



পাশাপাশি

ম্যানিক
বন্দ্যোপাধ্যায়

পাশাপাশি প্রথম সংস্করণের প্রচ্ছদচিত্র

লোকে বলে, বসকষ নেই, ভোঁতা মানুষ।

বাড়ির লোক আরও বাড়িয়ে বলে, দয়ামায়া নেই, হৃদযহীন নিষ্ঠুর মানুষ।

কেনই বা বলবে না লোকে, ঘরের এবং বাহিরের।

বয়স ত্রিশ পেরিয়েছে, স্বাস্থ্য ভালো, চেহারা ভালো, চাকরি করে ছাঁকা তিনশো টাকা মোটা বেতনের। ঘরে ঘরে যখন বেকার, তখন তার এমন চাকরি ! এ রকম একটা চাকরি বাগিয়ে কত কিছু করার প্র্যান আঁটে জোয়ান ছেলেবা, স্বপ্ন আর কল্পনা দিয়ে ! চাকরি বাগিয়েও সে কিছুই চায় না। অথচ একটা অদ্ভুত নিবৃত্তজ্ঞ যান্ত্রিক জীবনযাপন করে চলেছে। তার যেন কোনো শখ নেই আবেগ নেই উত্তাপ নেই।

বউ চায় না, নেশা করে না, সিনেমা দেখে না, জুয়া খেলে না। মেয়েদের সাথে মেলামেশা, বন্ধুর সাথে মজার কথা রসের কথা কেচ্ছার কথা, কোনো কিছুতে বুচি নেই। কাউকে স্নেহমায়া দেয়ও না, নিজের জন্য চায়ও না।

অথচ গোমড়া মুখেও দিন কাটায় না, ব্যথাবেদনা বিষন্নতার আমেজ মেলে না তার কাছে। তাহলেও অন্তত অনুমান করা যেত সকলের অজ্ঞাতে হয়তো জীবনে তার কিছু একটা ঘটেছে, মনটা কোনো কাবণে বিগড়ে গেছে অথবা হয়তো ভেঙেই গেছে।

ও বকম মানুষ কি আর সংসারে নেই ?

জীবনে বিতৃষ্ণা এসে গেছে, বিষিয়ে তেতো হয়ে গেছে কামনা বাসনা, গভীর হতাশা নিয়ে জীবনের ইইহুমোড় এড়িয়ে হাঙ্গামা থেকে গা বাঁচিয়ে কোনো বকমে দিন গুজরান করা, দাঁড়িয়ে গেছে তার কাছে জীবনের মানে—এ রকম বৈরাগ্যের একটা মানে বোঝা যায়।

এ মানুষটা একেবারেই ও রকম নয়।

বৈবাগ্যেব ধার ধারে না।

সাধারণভাবে লোকের সঙ্গে মেলামেশা হাসিগল্প বজায় আছে ঠিকই। রোয়াকের বৈঠকে নগদ নগদ উত্তেজক সংবাদ ও সমস্যা নিয়ে গলাবাজির সময় হাজির থাকলে তার গলা না চড়লেও সে চুপ করে থাকে না।

রাত্রে দিব্যি ঘুমায়। পেট ভরে খায়। সংসারের খুঁটিনাটি সব বিষয়ে নজর রাখে।

কঠোর নিয়মে সংসার চালায়।

বাপ-মা ভাইবোনের সংসার।

নিয়মমতো আপিস করে, সন্ধ্যার পর বাড়তি খেটে বাড়তি রোজগার করে, বই পড়ে, কাগজ পড়ে।

কিন্তু জীবনটা রসালো করার জন্য, জীবনে রং ও বৈচিত্র্য আনার জন্য কিছুই করে না।

নির্দোষ ভাসপাশা খেলায় পর্যন্ত তার মন বসে না।

বিয়ের কথা বললে হেসে উড়িয়ে দেয়।

হাসে সতাই কিন্তু এমন এক কঠোর দৃঢ়তার সঙ্গে কথাটা উড়িয়ে দেয় যে পীড়াপীড়ি করার সাহস হয় না বাড়ির লোকের।

কল্পনা মুখ বাঁকিয়ে বলে, বিয়ে করবে কী ! বউ তো আর পুতুলটির মতো উঠবে বসবে না, আমরা যেমন করি। বউয়ের চেয়ে কর্তালি ভালো লাগে দাদার।

আলপনা বলে, ভালো লাগে না ছাই ! দাদার ভালো লাগালাগিই নেই। কর্তালি করতে হবে তাই কলের মতো করে ! দাদার বুকটা পাথর দিয়ে গড়া।

পিঠাপিঠি দুটি বোন। বিয়ের বয়স পেরিয়ে গেছে দুজনেরই। আজকালকার বিয়ের বয়স। দাদার সম্পর্কে তাদের সমালোচনার মূল কথাটি সম্পর্কে সকলেই একমত। সুনীল যে বিয়ে করে না তার অন্য কোনো কারণ নেই, তার ধাতটাই একমাত্র কারণ।

মানুষটাই সে ওই রকম !

স্নেহমায়া প্রেমভালোবাসা তেতো নয় তার কাছে, সে কোনো স্বাদই পায় না ও সব ঘরোয়া হৃদয়গত ভাবের কারবারে, আদানপ্রদান দেনাপাওনায়। ঘরসংসারে তার বিতৃষ্ণা নেই, বোগশোক দুঃখযাতনা-ভরা জীবনের উপর মনটাও তার বিষিয়ে যায়নি—তাহলে তো বৈরাগ্য আসত !

ওর হৃদয়টাই ভোঁতা, অনুভূতির বালাই নেই। অনুরাগের তাপেও গলে না, বিরাগের হিমেও জমে না।

সংসার চলে সুনীলের আয়ে।

ভূপেশ পেনশন পায় মোটে পঞ্চাশ টাকা।

সংসারে তাই সুনীলের কথার ওপরে আর কথা নেই। কিন্তু সে হস্তিত্ব করে না বা কড়া শাসনে সকলকে দাবিয়েও রাখে না। ভূপেশ বরং দিনে দশবার রাগে আর চোঁচামেচি করে।

তবু সকলে নিষ্ঠুর ভাবে সুনীলকেই !

তার সংসার চালাবার হৃদয়বর্জিত নীতিটার জন্য। এ নীতিতে প্রয়োজনের আপেক্ষিক ওজন ছাড়া কোনো হিসাব নেই, কারও এতটুকু আলগা শখ বা আবদার প্রশ্রয় পায় না।

প্রাণপণে লাগাম টেনে খরচ করার প্রয়োজনটা সবাই বোঝে বইকী। দুটি বোন একটি ভাই কলেজে, আর দুটি ভাই একটি বোন স্কুলে পড়ে—কঠোর হিসাব ছাড়া এত বড়ো সংসার কি এই আয়ে চলে ? কিন্তু এ কেমন হিসাব সুনীলের ! সব রকম বিলাসিতা নয় বাদ গেল, একদিন পরে একবেলা এক টুকরো মাছ খাওয়া থেকে রোজের এক সেব দুধ মেপে মেপে কে কতটুকু খাবে, আর কে এক ফোঁটাও খাবে না সে নিয়ম পর্যন্ত সব কিছু মেনে নেওয়া গেল, কিন্তু সামান্য পয়সায় মেটানো যায়, এমন দুটো-একটা তুচ্ছ সাধও কেন বাতিল হয়ে যাবে ? সুনীল কেন ভুলেও একদিন অল্প দামের একটি উপহার এনে কারও মুখে হাসি ফোটাতে না ? ছোটো বোনটিকে দুটো পুতুল কিনে দিলেই কি অচল হয়ে যাবে সংসার ? ভূপেশ তো সামান্য হাতখরচের টাকা থেকে মেয়েকে পুতুল কিনে না দিয়ে পারে না !

এবং তাতে সংসারের অনটন বেড়েও যায় না।

তবু হয়তো একটু কম চদয়হীন ভাবা যেত তাকে, বড়ো মা-বাবা আর ভাইবোনদের তুচ্ছতম সাধ-আত্মদও মেটাতে পারে না বলে একটু যদি লান দেখাত তার মুখ, একটু যদি সে আপশোষ করত। সে যেন গ্রাহ্যও করে না !

বাধ্য হয়ে কঠোর হওয়ার জন্য এতটুকু মন খারাপ করার বালাই তার নেই !

কল্পনার একটি শাড়ি না হলেই নয়।

কলেজে পরে যাবার কাপড় নেই। ও বাড়ির মায়ার পরনের শাড়িখানা দেখে হঠাৎ কী অদম্য সাধই যে জাগল কল্পনার—যে, সেও ওই রকম শাড়ি পরবে।

না পেলে বুক ফেটে মরে যাবে।

ওখানার দাম ষোলো টাকা। সুনীল তাকে তেরো টাকার একখানা কাপড় কিনে দেবে।

মা বলে, তিনটে টাকার মামলা তো, দে কিনে !

সুনীল মাথা নাড়ে।

এ মাথা নাড়ার মানে জানে কল্পনা। অনেকদিন পরে দাদার কাছে সে কেঁদে ফেলে বলে, তেরো টাকা ষোলো টাকা এত তফাত তোমার কাছে ?

অনেক তফাত।

তবে আরও কম দামের কিনে দাও।

ঘরে পরবার হলে তাই দিতাম। কলেজ যাবি না এ কাপড় পরে ? এর চেয়ে কম দামের কাপড় পরিয়ে তোমায় কলেজে পাঠিয়ে লাভ নেই, অন্য মেয়েদের দিকে তাকাবে আর পড়াশোনা মাটি করবে।

তাই যদি বলো তবে আর তিনটে টাকা দিয়ে ওটা কিনে দাও—খুশি মনে ভালো করে পড়াশোনা করব।

না। তোমার এ দুর্বলতাকেও প্রশ্রয় দিতে পারব না।

মালানা বোনের পক্ষ নিয়ে বলে, কী বলছ তুমি ? তেরো টাকাবটা পরলে দুর্বলতা হবে না, ষোলো টাকারটা পরলেই হবে ?

সুনীল বলে, হবে না ? তেরো টাকারটা কিনে দিচ্ছি বাধ্য হয়ে, কলেজে পড়াতে হলে না দিয়ে উপায় নেই। অন্য মেয়েরা ভালো শাড়ি পরে আসবে, সে জন্য ওকে দায়ি করা যাবে না। সম্ভা শাড়ি পরে যাবার মতো মনের জোর ওর নেই—কিন্তু সেটা দুর্বলতা নয়। তেরো টাকায় যেখানে চলে সেখানে শবেব জন্য ষোলো টাকা লাগানোটা দুর্বলতা।

বাবা তোমার কী হিসেব !

হিসেব করি বলেই কলেজে পড়তে পাবছ। মিছে আবদার করিসনে কল্পনা—ষোলো টাকা কেন সাড়ে তেরো টাকা হলেও আমি ও কাপড়টা তোমায় কিনে দিতাম না।

কিন্তু এবার ছাড়ে না কল্পনা। সেও তো সুনীলেরই বোন। না খেয়ে শুয়ে থেকে ভূপেশের কাছে তিনটি টাকা আদায় করে সুনীলের কেনা কাপড় বদলে সাধের কাপড়টি কিনে আনে।

সুনীল রাগে না, কিছু বলে না। ফিবেও তাকায় না।

মা তবু মিনতি করে বলে, যেতে দে, কিছু বলিস না ওকে। ছেলেমানুষ তো !

সুনীল গম্ভীর হয়ে বলে, আমার কী বলাব আছে ? নিজে চেষ্টা করে টাকা জোগাড় করেছে, আমি তো বাড়তি টাকা দিইনি।

সামান্য ব্যাপারে বাপের উপরেও চটতে নেই কিন্তু।

চটব কেন ? মেয়েকে তিনটে টাকা দেবার স্বাধীনতা বাবার নেই ?

কল্পনা কান পেতে শোনে।

শখের শাড়িটা বাগানোর আনন্দ যেন বড়ো তাড়াতাড়ি উপে যাচ্ছিল। উদাসীন নির্বিকার হয়ে না থেকে একটু যদি রাগ করত দাদা, একটু যদি দেখাত যে ছোটো বোন কথা না শোনায় তার মনে আঘাত লেগেছে !

শাড়িটা কিনে অপরাধ করেছে এই অনুভূতিটাই জোরালো হচ্ছিল কল্পনার।

মা আর দাদার আলাপ শুনে তখনও যেটুকু আনন্দ অবশিষ্ট ছিল তাও উপে যায় কল্পনার।

সুনীল আপিস থেকে ফিরলে ভ্রান মুখে কাছে গিয়ে বলে, দাদা, রাগ কোরো না, এবারের মতো মাপ করো।

সুনীল বলে, রাগ করব কেন ? নিজের চেষ্টায় নিজের সাধ মিটিয়েছিস, আমার রাগ করার কী আছে ? আমাকে জ্বালাতন করলে রাগ করতাম।

কল্পনা তার মুখের দিকে চেয়ে ভাবে, দাদার বুকটা কি পাথর দিয়ে গড়া ?

সন্ধ্যার পর মায়াদের বাড়ির স্কুলে শর্টহ্যান্ড ও টাইপরাইটিং শেখাতে গেলে বলে, কল্পনার কাছে শাড়ির ব্যাপার শুনলাম। সত্যি, কী করে পারেন আপনি ?

না পেরে উপায় নেই তাই পারি।

মায়া একটু সংশয়ভরে তাকায়। বলে, তিনটে টাকায় কী আসত যেত ? আপনি নাকি খুকুকে পুতুল পর্যন্ত কিনে দেন না ! ছোট্ট বোনটিকে পুতুল দিলে ফতুর হবেন ?

মায়া কখনও এভাবে তার সঙ্গে কথা বলে না, তার কাজের মানে বোঝার চেষ্টা করার বদলে এ যেন একেবারে সমালোচনা করে বসে !

সুনীল তাই একটু আশ্চর্য হয়ে যায়। মায়া সাধারণত মোটামুটি বুঝতে পারে তাব কাজের মানে।

সুনীল বলে, অনেকদিন ধরে কল্পনা অনেক রকম আবদার কবেছিল। চাকরি পাওয়ার গোড়ার দিকে প্রত্যেক দিন অন্তত দশটা আবদার করত। আজকাল আর বড়ো একটা কেউ চায় না আমার কাছে। খুকুকে পুতুল দিলে কী হত জানেন ? কল্পনাকে তেরোর বদলে ষোলো টাকার কাপড় দিলে ? আবার সবাই এটা দাও ওটা দাও শুরু করে দিত। একটা মেটালে দশটা মেটাতে পারব না, সে আশা জাগিয়ে লাভ কী।

সে তো বুঝলাম, কিন্তু পারেন কী করে তাই ভাবি !

আপনি পারছেন কী করে ? আপনার মা তো আজও কাঁদাকাটা করেন !

এটা অন্য জিনিস। বিয়ে করব না নিয়ে একটা বড়ো লড়াই হয়ে গেছে, মা-বাবা মেনে নিয়েছে, চুকে গেছে। মা মাঝে মাঝে একটু শখের কান্না কাঁদে। কিন্তু এ সব টুকটাকি ব্যাপারে শক্ত থাকা—আচ্ছা, আদুরে বোনটি পুতুল চাইলে না দিয়ে আপনার কষ্ট হয় না ?

সুনীল ধীরভাবে বলে, কী জানি, টের পাই না। বোনটি সবার আদুরে কিন্তু আমার আদুরে নয় বলে বোধ হয়। আদর করতে ইচ্ছা হয় না।

মায়া চেয়ে থাকে।

সুনীল একটু হেসে জিজ্ঞাসা করে, কী ভাবছেন ? আমি কী ভীষণ মানুষ ?

মায়া সায় দিয়ে বলে, সত্যি তাই ভাবছি। আপনি সত্যি ভীষণ মানুষ, না আপনার মনের জোরটা ভীষণ ?

মনের জোরে নিজেকে কন্ট্রোল করতে হয় না। বাড়ির লোকের ন্যাকামি ভালো লাগে না, করব কী !

তবে ওদের জন্য এত খাটছেন কেন ? সারাদিন আপিস করে ফের এখানে খাটতে আসেন, সে তো ওদেরই জন্য ?

সুনীল একটু হাসে।

এ কথা আমিও ভেবেছি। নিজেই জানি না, আপনাকে কী জবাব দেব বলুন ? তবে আমার মনে হয়, একটা কিছু তো করতে হবে মানুষকে, তাই ওদের জন্য খাটছি। আপনি যেমন বিয়ে না করে পাঁচটা কাজ নিয়ে আছেন।

মায়া বলে, ঠিক হল না। আমি স্বাধীন জীবন ভালোবাসি তাই বিয়ে করতে চাই না—এটা আমার নিজের বুচি, নিজের সুখশান্তির হিসাব। আপনার সব হিসাব তো শুধু বাড়ির লোকের সুখের জন্য !

সুনীল বলে, তাহলে আপনি যেমন স্বাধীন জীবন ভালোবাসেন, আমিও তেমনই বাড়িতে কর্তালি করতে ভালোবাসি। ওরাও তাই বলে। বউ কর্তালি মানবে না বলেই নাকি আমি বিয়ে করি না।

তারা দুজনেই ভাবে, সত্যি কী তাই ? না আর কোনো মানে আছে তাদের এ রকম জীবন-যাপনের ?

মায়া ভাবে, বিয়ের নামে না হয় তার বিতৃষ্ণা কিন্তু এমন একটা পুরুষ কি জগতে নেই যার জন্য প্রাণটা তার একটু উতলা হয় ? চব্বিশ-পঁচিশ বছর বয়স হল, আজও হৃদয়টা যেন ঠান্ডা বরফ হয়ে আছে ! অন্যদিকে না হোক, বাড়ির মানুষ বাইরের মানুষের হাসিকান্নায় তার হাসি পাক কান্না আসুক, শাড়ি পরতে সিনেমা দেখতে বেড়াতে ভালোবাসুক, আরাম-বিলাস পছন্দ করুক—ওই দিক দিয়ে তার হৃদয়টাও কি সুনীলের মতো ভোঁতা ?

সুনীলের সঙ্গেই তো কতকালের পরিচয়, সকলের চেয়ে বেশি ঘনিষ্ঠতা। এমন সহজভাবে প্রাণ খুলে কথা তো আর কারও সঙ্গে বলতে পারে না। অথচ এই সুনীলকে পর্যন্ত ঘনিষ্ঠ বন্ধুর বেশি আর কিছু ভাববার চেষ্টা করলে মোটেই জমে না ভাবনাটা, একটু রোমাঞ্চও হয় না !

একটা আতঙ্ক বোধ করে মায়া। একটা দুর্বোধ্য কষ্ট অনুভব করে।

সুনীল নিজের ঘরে বসে ভাবে। রাত্রে খাওয়া শেষ হয়নি, সংসারের কলরব কানে ভেসে আসে। সত্যি, এটা কার সংসার ? কেন সে এই সংসার নিয়ে মেতে আছে, আয় বাড়াবার জন্য সকালে আরেকটা টিউশনি খুঁজছে ?

অথচ ভালোবাসা তো টের পায় না বাড়ির মানুষগুলির জন্য। সে কি সত্যি সৃষ্টিছাড়া মানুষ, রক্তমাংসের তৈরি নিছক একটা যন্ত্র ?

এমনি একটা বাঁকা যন্ত্র যে তার দেহটার নিয়মমতো শুধু ভাতের খিদে পায় অন্য কোনো খিদে পায় না ?

একমাত্র মায়া ছাড়া কোনো মেয়ের সঙ্গে মিলতে মিশতে পর্যন্ত ভালো লাগে না। কল্পনা আলপনার বন্ধুরা আসে, চেনা পরিবারের মেয়েরা আসে, কেউ কেউ ভাব করার চেষ্টাও করে তার সঙ্গে। ভাব কিন্তু হয় না কারও সঙ্গেই। বিবাহিতা বয়স্কা মেয়েদের সঙ্গে তবু দুদণ্ড সহ্য হয়, কমবয়সি মেয়েদের সম্পর্কে কেমন যেন একটা বিতৃষ্ণা বোধ করে।

মায়ার সঙ্গে পর্যন্ত তার শুল্ক নীরস বন্ধুত্বের সম্পর্ক—বোধ হয় ওই জন্যই সম্পর্ক। মায়ার মেয়েলি ভাব এত কম না হলে, ন্যাকামি আর আবেগরহিত না হলে, মেলামেশায় ভাবুকতা আমদানি করতে চাইলে, ওকেও হয়তো সে সহিতে পারত না !

এ কি বিকার ? কোনো মানসিক রোগ ?

প্রশ্ন জাগে।

মায়ার মতো অজানা আতঙ্ক কিন্তু বোধ করে না সুনীল।

দরজায় দাঁড়িয়ে রেবা বলে, আসব ?

পাড়ায় মাস তিনেক হয় বসাকদের বাড়ির একতলায় নতুন ভাড়াটে এসেছে সুধীরবাবু, রেবা তার মেয়ে। তিন মাসেই কল্পনাদের সঙ্গে খুব ভাব জমিয়ে ফেলেছে, সুনীলের সঙ্গেও ভাব করার তার প্রবল ইচ্ছা। অন্য সকলের চেয়ে এ বিষয়ে তার অনেক বেশি অধ্যবসায় দেখা যায়। সুনীল আমল না দিলেও সে দমতে রাজি নয়।

সে যেন গায়েই মাখে না সুনীলের অবহেলা।

বোধ হয় খেলা করছে তাকে নিয়ে। ইয়ার্কি জুড়েছে ! কতবার তাকে যেতে বলেছে তাদের বাড়ি, সুধীর চার-পাঁচবার যেচে এসে তার সঙ্গে আলাপ করে গেছে, সে একবারও যায়নি।

তবু রাত নটার সময় আবার একক্লা এসে ঘরের দুয়ারে দাঁড়িয়ে রেবা হাসিমুখে বলছে, আসব ? দরজার কাছে এগিয়ে গিয়ে সুনীল গভীর মুখে বলে, কী খবর ?

রেবা তার পাশ কাটিয়ে ঘরে ঢুকে চেয়ারে বসে সানন্দে বলে, ভারী আনন্দের খবর। বাবাকে রাজি করিয়েছি। কাল টাইপরাইটিং শিখতে আপনার স্কুলে ভর্তি হয়ে যাব।

সুনীল উদাসভাবে বলে, বেশ তো !

গলা চড়িয়ে বলে, আলপনা, আমি এখন খাব, জায়গা কর।

রেবার সুন্দর চোখ দুটি প্রথমে রাগে কলসে উঠে পরক্ষণে আবার সজল হয়ে আসে।

আজ সত্যি অপমান হলাম। কিন্তু কী ব্যাপার বলুন তো ? ঠিক যেন শত্রু এসেছি এ রকম করেন কেন আমার সঙ্গে ? আমি তো কিছুই করিনি আপনার ?

কী জানেন—

কিন্তু কে তখন তার কথা শোনে। রেবা উঠে দাঁড়িয়েছে, জল শুকিয়ে আবার বিদ্যুৎ ঝিলিক দিচ্ছে তার চোখে।

তীব্র ঝাঁঝের সঙ্গে সে বলে, কতবার বলেছি, আপনি আমার দাদার মতো, আমায় আপনি বলবেন না। তুমি আর মুখে এল না আপনার ! বেশ তো, সেটা বুঝলাম। আপনি ঘনিষ্ঠ হতে চান না, আমায় পছন্দ করেন না। সেটা একশোবাব হতে পারে। কিন্তু কী অপবাধটা আমি করেছি যে সাধারণ ভদ্রতাটুকুও বজায় রাখতে পারেন না ? ভদ্রলোকে তাই করে থাকে। যাকে ভালো লাগে না তার সঙ্গে ওই ভদ্রতার সম্পর্কটুকুই বজায় রাখা হয়।

কল্পনা এসে দাঁড়িয়েছিল।

কিন্তু তার সঙ্গে রেবা কথা বলে না। চলে যেতে যেতে মুখ ফিরিয়ে রেবা আরেকটু ঝাল ঝেড়ে যায়। বলে, আগেও এ রকম অভদ্রতা করেছেন, আমি গায়ে মাখিনি। ভেবেছি, অন্য কারণ আছে, আপনার হয়তো মন খারাপ, বিনা কারণে কেউ এ রকম অসভ্যতা করে ? আপনি কি পাগল ?

মা জিজ্ঞাসা করে, রেবা অত চটল কেন রে ?

সুনীল বলে, খালি ঘরে বসতে বলিনি, তাই অপমান হয়েছে। মেয়েটার কী বুদ্ধি। এত রাতে ফাঁকা ঘরে গল্প করতে গিয়েছে।

মা বলে, তাতে কী হয়েছে ? সন্ধ্যা রাত, আশপাশে আমরা এতগুলি লোক রয়েছে, দুদণ্ড কথা বলতে গেলে কী হয় ? ও সে রকম মেয়ে নয়, ওটুকু বুদ্ধি-বিবেচনা আছে। ভদ্রলোকের মেয়ে কথা কইতে ঘরে গেছে বলে অপমান করে তাড়িয়ে দিল !

মার ভর্ৎসনাতোও বড়ো ঝাঁঝ ফোটে আজ !

অনেক রাত্রি পর্যন্ত সেদিন ঘুম আসে না। মেয়েদের সম্পর্কে সত্যি কি তার বিকারের আতঙ্ক আছে ? এই দুর্বোধ্য আতঙ্কের চাপটা বেড়ে গিয়ে তাকে সাধারণ ভদ্রতা পর্যন্ত ভুলিয়ে দেয় ?

কোনো সংগত যুক্তি সত্যি খাড়া করা যায় না রেবাকে অপমান করার পক্ষে। স্বেচ্ছায় বিচার-বিবেচনা করে যদি সে এটা করত, নারীকে নরকের দ্বার ভেবে করত, তাহলেও একটা মানে থাকত তার কাজের। এমন কিছু রেবা সত্যি করেনি যাতে তার রাগ বা বিতৃষ্ণা জাগা উচিত ছিল। তার গায়ে ঢলেও পড়েনি, তার সঙ্গে ছাবলামিও জুড়ে দেয়নি। আর পাঁচজনের সঙ্গে যেভাবে মেলামেশা করে, তার সেকলে মা পর্যন্ত আজকাল যে রকম মেলামেশায় কোনো দোষ খুঁজে পান না, তার সঙ্গেও সেইভাবেই মিলতে মিশতে চেয়েছে রেবা, ভদ্রভাবে স্বাভাবিকভাবে।

এতই খারাপ লাগল সেটা তার যে ওকে অভদ্রের মতো, অসভ্যের মতো, অপমান না করে পারল না ? এ তো তারই অসংযম !

পাগল না হোক, সে নিশ্চয় ভয়ানকভাবে বিকারগ্রস্ত। সে নিশ্চয় কঠিন মানসিক রোগে ভুগছে।
জীবন সম্পর্কে তার সব ধারণা ভুল। হিসাবনিকাশ ভুল। লোকে ঠিক কথাই বলে, সকলের হৃদয় আছে, শুধু তার হৃদয় নেই, সে অস্বাভাবিক।

অত্যন্ত ভীৰু স্কীণ একটা আওয়াজ যেন কানে আসে। প্রথমটা ধরতেই পারে না সুনীল। তারপর সচেতন হয়ে টের পায় খোলা জানালায় বাইবে দাঁড়িয়ে কল্পনা মৃদুস্বরে ডাকছে, দাদা !

সুনীল দরজা খোলে। বলে, কী হল ?

কল্পনা বলে, কেন মিছে ভাবছ ? অপমান করেছে বেশ কবেছ। তুমি তো ডেকে আনোনি, ও যেচে যেচে আসে কেন তোমার কাছে ?

তার ইচ্ছা অগ্রাহ্য করে কেঁদেকেটে ভূপেশের কাছে বাড়তি টাকা নিয়ে কল্পনা নিজের পছন্দসই কাপড়খানা কিনেছিল। রোজ যে দাদা রাত দশটা না বাজতে আলো নিবিয়ে শুয়ে ঘুমিয়ে পড়ে, সেই দাদা আজ আলো নিবিয়ে শুতে পাবছে না দেখে সেই কল্পনাই মরিয়া হয়ে উঠে এসেছে দাদাকে একটু স্নেহ জানাতে। হয়তো বা স্নেহ জানিয়ে ঘুম পাড়বার আশা নিয়েও !

সুনীল তাকে স্নেহ জানাবার সুযোগ দেয় না, সে জানিয়ে দেয় তার অনিদ্রার কারণ রেবা-সংক্রান্ত ঘটনা নয়, সংসারের চিন্তা।

আমি খরচের হিসেব করছিলাম। খরচ বেড়ে যাচ্ছে। সামনের অদ্বানে তোর যে বিয়ে দেব, টাকার ব্যবস্থা কী হবে ?

কল্পনা স্তব্ধ হয়ে থাকে। মুখ কালো করে থাকে।

খরচ তোর কমাতে দিবি না। আর বোধ হয় কমানোও যায় না খরচ। তাহলে অন্যভাবে বস্তিতে গিয়ে বাঁচার ব্যবস্থা করতে হয়। তার চেয়ে আমি ভাবছি কাল থেকে সকালে একটা টিউশনি করব। দুটো অফার পেয়েছি, কোনটা নেব ভাবছিলাম।

কল্পনার মুখ একটু হাঁ হয়ে গেছে দেখা যায়।

সুনীল হঠাৎ জিজ্ঞাসা করে, আমার শরীরটা খারাপ হয়েছে নাকি রে ? ঠিক মতো খাচ্ছি তো ?

কল্পনা হঠাৎ যেন তার কথাব জবাবেই কেঁদে ফেলে। কিন্তু এ তো তারও জানা কথাই যে সুনীলের কাছে এ সব কল্পনার মানে আছে, কিন্তু বিশেষ কোনো দাম নেই।

তাই প্রাণপণে কান্না চেপে, দু-একবার গলা ঝেড়ে সে স্পষ্ট ভাষায় বলে, দাদা, কাল থেকে তুমি যদি আমায় জুতো মারো লাথি মারো, আমি জানব আমার কোনো রোগ সারাতে জুতো মেরেছ লাথি মেরেছ। তুমি আমার ভার বইছ, আমি তোমার ঘাড়ে চেপে রয়েছি, এটুকুও খেয়াল হয়নি অ্যাডিন !

কল্পনা চলে গেলে রেবার চিন্তাকে সে আর প্রশ্ন দেয় না।

কদিন আগে আপিসের চেনা লোকের কাছ থেকে যৌন বিষয়ে সাধারণের জন্য লেখা একখানা বই এনেছিল—বড়ো একজন বৈজ্ঞানিকের লেখা বই। কদিন পড়বার সময় হয়নি। বিজ্ঞানের কথা, পড়তে ভালোই লাগে। অনেক অজানা কথা, আশ্চর্য অদ্ভুত কথা জানতে পারে, কিন্তু তার নিজের সমস্যার কোনো হিন্দস পায় না।

তবে পড়তে পড়তে এক সময় ঘুম এসে যায়।

সকালে সুনীল টিউশনির সন্ধানে যায়।

দুজায়গায় যাবে। প্রথম বাড়িটি বেশি দূরে নয়, মিনিট পাঁচেকের পথ। চেনা লোকের মুখে জেনেছিল ওদের মাস্টার চাই। দ্বিতীয় বাড়িটি কিছু দূরে, খবরের কাগজে বিজ্ঞাপন দেখে দরখাস্ত বেড়েছিল।

তারা দেখা করতে লিখেছে।

উচ্চ না হলেও যাদব পদস্থ চাকুরে। পরিচয় না থাকলেও পথে-বাজারে-বাসে অনেকবার দেখা হয়েছে, মুখচেনা দুজনেরই।

সুনীল বলে, বিপিনবাবুর কাছে শুনছিলাম আপনাদের একজন মাস্টার দরকার।

প্রৌঢ় যাদব অমায়িকভাবে বলে, হ্যাঁ, বিপিনবাবু তোমার কথা বলেছেন। এসো বোসো। উমা, এক কাপ চা এনো তো।

আমি চা খাই না।

বারো-তেরো বছরের একটি ছেলে পড়ছিল, পড়ার টেবিলের অন্যপাশে বসেছিল রেবার বয়সি উমা। রেবার চেয়েও সুশ্রী আর একটু ঢ্যাঙা। সুনীলের সঙ্গে চমৎকার মানায়।

উমা খুশি হয়ে বলে, চা খান না তো ? বেশ করেন। দেখলে তো বাবা, ওঁর কাছে শেখো, ঘন্টায় ঘন্টায় চা খাওয়া কমাও, পেট ভালো থাকবে।

যাদব হাসে।—বেশ তো, শেখা যাবে। এখন কাজের কথা বলি। আমার মেয়েই ওকে অ্যাডমিন পড়াচ্ছিল, নিজে ম্যাট্রিক পর্যন্ত পড়েছে। এখন আর পেরে উঠছে না, তাই একজন লোক রাখব। এই বাজারে আরেকটা খরচ বাড়ল—কী আর করা যায় ! সকালে এক ঘন্টা পড়াবে, আমি—সুনীলের মুখের দিকে চেয়ে খানিক ইতস্তত করে হঠাৎ যেন মরিয়া হয়েই বলে ফেলে,—আমি ত্রিশ টাকাই দেব।

উমা সাগ্রহে বলে, কাল-পরশুই আরম্ভ করুন। বেচারার বড়ো অসুবিধা হচ্ছে।

দ্বিতীয়টি বাগানওলা বাড়ি। দেখেই বোঝা যায় মালিক পয়সাওলা লোক। গেটে দারোয়ান ছিল, খবর পাঠিয়ে হুকুম আনিয়ে ভেতরে ঢুকতে হয়।

মোটাসোটা ফরসা সুন্দরী এবং সুসজ্জিতা একটি মেয়ে বলে, বসুন। এত সকালেই আপনারা আসতে আরম্ভ করলেন !

আপিস যেতে হবে।

সুনীলের নাম শুনে এক বাড়িল দরখাস্ত থেকে তারটি বেছে নিয়ে সে বলে, আমিই বিজ্ঞাপন দিয়েছিলাম, আমার নাম নন্দা দেবী। এই যে আপনি লিখেছেন, আপনি আনম্যারেড কিন্তু বড়ো একটা ফ্যামিলি চালান, এটা আরেকটু খুলে বলুন তো ?

সব শুনে নন্দা বলে, এক ঘন্টা পড়াবেন, আমরা পঁচিশ টাকা দেব। এক কাপ চা আর বিস্কুট বা টোস্ট—

আমি চা খাই না।

নন্দা আশ্চর্য হয়ে বলে, সে কী ? সবাই চা খায়, আপনি খান না কী রকম ?

এক কাপ দুধ পাই না, চা খাব কেন ? একটু দুধ যে পায় না তার চা খাওয়া উচিত নয়। বড়ো খারাপ নেশা দাঁড়ায়। ভাতের খিদে চা খেয়ে মটানো যায়, তাই না এত আদর।

নন্দা একটু ভেবে প্রশ্ন করে, আপনি কি তাহলে আসবেন কাল থেকে ?

অর্থাৎ তাকে পছন্দ হয়েছে। সুনীলকে একটু ভাবতে হয়।

যাদবের বাড়ি কাছে, বেতন পাঁচ টাকা বেশি। এখানে অনেকটা পথ হেঁটে আসতে হবে, নয় বাসের পয়সা যাবে। তবু ভেতর থেকে জোরালো তাগিদ আসে, এই কাজটাই ভালো, এটা নিয়ে নাও !

সুনীল বলে, তাই আসব। মাইনেটা ত্রিশ কবতে পারেন না ?

এখন পারছি না। পড়ান, পরে বিবেচনা করব।

সুনীল ভাবে, পরে মানে তো আট-ন মাস পরে, তার ছাত্র পরীক্ষায় কেমন ফল করে তাই দেখে !

সুনীল জিজ্ঞাসা করে, বিজ্ঞাপনে ছিল ম্যাট্রিক স্ট্যান্ডার্ডের ইংরেজি পড়াতে হবে, ছেলেরা
অ্যাকচুয়েলি কোন ক্লাসে পড়ে ?

ছেলে নয়, মেয়ে। স্কুলে পড়ে না।

তা হলে ছাত্রীটিকে একটু দেখতে হবে। আপনাকে খোলাখুলি বলি, পড়ানোর খাটুনি অনেকটা
ছাত্রছাত্রীর উপর নির্ভর করে। একজনকে সহজে পড়ানো যায়, আরেকজনের পিছনে গাধার মতো
খাটতে হয়। সেটা না জেনে পঁচিশ টাকায়—কথাটা বুঝেছেন আমাব ?

বুঝেছি বইকী। ছাত্রী আপনাব সামনেই বসে আছে।

সুনীল কিছুমাত্র আশ্চর্য হয় না দেখেই যেন নন্দা একটু আশ্চর্য হয়ে যায়।

সুনীল বলে, আপনি পড়বেন ? প্রাইভেট পরীক্ষা কোন বছর দিতে চান ?

নন্দা বলে, পরীক্ষা আমি দিতে চাই না—আমি শুধু ইংরেজি শিখতে চাই। আপনাকে খুলেই
বলি, আমার বাবার একটি ইংরেজি কাগজ আছে—দি পিপলস্ ভয়েস।

সুনীল বলে, আপনি শটীনবাবুর মেয়ে ?

সাবাদে আপনি চেনেন ?

চিনি না, নাম শুনেছি।

নন্দা বলে, আমি ক্লাস টেন পর্যন্ত পড়েছিলাম, তারপর নানাকারণে পড়া বন্ধ হয়ে যায়। আমি
এখন ভালো করে ইংরেজি শিখে আমাদের কাগজে নিজে কাজ করতে চাই। আমি নিজে প্রাণপণ
খাটব, আপনি আমাকে যত তাড়াতাড়ি পারেন এগিয়ে নিয়ে যাবেন।

নন্দা একটু থেমে বলে, আমি যেমন এগিয়ে যাব আপনার মাইনেও তেমন বেড়ে যাবে। পঁচিশ
টাকায় অবশ্য আমি বি এ স্ট্যান্ডার্ডের বই পড়াতে বলব না।

সুনীল খানিক চুপ কবে থেকে বলে, পড়াতে আমার আপত্তি নেই কিন্তু একটা কথা আপনাকে
বলে রাখা উচিত। শুধু ইংরেজি সাহিত্য শিখলে ভালো শেখা হবে না।

কেন ?

কারণটা হল এই যে, প্রত্যেক ভাষায় শব্দ পদ এ সবেব নিহিত মানে থাকে, বিশেষ প্রয়োগ
থাকে, শুধু ইংরেজি গ্রামার আব সাহিত্য পড়ে আপনি সেগুলি ধরতে পারবেন না। কলেজে
ইংরেজিতে আরও কয়েকটা বিষয়ে পড়ানো হয় বলে এদিক দিয়ে অনেক সাহায্য হয়। এখনও
সাধারণ বি এ পাস ছেলে যতটা ইংরেজি জানছে, অন্য সাবজেক্টগুলি বাংলায় শেখানো শুরুর হলে
সেটুকুও জানবে না। কোনো ভাষা ভালো করে শিখতে হলে শুধু সাহিত্য পড়াই যথেষ্ট নয়। ইতিহাস,
ভূগোল, দর্শন বিজ্ঞান এ সব বইও পড়তে হয়।

বেশ বোঝা যায় তার কথা শুনে দমে যাবাব বদলে নন্দা খুশিই হয়েছে। কারণটা সুনীল সহজেই
অনুমান করতে পারে। বিদেশি ভাষা শেখার কাজটা সে খুব কঠিন প্রতিপন্ন করে দিয়েছে বটে কিন্তু
নন্দা বুঝতে পেরেছে যে, সে গৃহশিক্ষকটি পেয়েছে ভালোই। লোকটা বোঝে শোনে, এবং শেখাবার
কাজে ফাঁকি দেবে না।

নন্দা বলে, যেসব বই পড়া দরকার আমিও তা পড়ব। এক বিষয়ে আপনাকে নিশ্চিত করছি—
ইচ্ছা করলে আমি দিনরাত পড়াশোনা নিয়েই থাকতে পারব। আমার অন্য কোনো দায়িত্ব বা বিশেষ
কাজ নেই। স্কুলে কলেজে পড়তে চাই না এই জন্য যে বড়ো বেশি সময় লেগে যাবে। বি এ পাস
করতেই পাঁচ বছর ! আমি দুবছরে সব শিখে ফেলতে চাই।

সুনীল হাসিমুখে বলে, সব ?

নন্দাও হাসে, সব মানে কাগজে কাজ করার জন্য যতটা শেখা দরকার। পারব না ?

কেন পারবেন না ? তার আগেও কিছু কিছু সহজ কাজ আরম্ভ করে দিয়ে শিখে যাবেন। শেখার তো শেষ নেই।

নন্দা আচমকা একটা ব্যক্তিগত প্রশ্ন করে বসে, আচ্ছা আপনি বিশেষভাবে ইংরেজির দিকে ঝুকলেন কেন ? আপনি অবশ্য যে ইয়ারে পাস করেছেন দেশটা তখনও স্বাধীন হয়নি, তবু—

সুনীল বলে, দেশটা এখনও সত্যি স্বাধীন হয়নি। আমি বিশেষভাবে বিদেশি সাহিত্য পড়বার জন্য ইংরেজি নিয়েছিলাম।

চাকরি করে টিউশানি করে পড়ার সময় পান ?

বেশি সময় আর কোথায় পাই ?

সুনীল বিদায় নিতে উঠে দাঁড়ালে নন্দা আবার জিজ্ঞাসা করে, কাল থেকে আসছেন তো ? আসব।

কিন্তু কেন ?

কেন যাদবের বদলে নন্দাদের বাড়ির কম মাইনের বেশি অসুবিধার কাজটা নেওয়া ?

নিজেকে এই প্রশ্ন করে সুনীল। প্রশ্ন করতেই হবে, সোজা বাস্তব একটা হিসাব নাকচ করে দিলে তার মানে খুঁজতেই হবে।

মায়াও প্রশ্ন করে, কেন ? ওরা বড়োলোক, হয়তো কোনো সুবিধা করে দেবে, এই প্রত্যাশা করছেন ?

সুনীল বলে, বড়োলোক বলেই প্রত্যাশা কম করছি। কৃপণ মেয়ের বাবাকে চোখেও দেখলাম না, মেয়েই সব। হিসেবি পাকা মেয়ে।

মায়া একটু হাসে।—মেয়েটাকে পছন্দ হয়েছে বলে ?

সুনীলও হাসে।—ওরে বাবা ! ওই মেয়ে আমায় পাত্তা দেবে ? আপিসের বড়োবাবুর মতো পঁচিশ টাকার মেহনত আদায় করে ছাড়বে।

মায়া খানিকক্ষণ চেয়ে থাকে।

তাহলে ওই জনাই এ কাজটা নিয়েছেন। ওদিক দিয়ে কোনো ভয় নেই, আপনাকে পাত্তাও দেবে না !

সুনীল নির্বাক হয়ে চেয়ে থাকে।

মায়া আবার বলে, যাদববাবুর মেয়েব বেলা ভয় আছে, তার ওপর আবার বিয়ের যুগি মেয়ে, বয়সে চেহারায় আপনার সঙ্গে খাসা মানায় !

সুনীল নির্বোধের মতো চেয়েই থাকে।

মায়া হাসে না। তাকেও খুব বিচলিত মনে হয়। মৃদুস্বরে সে যেন নিজের মনেই বলে, এবার বুঝেছি আপনার ব্যাপারটা। আপনার হল ফাঁদের ভয়, আপনি ফাঁদ এড়িয়ে চলেন।

সুনীল এবার বলে, কিন্তু কেন ? এটা কী রোগ না বিকার ?

মায়া বলে, রোগবিকার কেন হবে ? আপনার ধাতটাই এ রকম।

তখনকার মতো মায়ার কথাটা খুব মনে লাগে। তার ধাতটাই এ রকম, সে অস্বাভাবিক নয়, বিকারগ্রস্ত নয়।

কিন্তু জিজ্ঞাসার জের কী এত সহজে মেটে এ জগতে ! ধীরে ধীরে আবার প্রশ্ন জাগে। কেন তার ধাত এ রকম কেন ?

ছেলে খোঁজা হচ্ছিল কল্লনার জন্য, লাগসই ছেলে জুটে গেলে তাকে সুনীল পার করে দেবে।

ভূপেশ বলে, টাকা ?

জোগাড় করব। .

জোগাড় মানে ধার ?

টাকার ভরসা দিয়েছে মায়া। বলেছে, আমার বিয়েব জন্য জমা ছিল। আপনার বোনের বিয়েতেই লাগুক। ব্যাংকে পড়ে থাকাও যা, আপনার কাছে থাকাও তাই। আপনি ব্যাংকের রেটেই সুদ দেবেন।

একটি বয়স্কা বোন বিদায় হবে, কলেজগামিনী বোন, কিন্তু ঘাড়ের বোঝা হালকা হবে না সুনীলের। শুধু আশা এই যে পরে একদিন বোঝা হালকা হবে, ধারটা যদি শোধ হয়ে যাবে। যতদূর সম্ভব চুলচেরা হিসেব কবে সুনীল বার করে কল্লনার জন্য সব মিলিয়ে মাসে কত খরচ হয় এবং সেই পরিমাণ টাকা ঋণশোধের জন্য কেটে নিলে কী দাঁড়ায়। যেমন চলছিল, তেমনি কি চলবে সংসার ?

মায়া হিসাব শুনে বলে, এত ব্যস্ত কেন ? আরও কম করে দিলেও চলবে। আমার তো তাগিদ নেই।

সুনীল বলে, না, টিলে দিয়ে লাভ নেই। বোন যেটুকু রেহাই দেবে অন্যেরা শুষে নেবে। তার চেয়ে ধাব শোধ হোক। এতেও কম দিন লাগবে না।

কল্লনা খুশি না অখুশি বোঝা যায় না। মুখ দেখলে মনে হয় সে মস্ত ধাঁধায় পড়ে গেছে।

সম্বন্ধ পাকা হবার দুদিন আগে সে বলে, জুতো মারলেও সইব বলেছিলাম—তার বদলে পড়াশোনা ছাড়িয়ে খেদিয়ে দিচ্ছ আমাকে ?

সুনীল বলে, এ রকম বাঁকাভাবে বিচাব করিস কেন ? পড়া বন্ধ করে কত মেয়ের বিয়ে হচ্ছে,—তাদের কি খেদিয়ে দেওয়া হয় ? কোনো মেয়ে একেবারে পড়া ছেড়ে দেয়, কোনো মেয়ে বিয়ের পরেও পড়ে। লেখাপড়ার দিকে তোর খুব বেশি ঝোঁক নেই—তুই ঘরসংসার করা ভালোবাসিস। তোর প্রকৃতি ওই রকম। ভালো বিয়ে হবে, এই জনাই বাবা তোকে পড়াচ্ছিলেন। তোকে বেশি পড়িয়ে আমাদের কী লাভ, তোরই বা কী লাভ ? শেষ পর্যন্ত তুই ওই ঘরসংসার নিয়েই সুখী হতে চাইবি। আলপনার বরং ঝোঁক আছে লেখাপড়া করে নিজে একদিন বড়ো হবে, কিছু করবে। নিজের মন হাতড়ে দ্যাখ—ও রকম সাধ কি তোর আছে ?

কিন্তু সুখী হতে পারব কি ?

সেটা কেউ বলতে পারে ? আমি সেই জনাই এমন ঘর এমন ছেলে খুঁজছিলাম বিয়ের পরেও পড়া চালিয়ে যেতে ইচ্ছে হলে তুই যাতে সে সুযোগ পাস।

ও !

বিয়ে হচ্ছে বলে তোকে কলেজ ছাড়ানো হবে না। কিছুদিন পরে তুই নিজেই পড়া ছাড়বি—তোর ভালো লাগবে না।

যথারীতি কল্পনার বিয়ে হল। বাড়িতে একজন অস্থায়ী লোক বাড়ল—জামাই প্রণব।

মোটামুটি ভালোই চাকরি করে, শাস্ত লাজুক প্রকৃতি। কিছুক্ষণ আলাপ কবাব পরেই টের পাওয়া যায় সে একটু কল্পনাবিলাসী এবং ভাবপ্রবণও বটে।

সুনীলের মতো নীরস কাঠখোঁট্টা মোটেই নয়।

সকলে তাই আশ্চর্য হয়ে যায় যে বোনের জন্য সুনীল এমন ছেলে পছন্দ করেছে যার মধ্যে আছে এ রকম গুণ, সে যা অত্যন্ত অপছন্দ করে।

মায়া জিজ্ঞাসা করে, এটা কীরকম ব্যাপার হল ? আপনি যেটা ন্যাকামি বলেন ওর মধ্যে সেটা তো বেশ খানিকটা আছে। তবু ওকে পছন্দ করলেন ?

সুনীল বলে, আমার বোনের মধ্যে ওই ন্যাকামি নেই ?

ও ! তাই বলুন।

অনেকে এটা হিসাব পর্যন্ত করে না। দুজনের প্রকৃতিতে খাপ খাবে কিনা এটা না দেখেই অন্য বিষয়ে খুঁটিয়ে খুঁটিয়ে বিবেচনা করে বিয়ে দিয়ে দেয়। ছেলেটি মেয়েটি দুজনেই সব দিক দিয়ে ভালো—কিন্তু দুজনের ধাত হয় দুরকম, মিশ খায় না, একজন অন্যজনকে সহিতে পারে না।

তা ঠিক ! এটা দেখা উচিত।

এটাও সুনীল হিসাবে ধরতে ভোলেনি যে বিয়ে দিলেই বোন একেবারে ঘাড় থেকে নামে না এবং জামাইয়ের পিছনেও খরচপত্র করতে হয়।

কিন্তু অভিজ্ঞতা না থাকায় সঠিক হিসাবটা ধরা যায়নি—আন্দাজে করতে হয়েছিল।

দেখা যায় বাড়ির মানুষ সতাই বেশ কিছুটা আরাম আশা করছিল। ছোটোভাই অনিলের বিদ্রোহে সেটার চরম প্রমাণ মেলে। ভূপেশের সঙ্গে একদিন অনিলের লড়াই বেধে যায় হাতখরচের টাকার জন্য। সকালবেলা সুনীল তখন সুবে নন্দাকে পড়িয়ে বাড়ি ফিরেছে।

ভূপেশের তিরস্কারের জবাবে অনিল গলা ফাটিয়ে চৈচায়, বেশ কবি সিগারেট খাই, সিনেমা দেখি। সবাই করে, আমি কেন করব না ? দাদা সেকলে একটা মেশিন বলে আমিও মেশিন হব ! বড়ো হয়েছি আমাব হাতখরচ দেবে না তোমরা, এ কী আবদার নাকি !

ভূপেশ তর্জনগর্জন করে।

সুনীল শুধু বলে, তোমায় তো হাতখরচ দেওয়া হয়।

ওতে হয় না।

তোমায় সঙ্গে নিয়ে বসে, তোমাকে জিজ্ঞেস করে খরচের হিসেব করেছিলাম।

অনিল গোমড়া মুখে বলে, তখন ছোটো ছিলাম।

সুনীল উদাসভাবে বলে, এক বছর আগে ছোটো ছিলে, এক বছরে বড়ো হয়ে গেছ ? বেশ, হাতখরচ বাড়াতে না বলেই চৈচাষেচি জুড়েছ কেন ?

চাইলে তো পাই না।

মিছে কথা বোলো না। আমার কাছে চাওনি। যা সত্যি দরকার, যা তোমার পাওয়া উচিত, খরচে কুলোলে পাবে না কেন ?

অনিল মরিয়া হয়ে বলে, আমার আজকেই তিনটে টাকা চাই।

সুনীল শাস্তভাবে বলে, চাই বললেই হয় না জানানো। কেন চাই বলতে হবে। সত্যি দরকার থাকলে দেব।

একজন বন্ধুকে সিনেমা দেখাব, নেমস্তম্ভ করেছি।

সুনীল মাথা নাড়ে, তাতে তিন টাকা লাগে না।

আমার একজন মেয়ে-বন্ধু।

মেয়েটির বাড়িতে জানে ?

জানে।

সুনীল তাকে তিনটি টাকা দেয়। ভূপেশ ক্ষুব্ধ চোখে চেয়ে থাকে। সুনীলের কাছে কোন খরচটা জরুরি, কোনটা নয়, মাথামুণ্ড বোঝা দায়।

অনিল চলে যেতেই ভূপেশ বলে এটা তোমাব উচিত হল না। সংসারে কত কী হচ্ছে না, ওকে তুমি মেয়ে-বন্ধু নিয়ে সিনেমা দেখার জন্য টাকা দিলে !

সুনীল বলে, উপায় কী ? সে শিক্ষা তো দ্যাননি, আমাকেও দিতে দেবেন না। নিয়ে যাবে বলেছে, এখন না নিয়ে গেলে বিস্ত্রীরকম লজ্জা পাবে। মনটা বিগড়ে যাবে। বাধ্য হয়েই দিতে হল।

মুখে যাই বলুক, মনে কিন্তু দ্বিধা থেকে যায়। হিসেব কি ঠিক হয়েছে ? ধমকে দেওয়াই কি উচিত ছিল ? কিন্তু তার ও সব বালাই নেই বলেই সে তো মেয়ে-বন্ধু থাকার আনন্দ, তাকে নিয়ে সিনেমা দেখতে যাওয়ার আনন্দের প্রয়োজন, বাতিল গণ্য করতে পারে না অন্যের জীবনে !

বাঁচা তো যায় জীবন থেকে অনেক কিছুই ছাঁটাই করে। বেকারদের কথা বাদ যাক, আশেপাশে কত চাকুরেরই সব রকম বাহুল্যবর্জিত বুদ্ধ সাদামাঠা জীবন, কষ্টকর জীবন। অলিতেগলিতে বস্তি-কলোনিতে কত অসংখ্য মানুষ প্রাণপণে কোনো রকমে শুধু বেঁচেই আছে।

কিন্তু তার তো সে অভ্যুত্থান নেই। সামান্য হলেও মানুষের মতো বাঁচার জন্য দরকারি কিছু কিছু বাহুল্য বজায় রাখতেই তো সে সকালবেলা টিউশনি নিয়েছে। অনিলের একটু আনন্দ পাওয়ার দাবি সে অগ্রাহ্য কববে কোন যুক্তিতে ?

মাথা সব শূনে বলে, সত্যি। আমি অবশ্য অন্যদিক দিয়ে ভাবছিলাম। কিন্তু মোটামুটি আমাদের হিসাবটা দাঁড়াচ্ছে এক। অনিলের মেয়ে-বন্ধুটি কে জানেন ? আমাদের ছায়া।

তাই নাকি !

মা আজ আগে থেকেই মেজাজ কড়া করে এসে আমায় বললে, শোন, অনিল ছায়াকে সিনেমায় নিয়ে যেতে চায়, আমরা অনুমতি দিয়েছি। তুই যেন আবার বারণ করিসনে। তোর তো সব বিষয়েই কড়াকড়ি আর বাড়াবাড়ি।

সুনীলের মনে পড়ে, রাত নটায় খালি ঘরে তার সঙ্গে রেবার গল্প করতে যাওয়া মা সমর্থন করেছিল।

মায়া চিন্তিতভাবে তাকায়।—অথচ সত্যি আমি কড়াকড়ি করি না। বাড়াবাড়ি করলে কে শুনছে আমার কথা ? আপনার তবু জোর আছে, আপনার রোজগারে সংসার চলে। আমি তো সত্যি স্বাধীন নই, বাবার ছেলে নেই বলেই যেটুকু স্বাধীনতা ভোগ করছি।

আমার স্বাধীনতা মানেই শেষ পর্যন্ত বাবার ইচ্ছা আর অনিচ্ছা। আমি আজ ভাবছিলাম, এ স্বাধীনতা হারাতে আমার তবে এত ভয় কেন ? বাপের চেয়ে বরং স্বামীর ওপরেই বেশি জোর খাটানো চলে।

জোর থাকলে চলে বইকী।

আমিও ঠিক তাই ভেবেছি। জোর খাটবে না এটাই আমার আসল ভয় নয়। আমার স্নেহ-মমতা আছে কী নেই, বাবা তা দেখতে আসবে না। কিন্তু স্বামী তো আর ছেড়ে কথা কইবে না। তার পাওনা

দিতেই হবে। আমি জানি আমার সে সাধ্য নেই। বাবার সঙ্গে মানিয়ে চলছি কিন্তু স্বামীর সঙ্গে বনবে না। আমার ভয়ের কারণ হল এই। কেমন, ঠিক না ?

এতদিনে নিজের হৃদয়-মনের গভীর রহস্য ভেদ করতে পেরেছে বলে মায়াকে বেশ খুশি মনে হয়।

কিন্তু সে একেবারে ভড়কে যায় সুনীলের প্রশ্নে !

বনবে না ধরে নিচ্ছেন কেন ? বাবার যা কিছু আছে অর্ধেক পাবেন, বাবাকে যেটুকু মানেন সেটুকু মেনে চললেই অনেক স্বামী কৃতার্থ হয়ে যাবে।

মায়া মাথা নাড়ে।—সে তো অন্যভাবে মানিয়ে চলা। আমি জানি আমি কিছুতেই পারব না। ভাবলেও বিস্ত্রী লাগে। গা ঘিনঘিন করে। আমার মধ্যে রসকষ নেই।

কেন নেই ?

মায়া বিব্রতভাবে হেসে বলে, যাঃ, আপনি সব গুলিয়ে দিলেন। ভাবছিলাম আসল ব্যাপারটা বুঝি স্পষ্ট বুঝে গিয়েছি। তা তো নয়, রসকষ নেই কেন, এটাই আসল প্রশ্ন। সবার আছে আমার নেই কেন ?

আমারও কিন্তু নেই।

সেদিন ছিল ছুটি।

এক রকম কিছু না ভেবেই সুনীল প্রস্তাব করে, বহুদিন সিনেমা দেখি না। যাবেন ?

বেশ তো চলুন না।

ওরা কোনটাতে গেছে জানেন ? সেখানে গেলে জানা যেত ওদের কী রকম ছবি পছন্দ। ছবিগুলি শুনছি নাকি যাচ্ছেতাই হচ্ছে আজকাল,—দু-একটা ছাড়া।

মায়া বলে, ছায়াকে জিজ্ঞেস করেছিলাম। ওর কোনো চেনা মেয়ে দেখেছে, সে নাকি বলেছে, ছবি ভালো নয় কিন্তু বেশ মজার ছবি।

তাহলে হাসির ছবি হবে। হালকা ভাঁড়ামির ছবি। তবু চলুন দেখে আসি।

অনিল আর ছায়া দেখতে গিয়েছিল বিকালের শোতে। চৈত্রের মাঝামাঝি, বেলা খানিকটা বড়ো হয়েছে। ভিড়ের সঙ্গে বাইরে বেরিয়ে অনিল ক্রুদ্ধস্বরে বলে, এখনি বাড়ি ফিরতে হবে। কবে পাস করব, চাকরি করব, তবে দুটো টাকা পাব। এমন রাগ হয় ভাবলে !

ছায়া হাতের একগাছি চুড়ি খুলে তার হাতে তুলে দেয়, কথা বলতে গিয়ে চাপা উত্তেজনা আর আবেগে গলা তার কঁপে যায়।

মরে গেলেও বাড়ি যাব না এখন। এটা বিক্রি করো।

বাড়িতে কী বলবে ?

বলব হারিয়ে গেছে।

অনিলের বিবেক নয়, পৌরুষে একটু বাধে। ইতস্তত করে বলে, তোমার চুড়ি বিক্রি করে—

ছায়া ফুঁসে বলে, তোমার টাকা আমার চুড়িতে তফাত আছে নাকি ? ছবিতে দেখলে না মেয়েটা কী ভাবে—

এ যুক্তির পরে আর কথা কী !

সন্ধ্যাবেলা সেই ছবি দেখতে যায় সুনীল আর মায়া। শো ভাঙবার পর ভিড়ের সঙ্গে রাস্তায় নেমে এসে তারা দুজনেই যেন হাঁফ ছাড়বার জন্য খানিকক্ষণ বাক্যহারা হয়ে থাকে।

শেষে মায়া বলে, গা ঘিনঘিন করছে। বাড়ি গিয়ে হাজার নাইলেও তো কাটবে না। ঠিক যেন দেশের বাড়ির খাটা পায়খানার তলায় গিয়ে দুঘণ্টা সময় কাটিয়ে এলাম।

সুনীল বলে, সে গা ঘিনঘিন দু-একবার সাবান ঘষে নাইলেই কেটে যায় ! এরা যে চোখ দিয়ে, কান দিয়ে, মনেপ্রাণে ইনজেকশন করে দিয়েছে, ঘেলার জিনিস। বাড়ি যেতে পারব না। চলুন একটু ফাঁকা জায়গায় বেড়িয়ে আসি।

লেকে যাবেন ?

নাঃ।

নদীর ধারে যাই চলুন।

চলুন।

সুনীল বলে, ট্রামেবাসে যেতে হবে কিন্তু, ট্যাক্সির টাকা নেই।

মায়া বলে, ট্রামেবাসে যাওয়াই ভালো। দশটা ভালোমানুষের ভিড়ে গা-খোঁষাখোঁষি করে একটু স্বস্তি পাব। সত্যি বলছি আপনাকে সিনেমায় ভিড় যদি না হত, রাগের মাথায় জ্ঞান হারিয়ে আমি একটা কেলেঙ্কারি করে বসতাম।

সুনীল বাসের ডান্ডা ধরে ঝুলছিল। শহরতলিতে বাস একটু হালকা হলে সে লেডিজ সিটেই মায়ার পাশে বসবার সুযোগ পায়।

সুনীল খেয়াল করিয়ে দেয়ার জন্য বলে, ফিরতে কিন্তু অনেক রাত হয়ে যাবে।

মায়া বলে, ছেলেমানুষি করবেন না। রাত হলে হবে।

ছেলেমানুষি ! সুনীল করবে ছেলেমানুষি !

মায়া সঙ্গে সঙ্গে হেসে ফেলে, দেখলেন তো ? নোংরা সিনেমা দেখবার ফল ? আপনি শুধু আমায় মনে করিয়ে দিলেন রাত হয়ে যাবে, আমি বিদ্রোহিনীর মতো ঝেঁঝে উঠলাম।

সুনীল বলে, আমি কিন্তু এতটা বিচলিত হইনি। কিছু কিছু নমুনা দেখা আছে। কিছুকাল আগে মাসখানেকের মধ্যে দশ-বারোটা সিনেমা দেখেছি বললে বিশ্বাস করবেন ?

কবব।

নভেম্বর-ডিসেম্বর মাসে কয়েকটা শনি-ববিবার আপনার কাছে ছুটি নিয়েছিলাম মনে আছে ?

এবার আমি রাগ করব। আমার কাছে নয়, বাবার কাছে ছুটি নিয়েছিলেন। বাবা বিছানায় পড়ে আছেন বলে আমি বাবার হয়ে স্কুলটা চালাই ভুলবেন না।

বেশ তো তাই হল। ছুটি নিতাম সিনেমা দেখার জন্য। একদিনে দুটো ছবি দেখতাম—একটা হলিউডের ছবি একটা দেশি ছবি। আর ছবি দেখার আগের মাঝের পর্বের সময়টা কী করতাম জানেন ? মার্কিন থেকে আমদানি নোংরা বই পড়তাম। বাজার ছেয়ে গেছে।

পবীক্ষার ফলটা কী হয়েছিল ? কী বুঝেছিলেন ?

বুঝেছিলাম এও একটা মস্ত বিপদ দাঁড়িয়েছে ছেলে-মেয়ে-ভাইবোন নিয়ে ঘরসংসার করার। আজ প্রমাণ দেখলেন তো ? আপনার বোন আমার ভাই এই ছবি দেখার জন্য পাগল। আমাকে তর্কে হারিয়ে আমার কাছে পয়সা নিয়ে অনিল আজ ছাযার সঙ্গে এই ছবিটা দেখেছে। আমি না বলতে পারিনি। এ রকম ছবি দেখানো বন্ধ করতে পারি না। আর দশটা ছেলে, মেয়ে-বন্ধুর সঙ্গে এ সব ছবি দেখছে তাও ঠেকাতে পারি না—আমার ভাই বলেই কী করে জবরদস্তি করব যে তুমি সন্ন্যাসী হও ?

শহরতলি দিয়ে বাস চলেছে। গঙ্গার কাছাকাছি পাশাপাশি রাস্তায়। গঙ্গার ধারে শুধু কারখানা আর কারখানা। বাংলার এটা সেরা শিল্পাঞ্চল। তাই মনে হয় কলকাতা শহরটাই বুঝি নিজেকে এদিকে এগিয়ে এগিয়ে নিয়ে চলেছে অনেক দূর অবধি।

মায়া বলে, আমিও ঠিক এই জন্যই ছায়াকে যেতে দিলাম। না যেতে দেওয়াও বিপদ। সবাই যাচ্ছে আমি কেন যেতে পাব না ভেবে মুষড়ে যাবে। এই হয়েছে মুশকিল। ছেলেমানুষ তো, বুঝবে না।

গঙ্গার তীরবর্তী দুটি প্রধান স্থান ও স্টেশন পার হয়ে বাস চলেছে, ঠিক ঠিক জায়গায় বসানো সিনেমা চোখে পড়েছে। এতক্ষণে হালকা হয়ে এসেছে বাস, বাদুরঝোলারা নেমে গিয়ে বাসে এখন কেবলমাত্র ঠেসাঠেসি গাদাগাদি করে সিটে বসা যাত্রীরা আছে।

মায়া একটা কঠিন প্রশ্ন করে সুনীলকে।

দশ-বারোটা ছবি দেখে ওই সব বই পড়ে আপনার একটুও মজা লাগেনি ? আমি খুব সিরিয়াসলি জিজ্ঞাসা করছি কিছু। আজকের ছবিটা বড়ো বেশি নোংরা—একেবারে বীভৎস। দু-একটা কম নোংরা ছবি দেখে আমি কিন্তু কিছুটা মজা পেয়েছি। আপনি একটুও পাননি ? কিছুক্ষণের জন্য ?

সুনীল বলে, মজা ? আমার কেবলই মনে হয়েছে এত সস্তা মজা দিয়ে এরা লোক ভুলায় কী করে ! ব্যাপারটা কী তা অবশ্য জানি, খেতে না পেলে মানুষ ডাস্টবিন ঘেঁটেও খিদে মেটায়—তবু অবাক লেগেছে। এখানে নামা যাক। সুন্দর একটি বাঁধানো ঘাট আছে।

চেনা জায়গা ?

ছেলেবেলা বছর দুই এখানে ছিলাম।

তারা ঘাটে গিয়ে বসে। সুনীল জিজ্ঞাসা করে, গা ঘিনঘিন করা কমেছে ?

মায়া হেসে বলে, হ্যাঁ, ও আর কতক্ষণ থাকে ?

শীতের শেষের ঝিল্লি হাওয়া বইছে। এপারে ওপারে কলকারখানার ঘন বস্তির আলোকমালা। কথা তাদের আপনা থেকেই কমে আসে। কথা বলার অবকাশ পাবে অনেক, নদীর ধারে এভাবে বসে বিশ্রামের অবকাশ পেয়েছে অনেকদিন পরে।

বড়ো বেশি খাটতে হয় দুজনকেই।

৩

আপিসে তাকে এদিক থেকে হৃদয়হীন নিষ্ঠুর মানুষ মনে করার কোনো কারণ নেই। কিন্তু ভোঁতা হৃদয় কি গোপন থাকে ?

শীত শেষ হয়ে এসেছে।

একটানা উত্তরে হাওয়া আর বয় না। মাঝে মাঝে এলোমেলোভাবে দিক পরিবর্তন করে। আমেজ পাওয়া যায় আগামী বসন্তকালের।

শহরের বৃকেও টের পাওয়া যায়। আপিসে কাজ করতে করতে।

টিফিনের সময় সুনীল বলে, গরমকাল আসছে। শীতকালটা যেন দেখতে দেখতে ফুরিয়ে যায়।

দীনেশ বলে, তুমি যে বসন্তকালটাকে একেবারে পান্ডাই দিলে না হে ! ঋতুর রাজা—শীত কেটে এলে আগে বসন্তের জয়গান করতে হয়।

করবে। রোজ শয়ে শয়ে করবে। এখন থেকেই শুরু করেছে।

দীনেশ একটু হাসে।

তুমি বড়ো বেশি বস্তুবাদী হয়ে উঠেছ সুনীল।

বস্তুবাদী ? মোটেই না। বরং সত্যবাদী বলতে পার। এ দেশে আবার বসন্তকাল !

ভূপেন বলে, কথাটা কীসের হিসাবে বললে ? দেশের এমন দুরবস্থা, বসন্তকাল দিয়ে লোক কী করবে ?

সুনীল মাথা নাড়ে। পেপার ওয়েটটা দুবার টেবিলে ঠুকে সহজভাবেই বলে, মোটেই নয়। দেশের লোকের দুরবস্থা বলে ঋতু পরিবর্তন হবে না ? বসন্তকাল আসবার হলে লোকে না খেয়ে

মবলেও ঠিক এসে হাজির হবে। আমি বলছি এ দেশে বসন্ত বলে কোনো ঋতুই নেই। শীতের পরেই গরমকাল। মাঝখানে চারটে দিন একটু একটু গা জুড়ানো হাওয়া বয়—বাস্।

নবীন বলে, বেশ তো বললেন ? নিজেই বাতিল করে দিলেন নিজের কথা !

কী রকম ?

দু-চারদিনের জন্য বলেই তো বসন্তকালের এত মান ! সারা বছর বসন্তকাল চললে কে কেয়ার করত ? বসন্ত নিয়ে দখিনা নিয়ে এত যে কাব্য হয়েছে, আপনি সেটার মানেই বোঝেননি সুনীলবাবু।

নবীনের বয়স কম। বছরখানেক আপিসে ঢুকেছে। ঢুকেছে খিড়কির দরজা দিয়ে। পরীক্ষা পাসের গুণ বা কোয়ালিফিকেশনের জোরে তার চাকরি নয়। অঘোরের মেয়ে তাকে স্নেহ করে।

শরৎ তাড়াতাড়ি বলে, কী বাজে বকছ নবীন ? রবীন্দ্রকাব্যের ওপর ওনার একটা ইংরাজি প্রবন্ধ ছাপা হয়েছে খবর রাখো ?

নবীন বলে, আমি কি সুনীলবাবুকে মূর্থ বলেছি ? ওনার কাছে আমি গোমুখ্য তা জানি না ? আমি বলছিলাম—

হরেন বলে, তোমার আর বলে কাজ নেই।

রমেশ বলে, আহা, বলতে দিন না ওকে।

সুতরাং সকলে চুপ করে যায়। একটু ক্ষুণ্ণ হয়েই চুপ করে।

এই ঘবেই তাদের ক-জনের সঙ্গে প্রায় সমান আসনে বসেই কাল পর্যন্ত চাকরি করেছে রমেশ, পদটা ঠিক তাদের সমান না হলেও এমন কিছু উঁচু ছিল না সম্মান বা মাইনের দিক দিয়ে, যে তাকে সম্মান করে কথা বলার দরকার হবে।

আজকেই প্রথম সে তাদের মধ্য থেকে একটু তফাতে সরে গিয়ে আপিসের এই ঘরটার একমাত্র বিচ্ছিন্ন বড়ো এবং বিশিষ্ট টেবিলটাতে গিয়ে বসেছে।

ও টেবিলে বসত বড়ো রতনবাবু। দিন তিনেক আগে বড়ো মানুষটা হঠাৎ বিনা নোটিশে আপিসের চাকরিতে ইস্তফা দিয়েছে, একেবারে চিবদিনের জন্য। ইহলোক ছেড়ে যাওয়ার প্রয়োজনে।

অঘোব নিজে রমেশকে রতনবাবুর কাজটা সাময়িকভাবে কিছুদিন চালিয়ে দেবার দায়িত্ব দিয়েছে। যতদিন না ওই পদে নতুন একজন বহাল হয়।

তাকে ওই টেবিলে গিয়ে বসবার কথাও অঘোর বলে গিয়েছে নিজে থেকে।

রমেশ ওই শূন্য চেয়ারে স্থায়ীভাবে বসতেও পারে এ বকম একটা কানাঘুষা চলছে। অঘোরবাবুর একটি মেয়ে আছে। মেয়েটির বয়স কম করে ধরলেও পঁচিশের নীচে নয়।

গতবার বি এ পাস করেছে। তিনবারের চেষ্টায়। রং একটু কালো, পা খোঁড়া। লাবণ্য ঢলঢল মুখ। কিন্তু মুখে ঘন রোমের বাড়াবাড়ি।

সামনের রবিবার দুপুরে খাওয়ার জন্য অঘোর রমেশকে তার বাড়িতে নেমস্তম্ব করেছে !

আপিসের সকলেই জানে যে অঘোরের পিসি রেঁধে দিলেও রমেশকে সব কিছু তার মেয়ে বিভার একার রান্না বলে খাওয়াবে।

বিভার গান শোনাবে।

এমন মেয়ে আর হয় না। এদিকে বি এ পাস ওদিকে রান্নায়, ঘরকমায়, গানে, অদ্ভুত প্রতিভাবতী।

এ সব খবর সকলের জানা হয়ে গেছে এই জন্য যে রমেশ অঘোরের প্রথম চয়েস নয়। কিছুকাল আগে ভূপেনকেও সে কয়েকবার বাড়িতে কারণে অকারণে নেমস্তম্ব খাইয়েছিল। গান শুনিয়েছিল।

বিভার রান্না, বিভার গান !

আচমকা বন্ধ হয়ে গিয়েছিল ভূপেনকে নেমস্তম্ব খাওয়ানো। ভূপেন বন্ধুদের কাছে কৈফিয়ত দিয়েছিল, অঘোরবাবু টের পেয়ে গেছে আমার কাছে আশা নেই। হলাম বা দ্বিতীয় পক্ষ ? ছেলেপিলে

নেই, কী আর এমন বয়স হয়েছে আমার ? কালো খোঁড়া বুড়ি মাগিকে বিয়ে করতে গরজ পড়েছে আমার !

বঙ্কুরা বলেছিল, কদিন তো বেশ মজা লুটে নিলে।

তারপর ভূপেনের বিয়ে হয়েছে অন্য মেয়ের সঙ্গে। পাস করা গান জানা না হোক বউ পেয়েছে সুন্দরী।

ভূপেনের মামা এই কারবারের অংশীদার।

বোধ হয় সেই জন্যই অঘোর প্রতিশোধ নিতে, তাব কোনো ক্ষতি করতে পারেনি।

মৃত রতনবাবুর চেয়ার-টেবিলে অস্থায়ী অনিশ্চিত দখলিসত্ত্ব পেয়েই রাতারাতি সহকর্মীদের উপব হুকুমের সুরে কথা বলার কেরামতি রপ্ত করতে দেখে নবীনও বোধ হয় দমে গিয়েছিল।

রমেশের সায় পেয়েও সে আর এ দেশের অস্থায়ী বসন্ত দখিনা কাব্য ইত্যাদির পক্ষ নিয়ে মুখ খুলতে পারে না।

সুনীলের সঙ্গে তর্ক করা এককথা।

রমেশের হুকুমে সুনীলের বিরোধিতা করা অন্য ব্যাপার।

টিফিনের সংক্ষিপ্ত সময়টা শেষ হতে সে যেন হাঁফ ছেড়ে কাজে মনোযোগ দেয়।

গরম জলে ভেজাল দেওয়া এক রকম গাছের শুকনো পাতা ভেজানো খানিকটা নির্যাস এক চামচ দুধ দিয়ে খেয়ে টিফিন করা।

টিফিনটা জমে গল্পগুজব তর্কবিতর্কেই।

এতদিন রমেশও টিফিনের টাইমটুকু ওইভাবেই তাদের সঙ্গে জমিয়েছে।

আজ সদ্যোমৃত রতনবাবু চেয়ারে বসে তিরিশ বছরের অধিকার কবা টেবিলে সে টোস্ট আব ডিমের কারি নিয়ে তাদের সামনেই টিফিন শুরু করেছে টাইম পেরিয়ে যাবার পব।

নির্ভয় নিশ্চিতভাবে !

রমেশ টোস্ট আর ডিম চিবোতে চিবোতে বলে, কী হল নবীন ? থেমে গেলে যে ?

নবীন ভারী চালাক ছেলে।

টাইপ করার যন্ত্রে হাত দুটিকে ব্রেক কষিয়ে থামিয়ে সে বলে, অঘোরবাবু তিনটেব মধ্যে এ রিপোর্টটা চেয়েছেন।

নিজেই তাই টাইপ করছ ?

কী করি বলুন ?

এ ঘরে সুনীলেরও টেবিল-চেয়ার, সেও ঠিক ডেস্কে বসা কেরানি নয়। কিন্তু রমেশের দখল-করা কেবিনেট টেবিল আর কুশন-দেওয়া চেয়ারের সঙ্গে তার সাদামাঠা কাঠের চেয়ার-টেবিলের তুলনাই হয় না।

ঠিক ইংরেজি সাহিত্যের বিদ্যা নিয়ে সুনীলের কাজটা করা যায় না। ভাগ্যে শুধু ইংরেজি সাহিত্যে পাস করাটাই সে ছাত্রজীবনের একমাত্র ব্রত করেনি, টেকনিক্যাল বিদ্যায় পাস করার জন্যও নিজেকে প্রস্তুত করছিল।

নইলে অঘোরবাবুর দেওয়া এই চাকরি করা অসাধ্য হত তার পক্ষে।

আজ রতনবাবুর আসনে রমেশকে বসতে দেখে তার মনে হয়, সত্যিই অসাধ্য হত কী ?

বিদ্যাও কাজে লাগবে না রমেশের, রতনবাবুর অভিজ্ঞতাও তার নেই। তবু সে যদি ও কাজ চালাতে পারে টেকনিক্যাল বিদ্যা ছাড়াই সেও বা পারত না কেন তার এই কাজ চলিয়ে নিতে !

এ রকম কত আনাড়িই তো কত বকম দায়িত্বপূর্ণ পদ জুড়ে বসে আছে—বিদ্যা আর অভিজ্ঞতায় পাকাপোক্ত না হলে সে কাজ করা মানুষের পক্ষে একেবারেই অসম্ভব ব্যাপার !

মনে মনে সুনীলকে সকলেই কমবেশি সমীহ করে। নবীনও করে—যতই সে সতেজ তর্ক করুক তার সঙ্গে। নবীনের কাছে সমীহ করা আর ভয় করা অবশ্য এক জিনিস নয়।

ঘা সহ্য শক্ত লড়াইয়ে ছেলে। শ্রদ্ধার সঙ্গে ভয়ের ভেজাল থাকতেই হবে এ নিয়ম সে মানে না।

সুনীল হিসাবি ধীর শান্ত মানুষ—নবীনের ধারণা সুনীলের চরিত্রের এ দিকটা সে বিশেষ পছন্দ কবে না। ধীর শান্ত হিসেবি হওয়ার মধ্যেই কেমন একটা সেকেলে হওয়ার ইঙ্গিত আছে।

সে শ্রদ্ধা করে সুনীলের দৃঢ়তাকে—হিসাব করে হলেও কোনো বিষয়ে দ্বিধা সংশয় না করেই স্পষ্ট সিদ্ধান্ত নেবার ক্ষমতাকে।

সুনীলকে সকলের এই সমীহ করার মনোভাব রমেশকে বরাবর খানিকটা ঈর্ষাতুর করে রেখেছে।

বতনবাবু তোষামোদ ভালোবাসত। তাকে সব চেয়ে বেশি তোষামোদ করত শরৎ। সুনীলকে কেউ তোষামোদ করে না—শরৎও নয়। সহজ স্বাভাবিকভাবেই তার সঙ্গে কথাবার্তা বলে।

নবীনের তার ভুল ধরা আর সতেজ তর্ক কবা দেখে তো প্রায় মনেই হয় না যে সে তাকে এতটুকু কেয়ার করে !

তবু টের পাওয়া যায় সকলের মনের শ্রদ্ধার ভাবটা।

আজ যেন টেব পাওয়া গেল স্পষ্টভাবেই।

ওরাই নবীনকে থামিয়ে দিচ্ছিল, একটু কর্তালি করে সে যে নবীনকে তর্ক চালিয়ে যেতে বলেছে, এটা কেউ পছন্দ করেনি।

নবীন পর্যন্ত নয় !

এভাবে তার সমর্থন পেয়ে তর্ক করে গেলে সুনীলকে তাতে অপমান করা হবে।

সুনীল নিজের মনে কাজ করে চলেছে। পিয়োন নিতাই তাব টেবিলে দুটো ফাইল রেখে যায়। শরৎ একটা মোটা খাতা তুলে নিয়ে এসে খুব খুশির সঙ্গে তাকে কী যেন দেখায়—একটা বড়োরকম ভুলের গোড়াটা সে খুঁজে পেয়েছে।

হাত গুটিয়ে বসে রমেশ চেয়ে দ্যাখে !

তার দিকে ফিরে তাকিয়ে সুনীলকে এমন আনন্দের সঙ্গে ভুল খুঁজে পাবার খবরটা জানালো। এই শরৎ কী তোষামোদটাই করত রতনবাবুকে যার চেয়ার টেবিলে সে আজ বসেছে ! ওর কি খেয়াল নেই যে এখানে যে বসে তার মধ্যে রতনবাবুর ক্ষমতা বর্তায় ?

রতনবাবুর ফাইলপত্র সে নাড়াচাড়া করে দেখতে পারে। চাবি লাগানো ড্রয়ার খুলে দেখতে পারে কী কী মূল্যবান দলিল আর চিঠিপত্র সেখানে আছে।

কিন্তু রমেশের কেমন যেন বিতৃষ্ণা বোধ হয়।

মোটো তিনদিন আগে মানুষটা মরেছে।

সে পর্যন্ত তার দখল-করা চেয়ারে বসতেই কেমন অস্বস্তি বোধ হচ্ছে এখন। পদোন্নতির উল্লাস আর গর্ববোধে এতক্ষণ এটা যেন চাপা ছিল—তার অতি মৃদু প্রথম হুকুমটি অগ্রাহ্য করে সকলে কাজ নিয়ে ব্যাপৃত হয়ে পড়ার পর এখন কেবলি তার সবু সবু পা-ওলা প্যান্ট আর গলা পর্যন্ত বোতাম-আঁটা-কোটপরা, টাক, পাকা চুল, বাঁধানো দাঁত সমেত ফরসা মোটা বুড়ো মানুষটাকে কেবলি মনে পড়ছে।

এখনও শ্রদ্ধাশাস্তি হয়নি মানুষটার।

ফাইল খুললেই তো চোখে পড়বে তার পরিচিত সই ! ড্রয়ার খুলে তার নস্যের শিশি কিংবা পানের ডিবাটা চোখে পড়বে না তাই বা কে বলতে পারে।

কেমন একটা জ্বালা বোধ করে রমেশ।

অঘোরবাবুই চাকরি করে দিয়েছে সুনীলকে। অঘোরবাবুই তাকে বসিয়েছে রতনবাবুর আসনে। ওরা কিছু সমীহ করে সুনীলকে। ঘরে যেন সে উপস্থিত নেই এমনভাবে তার দিকে একবার না তাকিয়েই নিজের মনে অথবা পরস্পরে জিজ্ঞাসা ও পরামর্শ করে কাজ চলেছে।

রমেশ যেন মরিয়া হয়ে হঠাৎ একটা সিগারেট ধরিয়ে বসে।

এই আপিসে এই ঘরে চাকরি করতে করতে তার এই প্রথম সিগারেট ধরানো।

আজ এই স্বাধীনতা সে পেয়েছে—আপিস টাইমে আপিসের মধ্যে সিগারেট ধরিয়ে টানা।

কারও কিছু বলার নেই করার নেই।

তার সিগারেট ধরানো সিগারেট টানার দিকে কেউ ফিরেও তাকায় না। নির্ভয় নিশ্চিন্ত মনে আপিসের মধ্যে সিগারেট টানার প্রথম স্বাধীনতা-ভোগকে কেউ গ্রাহ্যও করছে না !

রাগ চড়তে থাকে রমেশের মগজে।

সিগারেটটা শেষ করে আরেকটা সিগারেট ধরিয়ে প্রায় রতনবাবুর সুর নকল করেই সে বলে, স্টেটমেন্টটা আমায় দেখিয়ে নেবেন সুনীলবাবু।

সুনীল ধীর গলায় বলে, অঘোরবাবু একটা এস্টিমেট চেয়েছেন, আমি সেটা তৈরি করছি। অঘোরবাবু এটা নিজে দেখবেন।

রমেশ ধৈর্য হারিয়ে চাঁচিয়ে ওঠে, আহা, অঘোরবাবুই তো দেখবেন। ওঁকে দেখবার আগে আমায় একবার দেখিয়ে নেবেন।

সকলে এবার মুখ ফিরিয়ে তাকায় তার দিকে।

কোম্পানি তিরিশ বছরের, কিন্তু মাত্র গত যুদ্ধের টাইমে কোম্পানিটা বড়ো হওয়ায় এবং বড়ো আপিস সৃষ্টি করতে বাধ্য হওয়ায় এই ঘরটায় আপিসের ঐতিহ্য মোটে পাঁচ-ছবছরের।

তবু, গত পাঁচ বছরের মধ্যে আজই যেন নাটক শুরু হল এমনি নাটকীয়ভাবে ধমধম করে ঘরটা।

মিনিট দুই চুপচাপ।

রমেশের হুকুম শুনেও সুনীল যেন কিছুই বলবে না। তাকে কেয়ার করবে না।

এই দুমিনিটেই রমেশ ভয়ে বিমিয়ে যায়। অঘোরবাবুর বিশেষ কাজের, হয়তো বা গোপনীয় কাজের কাগজপত্রে নাক গলাতে চেয়ে সে বোকামি করে ফেলেছে। শূনে যদি অঘোরবাবুর রাগ হয় !

রমেশ বলে, যাকগে। ভালো করে তৈরি করুন এস্টিমেটটা। ভুলটুল না করে বসেন এই জন্য দেখতে চেয়েছি।

এবার সুনীল পেন রেখে একটা সিগারেট ধরায় !

এই আপিসঘরে আপিস টাইমে তারও এই প্রথম সিগারেট ধরানো।

বলে, এস্টিমেটটা অঘোরবাবু সোজা ওঁকেই দিতে বলেছেন। স্পষ্ট বলেছেন, আর কাউকে যেন না দেখাই। আপনি দেখতে চাইলে দেখাতে পারি। তবে আমাকে বলতে হবে যে আপনি নিজে দেখে ভুল-টুল ঠিক করে দিয়েছেন।

যাকগে।

দেখবেন না এস্টিমেটটা ?

অঘোরবাবুকেই দেখাবেন।

কাগজপত্র নাড়াচাড়া ছাড়া ঘরে অনেকক্ষণ ধরে আর টু শব্দটি শোনা যায় না।

কেবল নবীন নয়, সকলেই মাঝে মাঝে কর্মরত সুনীলের দিকে তাকায় এবং নবীনের মতো অতটা স্পষ্টভাবে না হলেও সকলেরই মনে হয় মানুষটা সুনীল শুধু শক্ত নয়, মানুষটা সে বেশ একটু নিষ্ঠুর।

রমেশের জন্য তাদের কোনো সহানুভূতি নেই, তাকে অপদস্থ করে উচিত কাজই সুনীল করেছে। কিন্তু মানুষটা নিষ্ঠুর না হলে কী এমনভাবে অপদস্থ করতে পারত, অঘোরবাবুই হুকুম দিয়েছেন এস্টিমেটটা অন্য কাউকে দেখানো বারণ—এ কথাটা গোড়ার দিকে চেপে রেখে ?

গোড়ায় বললেও রমেশ অপদস্থ হত। কিন্তু এতটা হত না।

সন্ধ্যার পর মায়াদের বাইরের ঘরটি মুখর হয়ে ওঠে কয়েকটি টাইপরাইটিং মেশিনের শব্দে। তিন মাসেব মধ্যে শর্টহ্যান্ড টাইপরাইটিং আরও কমিয়ে দেবার শর্ত—তবে অনেক ছাত্রছাত্রীই আরও দু-একমাস স্বেচ্ছায় টেনে যায়।

এখন ছাত্রী আছে দুটি। মায়ার বাবা দীনেশ যখন চালাত তখন ছাত্রী হত না। সে স্থায়ীভাবে বিছানা নিলে মায়া স্কুলটা চালাবার দায়িত্ব নেবার পর দু-তিনটি ছাত্রী শিখতে আসে।

সাতটা থেকে নটা পর্যন্ত ক্লাস। সুনীল আটটা পর্যন্ত মায়ার সঙ্গে এক ঘণ্টা শেখায়। বাকি এক ঘণ্টা ছাত্রছাত্রীরা নিজেবাই প্র্যাকটিস করে। মায়া একাই তখন ক্লাসটা সামলাতে পারে।

দুপুরে নবীনের সঙ্গে একচোট তর্ক হয়েছে, ক্লাস নিয়ে বাড়ি ফিরে নবীনকে তার জন্য অপেক্ষা করে থাকতে দেখে সুনীল ভাবে, ছেলোটা আবার তর্কের জের টানতে হাজির হল নাকি ?

বাড়িতে ঘরের টানাটানি। বৈঠকখানা নিয়ে তিনখানা ঘরে এতগুলি লোকের কুলোতে চায় না। বিয়ে না করলেও ছোটো ঘরখানা দখল করেছে সুনীল একা।

সুনীল পবিত্র জ্ঞানিয়ে দিয়েছে যে সারাদিন তার খাটুনি, বাড়িতেও তাকে পড়াশোনা করতে হয়, নিজস্ব একখানা ঘর না হলে তার চলবে না।

হেসে বলেছে, ধরে নাও বিয়ে করেছে। তখন তো একটা ঘর ছেড়ে দিতেই হত আমাকে !

কিছু না বলে সে ঘরটা দখল করে থাকলে কেউ কিছু ভাবত না। সাংসারিক নিয়মেই একটা ঘর দখল করার পুরো অধিকার তার আছে—অনাদের যতই অসুবিধা হোক।

কিন্তু অধিকার খাটাবার বদলে এভাবে যুক্তি দিয়ে নিজের স্বার্থপরতাকে সমর্থন করতে চাওয়ায় ক্ষুব্ধ হয়েছে সকলেই।

কিন্তু সেই সঙ্গে সুনীল এ কথাও বলে দিয়েছে যে সে যতক্ষণ বাড়ি থাকবে না, তার ঘরটা সকলে ব্যবহার করতে পারবে।

আগে সকালে নিজের ঘরে লেখাপড়া করত সুনীল, তাই তার নির্দেশ ছিল যে সন্ধ্যার পর অনিল আর আলপনা তার ঘরে পড়বে, পুলিন আর কল্পনা পড়বে বৈঠকখানায়।

কল্পনা আর আলপনা এক ঘরে পড়তে বসলে শুধু বকবক আর ঝগড়া করে পরস্পরের সঙ্গে—লেখাপড়া হয় না।

অনিল আর কল্পনা এক ঘরে পড়তে বসলে কল্পনা বারবার তাকে পড়ার মানে জিজ্ঞাসা করে, অনিল চটে গিয়ে তাকে ধমকায়। দুজনের মধ্যে প্রায় কথা বলাবলি বন্ধ হয়ে যায় দু-একদিনের জন্য !

পুলিন একটু হাবাগোবা। সে দাদা-দিদিদের যেমন রকম-সকম, তেমনভাবে চলে। চারটে দাদা-দিদি হোক আর একটাই হোক—পড়তে বসে তারা মন দিয়ে পড়লে সেও পড়ে, তারা হাসাহাসি গল্পগুজব করলে সে চুপচাপ শোনে, ঝগড়াঝাঁটি করলে সেও আবোল-তাবোল চেষ্টামেচি করে।

জটিল সমস্যা !

এ সমস্যা সমাধানের জন্যই সন্ধ্যায় লেখাপড়া কে তার ঘরে কে বৈঠকখানায় আর কে ভূপেশের ঘরে করবে সুনীল নিয়ম বেঁধে দিয়েছিল।

সকালে এতদিন সবাই পড়ত বৈঠকখানায়।

সুনীল নিজের ঘরে বসে তার নতুন প্রবন্ধটা লিখতে লিখতে শুনতে পেত বৈঠকখানা থেকে কলেজ-স্কুলের ছাত্রছাত্রীরা যেন পাঠশালায় স্বরে অ স্বরে আ পড়ার আওয়াজ তুলে পাঠাভ্যাস করছে।

সকালে টিউশনি নেবার পর সে পড়ুয়া ভাইবোনদের হিসাব করে বৈঠকখানা আর নিজের ঘরে লেখাপড়া করার জন্য ভাগ করে দিয়েছে।

বাজে শিক্ষা। অর্থহীন ফাঁকিবাজি শিক্ষা। তবু শিক্ষা দিতেই হবে !

পাসফেলের ডান্ডায় মাপতেই হবে ওদের বেশির ভাগকে ফেলের ডান্ডাব ঘায়ে কাত করে।

পুলিন ঘুমিয়ে পড়েছিল। ছেলেটা অস্বাভাবিকরকম দূরস্ত।

চেষ্টা করেও তাকে জাগিয়ে খাওয়ানো যায়নি রাত্রের রুটি-তরকারি।

দুধ খাবি ?—বললে হয়তো তাকে একেবারে জাগানো যেত না, কিন্তু ঘুম-জড়িত স্বরে সে নিশ্চয় বলত, দাও।

ছিটোফোঁটা দুধ দিলেও চুমুক দিয়ে খেয়ে নেতিয়ে পড়ত।

রুটি সে খেতে পারে না। এই জলকাদার দেশের বাচ্চা। চোদ্দোশো পুরুষ ধরে যাবা ভেতো তাদের বাচ্চা।

তার মা ঝংকার দিতে ভুলে গেছে যে, মাছভাত মানায় বলে কী মাছরুটি মানায় ! এক্সিমোরা সিল মাছ পচিয়ে খায়, তাদের দেশে গেলে বরং ভালো করতাম। একরকম খাবার জুটত—চোদ্দোশো পুরুষ যা খেয়েছে।

অনিলের মাথা ধরেছে।

সে শুয়ে পড়েছে সকাল সকাল।

আলপনা একা বৈঠকখানায় ভদ্রতা রক্ষা করছে নবীনের সঙ্গে।

কী ব্যাপার নবীন ?

বলছি।

এতক্ষণ বসে না থেকে আমাকে একটা খবর পাঠালেই হত ?

দরকার হলেই বলে পাঠাতাম। অনেকদিন পরে এসেছি, এদের সঙ্গে কথাবার্তা বলছিলাম—ভাবলাম যে আপনি এলেই আপনাকে বলা যাবে আসল কথা। মুখহাত ধুয়ে আসুন ?

নবীনের কথাবার্তা একটু রহস্যময় মনে হয় সুনীলের।

ব্যাপার কী বলো না ?

বিভাদি আপনাকে একবার যেতে বলেছেন—জবুরি দরকার।

আজ এখন ? এখন আমি কোথাও যেতে পারব না।

বিভাদি বলতে বলেছে যে ওর খুব বিপদ—আপনাকে যেতেই হবে।

সুনীল এতক্ষণ দাঁড়িয়ে ছিল, এবার বসে। বলে, কী বিপদ নবীন ? কী হয়েছে ?

নবীন বলে, আমি তো জানি না।

তুমি ওর কাছ থেকে আসছ, তুমি জান না কী হয়েছে ? সে আবার কী রকম বিপদ ?

আমি কী করে বলব ? আমায় কিছুই বলেনি।

জিজ্ঞাসা করেছিলে ?

নিশ্চয়। আমি জানতে চাইলাম কী বিপদ, কিছু বললে না। তারপর জিজ্ঞাসা করলাম আপনি যদি জানতে চান কী বিপদ তাহলে কী বলব, তখনও কিছু বললে না।

আলপনা চুপ করে শুনছিল। এবার সে থাকতে না পেরে বলে ওঠে, দাদা তুমি একবার যাও। কিছু নিশ্চয় হয়েছে। বেচারি খোঁড়া নইলে নিজেই হয়তো আসত !

সুনীল বলে, তুই চুপ কর। বিভা কী করছিল নবীন ?

নবীন বলে, চুপচাপ শয়েছিল, আবার কী করবে ? আমায় অঘোরবাবু ডেকেছিলেন একটা জরুরি চিঠি টাইপ করার জন্য—শ্যামলদের নাকি কী কাজে পাঠিয়েছেন। বিভাদি আমায় ডেকে একটা দুটো কথা বলেই হঠাৎ কাঁদো কাঁদো হয়ে বলল, সুনীলবাবুকে একবার ডেকে আনবে ভাই ? বোলো যে আমার বড়ো বিপদ।

আলপনা বলে, ইস্ ! নিজের বাপ-মাকে না বলে তোমায় ডেকেছে, নিশ্চয় ভীষণ কিছু হয়েছে। তুমি এক্ষুনি একবার যাও দাদা।

সুনীল তার দিকে শুধু একবার তাকায়। আলপনার সমস্ত উত্তেজনা নেতিয়ে যায়।

বলো গে আমি এখন যেতে পারব না। কাল-পরশু সময় পেলো যাব।

নবীন আর আলপনা দুজনেই যেন স্তম্ভিত হয়ে যায়। একটা খোঁড়া দুখিনি মেয়ে, আপিসের খোদ কর্তার মেয়ে, সে বিষম বিপদের কথা জানিয়ে একবার যেতে বলেছে—ছুটে যাবার বদলে সুনীল কিনা এলছে কাল-পরশু সময় পেলো যাবে !

দয়ামায়া না থাক, তার কী কৃতজ্ঞতা বলেও কিছু নেই ? চাকরি তো তার করে দিয়েছে একরকম বিভাই।

ইচ্ছা করলে বিভা কি চাকরির দফা শেষ করতে পারে না ?

সুনীল হাই তুলে নবীনকে বলে, তুমি দেখছি বড়োই আশ্চর্য হয়ে গেলে ? তুমিও তো বিভার বিপদটাকে সিরিয়াস ভাবতে পারনি !

নবীন বলে, কী রকম ? বিপদটা কী জানি না, কিন্তু ছুটে এসেছি তো আপনাকে ডাকতে ? ছুটে এসে এখানে গল্পে মেতে গেছ। দুপা গিয়ে মায়াদের বাড়িতে আমায় খবর দেওয়া দরকার মনে করনি।

নবীন অপ্রতিভ হয়, তর্ক কখনও হার মানে না। বলে, আলপনা বললে, বসুন না, দাদা এক্ষুনি আসবে। আমিও ভাবলাম আপনি ক্লাস নিচ্ছেন—

সেই জন্য তো বলছি তুমিও বিভার বিপদটা সিরিয়াস ভাবতে পারনি।

বিপদটা কী তা তো আমায় বলেনি।

আমি তো তাই বলছি। সত্যিসত্যি গুরুতর ব্যাপার কিছু হলে তোমার হাতে দুলাইন চিঠি লিখে দিতে পারত না ? তোমায় না জানাতে চায়, খামে ভরে দিলেই হত !

কল্পনার আজ বড়ো খিদে পেয়ে গিয়েছিল। আশ্চর্য অসহ্য খিদে।

বিয়ের পর বাপের বাড়ি এলেই তার এ রকম খিদে পায় !

সকলের আগে খেতে বসে এদের কথার আওয়াজ শুনে তাড়াতাড়ি খাওয়া সেরে—শুকনো বুটিগুলি তাড়াতাড়ি চিবিয়ে খাওয়া যে কী কষ্ট, ভাত হলে কোঁত কোঁত করে গেরাসে গেরাসে পেটে চলে যায়—এঁটো হাডেই সে এসে দাঁড়িয়েছিল।

এঁটো হাতটা উঁচু করে রেখে সে বলে, মুখ খুললেই তো ধমক খাব।

সুনীল বলে, কেন মিছে কথা বলছিস ? ন্যাকামি না করলে আমি কাউকে ধমকাই না।

তাহলে মনের কথাটা খুলেই বলি ! তুমি কিছু বোঝ না মেয়েদের ব্যাপার, কানাকাড়িও নয়। মেয়েদের কত রকমের বিপদ হতে পারে তোমার কোনো ধারণাই নেই। এমন বিপদও হয় যা

বাপ-মাকে জানানো যায় না, কাউকে লিখেও জানানো যায় না। বিভাদি নিশ্চয় ভীষণ বিপদে পড়েছে। নইলে এমনভাবে অসময়ে তোমায় ডাকতে পারত না। তোমায় ভালোবাসে বলেই—

এই তো ন্যাকামি শুরু করলি।

বেশ। তোমায় ভক্তি করে বিশ্বাস করে বলেই তোমায় ডেকেছে। তোমাকে ছাড়া কাউকে বলতে পারবে না বিপদের কথা।

সুনীল নির্বিকারভাবে বলে, কোনো মেয়ের ও রকম বিপদের কথা আমি শুনতে চাই না। কেন জানিস ? শূনেও তার বিপদ নিবারণ করার জন্য আধমিনিট সময়ও আমি নষ্ট করতে পারব না।

এক মুহূর্ত থেমে বলে, আমার অনেক কাজ।

নবীন একটু কাঁচুমাচু করে বলে, কিন্তু—মানে সুনীলদা, বিভাদি কিছু ভীষণ ঝোঁকের মাথায় চলে। রেগে গেলে যা খুশি করতে পারে। কোনো দিন তো ডাকে না, আজ এমনভাবে ডাকল, না গেলে ভীষণ রেগে যাবে। বিভাদি পণ ধরলে অঘোরবাবু হয়তো ইয়ে না করে পাবেন না, মানে—

সুনীল শান্তভাবে হেসে বলে, বাপকে বলে বিভা আমায় চাকরি দিয়েছে, বাপকে বলে সে আমার চাকরিটা খসিয়ে দেবে। তুমি আসল কথাটাই ভুল করছ নবীন। অঘোরবাবু বিভার খাতিরে আমাকে চাকরি দেননি—বিভাকে অবশ্য বুঝিয়েছেন তাই, স্বাভাবিক মেয়ের চেয়ে খোঁড়া মেয়ে হাজারগুণ বেশি আদর চায়। চাকরি আমি নিজের গুণেই পেয়েছি। বিভা যদি আবদার ধরে যে আমাকে ছাঁটাই করতেই হবে—অঘোরবাবু বলবেন, বেশ বেশ তাই হবে। কাজে কিছুই করবেন না।

আপনি বুঝি অঘোরবাবুর পেয়ারের লোক ?

কল্পনা আলপনা দুজনেই কমবেশি শিউরে ওঠে। নবীনের কি মাথা খারাপ ?

সুনীল কিছু রাগ করে না।

বলে, না পেয়ারের লোক নই। দরকারি লোক। পেয়াব চাই না, কখনও চাইব না বলেই আমার চাকরি। এমন অনেক কাজ আছে পেয়ারের লোককে দিয়ে যা করানো যায় না। অথচ যে কাজ না করালেই নয়।

নবীন কয়েক মুহূর্ত কল্পনার পায়ে ফুলতোলা কার্পেটের চটিটার দিকে চেয়ে থেকে হঠাৎ মুখ তুলে বলে, আপনাকে তা হলে অঘোরবাবু খাতির করেন।

সুনীল মৃদু হেসে বলে, মোটেই না। আমাকে খুব দরকারি কাজে খাটান—আমাকে দিয়ে ছাড়া সে কাজ অন্যকে দিয়ে করাতে পারবেন না। আমি তাই কাজটাকে খাতির করি, অঘোরবাবুকে খাতির করি না। উনিও কাজ করার জন্যই আমাকে খাতির করেন।

সুনীল ভিতরে গেলে কল্পনা নবীনকে বলে, নিজের দাদা তবু বলছি, এ রকম পাথর দিয়ে গড়া মানুষ আর দেখেছেন ?

আলপনা বলে, পাথর বলছ কী ? পাথর শক্ত হয়, নিচু হয় না।

নবীন যেন আনমনেই ধীরে ধীরে মাথা নাড়ে।

মাথা নাড়ছেন যে ?

নিচুর ? না, সুনীলদা নিচুর নয়। নিচুর হলে নিচুরতায় লোকে আনন্দ পায়। সুনীলদা কিছুই বোধ করে না। নিচুর নয় তবে মায়ামমতা বলে কিছু নেই।

হৃদয়হীন ?

হৃদয় আছে। হৃদয়টা ভোঁতা। না, এবার পালাই। বিভাদিকে আবার খবর দিতে হবে। কী বলব তাই ভাবছি।

রাত প্রায় দশটার সময় সুনীল খেতে বসেছে, অঘোরের দামি গাড়ি বাড়ির সামনে এসে দাঁড়ায়।

ডেকে পাঠালেও সুনীল যায়নি। বিভা নিজেই তাব কাছে এসেছে। তার দুটি পায়ের পাতাই মোচড়ানো। ফরমাশ দিয়ে বিশেষভাবে তৈরি জুতো পরে লাঠি ধরে সে হাঁটে।

বছর চব্বিশেক বয়স হয়েছে কিন্তু একটা কঁবুণ লাভণ্যে মুখখানা কচি দেখায় বলে বয়স আরও কম মনে হয়। মুখের রোমের জন্য যদিও লাভণ্য চোখে পড়ে না।

বাইরের ঘরে চৌকিতে বসে বলে, সুনীলবাবু খাচ্ছেন ? আচ্ছা আমি বসছি।

সুনীল সব খেতে আরম্ভ করেছিল। বিভা এসেছে শুনে সে উঠে মুখহাত ধুয়ে বাইরের ঘরে আসে।

খাওয়া ফেলে উঠে এলেন ?

খাওয়া পালাবে না।

আমিও কী পালাতাম নাকি ? একটু নয় বসতাম !

চৌকিতে বিভার কাছে বসে সুনীল সকলকে ভিতরে যেতে বলে।

তোমার নাকি গুরুতর বিপদ ?

শুনেও তো গেলেন না ?

আমি ভাবলাম এমনি খেয়ালের বশে ডেকেছি। তেমন কিছু হলে মুখে বলে না পাঠিয়ে চিঠি লিখে দিতো।

বিপদে পড়েছি শুনেও যাবেন না, এটা ভাবতে পারিনি।

প্রচণ্ড রাগ আর অভিমান হয়েছে টের পাওয়া যায় কিন্তু প্রকাশটা হয় খুব মৃদু। সেও তো জানে সুনীলকে ভালোভাবেই। একটানা চার বছর সে তাকে ইংরেজি পড়িয়েছে। নিছক হৃদয়াবেগের কী আর কোনো মূল্য আছে সুনীলের কাছে।

সুনীল মৃদুস্বরে বলে, তোমার কী বিপদ হতে পারে আর আমি তোমার কী কাজে লাগতে পারি ভেবে পাচ্ছি না। এক বমেশবাবুর ব্যাপারটা হতে পারে—

বিভা চোখ বড়ো করে বলে, নিজেই বুঝতে পেরেছেন তাহলে ? আপনি এত বোঝেন অথচ—

কিন্তু এ ব্যাপারে আমায় টানবে কেন সেটাই যে বুঝতে পারছি না।

বিভা ব্যাকুলভাবে বলে, কী যে ঢুকেছে বাবাব মাথায়, আমার বিয়ে দেবার জন্যে পাগল হয়ে উঠেছে তাও আবাব আপিসের কারও সঙ্গে দেওয়া চাই !

তার অবশ্য মানে আছে। আপিসের লোক বশে থাকবে, তোমাকে অবহেলা করতে সাহস পাবে না।

আপিসের লোক হোক বাইরের লোক হোক টাকার লোভে তো বিয়ে করবে।

টাকার লোভে খাতিরও করবে বিয়ের পর।

কিন্তু ও খাতির দিয়ে আমি করব কী ? ভাবলেও আমার গা ঘিনঘিন করে। কচিখুকি তো নই, ঢের বয়স হয়েছে। ক-বছর আগে হলে বরং কথা ছিল, তখন আমিই কত স্বপ্ন দেখতাম—বাবা রাজপুত্র বর কিনে এনে দেবে, আমায় কত ভালো বলবে, খোঁড়া বলে আরও মায়্যা হবে বেশি। বুড়ো বয়সে এখন বুঝি তো সব ! এতটুকু ভক্তি করতে পারব ও রকম পয়সার কাঙালি ওঁচা একটা মানুষকে ? বাবাকে বোঝালেও বোঝে না। বাবার সেই এককথা, পয়সার কাঙালি সবাই। জামাই যে হবে সে আমায় মাথায় করে রাখবে, আবার কী চাই ?

বিভা কঁবুণ চোখে চেয়ে থাকে। চোখ নামিয়ে একবার নিজের কুৎসিত পা দুটির দিকে তাকিয়ে নেয়।

সুনীল নীরবে তার বাকি কথা শোনার জন্য অপেক্ষা করে।

বিভা একবার কেশে বলে, ভূপেনবাবুর তবু একটু মনুষ্যত্ব ছিল। বাবাকে কিছু বলার আগে আমায় একবার জিজ্ঞেস করেছিল। আমিও সোজা জানিয়ে দিয়েছিলাম বাবার টাকার লোভে আমায় বিয়ে করলে রোজ দুবেলা খোঁড়া পায়ের লাথি ঝাড়ব, স্বামী বলে কেয়ার করব না। তারপর থেকে ভূপেনবাবু আর যায়নি। কিন্তু রমেশবাবু দুদিন গিয়েই বাবাকে মত জানিয়ে বসেছে। আমি এখন কী করি। বাবা বিয়ে দেবেই আমার।

বিভা প্রায় কাঁদো কাঁদো হয়ে যায়।

কেন দেবে জানেন ? মানুষকে বলতেও আমার মাথা কাটা যায়। বাবা আমাকে অবিশ্বাস করছে। কবে কী কাণ্ড করে বসি বলা তো যায় না, তাই একটা স্বামী জুটিয়ে দিচ্ছে। তারপর যা খুশি করি আসবে যাবে না।

বিয়ে কবে ? কাল পরশু ?

তার প্রশ্ন শুনে বিভার কাঁদো কাঁদো ভাব কেটে যায়।

দিন ঠিক হয়নি, কিন্তু বাবা যত তাড়াতাড়ি পারে চুকিয়ে দেবে।

সুনীল শান্তভাবেই বলে, তাহলে এমন অস্থির হয়ে পড়লে কেন ? ভয়ানক বিপদ বলে নবীনকে পাঠিয়ে দিলে, এতরাতে নিজে ছুটে এলে। আমি কাল-পরশু যাব ভেবেছিলাম, তখনও তো এ সব বলতে পারতে।

বিভা ব্যাকুলভাবে বলে, আপনি বুঝবেন না। আমার কী রকম অস্থির অস্থির কবছে, দম আটকে আসছে। কী মনে হচ্ছিল জানেন ? আজ রাতেই বোধ হয় পাগল হয়ে যাব, একটা ভয়ানক কিছু করে বসব। আপনি আজকেই কিছু না করুন, আমায় একটু আশা দিন যে বাবাকে বুঝিয়ে বলবেন।

এত খারাপ লাগছে তোমার ?

বলে বোঝাতে পারব না কত খারাপ লাগছে।

সুনীল একটু চুপ করে থেকে ধীরে ধীরে বলে, এই তো দোষ তোমাদের, একটা ঝগড়াট হলেই মাথা খারাপ করে বসবে। অঘোরবাবুকে বুঝিয়ে বলতে বলছ। আমি বললে তিনি বুঝবেন কেন একবার ভেবে দেখলে না ? তাঁর ঘরোয়া ব্যাপারে কিছু বলতে গেলে তিনি শুধু চটে যাবেন, আর কোনো লাভ হবে না।

বিভা হতাশভাবে বলে, বাবা কিন্তু আপনার কথার দাম দেন।

সে আপিসের কাজের কথায়। আমি অবশ্য যদি রমেশবাবুর নামে বানিয়ে বলি যে রমেশবাবু বদলোক, স্বভাব চরিত্র ভালো নয়, তা হলে বিশ্বাস করবেন।

তাই বলুন বাবাকে, আমায় বাঁচান। এ তো আর মিথ্যে নয়, বদলোক না হলে টাকার জন্য নিজেকে বিক্রি করতে চায় ?

ও রকম বদলোক বললে তোমার বাবার কিছু আসবে যাবে না। তোমাকেই তো বলেছেন, সবাই টাকার কাঙাল। অঘোরবাবুর কাছে টাকার জন্য নিজেকে বিক্রি করতে চাওয়াটা দোষ নয়। একজনের নামে বানিয়ে কিছু বলতে পারব না আমি। কাজেই বুঝতে পারছ আমার গিয়ে বলায় বিশেষ কোনো লাভ হবে না।

আমি সুইসাইড করব।

তোমার লজ্জা করল না এ কথা বলতে ? সুইসাইড করতে পারবে আর বিয়েটা ঠেকানোর জন্য একটু শক্ত হতে পারবে না ! উপায় তোমার নিজের হাতেই আছে।

কী উপায় ?

অঘোরবাবুকে পরিষ্কার জানিয়ে দাও এভাবে বিয়ে দেবার চেষ্টা করলে তুমি বাড়ি ছেড়ে চলে যাবে। কাঁদাকাটা করলে কিংবা বিয়ে করতে তোমার অসুবিধা কী বুঝিয়ে বলতে গেলে অঘোরবাবু বুঝবেন না। ভাববেন তুমি ঢং করছ, পরে সব ঠিক হয়ে যাবে।

বিভা কাতরভাবে বলে, শুধু বললে বাবা বিশ্বাস করবে না। ভাববে ঢং করছি। আমাকে সত্যিসত্যি বাড়ি ছেড়ে গিয়ে প্রমাণ করতে হবে বাজে কথা বলছি না।

সুনীল সহজভাবে বলে, প্রমাণ করবে। সুইসাইড করার চেয়ে কয়েকদিনের জন্য বাড়ি ছেড়ে যাওয়া অনেক সোজা।

কিন্তু কোথায় যাব ?

আত্মীয়ের বাড়ি, বন্ধুর বাড়ি, হোটেল—যাওয়ার জায়গার অভাব আছে নাকি ?

বিভা স্থিরদৃষ্টিতে তার মুখের দিকে চেয়ে প্রশ্ন করে, আপনার এখানে এসে যদি উঠি ক-দিনের জন্য ?

সুনীল হেসে বলে, সাথে কী বলি তোমাদের কেবল বয়সটাই বাড়ে, বুদ্ধি বাড়ে না। যাওয়ার এত জায়গা থাকতে বাড়ি ছেড়ে আমার এখানে আসবার কথা ভাবছ। ফলটা কী হবে ? চাকরিটা যাবে আমার।

বিভা সঙ্গে সঙ্গে বলে তা বটে, ঠিক বলেছেন। বাবা ভাববে আপনিই বুঝি আমাকে বিগড়ে দিয়েছে। ২ খণ্টা সত্যি হলেও বাবাকে টেব পেতে দেওয়া উচিত হবে না।

কী রকম ?

আপনার সংস্পর্শে এসেই তো আমার মন-টন ভেঁতা হয়ে গেছে। আপনার সঙ্গে অ্যাডিন মেলামেশা না করলে আজকে হয়তো আমি খুশিই হতাম—ভাবতাম হোক, রমেশবাবুই ভালো।

সুনীল স্বস্তির নিশ্বাস ফেলে।

তুমি আমায় ভড়কে দিয়েছিলে।

কেন ?

আমি ভাবলাম তুমি বুঝি নালিশ করছ আমার নামে। আমি তোমার মন-টন হরণ করেছি তাই তোমার অন্য কাউকে বিয়ে করতে আপত্তি।

বিভা প্রথমটা আশ্চর্য হয়ে যায়, তারপর ক্ষুব্ধ স্বরে বলে, সাংগাই কি আপনার দয়ামায়া নেই ? একটা খোঁড়া মেয়েকে এ কথাটা না বললে চলত না আপনার ? আমি অন্যভাবে বলেছি কিন্তু ও রকমটাও তো সত্যি হতে পারে !

সুনীল বলে, না। সত্যি হতে পারে না। সত্যি হলে সত্যিই আমি খোঁড়া মেয়েকে কথাটা বলতাম না।

সত্যি হতে পারে না কেন ?

কী করে হবে ? আমি তোমার হৃদয়মন দখল করলাম আর আমিই কিছু টের পেলাম না !

বিভা তার বেশি বয়সের কচি মুখখানা যতদূর সম্ভব গম্ভীর করে বলে, এমন তো হতে পারে আপনি দখল করেননি, আমি নিজেই সঁপে দিয়েছি ?

সুনীল হেসে বলে, ওটা কথার মারপ্যাচ। তুমি যে আমার অজান্তে আমাকে হৃদয়মন সঁপে দেবে—কোথায় দেবে ? আমার জামার পকেটে ? আমি হৃদয়মন দিয়ে না নিলে তোমার হৃদয়মন সঁপে দেবার সাধ্যই হবে না।—

কেন, একপক্ষে ভালোবাসা হয় না ? কত গল্প উপন্যাসে পড়েছি। আমার কথাই ধরুন ! আমি তুচ্ছ একটা খোঁড়া মেয়ে, আমি জানি আপনার ভালোবাসা আমি পাব না। আমি তাই আমার ভালোবাসা গোপন করে রাখি, আপনাকে জানতে দিই না।

তুমি যে সব গল্প উপন্যাস পড়ো তাতে এটা সম্ভব, জগতে কোথাও খুঁজে পাবে না। মানুষের ভালোবাসা দেওয়া-নেওয়ার ব্যাপার; একপেশে হয়ে সেটা গজাতে পারে না। প্রথম দর্শনেই আমার তোমার ভারী পছন্দ হয়ে গেল, এমনকী সাতরাত ঘুমোতে পারলে না, আমাকে ভেবে ইটফট করে কাটালে। এ পর্যন্ত সম্ভব হয়। কিন্তু তারপর তোমার ওই প্রথম দর্শনের ভালোবাসা জিইয়ে রাখা গড়ে তোলা আমাকে বাদ দিয়ে তোমার একার পক্ষে অসম্ভব। তোমার মন আমি টের পাব, আমার মন তুমি টের পাবে—আমার প্রশ্নে তোমার ভালোবাসা তোমার প্রশ্নে আমার ভালোবাসা দিন দিন বাড়বে। এভাবে ছাড়া মেয়েপুরুষে ভালোবাসা হয় না।

ভিতরে দরজার পিছনে সম্ভরণে দাঁড়িয়ে চুপিচুপি কল্পনা আলপনা দুজনের কথা শুনছিল। খুকু আর পুলিনও এসে দাঁড়িয়েছে। যন্ত্রণার একশেষ। তোর বৃষ্টি এ সব কথা ?

অথচ ধমক দিয়ে ওদের তাড়ানোও যায় না, সুনীল টের পেয়ে যাবে তাব দুবোন চোরের মতো তাদের দুজনের কথা শুনছে।

বিভা বলে, পাত ছেড়ে উঠে এসেছেন, আপনাকে আর বকাব না। এত কথাই যখন বললেন, একটা কথা জিজ্ঞাস করে যাই। সত্যি জবাব দেবেন কিন্তু। আপনি কাউকে ভালোবেসেছেন ?

সুনীল মাথা নাড়ে।

তবে যে এত বড়ো বড়ো কথা বলে গেলেন ভালোবাসা নিয়ে ?

সুনীল হেসে বলে, ভালো না বেসে বৃষ্টি ভালোবাসার নিয়মকানুন জানা যায় না ?

থিয়োরি আছে ?

বিভা ভেবেছিল এ প্রশ্নে জব্দ হয়ে যাবে সুনীল। সুনীল সঙ্গে সঙ্গে জবাব দেয়, আছে।

কী থিয়োরি ?

ভালোবাসাটা ঠিক কী জিনিস অথবা অ-জিনিস, তার স্বরূপটা কী, সে বিষয়ে কোনো থিয়োরি নেই। আজ কেউ বলতে পারে না। বৈজ্ঞানিকরা তো পারেনই না, কবি লেখকরা তবু খানিকটা আভাস দিতে পারেন। কিন্তু ভালোবাসা যাই হোক যেমন হোক, ভালোবাসার ব্যাপারেও সংসারের কতগুলি সাধারণ মূল নিয়ম খাটে। ভালোবাসা হবে দুটো জীবন্ত মানুষের মধ্যে—তারা মেয়েপুরুষ নাও হতে পারে ! কিন্তু মানুষ দুটো হওয়া চাই।

বিভা যেন কাঠ হয়ে যায়। খোঁড়া পায়ের পাতা দুটো আরও ঠেলে দেয় টোঁকটার ভিতরের দিকে।

সুনীল বলে, ভালোবাসা যখন দুজনের ব্যাপার, একজন একা নিজের মনে ভালোবাসা তৈরি করবে, এটা সম্ভব নয়। দুজনে মিলে ভালোবাসবে। তুমি গল্প উপন্যাসে একজনের যে গোপনে নীরব ভালোবাসার কথা পড়, তার মানেটা কি জানো ? মানেটা হল দেবতা-ভক্তি, দেবতা-উদ্ভাদনা। দেবতা সাড়াও দেয় না কিছু গ্রহণও করে না। ভক্ত নিজের ভাবে হাসে কাঁদে পাগল হয়—পাগল হবার আর কোনো রাস্তা নেই, উপায় কী ! ওই অশরীরী দেবতাকে নিয়ে পাগল হওয়ার আরেক নাম একটা জ্যাস্ত মানুষকে কিছু জানতে না দিয়ে নিজের মনে গোপনে ভালোবাসা। দেবতাদের ভুলে যাও। দেখবে এ ভালোবাসা ন্যাকামির মতো লাগছে।

বিভা চুপ করে থাকে।

কল্পনা অধীর হয়ে ভাবে, বিভাদি কী বোকা ! এমন সুযোগ পেয়েছে কিন্তু সুনীলকে বৃষ্টিয়ে দেয় না যে তোমার নিয়ম খাটে না আমাদের বেলা। কোনো মানেই নেই তোমার নিয়মকানুনের। আমরা অত সব ভেবে কাজ করি না, করতে পারবও না !

অথচ পাঁচ মিনিট পরে কল্পনাই নিয়ম খাটায় নিজের তেরো মাসের ছোটো বোন আলপনার উপর।

লাঠি ধরে খুঁড়িয়ে খুঁড়িয়ে গিয়ে বিভা গাড়িতে ওঠে। সুনীল রান্নাঘরে গিয়ে তার ফেলে-যাওয়া আটার পাতে বসে।

রাত বেজেছে এগারোটা।

আলপনা চট করে পরনের শাড়িটাই একটু ঘুরিয়ে পরে মুখে একটু পাউডার দিয়ে এক গ্লাস জল খেয়ে স্যান্ডেলটা পায়ে ঢুকিয়ে বাইরে যাচ্ছিল, কল্পনা তার হাত চেপে ধরে হুকুমের সুরে বলে, না।

কেন মিছে গোলমাল করবি দিদি ? আমি যাবই। কেউ আমাকে ঠেকাতে পারবে না।

কল্পনা প্রাণপণ শক্তিতে শক্ত করে তার হাত চেপে ধরে রেখে বলে, তাকে ঠেকাচ্ছি না তো ? তোর ইচ্ছে হলে তুই যাবি বইকী। যেখানে খুশি যাবি। এতরাতে হঠাৎ এভাবে গেলে নবীন চটে যাবে, ওর বাপ-মা সুবিধে পেয়ে যাবে বলে নবীনের মন ভেঙে দেবে। কাল সকালে ঠান্ডা মাথায় যাস। রাত কাটা মোটে কয়েক ঘণ্টার ব্যাপার।

আলপনা কয়েক মুহূর্ত স্তব্ধ হয়ে থেকে বলে, হাতে লাগছে দিদি। তোর তো ভীষণ জোর !

কল্পনা তার হাত ছেড়ে দিয়ে বলে, বাঃ, মায়ের পেটের বোনটি যাবে মরতে ? হাতে জোর হবে না ? হাতটা আমার কেলিয়ে গেছে আলপনা। টনটন করছে।

ছাই করছে। দাদার মতো চলতে ফিরতে কথা কইতে শিখেছ তুমি।

কল্পনা "মিস্তি সুরে বলে, কত খেটে দাদা আমাদের খাওয়াচ্ছে পরাচ্ছে বলো। নতুন টিউশনি নিয়েছে আমাদের খরচ চালাতে না পেরে। দাদা অবশ্য পাগলাটে কিন্তু সারাদিন খেটে যা পায় সব আমাদের পিছনে ঢালে তো ? বিয়ে করলে কী হত ভাব দিকি !

দাদা আবার বিয়ে করবে।

কল্পনা দাঁত দিয়ে ঠোঁট কামড়ায়। উনানের ছাই দিয়ে ঘষা চকচকে দাঁত। তাদের বিয়ের জন্য দাদা তোড়জোড় করেছে অথচ নিজে সে কেন বিয়ে করতে চায় না তার কোনো মানেই বোঝে না কল্পনা।

বিয়ে হয় একটা ছেলে আর একটা মেয়ের।

সুনীল মহাপুরুষ নয়, একটা রোজগেরে ছেলে। নিজে সে বিয়ে করবে না, বোনটাকে তাড়াতাড়ি বিয়ে দিয়ে দেবে।

পাশাপাশি ডাল আর ছেঁচকি দিয়ে রুটি খেতে খেতে কল্পনা বলে, পেট ভরে খা। মাথা ঠান্ডা থাকবে।

দুটি ভাত দাও।

মা ঝংকার দিয়ে বলে, ভাত ? জন্মিয়ে আনগে যা চাল, ভাত রেঁধে খাওয়াবো।

সেদিন পড়াতে যাওয়া মাত্র নন্দা বলে, রবীন্দ্রকাব্য নিয়ে আপনার প্রবন্ধটা পড়লাম। সুন্দর লিখেছেন—সবাই খুব প্রশংসা করছে।

আবার নিশ্চেষ্ট করছে।

সেটা রবীন্দ্রনাথ সম্পর্কে কতগুলি আপত্তিকর কথা বলেছেন বলে।

রবীন্দ্রনাথ সম্পর্কে আপত্তিকর কথা ? রবীন্দ্রনাথ সম্পর্কে আমি একটি কথাও বলিনি, তাঁর কাব্যের সমালোচনা করেছি।

শতীন, তার কাগজের সম্পাদক নিখিল আর নন্দার ভাই প্রদ্যোত বসে গল্প করছিল। প্রদ্যোত নন্দার চেয়ে দু-একবছরের বড়ো।

সে বলে, রবীন্দ্রনাথ আর তাঁর কাব্য লোকের কাছে একাকার হয়ে গেছে।

সুনীল বলে, তা হতে পারে। কিন্তু রবীন্দ্রনাথ সম্পর্কে আপত্তিকর কথা বলেছি বললে মানে দাঁড়ায় কবিকে অপমান করেছি। সমালোচনার মতামত নিয়ে লোকের আপত্তি থাকতে পারে, সে আলাদা কথা। রবীন্দ্রকাব্যের নিন্দাও আমি করিনি। বস্তুবাদের সঙ্গে সংঘাতটা রবীন্দ্রকাব্যে কী রূপ নিয়েছে সেটা দেখাবাব চেষ্টা করেছি।

প্রদ্যোত বলে, ওটাই অনেকে নিন্দা বলে ধরে নিয়েছে। বস্তুবাদের সঙ্গে রবীন্দ্রকাব্যের সংঘাত ছিল বলাতেই তাদের আপত্তি। কবিকে নাকি ছোটো করা হয়। তিনি বাদ সংঘাত এ সবের উর্ধ্বে ছিলেন।

সুনীল একটু হাসে, আর কিছুই বলে না।

শতীনের বয়স ষাটের কাছে গিয়েছে। কিন্তু অতটা বয়স অনুমান করা যায় না। সাধারণ হিসাবে এই বয়সের মতো চুলও পাকেনি শরীরও ভাঙেনি।

সে বলে, আমাদের কাগজে একটা লেখা দাও না ?

সুনীল বলে, আমার লেখা কি চলবে আপনাদের কাগজে ? আমি গা বাঁচিয়ে লিখতে পারব না।

শতীনের চেয়ে বয়সে ছোটো হলেও নিখিলকে বুড়ো দেখায়। তার চুল প্রায় সব পেকে গেছে, কতগুলি দাঁত পড়ে গেছে, মুখে শরীরের কোনো স্থায়ী অসুখের ছাপ।

কথাগুলি তার কিছু স্পষ্ট। বোধ হয় বহুকাল সম্পাদকের কাজ করার ফলে।

সে বলে, তুমি আমাদের কাগজ পড় না বোঝা যাচ্ছে।

সুনীল সরলভাবে কথাটা স্বীকার করে বলে, কাগজটা পাই না। বাড়িতে একটা বাংলা কাগজ রাখি, দু-তিনটে কাগজ কেনার ক্ষমতা নেই।

নিখিল বলে, কাগজে যখন লেখা দিচ্ছ। এবার থেকে কমপ্লিমেন্টারি কপি পাবে। কাগজ পড়লে বুঝতে পারবে, আমরাও গা বাঁচিয়ে কথা বলি না। কোনো বাদ বুঝি না, সত্য-মিথ্যা ন্যায়-অন্যায় উচিত-অনুচিত বুঝি। সত্য কথা খাঁটি কথা বলতে ভগবানকেও কেয়ার করি না।

তাহলে বাদও মানেন। বাদ না মেনে সত্যবাদী হবেন কী করে ?

নন্দ ঘড়ির দিকে চেয়ে বলে, নাও, এবার তোমরা ও ঘরে যাও। উনি আবার ঠিক ঘড়ি ধরে বিদায় নেবেন।

প্রদ্যোত ঘর ছেড়ে যেতে যেতে সুনীলের পক্ষ নিয়ে কৈফিয়ত দেয়। বলে, ঘড়িধরা দশটা কাজ থাকলে মানুষ করবে কী ?

নন্দা বলে, কাজ বোলো না—বেশির ভাগ পেটের ধান্দায় অকাজ।

সুনীল বলে, পেটের ধান্দায় হলে সেটা অকাজ হয় বুঝি ?

হয় না ? আপনি কোথায় বই ঘাঁটবার সময় পাবেন, প্রবন্ধ লিখবেন, একটা কাজে আপিসে কেরানিগিরি করছেন, আমায় পড়াচ্ছেন...

তাই বলুন। পেটের ধান্দায় সবাই খাটবে। তবে বেখান্না নিষ্ফল খাটুনি হলে সত্যি আপশোশের কথা। যে দেশে মানুষ পেটের ধান্দায় খাটতে চেয়ে কাজ পায় না সে দেশে এ রকম হবেই।

নন্দা আচমকা অন্য কথা বলে, ছাত্রীকে কিছুতেই তুমি বলতে পারলেন না।

সুনীল বলে, আপনিটাই অভ্যাস হয়ে গেছে।

নন্দা দু-তিনবার তাকে তুমি বলার জন্য সুনীলকে অনুরোধ জানিয়েছিল কিন্তু সুনীল তাকে আপনি বলে এসেছে।

ডাকটা যে গোড়ায় নন্দার কানে বাজত বা এখন বাজে এমন নয়, তুমি বলার অনুরোধটা সে জানিয়েছিল সচেতনভাবে ওটাই উচিত মনে করে।

এদিক দিয়ে সুনীলের হৃদয়হীনতা সে ক্রমে ক্রমে টের পেয়েছে।

সহজ সরল ব্যবহার, মন দিয়ে শুধু পড়ায় না যে বিষয়েই কথা উঠুক খোলাখুলি আলগা আলোচনা করে, হাসির কথায় হাসে, সে নিজের কথা বললে মনোযোগ দিয়ে—মনে হয় যেন সহানুভূতির সঙ্গেই—শোনে, কিন্তু ব্যক্তিগতভাবে হৃদয়গত ঘনিষ্ঠতা দূরে থাক মোটামুটি একটা সম্পর্ক গড়ে তোলা সম্পর্কে তার নিদারুণ অবহেলা, উদাসীনতা !

নন্দার প্রকৃতি হালকা নয়, তার ছেলেমি ন্যাকামি আসে না। কিন্তু জানাচেনা হলেই মানুষের সঙ্গে কমবেশি হৃদয়গত সম্পর্ক গড়ে উঠবে, এতেই সে অভ্যস্ত।

সেটা যে প্রেমাত্মক সম্পর্কই হবে এমন কোনো কথা নেই।

বাপ-ভাই আত্মীয়-অনাত্মীয় শত্রুমিত্রের সঙ্গে হৃদয়গত একটা আকর্ষণ-বিকর্ষণের সম্পর্ক থাকে না মানুষের ?

সুনীল যেন ও রকম কোনো সম্পর্কই গড়ে উঠতে দিতে নারাজ।

নন্দা ফ্রয়েডের নামটাই শুনছে। আর শুনছে যে ওই ভদ্রলোকের থিয়োরি অনুসারে মানুষের হৃদয়মন নাকি কামময়—স্নেহ-মায়া-প্রেম-ভালোবাসা থেকে বিরাগ-বিতৃষ্ণা-নিষ্ঠুরতা-হিস্টিরিয়া সব কিছুর পিছনে ওই কামের শক্তি।

কে জানে এ সব থিয়োরির কী মানে। একটু মাথা ঘামাবার তাগিদও সে বোধ করে না। যদিও তার বন্ধু লীলা কয়েক বছর ধরে ফ্রয়েডকে নিয়ে মেতে আছে এবং তাব ধারণা জন্মে গেছে যে মানুষের সব কাজ আর অকাজের মানে সে বুঝে গিয়েছে। বিদ্যাটা প্রয়োগ করে তার চলাফেরা ওঠা বসার ফ্রমেডীয় ব্যাখ্যা তাকে বুঝিয়ে না দিতে পারলে যেন লীলার শাস্তি নেই।

লীলা এক ধরনের বিকাবগ্রস্ত মানুষের কথা বলে, মেয়ে হলে পুরুষ আর পুরুষ হলে মেয়েদের সম্পর্কে হৃদয়টা ভোঁতা করে রাখাই নাকি তাদের বিকারের প্রধান কথা।

সুনীল কি ওই রকম বিকৃত মানুষ ?

কিন্তু একটা বিকারগ্রস্ত মানুষ এ রকম ধীর স্থিতি সংযমী বিবেচক হয় কী করে, এত কাজ আর দায়িত্ব পালন করে কী করে ? জীবনের নীতিতে এমন কঠোর নিষ্ঠা, মানুষের স্বাভাবিক দুর্বলতা সম্পর্কে এমন উদারতা, এত দায় ও হাজ্জামা সত্ত্বেও দুঃখ-দুঃশিচিন্তা বিষণ্ণতার ধার না ধারা কী করে সম্ভব হয় ?

অথচ চাকরিও করে কালোবাজারি অঘোরের আপিসে।

তিন মাস শুধু ঘড়ি ধরে একঘণ্টা পড়াতে এসে সুনীল দলিত মথিত করে দিয়েছে নন্দার হৃদয়-মন।

প্রথম প্রথম মনে হয়েছিল এটা বুঝি সুনীলের বাঁকা কায়দা, এইভাবে তাকে বুঝি অগ্রাহ্য করে অবহেলা দেখিয়ে—ইংরাজি বিদ্যা আয়ত্ত করতে ছাত্রী হিসাবে তার কাছে পড়লেও তার যে একটা হৃদয় আছে সে বিষয়ে উদাসীন থেকে অবজ্ঞা জানিয়ে—তাকে কায়দা করতে চায় সুনীল।

অনেকে অনেকরকমভাবেই তো কায়দা করতে চায় তাকে।

সেও কয়েকদিন খুব গম্ভীর হয়েছিল, অবজ্ঞা আর উদাসীনতা দেখিয়েছিল।

সুনীল এতটুকু ভাবান্তর দেখায়নি, শুধু প্রশ্ন করেছিল, পড়াতে মন বসছে না ? শরীর খারাপ ? এ সময় একদিন দুদিন পড়াশুনা কাজকর্ম বন্ধ রাখাই ভালো।

নন্দার সাধ হয়েছিল একটা চাপড় কষিয়ে দেয় সুনীলের গালে !

পুরুষের হৃদয়ে সাড়া জাগাবার জন্য মেয়েদের জানা-বোঝা পুরানো-নতুন কোনো আঘাত তার মর্মের বাইরের দ্বারেরও পৌঁছায় না।

মেয়েরা যেন মানুষ হিসাবেই তার কাছে গ্রাহ্য। মেয়ে হিসাবে সে গ্রাহ্যই করে না তাদের।

তার পরেই মনে হত, ঠিক তা তো নয় ব্যাপার।

মেয়ে বলে তাকে গ্রাহ্য করে বলেই তো তার কোনো রকম মেয়েলিপনাকে প্রশ্রয় দেয় না সুনীল।

জন্ম হয়ে যাওয়ার মতো একটা বিত্ৰী মনোভাব নিয়ে সে হঠাৎ জিজ্ঞাসা করেছিল, দিনরাত খেটেখুটে পড়ছি, আপনিও এত কষ্ট করে পড়াচ্ছেন, ইংরাজিতে পাণ্ডিত্য দেখিয়ে আমার লাভ কী হবে ?

সুনীল বলেছিল, এই তো। সেদিন আপনি ইংরাজিতে পাণ্ডিত্য চেয়ে আমায় মাস্টার রাখলেন। তিন মাস আগে। আপনার বাবার কাগজে চাকরি করবেন বললেন। তিন মাসে উদ্দেশ্য হারিয়ে গেল আপনার ? একেবারে ভুলে গেলেন কী জন্য আমার কাছে ইংরাজি জার্নালিজম শিখছেন ?

চমকিত হয়ে গিয়েছিল নন্দা।

জার্নালিজম শিখছি ?

তাছাড়া কী ? আপনার বাবার কাগজ হোক বা অন্যের কাগজ হোক, আপনি কাগজে কাজ করার জন্য ইংরাজি শিখছেন। আমিও আপনাকে সেইভাবেই শেখাচ্ছি।

নন্দা প্রায় খেপে গিয়ে বলেছিল, আমি দুজন সাব-এডিটরকে যেচে কাজ দিয়েছি জানেন ? তারা রাস্তায় রাস্তায় ঘুরে বেড়াচ্ছিল। আমার কাছে অনেকে কাজের জন্য আসে, তাদের আমি পাশা দিই নাকি ? ওরা অসহায় হয়ে পড়েছে কিন্তু আমার কাছেও আসেনি। এই জন্য ডেকে এনে আমি ওদের কাজ দিয়েছি।

সুনীল ব্যঙ্গের সুরে—হ্যাঁ ব্যঙ্গের সুরেই—বলেছিল, আমিও তো মাসে পঁচিশটা টাকার কাজের জন্য যেচে তোমার কাছে এসেছিলাম।

নন্দার খেয়ালও হয়নি যে সুনীল তাকে তুমি বলেছে। অনেকবার অনুরোধ করেও যাকে আপনি থেকে তুমিতে নামাতে পারেনি, সে নিজে থেকেই তাকে তুমি বলেছে।

খেয়াল সে অবশ্য করতেই পারে না। যদি পারত তবে সুনীলকে তুমি বলাবাব জন্য দু-তিনবার যেতে যেচে অনুরোধ জানাত না।

সুনীল ভাবে, ভাগ্যে সকালবেলা একঘণ্টা একে পড়ানোর কাজ নিয়েছি। রাত্রে দু-একঘণ্টা নিশ্চয় ঘুমায়। নইলে আমায় নাজেহাল করে ফেলত।

নন্দা ভাবে, কী দুর্ভাগ্য, এই নারী-বিদ্বেষী লোকটাকেই মাস্টার রাখলাম। এমনভাবে ইংরাজি শেখায় যেন মেয়েদের শিক্ষিত করাটা দয়াদাক্ষিণ্য দিয়ে করার কাজ।

পরদিন থেকে সুনীল আবার তাকে আপনি বলা শুরু করে। স্বেচ্ছায় নয়, আগের দিন যেমন আপনা থেকে তুমি বেরিয়ে এসেছিল আজ তেমনি আপনা থেকেই আপনি বেরিয়ে আসে।

নন্দার জীবনকাহিনি জানবার জন্য সুনীল বিন্দুমাত্র কৌতূহল দেখায়নি।

তবে, নন্দা নিজে থেকে যা জানিয়েছে সে মন দিয়ে শুনছে।

কোনো প্রশ্ন বা মন্তব্য করেনি।

নন্দা ভেবেছিল, বয়স বেশি হলেও বেশভূষা থেকে সুনীল তাকে কুমারী বলেই জানে।

তার বিয়ে হয়েছিল, সে পাঁচ-ছবছর স্বামীর ঘর করেছে। তার স্বামী যুদ্ধে সৈনিক হলেও যুদ্ধের সংবাদ সরবরাহ করার কাজে গিয়ে মারা পড়েছিল। বোমা বা গুলিগোলা খাওয়ার বদলে বুনো একটা মেয়ের সঙ্গে পিরিত করতে গিয়ে, তার জঙ্গুলে অসভ্য স্বামীর সেকলে ভুজলির ঘায়ে, মারাত্মক রকম আহত হয়ে সে মারা গিয়েছিল।

নন্দার ধারণা ছিল এ সব কাহিনি শুনে সুনীল চমকে যাবে।

সুনীল শাস্তভাবে শুধু বলেছিল, এ রকম কত ব্যাপার যে ঘটেছে ! অন্য অনেক রকম হিসাব তো আছেই, যুদ্ধের জন্য কত লাখ মেয়ে যে স্বামী হারিয়েছে।

গা জ্বলে গিয়েছিল নন্দাব।

ছেলে হারায়নি ?

হারিয়েছে বইকী। ছেলে হারানো মেয়েদের সয়। ভেলেমেয়ে বাইপ্রোডাক্ট তো। স্বামী হারালেই সর্বনাশ।

নন্দা খানিকক্ষণ কথা বলতে পারেনি। তার বিয়ে হয়েছিল, সে স্বামীর সংসার করেছে, এ সব শুনে না হয় চমক নাই লাগল সুনীলের, মৃত স্বামীর বুনো মেয়ের সঙ্গে পিরিত করতে গিয়ে প্রাণ হারানোর কাহিনি যে সে এমন অনায়াসে শুনিয়ে দিল, এতে একটু আশ্চর্য হওয়া তো উচিত ছিল তার !

গলার সুব পালটে সে বলেছিল, মানুষটা খারাপ ছিল ভাববেন না কিছু।

না। যুদ্ধের ব্যাপারে জড়িয়ে ঘরবাড়ি ছেড়ে পাহাড়ে জঙ্গলে গিয়ে একজন একদিন একটা অনাচার করেছিল, এ থেকে কী বিচার করা যায় মানুষটা ভালো না খারাপ ছিল ? তাছাড়া আপনিও হয়তো ভানন না ঠিক কী ঘটেছিল। এমনও তো হতে পারে যে আপনার স্বামী বুনো মেয়েটাকে মজাতে যাননি, বাঁচাতে গিয়েছিলেন।

নন্দা স্তম্ভিত হয়ে গিয়েছিল সত্যিই। বড়ো বড়ো চোখ করে তাকিয়েছিল।

তার ভাব লক্ষ করে নিজের বক্তব্য আরেকটু স্পষ্ট করা উচিত মনে করেছিল সুনীল।

মানুষ হঠাৎ একটা অপকর্ম করে বলতে পারে না তা নয়। কিন্তু এটা স্রেফ একটা আলগা থিয়োরি। কী ঘটনা সঠিক না জেনে, অকাট্য প্রমাণ না পেয়ে, কোনো মানুষ সম্বন্ধে সিদ্ধান্ত করা চলে না যে সত্যিই সে অন্যায় কাজটা কবেছে। ও রকম আন্দাজি বিচার মানুষ নিজের সুবিধার জন্য করে। বিনা বিচারে আটক আইনটা যেমন দেশের ভালোর নামে শাসকদলের সুবিধার জন্য, আন্দাজে একটা মানুষকে খারাপ ভাবাও তেমনি নিজের সুবিধার জন্য।

নন্দা উত্তেজিত হয়ে বলেছিল, দেখুন, এমন আশ্চর্য ব্যাপার আমিও মনে মনে বিশ্বাস করতে পারছিলাম না। আমিও তো ভালো কবেই জানতাম মানুষটাকে। পাঁচ বছর একসাথে ঘর করেছে ! হঠাৎ ও রকম তার মতি হয় কী করে ? আপনি যে আমার কী উপকারটা করলেন আজ !

পরদিন দেখা গিয়েছিল থান পরে নন্দা বিধবার বেশ ধারণ করেছে।

কেমন দেখাচ্ছে ?

সুনীল প্রশান্ত মুখে তাকিয়েছিল, কিছু বলেনি।

ছেলেমানুষি ভাবছেন তো ?

কেন তা ভাবব ? আপনার কাছে এটা কত গুরুতর ব্যাপার জানি না আমি ?

কয়েকদিন বাদেই আবার সে আগের মতো কুমারী বেশ ধারণ করেছে।

পড়ার তাগিদে সকলকে অন্যঘরে পাঠিয়ে দিলেও নন্দা পড়ায় মন দিতে পারে না।

তাড়াতাড়ি এগিয়ে যাবার জন্য সে যে খুব খাটছে সেটা স্পষ্টই বোঝা যায়। তিন মাস আগেও মুখে তার কমনীয়তা ভেসে থাকত। সেটা প্রায় উপে গেছে। এসেছে একটু শুকনো ভাব—দৃঢ়তাব্যঞ্জক বুদ্ধতা।

বড়ো বড়ো পরীক্ষার আগে ছেলেমেয়েদের কাঁচা মুখে যে ভাবটা আসে।

নিজে থেকে কোনোদিন তার কোনো ব্যক্তিগত বিষয়ে সুনীল কৌতূহল প্রকাশ করে না। বোধ হয় পড়াসংক্রান্ত ব্যাপার বলেই সে আজ জিজ্ঞাসা করে, কী অসুবিধা হচ্ছে ?

অসুবিধা ? এখন তো অসুবিধা নেই। ক-দিন ভারী অস্বস্তি বোধ করছিলাম, তাই আবার আগের মতো বেশ করেছি।

আমি পড়ার কথা বলছিলাম। মন বসছে না কেন ?

নন্দা আনমনে একটু ভাবে।

মন বসছে না কেন শুনবেন ? খবরের কাগজটা আসলে আমার—আমি কাগজটার মালিক। শচীনবাবুর নয় ?

না। আমার স্বামী কাগজটা বার করেছিলেন।

নন্দা যেন খানিকটা আনমনা অবস্থায় ধীরে ধীরে ‘দি পিপলস ভয়েস’ কাগজটি বার করার কাহিনি বলে যায়। তার কাছে এ ভার মন থেকে না নামালে পড়ায় তার মন বসবে না জেনে, সুনীলও নীরবে শুনে যায়।

দেশ ভাগ হয়ে স্বাধীনতা আসবার সময় প্রমোদের খবরের কাগজ বার করার ঝোঁক চাপে। এই তো উপযুক্ত সময়। যে বিরাট পরিবর্তন ঘটতে চলছে চারিদিকে, ভবিষ্যতের যে সম্ভাবনা দেখা দিয়েছে তা যেন কোনো দলের স্বার্থে ব্যক্তির স্বার্থে ব্যাহত না হয়, ক্ষুণ্ণ না হয়।

আজকের দিনেই সবচেয়ে বড়ো দরকার একটি নির্ভীক নিরপেক্ষ সংবাদপত্রের, দেশের মানুষের স্বার্থ ছাড়া, যে কাগজ আর কিছুই বড়ো করে দেখবে না।

যে কাগজ সহজ স্পষ্ট পরিষ্কার ভাষায় দেশের লোকের কাছে খুলে ধরবে সমস্ত দল আর নেতৃস্থানীয় ব্যক্তির স্বরূপ, তাদের প্রত্যেকটি কার্যকলাপের আসল উদ্দেশ্য, চিনিতে দেবে যে দেশের শত্রু কে মিত্র, তীব্র তীক্ষ্ণ আঘাতে নস্যাত করে দেবে মতলববাজ সুবিধাবাদী মানুষদের।

কিন্তু কোন ভাষার কাগজ ? বাংলা না ইংরাজি ?

দুরকম হলেই ভালো। কিন্তু সেটা যখন সম্ভব নয়, ইংরাজিতে কাগজ বার করতে হবে প্রথমে। এ কাগজ তো কেবল বাংলা দেশের স্বার্থ দেখবে না—সারা ভারতের জনসাধারণের স্বার্থরক্ষাই হবে এ কাগজের ব্রত।

এই কাগজ বার করা নিয়ে সংঘাত লাগে বড়ো ভাই বিনোদের সঙ্গে। ভাগাভাগি ছাড়াছাড়ি হয়ে যায় দুজনের—সর্বস্ব পণ করে প্রমোদ এই কাগজ বার করে।

সঙ্গে ছিল আরেকজন বন্ধু। তারা টাকা ঢালেনি, কিন্তু অন্যভাবে সাহায্য করেছিল।

আবার বন্ধুভাবে শত্রুতা করেছিল অনেকে।

নন্দা চুপ করলে সুনীল বলে, কাগজটা বার হবার সময় একটা হইচই হয়েছিল মনে আছে। তারপর আর বিশেষ কিছু শুনিনি।

নন্দা সায় দিয়ে বলে, লোকে তেমনভাবে নিল না কাগজটা। উনি ভেবেছিলেন প্রত্যেকটা কাগজ একটা দলের হয়ে একপেশে কথা বলে, লোকের মাথা গুলিয়ে দেয়, এ রকম একটা অদলীয় স্পষ্টবাদী কাগজ লোকে হইচই করে নেবে। কিন্তু তা হল না। এখনও ওই টেনে টেনে কোনোরকমে চলছে। আমিও ঠিক বুঝিনে ব্যাপারটা।

সুনীল ধীরে ধীরে বলে, অদলীয় মানুষ হয় না, অদলীয় কাগজও হয় না। মানুষ হোক কাগজ হোক, একটা পক্ষ নিতেই হবে।

কেন ? আমি তো রাজনীতি নিয়ে মাথাই ঘামাই না, সম্পূর্ণ নিরপেক্ষ আছি। অবশ্য আমার যদি মানুষ বলে গণ্য না করেন—

সুনীল শান্তভাবে হাসে।

নিজেকে আপনি নিরপেক্ষ মনে করেন। কিন্তু মনে করলেই তো সেটা সত্যি বা সম্ভব হয় না। রাজনীতি নিয়ে মাথা না ঘামালেও রাজনীতি বাদ দিয়ে আপনার চলতেই পারে না, আপনার জীবনে রাজনীতি এঁটে থাকবেই। আপনি একটা কাগজের মালিক কিন্তু ধরে নেওয়া যাক আপনি কাগজ পর্যন্ত পড়েন না। কিন্তু শোনেন তো চালের দর কোথায় উঠেছে ? লোকে না খেয়ে মরছে ? উদ্‌বাস্থুরা কী রকম কষ্ট পাচ্ছে ? কত মানুষ বেকার বসে আছে ? সব কিছু কালোবাজারের গ্রাসে গেছে ? দেশের লোকের সভায়, শোভাযাত্রায়, লাঠিগুলি চলছে ? শূনে নিশ্চয় গা জ্বালা করে আপনার। তার মানেই পক্ষ নিলেন।

গা জ্বালা করলেই পক্ষ নেওয়া হল ?

হল বইকী। আপনার ঠেকছে কোথায় জানেন ? দলের পক্ষ নেওয়া মানে আপনি ধরে রেখেছেন আন্দোলন করা, সোজাসুজি আন্দোলনে যোগ দেওয়া। কোনো দল সাধারণ লোকের জন্য ন্যায্য দাবি তুললে, ঘরের কোণে বসে মনে মনে সায় দিলেও আপনি পক্ষ নিলেন। মনে মনে সায় দেওয়াটা কাজে প্রকাশ পাবে—যত সামান্য হোক তুচ্ছ হোক কাজটা। ঘরের কোনায় থেকে নিজের ভাইবোনকে কথায় কথায় মনের কথাটা জানালেন—তার মানে দাঁড়াল কী ? ওই দলের হয়ে আপনি প্রচার করলেন।

সুনীল ঘড়ির দিকে তাকায়। তারপর তাকায় নন্দার মুখের দিকে।

বলে, আজ ইংরাজি পড়া থাক, যা বলছি সেটাই পড়াই। বেশ একটু ধাঁধা লাগিয়ে দিয়েছি মনে হচ্ছে, কথাটা স্পষ্ট করা উচিত। পক্ষ যে মানুষকে নিতেই হবে তার আসল মানে হল এই যে, সমস্ত মানুষ দুটো ভাগে ভাগ হয়ে আছে—শোষক আর শোষিত। এর একটা ভাগে মানুষকে পড়তেই হবে। রাজনৈতিক দলও আসলে আছে দুটোই—শোষকের দল আর শোষিতের দল।

কিন্তু দল তো অনেকগুলি।

দুটো ছাড়া বাকি সব উপদল, সুবিধাবাদী দল। যতই বড়ো বড়ো বুলি কপচাক আর নিজেকে স্বাভাব্য দেখাবাব চেষ্টা করুক, হয় এ-পক্ষ, নয় ও-পক্ষের স্বার্থে চলতেই হবে। একটা শ্রেণি উপরে চেপে আছে, আরেকটা শ্রেণি উঠছে, আসল সংগ্রাম এই দুটো শ্রেণির মধ্যে। যেখানে যেমন রূপ হোক সংঘাতের, স্পষ্ট হোক, আড়াল করা হোক, সব সংঘাতের পিছনে এই দুই শ্রেণির নেতৃত্ব।

চাষিতে জমিদারে যেখানে মারামারি ?

জমিদার মালিক শ্রেণির ঘাঁটি। চাষি যখন জমিদারের সঙ্গে লড়ে আসছে সে তখন শ্রমিক শ্রেণির পক্ষ নিয়ে মালিক শ্রেণির সঙ্গে লড়ছে।

নন্দা একটু বিস্ময়ের সঙ্গেই বলতে যায়, আপনি তো রাজনীতির ধার ধারেন না।

সে কী ? এতক্ষণ তাহলে কী বোঝালাম আপনাকে ? রাজনীতির ধার প্রত্যেককে ধারতেই হবে। রাজনীতি মানেই তাই।

নন্দা একটু বিরক্ত হয়ে বলে, আহা, আমি বলছি সোজাসুজি রাজনীতি করার কথা। তা তো আপনি করেন না ? আপনি আছেন চাকরি আর দেশ-বিদেশের সাহিত্যচর্চা নিয়ে। এ সব রাজনীতির কথা জানলেন কী করে ?

সুনীল হাসিমুখেই বলে, এ সব আজকাল সব কিছুর অ, আ, ক, খ হয়ে গেছে। সাহিত্যচর্চা বিজ্ঞানচর্চা যাই চর্চা করুন, একটু সাধারণ জ্ঞান জন্মে যাবেই।

আমার তো জন্মায়নি ?

আপনাকে চেষ্টা করে উলটো জ্ঞানটা শেখানো হয়েছে বলে। এটাই কিন্তু প্রমাণ যে শ্রেণিযুদ্ধের মোট কথাটা সাধারণ জ্ঞান দাঁড়িয়ে গেছে। আপনি পাছে সে জ্ঞানটুকু পেয়ে যান সে জন্য আপনাকে বিভ্রান্ত করতে রাজনীতির ছোঁয়াচ বাঁচানো যায়, নিরপেক্ষ থাকা যায়, এ সব আপনাকে শেখাতে হয়।

ঘড়ি ধরে বিদায় নেবার জন্য সুনীল উঠে দাঁড়ালে নন্দা তাকে আবেকটা মনের কথা জানিয়ে বসে।

বলে, আমি এমন তাড়াহুড়ো করে ইংরাজি শিখছি কেন জানেন ? আমার কথাটা বলি আপনাকে। কাগজটা ভালো চলছে না, বাবা মাঝে মাঝে তুলে দেবার কথা বলেন। কে জানে, কিছুদিন পরে বাবা হয়তো একেবারে বঁেকে বসলে তুলেই দেবেন কাগজটা। আমি তাহলে নিজে কাগজটা চালাবার চেষ্টা করে দেখব।

সুনীল সহজভাবে বলে, কাল থেকে আমি তোমাকে লিখতে শেখানোর দিকে জোর দেব। ছোটো ছোটো ঘটনা খবরের মতো লিখবে, ছোটো ছোটো প্রবন্ধ লিখবে, বাংলা কাগজ থেকে অনুবাদ করবে।

নন্দা আশ্চর্য হয়ে বলে, এই তো অনায়াসে তুমি বেরিয়ে এলো ?

সুনীল বলে, অনায়াসে বলেই বেরিয়ে এল। আমি চেষ্টা করে কাউকে তুমি বলি না।

রেবার চেয়ে বয়সে অনেক বড়ো নন্দা। রেবাকে তুমি না বলার জন্য সে আঘাত পেয়েছে, অপমান বোধ করেছে—কিন্তু তাকে আপনি না বলে কথা বলতে পারে না সুনীল।

বাড়ির দিকে হাঁটতে হাঁটতে সুনীল ভাবে, অনুমান তার মিথ্যা হয়নি। যাদবের মেয়েকে পড়ানোর বদলে পাঁচ টাকা কম বেতনে বেশি পথ হেঁটে নন্দাকে পড়াবার কাজ সে বেছে নিয়েছিল সেটা নিছক অকারণ নয়।

নন্দার গম্ভীর ভাব ও ভারি ক্লি চালচলন দেখেই এটুকু সে অনুমান করে নিয়েছিল যে সে খেয়ালি নয়, জীবনকে সে গুরুত্ব দেয়, হালকা হওয়া তার পোষাবে না।

শ্রদ্ধাভক্তি ভয়ের সঙ্গে প্রেমকে গুলিয়ে ফেলার মতো ভাবপ্রবণ সে কখনও হবে না।

রেবা যেমন অনায়াসে গুলিয়ে দিয়েছে।

এবং তাকে জ্বালাতন করে মারছে, তার মন জয় করার অভিযান শুবু করে।

আঘাত দিয়ে পর্যন্ত তার ভুল ভাঙা যায় না। বরং আঘাতের প্রতিক্রিয়ায় মন আরও বেশি করে তাকে আঁকড়ে ধরার চেষ্টা করে।

সে নিষ্ঠুর। কাজেই তাকেই সে ভালোবাসে। এ নিষ্ঠুর হৃদয় জয় না করতে পারলে বেঁচে থেকে কী হবে ?

এ রকম মেয়ের সঙ্গে আলাপ-পরিচয় হওয়াও এক বিপদের কথা।

নন্দার সঙ্গে নিশ্চিত মনে মেলামেশা করা চলে।

আজ তার কথা শুনে সে আরও নিশ্চিত বোধ করছে। নন্দার স্বামী একটা ইংরাজি কাগজের মালিকানার দায় চাপিয়ে রেখে গেছে তার ঘাড়ে। এ দায় তুচ্ছ করার সাধ্য তার নেই।

প্রমোদ বেঁচে থাকতে কাগজটার পিছনে যথাসর্বস্ব ঢালা হচ্ছে, শেষ পর্যন্ত তাদের অবস্থা কী দাঁড়াবে এদিকটা নিয়েই তো যেটুকু সে মাথা ঘামাত, কাগজটার জন্য বিশেষ মাথাব্যথা ছিল না।

প্রমোদ মারা যাবার পর বাপের উপর কাগজটা চালাবার দায়িত্ব ছেড়ে দিয়ে সে খুব বেশি দায়িত্ব বোধ করেনি।

সে মেয়েমানুষ, খবরের কাগজ চালাবার ব্যাপারে তার কী করার আছে ?

কিন্তু কাগজ ভালো না চলায় বাপ যেই কাগজটা বন্ধ করে দেবার কথা বলেছে তখনই টনক নড়ে গেছে নন্দার। সর্বস্ব দিয়ে স্বামী তার কাগজটি খার করেছিল, যে কাগজটি চালাবার জন্য প্রাণপাত চেষ্টা করেছিল, আজ সে কাগজ তুলে দেবার কথা ভাবছে তার বাবা ?

এ কী সর্বনাশের কথা !

কাগজটা বন্ধ করা তার কাছে সর্বনাশের শামিল বলেই এবার সে নিজে দায়িত্ব সম্পর্কে সচেতন হয়েছে। হোক সে মেয়েমানুষ, সে ছাড়া আর কে আছে যে দরদ দিয়ে কাগজটা চালু রাখার চেষ্টা করবে ?

নিজেকে তৈরি করতে তাই সে উঠে পড়ে লেগেছে। শতীন যদি শেষ পর্যন্ত কাগজ চালাবার ভার বইতে অস্বীকার করে নিজেই সে দায় ঘাড়ে নেবে। প্রাণপণে চেষ্টা করে দেখবে কাগজটা বাঁচিয়ে রাখতে পারে কি না।

এমন যার দায়িত্ববোধ সে কখনও দৃঢ়চেতা শক্ত সমর্থ একটা পুরুষের সংস্পর্শে এলেই প্রেমে পড়ার জন্য ব্যাকুল হয়ে ওঠে না।

কিন্তু প্রেম সম্পর্কে তার নিজের এমন বিতৃষ্ণ কেন ?

অনেকদিন পরে আজ আবার প্রশ্নটা তার মনকে বিশেষভাবে নাড়া দিয়েছে। নন্দা সহজে তার প্রেমে পড়বে না এ বিষয়ে সুনিশ্চিত হয়ে সে যে বিশেষভাবে স্বস্তি বোধ করছে—এটাই তুলে বড়ো করে ধরেছে প্রশ্নটাকে।

নারীপুরুষের পরস্পরের আকর্ষণ মোটেই তুচ্ছ বাজে ব্যাপার নয় তার কাছে, নারীদেহ বর্জন করেই পুরুষের শুদ্ধ পবিত্র উচ্চতর জীবন সম্ভব, এই ধ্যানবাজিতেও সে বিশ্বাস করে না। নারীপুরুষের মিলন সুস্থ স্বাভাবিক জীবনেরই একটা অঙ্গ। বৃহত্তর জীবনের জন্য বড়ো দায়িত্ব পালনের প্রয়োজনেই কেবল সংযমের মানে হয়, নিজের আর আধ্যাত্মিক প্রয়োজনের ফাঁকির খাতিরে সংযমের নামে আত্মপীড়নকে সে অসুস্থতা, বিকারগ্রস্ততা বলেই জানে।

নৈতিক কোনো কুসংস্কারের ধার সে ধারে না।

অথচ প্রেমের নামেই বিমুখ হয়ে ওঠে তার হৃদয়-মন। টিউশনি খুঁজতে গিয়ে পর্যন্ত সে এমন ছাত্রী বেছে নেয়, যে তার প্রেমে পড়ে যাবে এ আশঙ্কা অপেক্ষাকৃত কম।

আরও একটা কথা আজ খেয়াল হয় সুনীলের। খেয়াল হয় যে ঘটনাচক্রে যে দুটি টিউশনির খোঁজ পেয়েছিল, দুটিতেই ছিল মেয়েকে পড়াবার প্রয়োজন। তার মধ্যে একজনকে সে বেছে নিয়েছিল। কিন্তু এদের দুজনকেই বাতিল করে কোনো ছেলেকে পড়াবার টিউশনি খুঁজে নেবার কথা তো তার মনেও আসেনি ?

তার বিতৃষ্ণা কি তবে প্রেম সম্পর্কে নয় ? রেবার মতো উমার মতো মেয়েরা যেটাকে প্রেম মনে করে সেটাই তার অপছন্দ ?

কিন্তু মেয়ে তো এরা বদ নয়, পাকা ঝানু নয়। প্রেম তো তামাশা নয় এদের কাছে। ভুল বুঝে থাকতে পারে রেবা, কিছুদিন বাদে নিঃশেষ হয়ে যেতে পারে তার প্রেম, কিন্তু এই প্রেমকে আশ্রয় করে তুবড়ির মতোই তো প্রচণ্ড শক্তিতে উৎসারিত হয়ে উঠেছে সরল ছেলেমানুষ মেয়েটার আবেগ, কল্পনা, স্বপ্ন, অনুভূতি, সব কিছু।

হয়তো এই উদ্ভাদনাই প্রেম—প্রেম ব্যাপারটাই এ রকম, সে পছন্দ করুক আর না করুক। এই রকমই রীতিপ্রকৃতি প্রেমের।

সে যে গুরুগম্ভীর ভারিক্ণি প্রেমের কথা ভাবে সেটাই একটা অসম্ভব অবাস্তব কল্পনামাত্র।

প্রতিদিনের মতো আজও রেবা দাঁড়িয়ে আছে বাড়ির সামনের চার-পাঁচহাত লম্বা-চওড়া বাগানটুকুতে।

আজকাল রেবা শাস্ত্র সংযতভাবে কথা বলে, একটু উদাসীনভাবে। মুখে থমথমে ডাবটুকু বজায় থাকে কিন্তু সেটা ক্ষোভ বা অভিমানের জন্য মনে হয় না, এটা যেন তার নীরব ভর্ৎসনার প্রতীক।

আমার বইটা এনে রেখেছেন ?

ওদিকে যাবার সময় পাইনি।

রেবা অভিমান করে না।

বলে, সত্যি, সারাদিন যা খাটুনিটা ঝাটেন। আবার টিউশনিটা কেন নিতে গেলেন বলুন তো ? বাড়ির লোকেরাই নয় একটু কষ্ট করত।

সুনীল বলে, কষ্ট কী আর ওরা করছে না। কষ্ট করাটা নিশ্চল হচ্ছে এই যা আপশোশ। তুমি এক কাজ করো না কেন ? লাইব্রেরি থেকে নিজে বই এনে তো পড়তে পার।

তার মুখে হঠাৎ আজ তুমি শুনে রেবা যেন চমকে ওঠে।

বোঝা যায় ভেতরে তার তোলপাড় করে উঠেছে।

কোনোমতে বলে, ও সব বই কি সাধারণ লাইব্রেরিতে পাওয়া যায় ?

তা বলতে পারব না। বইটা আমি আনব, কবে আনব বলতে পারছি না। আনলে তোমায় পড়তে দেব।

যেখানটা বুঝব না বুঝিয়েও দিতে হবে কিন্তু।

৫

বাড়ির মানুষের কাছে রহস্যময় হয়ে উঠেছে অনিলের চালচলন।

দিন দিন কেমন রোগা আর মনমরা হয়ে যাচ্ছে ছেলেটা। সর্বদা অন্যমনস্ক ভাব, মুখে একটা চিন্তাক্লিষ্ট বুদ্ধতার ছাপ।

সর্বদা বিরক্ত হয়ে আছে, যখন তখন কারণে-অকারণে ভয়ানক চটে যায়। পড়াশোনা করে না, কোনোদিন বাইরে বাইরে কাটায়, কোনোদিন গোমড়া মুখে ঘরের কোনোয় মুখ গুঁজে থাকে।

জিজ্ঞাসা করলে কিছু বলে না।

দরদ দেখিয়ে দুবারের বেশি তিনবার কিছু জিজ্ঞাসা করলে একেবারে খেঁকিয়ে ওঠে।

এ সমস্তের সঙ্গে বেড়ে যাচ্ছে তার টাকার চাহিদা।

হঠাৎ মাকে বলে, আমায় দশটা টাকা দাও।

দশ টাকা ? দশ টাকা কোথা পাব ?

আমার ভীষণ দরকার। বাবার কাছে নয় দাদার কাছ থেকে চেয়ে দাও।

দাদা দেবে না। ওঁর কাছে আমি চাইতে পারব না, তুমি চাওগে।

আমার ভীষণ বিপদ।

বিপদ ?

মা চমকে গিয়েও ধৈর্য ধরে বলে, কী বিপদ বলো ! সত্যিসত্যি বিপদ হলে কী দশটা টাকার জন্য আটকাবে ? তোর দাদাই ব্যবস্থা করে দেবে।

আমি বলতে পারব না। দিলে দেবে, না দিলে দিয়ে না।

গৌরী অনেক ভেবেচিন্তে নিশ্বাস ফেলে বলে, আচ্ছা বেশ দিচ্ছি এবারের মতো। তুই আমাকে শেষ করবি অনিল !

কার কাছে চাইবে ? বাবার কাছে ?

চেয়ে এনে দিতে পারব না। লুকিয়ে দশটা টাকা নিয়ে আসছি—হিসেবে কম পড়লে যখন জিজ্ঞেস করবে বলব আমার দরকার ছিল, নিয়োজি।

অনিল সঙ্গে সঙ্গে জোর দিয়ে বলে, না না, ছি ! আমার জন্যে চুরি করবে ? টাকা চাই না আমার।
গৌরী ব্যাকুলভাবে বলে, বিপদের কথাটা বলো না গিয়ে সুনীলকে ? তোরা যত ওকে কঠিন
ভাবিস, ও তত কঠিন নয় ! সত্যি মুশকিলে পড়েছিস বুঝলে ব্যবস্থা করে দেবে।

দাদাকে সে কথা বলা যায় না।

একটা কিছু বানিয়ে-টানিয়ে বল না গিয়ে।

মিছে কথা বলতে পারব না।

মিছে কথা বলতে পারবে না অনিল !

মার্কিনি সিনেমা দেখে মাথায় রক্ত চড়ে যাওয়ায়—ছায়া, সন্ধ্যারাত্রে বাড়ি ফিরতে চায়নি,
কানেক দুল খুলে দিয়ে অনিলকে বলেছিল, টাকা জোগাড় করো।

পৌরুষে একটু বেঁধেছিল অনিলের কিন্তু নীতিবোধে বাধেনি।

দুল বিক্রির টাকায় উদ্ভ্রান্ত অশান্ত মানসিক বোগের দুঃখ তারা মছন করেছিল হোটেল আর
ঘণ্টা হিসাবে ভাড়া করা দুঘণ্টার বাসরঘরে।

কিন্তু কত দুল বিক্রি করার জন্য অনিলের হাতে তুলে দেবে ছায়া ? একটা দুল কোথায় পড়ে
গেছে—একবার প্রথমবার এ কৈফিয়ত বাড়ির মানুষ মেনে নেয়।

আরেকটা দুল হারালেই তাদের সন্দেহ জাগবে।

তার সঙ্গে স্তূতি করতে চায় অথচ ব্যাটাছেলে টাকার ব্যবস্থা করতে পারে না, ছি !

কিছুদিন অনিল পারে বইকী ব্যবস্থা করতে। আংটি বেচে কলেজের মোটা মোটা দামি বইগুলি
অর্ধেক দামে সেকেণ্ডহ্যান্ড বুকশপে বেচে কলেজে মাইনে না দিয়ে, মাছলি টিকিট না কেটে টাকার
ব্যবস্থা কবেছে।

সে কি পুরুষ মানুষ নয় ?

কিন্তু তারপর ?

তারপর সে হয়ে গেছে নিরুপায়।

গিয়ে বলেছে ছায়াকে—দ্যাখো, হোটেলে হইচই করা, ভাড়াঘরে চোরের মতো যাওয়া বিক্রী
ব্যাপার লাগছে। তার চেয়ে চলো তুমি আমি গিয়ে দাদার পায়ে একসঙ্গে প্রণাম করি। দাদাকে বলি
যে আমাদের এই অবস্থা, একটা ব্যবস্থা করে দাও, দাদা সব ঠিক করে দেবে।

ছায়া চূপ করে খানিকক্ষণ তার মুখের দিকে চেয়ে থাকে।

তারপর গভীর মুখে বৃক্ষ গলায় বলে, আচ্ছা সে হবেখন। আজ আমি একটু ব্যস্ত আছি। তুমি
কাল এসো।

অনিল রাস্তায় নেমে গিয়ে মোড়ের পানবিড়ির দোকান থেকে একটা আনি ভাঙিয়ে দুপয়সা
দিয়ে একটা সিগারেট কিনে ছোবড়ার দড়ি আগুনে সেটা ধরিয়ে ভাবছিল, আরেকবার গিয়ে কি
বুঝিয়ে বলবার চেষ্টা করবে ছায়াকে ?

তার চোখের সামনে দিয়ে মোটরগাড়িতে সেনদের ললিতের পাশে বসে ছায়া বেরিয়ে গিয়েছিল !
পরদিন কলহ।

ছায়া বলে, কেন ? কী দোষ করেছে ?

অনিল বলে, ছিছি, তুমি এত নীচ ? আমার পয়সা ফুরিয়েছে বলে আমায় ছেড়ে ললিতকে
ধরলে—এত কিছুর পর !

ছায়া বোঝে ওঠে, তোমার পয়সা ফুরিয়েছে বলে ? তুমি অপদার্থ অমানুষ বলে ! একটা মেয়ের
সঙ্গে খেলা করতে পার, দায়িত্ব নেবার ক্ষমতা নেই।

দায়িত্ব নেব না কে বলেছে ?

তোমার লজ্জা করে না ? কোন মুখে বললে চলো তুমি আমি দুজনে একসঙ্গে দাদার পায়ে ধরি, দাদা ব্যবস্থা করে দেবে ? আমি যেতে পারি ওভাবে ? নিজে ব্যবস্থা করতে পার না ? ললিত আমার কাছে প্যানপ্যান করবে না, যা করার নিজেই সব করবে, আমাকে বিপদ থেকে বাঁচাবে।

বিপদ ? ছায়ার বিপদ ? অনিল অবাক হয়ে যায় !

ছায়া বলে, বোকাসোকা পেয়ে মজা করলে আমাকে নিয়ে। বিপাকে পড়ে গিয়েছি মনে হচ্ছে। ও মাসে ভাবনা হয়েছিল, এ মাসে ভড়কে গিয়েছি। আমার কাছে ন্যাকামি না করে, পুরুষ মানুষ একটা ব্যবস্থা করো—আমি তো তোমারই। তুমি না পারলে অগত্যা আমাকে ললিতের ভরসা করতে হবে।

মা মরিয়া হয়ে বলে, অনিলের কী হল তুই তাকিয়েও দেখবি না ?

সুনীল বেগুন ভাজা দিয়ে ডালমাখা ভাত চিবুতে চিবুতে বলে, আমি দেখতে গেলেই তো তোমরা চটে যাও। তোমরা ওকে তোমাদের আদাবের ছোটো ছেলে করে রাখতে চাও। আমি কী করব বলো ?

কল্পনা বলে, মেজদার যা রকমসকম ব্যাপারসাপার দেখছি, বোধ হয় এবার সুইসাইড কবে বসবে একদিন।

সকালে খবরের কাগজ পড়ার সময় হয়নি। সারাদিন খাটুনির পরে রাত্রে খেতে বসবার আগে কাগজে একটা খবর পড়েছিল—স্বীপুত্রকে খেতে দিতে না পেরে জোয়ানমন্দ একটা পুরুষ অশথ গাছের ডালে দড়ি বেঁধে গলায় দড়ি দিয়ে মরেছে।

খাওয়া ফেলে ওঠে না সুনীল।

বলে, অনিলকে ডেকে নিয়ে এসো।

ডাকামাত্র অনিল আসে। এই মডলব নিয়ে আসে যে একটা চড়া কথা বলামাত্র পায়ের চটি খুলে সে সুনীলকে মারবে।

সুনীল খেতে খেতে জিজ্ঞাসা করে, তুমি খাওনি ?

পরে খাব।

খিদে পায়নি ? খেলে এখনি খাও। এখন খিদের সময়ে না খেলে আজ রাতে উপোস দেওয়াই ভালো।

অনিল চুপ করে থাকে।

খেতে ইচ্ছে করে না কেন তোর ? নেশা ধরেছিস ?

ভূপেশ আর গৌরী, দুজনেই যেন একসঙ্গে নিশ্বাস টানে। ঠিক কথা। অনিলের নেপথ্য জীবন নিয়ে এমনই তারা বিব্রত হয়ে পড়েছে যে ছেলেটা খেয়েছে কি না খেয়েছে তাও খেয়াল হয়নি।

সুনীল নিজেই কল্পনার আলপনা আঁকা পিঁড়িটা টেনে নিয়ে পেতে দিয়ে বলে, বসে পেট ভরে খা দিকি। তারপর অন্য ব্যাপার বিবেচনা করা যাবে। তোর ডিসপেন্সিয়া হয়নি তো ?

অনিল কথা বলে না। পিঁড়িতে বসে নীরবে ডাল আর পুইশাকের ঘণ্ট দিয়ে সাতখানা সের্কা বুটি পেটে চালান করে দেয়।

জল খেয়ে কুলকুচো করে উঠেই বলে, আমি এখন ঘুমোব। বিছানা হয়নি ?

জবাব শুনবার অপেক্ষা না রেখেই সে ঘরে গিয়ে বিছানায় শুয়ে ঘুমিয়ে পড়ার ভান করে।

নন্দার কাগজের জন্য প্রবন্ধটা শেষ করা দরকার ছিল কিন্তু ঘরে গিয়ে কাজে সুনীল মন দিতে পারে না।

মাঝে মাঝে যে চিন্তা মনে আসত আলাগভাবে আজ সেই চিন্তারই আবির্ভাব ঘটেছে গম্ভীর কালো মূর্তি নিয়ে। অগ্রাহ্য করার উপায় নেই।

সে যে এত করছে এদের জন্য, প্রাণপণে কর্তব্য পালন করে চলেছে, সত্যি তার কোনো মানে আছে কী ?

পথ কেবল দেখিয়ে দেওয়া নয়, পথ সে কি ধরিয়ে দিতে পারবে ভাইবোনদের ? ওদের জীবনের গতি ঘুরিয়ে দিতে পারবে ভবিষ্যতের দিকে ?

অথবা তার কিছু করা না করার প্রশ্নই আসে না ? যে ভাঙনের খাতে হিসাব লেখা হচ্ছে ওদের বাঁচন-মরণের তারই মধ্যে ব্যবস্থা আছে ভাঙার প্রতিক্রিয়ার পর গড়ে উঠবার—নতুন দিকে নতুনভাবে ?

ভাইয়ের কাছে সে বিশেষ কিছু আশা করেনি—নিজের দিক থেকে তার যদি কোনো প্রত্যাশা থেকে থাকে তা শুধু এই যে, জীবনের অপরিহার্য নিয়মনীতি মোটামুটি হৃদয়ঙ্গম করে জীবনের গতির দিকে চলার কায়দাটা একটু আয়ত্ত্ব করে নিক।

অনিলের বোঁক অনিয়মের দিকে, উলটো দিকে।

জীবন যেকোনো একটা দিকে এগোয় না। যেকোনো ব্যর্থতা ওত পেতে থাকে।

অনিয়মকে বেছে নেয় অথচ সে অনিয়মে বিদ্রোহ থাকে না। নিজেকে ভেঙে চুরমার করে ক্ষয়িষ্ণুকে দ্রুত শেষ করে ফেলার মধ্যেও একটা ব্যতিক্রমের নিয়ম আছে। সেটা পছন্দ নয় অনিলের। ভীষ্মতায় হতাশায় কাবু হয়ে সে শুধু নিজেকে কষ্ট দেবে, কষ্ট পাবে আর ভাববে জগৎ-সংসার তার উপরে বিরূপ।

অসময়ে মায়া আসায় সুনীল আশ্চর্য হয় না। মায়া আসবে সে জানত আজ রাতে না এলেও কাল সকালে নিশ্চয় আসত।

নিজেও সে যেতে পারত অনায়াসেই। কিন্তু বোনের ব্যাপারে মায়াকে একটু হাল ধরতে দেওয়া সে উচিত বিবেচনা করেছে।

অস্তিত্ব তার ঘর পর্যন্ত এগিয়ে আসুক।

মায়া বসে বলে, চূপচাপ যে ?

নানাকথা ভাবছি।

কাজের কথা নিশ্চয়। নইলে আপনার ভাববার গরজ পড়ে না। আমি কেন এসেছি জানেন ? জানি।

অনিল আপনাকে বলেছে বুঝি ?

সুনীল মাথা নাড়ে।

মায়া আশ্চর্য হয়ে বলে, তবে কী করে জানলেন ?

সুনীলের মুখের ভাব এতটুকু বদলায় না, শাস্ত্রভাবে বলে, আপনার বোনকে সিনেমা দেখাতে, হাতখরচের টাকার জন্য ভাইটি আমার সাথে ঝগড়া করেছিল। তারপর কটা টাকার জন্য সব সময় ঝাঁ ঝাঁ করছে। আংটি কলেজের বই হাতঘড়ি সব বিক্রি করে দিয়েছে শুনলাম। ক-দিন থেকে দেখছি ভাইটি পাগলের মতো করছে। ব্যাপারটা অনুমান করা কি কঠিন এ অবস্থায় ?

মায়া বুটবয়ে বলে, আমার বোনের জন্য আপনার ভাই পাগল হলে তো কথাই ছিল না—সাদাসিধে ব্যাপার হত। আপনার কাছে ছুটে না এসে আমি সংসারের হিসেবপত্র দেখতে বসে যেতাম।

সুনীল সোজা হয়ে বসে বলে, বটে ? শুনি তো ব্যাপারটা তবে ?

মায়া বলে শুনে আপনি অবশ্য এতটুকু বিচলিত হবেন না। বলতে আমার কান্না পাচ্ছে। ছায়া ক-দিন ধরে ছটফট করছিল। আমি টের পেয়েও কিছু জিজ্ঞেস করিনি—জানি তো, আমাকে দিয়ে জিজ্ঞেস করাবার জন্যই ছটফট করেছে। জিজ্ঞেস করলেই পেয়ে বসবে। আমি এমন ভাব দেখাচ্ছিলাম যেন কিছুই আমার চোখে পড়েনি। আজ মেয়ে নিজে থেকে আমায় সব বললেন।

একটু থেমে মায়া আবার শুরু করে, গোড়ার দিকে অনিল ছায়াকে সিনেমায় নিয়ে গিয়েছিল কয়েকবার—এদিক-ওদিক হইচই করেও বেড়িয়েছে। একদিন পয়সা ছিল না, ছায়া হাতের চুড়ি পর্যন্ত খুলে দিয়েছে। কিন্তু পরে ছায়াকে ছেড়ে অনিল নাকি রেবাকে ধরেছে। ছায়ার বদলে রেবাকে নিয়ে সিনেমায় যায়, এখানে ওখানে যায়। আমি জিজ্ঞেস করলাম, তোকে ছাড়ল কেন অনিল ? ও অনেক ঘুরিয়ে পেঁচিয়ে যে কারণ বলল তার সোজা মানে দাঁড়ায় এই—অনিলের কাছে সব সময় পয়সা থাকে না, উনি তাই আরেকজনের সঙ্গে সিনেমায় গিয়েছিলেন। সেনদের ললিতের সঙ্গে। সে জন্য রাগ করে পান্না দিয়ে অনিল রেবাকে নিয়ে যায়—ছায়ার সঙ্গে কথা কয় না।

কথা কয় না ?

কথা কয় না মানে মেশে না। রোজগার না থাকলে কী হবে, মেয়েরা যে সম্পর্কিত, এ জ্ঞানটি আপনার ভাইয়ের বেশ টনটনে হয়ে উঠেছে। আরেকজনের সঙ্গে সিনেমা গেলেই মেজাজ বিগড়ে যায়।

সুনীল গভীর মুখে বলে, তাহলে অনিলের সঙ্গে শুধু সিনেমায় যেত না, হইচই করত না। আরও কিছু নিশ্চয় ছিল।

তাই তো মনে হচ্ছে মেয়েটার রকম দেখে। একেবারে এলিয়ে পড়েছে। কী করা যায় বলুন দিকি ?

সুনীল ভাবতে ভাবতে বলে, বলছি। ছায়াকে আপনি বলবেন না আমি বলব ভেবে একটু ঠিক করে নিই, তারপর বলছি।

মায়া জোর দিয়ে বলে, কী বলবেন কথাটাই আগে বলুন না, তারপর ঠিক করা যাবে ছায়াকে কে বলবে।

সুনীল তবু একটু সময় গভীরভাবে চিন্তা করে নিয়ে বলে, বলবেন, রেবার দিক থেকে ছায়ার কোনো ভয় নেই। সিনেমায় নিয়ে যাক আর যেখানেই নিয়ে যাক, অনিলকে রেবা দেওয়ার মতোই আপন করবে। তার বেশি এতটুকু নয়।

তাই নাকি !

আমার সঙ্গে ভাব করতে চেয়ে অপমান হয়েছিল, সেটা চেপে রেখে আবার ভাব করার চেষ্টা করছিল। অপমান হয়ে, হয়তো গায়ের জ্বালায় শোধ নেবার জন্য বাইরে একটু বাড়াবাড়ি দেখাতে পারে, সেটা স্রেফ লোকদেখানো অর্থাৎ আমাকে দেখানো ব্যাপার হবে।

মায়া খানিকক্ষণ তার মুখের দিকে চেয়ে থেকে ধীরে ধীরে বলে, মেয়েদের সম্পর্কে আপনার তো ভারী বিশ্বাস !

সুনীল হেসে বলে, মেয়েদের অবিশ্বাস করার চেয়ে বিশ্বাস করে মার খাওয়া টের ভালো।

মায়াও হাসে।—অভিজ্ঞতা আছে নাকি ?

না, সাধারণ অভিজ্ঞতা থেকেই বলছি।

তারপর মায়া বেশ খানিকক্ষণ অত্যন্ত চিন্তিতভাবে চুপ করে থেকে মাঝে মাঝে চোখ ভুলে তার দিকে তাকায়। মায়া চিন্তা শেষ করে মুখ খুলতে অনেক সময় নেবে টের পেয়ে সুনীল নিজে থেকে বলে, না, তা হয় না। আমি রাজি হব না।

মায়া তাজ্জব বনে বলে, মানুষের মনের কথাও টের পান নাকি ?

সুনীল সহজভাবেই বলে, সময় অবস্থা যোগসূত্র অনেক কিছু ধরে বিচার করলে পাওয়া যায় বটকী। এতক্ষণ ওদের কথা বলার পর ওদের বিয়ে দিয়ে সব হাঙ্গামা ঢুকিয়ে দেবার কথাটা আপনার মনে হওয়া আশ্চর্য নয়। আমাকেও কথাটা ভাবতে হয়েছে।

উচিত হবে না, না ?

নিশ্চয় না। তার চেয়ে ওরা বখাটে হয়ে যায় তাও অনেক ভালো। বখাটে হলে শোধরাবার আশা আছে, বিয়ে দিলে আর কোনো আশা নেই।

মায়া নিশ্বাস ফেলে বলে, কিন্তু ছায়ার কী উপায় হবে ?

সুনীল বলে, কী আশ্চর্য, এই বিজ্ঞানের যুগে ওই সামান্য ব্যাপার নিয়ে আপনার এত দুর্ভাবনা ! ডাক্তাররা আছে কী জন্য ? ভয় পাবেন না, আমি সব ব্যবস্থা করে দেব।

মায়া বিদায় না নিয়েই নীরবে উঠে চলে যায়। এটা আজ নতুন নয়—একবাড়িতে দিনে যাদের দশবার দেখা হয়, কথা হয়, তাদের মতোই কথার শেষে কখনও শুধু যাই বলে, কখনও কিছু না বলে চলে যাওয়া তাদের অভ্যাস হয়ে গেছে।

তাদের এই স্বভাবের জন্য আজ অসুবিধা হয় কল্পনার।

সে খোলা দরজার পাশে দাঁড়িয়ে কান পেতে ভিতরে তাদের কথা শুনছিল !

মায়া হাত বাড়িয়ে কান ধরতে তার মুখখানা রাঙা হয়ে যায় বটে কিন্তু মায়ার হাত চেপে ধরে টানতে টানতে ও ঘরে নিয়ে গিয়ে সে চাপা গলায় বলে, বেশ করেছি শুনছি। নইলে কি তোমাদের এ রহস্য কোনোদিন ভেদ করতে পারতাম মায়াদি !

মায়া আশ্চর্য হয়ে বলে, আমাদের রহস্য ?

কল্পনা বলে, রহস্য বইকী ! তাইতো বলি তোমরা দুজনে মিলেমিশে ঘরকন্না করছ, শুধু লীলাখেলাটুকু বাদ দিয়ে ! আচ্ছা, মায়াদি—মায়াদি তো নয়, বউদি—তোমাদের আইনমতে বিয়ে হয়েছে না তোমরা ওটা একদম বাদ দিয়েছ ?

তাদের মতো বিয়ের জন্য পাগল নই আমরা।

প্রেমের জন্য পাগল তো। তাই তো বলি, দাদার বুকটা বিয়ে না করেই এমন পাথর হল কীসে ? অন্য সংসারে আগে বউ আসে তারপর ভাই দাপট চালায় বাপ-মা ভাইবোনদের ওপর। কে জানত দাদা আমাদের বউ না এনেই সংসারী।

মায়া বলে, বিয়ের পর যেন মাথাটা বিগড়ে গেছে মনে হচ্ছে তোর ? আমি অন্য বিষয়ে পরামর্শ করতে এসেছিলাম।

কল্পনা নির্ভয়ে বলে, আমি সব শুনছি। ছোড়দার সঙ্গে ছায়ার বিয়ে তো তোমরা বাতিল করবেই, নইলে যে তোমাদের বেলা অসুবিধা হয়।

মায়া এবার রাগ করে বলে, আবোল-তাবোল কী বলছ তুমি কল্পনা ? আমাদের তো অসুবিধা হবেই। যে দিনকাল, অনিল রোজগার না করলে, ঠিক পথে চলে মানুষ হবে কিনা না জানলে আমিই বা ওর হাতে কী করে বোনকে দেব ?

একটু থেমে শান্ত গলায় মায়া আবার বলে, সুনীলবাবু ঠিক কথাই বলেছেন। এ রকম হালকা প্রকৃতির ছাবলা ছেলেমেয়ের বিয়ে দেওয়াটাই মস্ত ভুল হবে। আমাদের জিজ্ঞাসা করে কি ওরা বিগড়ে গিয়েছে ? গোদ্রায় গিয়েছে নিজেরাই। মানুষ যদি হয়, নিজেরাই চেষ্টা করে ব্যবস্থা করুক—

তখন আমাদের যতটা করা দরকার করব ? আমরা ওদের ছেলেমানুষিকে প্রশ্রয় দিলে ওদের দুজনেরই সর্বনাশ করা হবে।

কল্পনা বলে, তোমাদের দুজনেরই সত্যি কঠিন প্রাণ মায়াদি !

৬

সুনীলের ইংরাজি প্রবন্ধটা নিয়ে চারিদিকে হইচই না হলেও লেখাটার বেশ নাম হয়েছে। এ ধরনের গুরুতর প্রবন্ধ নিয়ে বোধ হয় সে রকম হইচই হয় না, এমনিভাবেই ধীরে ধীরে গুণগ্রাহীদের মধ্যে নাম ছড়ায়।

হইচই করার মানুষেরা বোধ হয় মেতে উঠবার কিছু খুঁজে পায় না এ সব লেখায়।

আগে কথা হয়ে না থাকলেও সম্পাদক হিসাবে নিখিল তাকে লেখাটার জন্য কয়েকটা টাকা দিয়েছে।

অন্য কাগজ থেকে ফরমাশ এসেছে লেখার।

নবীন খুশি হয়ে বলে, এদিকে আপনার ভবিষ্যৎ আছে সুনীলদা।

কীসের ভবিষ্যৎ ? নাম না টাকার ?

দুটোরই।

সে ভবিষ্যৎ দিয়ে কী করব ? তোমার থাকলে বরং কাজে লাগত।

নবীন একটু হেসে বলে, নিজেকে যত উদার নির্বিকার ভাবছেন আসলে আপনি কিন্তু অতটা নন সুনীলদা। আলপনা আর কল্পনার কথা সবটা না হলেও খানিকটা ঠিক। আপনি কর্তালি করতে ভালোবাসেন।

সুনীল বলে, তা হয়তো বাসি। মানুষের কতরকম স্বভাব থাকে। কিন্তু নিজেকে আমি উদার নির্বিকার ভাবি এটা তুমি কী থেকে আবিষ্কার করলে ?

অনিলকে আপনার শাসন করে দেওয়া উচিত ছিল।

সুনীল একটু সময় তার মুখের দিকে চেয়ে থাকে। দরজার পাশে দাঁড়িয়ে কল্পনা তার আর মায়ার কথা লুকিয়ে শুনে মায়াকে খোঁচা দিয়ে মন্তব্য করেই ক্ষান্ত থাকেনি, অন্তরঙ্গ সকলের কাছে নিজের ভাষ্যসম্মত সেই কথাগুলি বলে বেড়িয়েছে বোকার মতো।

কিন্তু কল্পনার নয় বিয়ে হয়ে গেছে, সে এখন পরের বাড়ির মেয়ে, সুনীলকে সে আর এতটুকু ভয় করতে রাজি নয়। বরং গায়ে পড়ে দেখাতে চায় যে আমি তোমায় একটুও ভয় করি না।

কিন্তু নবীনের এ দুঃসাহস কোথা থেকে এল ? কল্পনার কাছে সব শূনে তার ভয় উপে গেছে ?

সুনীল ধীরে ধীরে বলে, অনিলকে শাসন করলে সেটা কর্তালি হত না তোমাদের হিসাবে ?

নিশ্চয় না। ওটা হত শাসন। কিন্তু যেখানে শাসন করতে সাহস হয় না সেখানে তো উদার নির্বিকারতা দিয়ে কর্তালি করা সুবিধা। অনিলের সম্পর্কে আপনার ভাবটা এই যে, তোমার ও সব ছেলেমানুষি ব্যাপার নিয়ে আমার মাথা ঘামাবার সময় নেই।

সুনীল আর কিছু বলে না।

আপিস ছুটির পর সুনীল টাইপরাইটারে গিয়ে বসে।

পকেট থেকে হাতে লেখা কাগজ বার করতে দেখে নবীন জিজ্ঞাসা করে আরেকটা প্রবন্ধ লিখেছেন ? কী বিষয়ে ?

তোমাদের বিষয়ে। আধুনিক কবিতা নিয়ে।

আপনি আধুনিক বাংলা কবিতা পড়েছেন ?
পড়েছি বইকী। বেশি গদ্য পড়ার সময় পাই না। ট্রামে-বাসেও কয়েকটা কবিতা পড়ে নেওয়া যায়।

ঝুলতে ঝুলতে ?

আমি হেঁটে গিয়ে ডিপো থেকে ট্রামে উঠি।

নবীন ক্ষুদ্র স্বরে বলে, তবু, ট্রামে কবিতা পড়ে সমালোচনা লিখেছেন ! ট্রাম-বাসে লোকে ডিটেকটিভ বই পড়ে। খুব নিন্দা করেছেন তো ?

নিন্দাও করেছে, প্রশংসাও করেছে। ট্রামে ডিটেকটিভ বই পড়া যায়, কবিতা পড়লে দোষটা কী ?

ডিটেকটিভ বই যেমন-তেমনভাবে পড়া যায়। কিন্তু কবিতা একটু বিশেষভাবে না পড়লে—
চান করে গরদ পরে ফোঁটাচন্দন কেটে যোগাসনে বসে ? না, পরীক্ষা পাস করার মতো সিরিয়াস হয়ে ?

নবীন রেগে বলে, শেলি কিট্‌স কখনও পড়েছেন ট্রামে বসে ?

সুনীল গভীর হয়ে বলে, না, পড়িনি। তাতে কী প্রমাণ হয় ?

কী প্রমাণ হয় ? প্রমাণ হয় যে শেলি কিট্‌সরাই আপনার কাছে আসল কবি। খুব মনোযোগ দিয়ে স্মারক হয় ওদের কবিতা পড়তে হবে। দেশের চ্যাংড়া ছোকরারা যে সব কবিতা লিখছে সেগুলো ফাঁকতালে একটু চোখ বুলিয়ে পড়াই যথেষ্ট।

সুনীলের মুখ আরও গভীর হয়ে যায়।

বলে, ট্রামে, রেশনের দোকানে লাইন দিয়ে দাঁড়িয়ে আমি রবিবাবুর কবিতাও পড়েছি, আরও অনেক জাঁদরেল পুরানো কবির কবিতাও পড়েছি। আমার তো পড়তে বা বুঝতে কোনো অসুবিধা হয়নি। শেলি কিট্‌স শেকসপিয়ার বিদেশি কবি—বুঝে পড়তে বেশ খানিকটা কসরত করতে হয়। আমার মাতৃভাষায় লেখা কবিতা বুঝতে আমাকে কষ্ট করতে হবে কেন ? লেখাপড়া না জানতাম তা হলেও বরং কথা ছিল। ছেলেবেলা থেকে বাংলা ছড়া, বাংলা কবিতা পড়তে পড়তে ত্রিশ বছর বয়স হল, প্রায় সমস্ত বাংলা কথার তাৎপর্য জানি, রাস্তায় ঘাটে পড়লেও বাংলা কবিতা বুঝব না কেন ? যে কবিতা বুঝব না সেটা নিশ্চয় না বুঝবার জন্যেই কায়দা করে লেখা। সে কবিতা বুঝবার জন্যে আমার মাথাব্যথা নেই।

কেন নেই ? একটা ইংরাজি কবিতা বুঝবার জন্য ঘণ্টার পর ঘণ্টা কোমর বেঁধে চেষ্টা করবেন, বাংলা কবিতায় চোখ বুলিয়ে বুঝতে না পারলেই ছুঁড়ে ফেলে দেবেন ?

দেব।

কেন দেবেন ? কোন অধিকারে ?

এই অধিকারে দেব যে বাংলা কবিতাটা পরীক্ষা পাসের জন্য পড়ছি না। এই তো সেদিন চাকরিতে ঢুকলে, এর মধ্যে ভুলে গেছে পরীক্ষা পাসের জন্য ইংরাজি বাংলা সব কবিতাই কেটে ছিঁড়ে নোট মিলিয়ে পড়তে হত ?

নবীন আহত হয়ে চূপ করে থাকে।

তবু সুনীল তাকে আঘাত দিয়ে বলে, বেশি কথা বলা দোষ নয়, একটা দোষের লক্ষণ। চিন্তা হালকা হলে বেশি কথা বলিয়ে ছাড়ে। বিবেচনা করে কথা বলার দরকার হয় না কিনা।

নবীনের ফরসা মুখ তামাটে হয়ে যায়।

ব্যঙ্গের সুরে সে বলে, সেকলে ভারী চিন্তার চেয়ে হালকা চিন্তাও ভালো। নিজের ভাবে গাঁট হয়ে না থেকে হালকা চিন্তা তবু এদিক ওদিক নড়ে-চড়ে এগোয় পিছোয়।

এত চটে গিয়েছে নবীন কিন্তু সুনীল যেন গ্রাহ্যও কবে না !

নিজেকে না শুধরে নিলে তুমি কোনোদিন বড়ো কবি হতে পারবে না। কথায় কথায় হৃদয় যার ফাঁস করে ওঠে, তার আর এ দেশেও বড়ো কবি হবার চান্স নেই দশ-পনেরো বছর আগেও খানিকটা ছিল।

রাগে নবীনের হাত-পা কাঁপছিল। একটা চেয়ার টেনে ঘুরিয়ে নিয়ে ধপাস করে বসে সে প্রশ্ন করে, কবি কি হৃদয়হীন ?

না। কিন্তু এ যুগে হৃদয়সর্বস্ব কবির দিন ফুরিয়েছে।

আমার কবিতা পড়েছেন আপনি ?

কবিতার বই বেরিয়েছে তোমার ?

এখনও বই বেরোয়নি। মাসিকে কয়েকটা ছাপা হয়েছে।

তা হলে এমন গোঁয়ারের মতো জিজ্ঞেস করছ কেন তোমার কবিতা পড়েছি নাকি ? হয়তো কোনো মাসিকে পড়েছি তোমার দু-একটা কবিতা, মনে নেই।

নবীন যেন খুশি হয় তার জবাব শুনে। সে যেন এবার বাগে পেয়েছে সুনীলকে।

তার তামাটে মুখ সাদাটে হতে থাকে। মুখে একটু বিদ্রুপাশ্রক হাসিও ফোটে।

এই বিচারবুদ্ধি নিয়ে আপনার এত বড়াই ? আমার কবিতা না পড়েই রায় দিলেন সেগুলি হৃদয়সর্বস্ব কবিতা ?

বিদ্রুপাশ্রক হাসিটা আরও স্পষ্ট হয় নবীনের। সুনীলের কথাই ব্যঙ্গের সুরে ঢেলে সেজে সে বলে, নিজেকে শুধরে না নিলে আপনি কোনোদিন বড়ো কাব্য-সমালোচক হতে পারবেন না। কবিতা না পড়েই যে কবির ওপর ফাঁস করে ওঠে, এ দেশেও তার বড়ো কাব্য-সমালোচক হবার চান্স নেই। দশ-পনেরো বছর আগে হয়তো খানিকটা ছিল।

সুনীল যেন একটা নিশ্বাস ফেলেই পকেট থেকে সস্তা সিগারেটের একটা প্যাকেট বাব করে। নিজে একটা নিয়ে নবীনকে একটা বাড়িয়ে দেয় ! তার সামনে নবীন সিগারেট খায়নি আজ পর্যন্ত।

নবীন বলে, না।

তুমি তো সিগারেট খাও ?

খাই। কিন্তু সিগারেট দিয়ে ভোলাবেন না আমায়।

ভোলানোর কথা নয়। তুমি সিগারেট খাও কিন্তু আমার সামনে খাও না। সিগারেট আমি খুব কম খাই—রোজ পাঁচ-সাতটার বেশি পয়সায় কুলোয় না। আমার বাবা গড়গড়ার তামাক টানেন, ইচ্ছা হলে তাঁর সামনেও আমি সিগারেট ধরিয়ে টানি। আমার সামনে সিগারেট খেতে তোমার লজ্জা হচ্ছে কেন ?

লজ্জা ? মোটেই নয়। আপনার সামনে সিগারেট টেনে চাকরি খোঁয়াব এই ভয়েই খাই না। এখন খাচ্ছি না এই জন্য যে আপনি আমাকে একটা সিগারেট দিয়ে ভোলাতে চাচ্ছেন, আসল কথাটা চাপা দিচ্ছেন। আমি সিগারেট খাওয়া? অনুমতি চাই না, কবিতা না পড়েও আমার কবিতা নিয়ে ও রকম কেন করলেন জানতে চাই। কবিতা না পড়েই মন্তব্য !

সুনীল হাসে। সে হাসি শূলের মতো বেঁধে নবীনের বুকো।

সুনীল সিগারেটটা ধরিয়ে বলে, প্রায় বছরখানেক উদীয়মান কবিটিকে দেখলাম শুনলাম জানলাম বুঝলাম। কবিকে জানলে বুঝলে বলা যায় না সে কী রকম কবিতা লেখে ? ধানগাছটাকে জানলাম বুঝলাম। অনায়াসে ধরে নিতে পারব না এ গাছে ধান ছাড়া কিছুই ফলবে না ?

নবীন যেন স্তম্ভিত হয়ে যায়।

আপনি তামাশা করছেন !

তোমার তাই মনে হবে।

কিন্তু এ কী রকম অদ্ভুত কথা বলছেন ! কবির সঙ্গে জানাশোনা থাকলে সে কেমন কবিতা লেখে বলা যায়, কবিতা পড়বারও দরকার হয় না ? এ কী ম্যাজিক নাকি ?

তোমার তাই মনে হবে। তোমার কাছে কবি আর কবিতা ভিন্ন। কবি একরকম হলেও কবিতা অন্যরকম হতে পারে, স্রষ্টার সঙ্গে সৃষ্টির মিল থাকবে এমন কোনো কথা নেই।

আমাকে নিয়ে আপনি আবোল-তাবোল বকছেন। কে আপনাকে বললে যে, আমি মনে করি কবি আর কবিতায় সম্পর্ক নেই ? আমি মোটেই তা মনে করি না।

তুমি নিজেই বললে, কবির বিচার করা গেলেও কবিতার কোনোরকম বিচার করা যায় না। কবিকে জেনেও জানা যায় না তার কবিতা কোন ধরনের।

নবীন যেন হঠাৎ স্বস্তি বোধ করে। তার মুখে মৃদু একটু হাসিও দেখা যায়।

তাই বলুন। আপনি আমার কথাটাই বুঝতে পারেননি। আপনি যদি বলতেন কবিকে কবি হিসাবে জানতে চিনতে পারলে সে কী ধরনের কবিতা লেখে আন্দাজ করা যায়, আমি কথাটা না কয়ে আপনার কথা মেনে নিতাম। আপনি বলছেন, এমনি চেনাপরিচয় থাকাটাই যথেষ্ট। বছরখানেক এক আপিসে কাজ করছি বলেই আপনি যেন আমার সব কিছুই জেনে গেছেন। জন্ম থেকে কীভাবে মানুষ হয়েছি হাঙ্গামার বাইরে কীভাবে চলি ফিরি কিছু জানেন আপনি ? কী খেতে ভালোবাসি জানেন ? আপিসের বাইরেও কার কাছে কী ধরনের দাসত্ব করি খবর রাখেন ?

সিগারেটের প্যাকেট আর দেশলাইটা সুনীল পকেটে পোরেনি। নবীন এবার প্রায় সুনীলের মতোই ধীর শান্তভাবে একটা সিগারেট নিয়ে ধরায়।

সে যেন সমবয়সি অন্তরঙ্গ বন্ধু এমনি অমায়িকভাবে বলে, আপনার কী ব্যারাম হয়েছে জানেন ? আপনার হয়েছে গুরুজন কমপ্লেক্স। গুরুজন হতে চান। অবতারেরা যেভাবে জগতের গুরু হয়েছিলেন, আপনার সেভাবে গুরুজন হবার সাধ্য নেই। আপনি তাই চাকরি করতে করতে যতখানি গুরুজন হওয়া যায় সেই চেষ্টা করছেন।

সুনীল নিশ্বাস ফেলে বলে, নবীন, তোমাকে শুধু একটা পশু করব। সোজা স্পষ্ট জবাব দিয়ে। তুমি তো বললে আপিসে ঘবে বাইরে তোমার অনেক গুরুজন। আমার সঙ্গে যেভাবে কথা বল তর্ক কর আর কোনো গুরুজনের সঙ্গে সেটা তোমার চলে কী ?

নবীন চুপ করে থাকে।

সুনীল বলে, এখনও পাকা হওনি। আমি ইচ্ছা করলে তোমায় বিদায় দিতে পারি, অঘোরবাবু ইচ্ছা করলেই পারেন। এক বছর চাকরি করছ। আমার সঙ্গে প্রায় রোজ তর্ক কর। অঘোরবাবুর সঙ্গে সামান্যামনি মুখোমুখি জোর গলায় তুমি ক-দিন কথা বলছ নবীন ? আমি রিপোর্ট দিয়েছি তুমি খুব ভালো কাজ করছ, তোমাকে এবার পারমানেন্ট করা উচিত। অঘোরবাবু কাউকে পারমানেন্ট করছেন না—আটজনকে বিদায় দিয়েছেন। আমিও তোমার গুরুজন, অঘোরবাবুও তোমার গুরুজন। আমার সঙ্গে রোজ তর্ক কর, আমাকে রোজ নস্যাত্ন করে দিতে চাও—অঘোরবাবুর সঙ্গে একদিন তর্ক করার সাহস হয় না কেন তোমার ? অঘোরবাবু ভালো গুরুজনই থাকেন তোমার কাছে—যা খুশি বলে তর্ক করতে দিয়ে আমি গুরুজনটাই হয়ে যাই বাজে গুরুজন !

নবীন চুপ করে থাকে। মাথা হেঁট করে না, শুধু চুপ করে থাকে।

টাইপ করার যন্ত্রে কাগজ ইত্যাদি গুছিয়ে নিয়ে তার ইংরাজিতে লেখা বাংলা কাব্য সম্পর্কে প্রবন্ধটা টাইপ করতে আরম্ভ করার আগে সুনীল বলে, নবীন, কাল থেকে তুমি আমার সঙ্গে কথা বলবে না। আপিসের কাজের জন্য দরকারি কথা ছাড়া একাট্টো বাড়তি কথা বলবে না। এটা গুরুজনের হুকুম নয়—অনুরোধ।

সুনীল দ্রুতগতিতে টাইপ করে যায়।

তার আঙুলগুলির দ্রুত স্বচ্ছন্দ গতির দিকে চেয়ে নবীন অনেকক্ষণ চূপচাপ বসে থাকে, হঠাৎ বলে, কী দোষ করলাম ?

সুনীল যেন শুনতেও পায় না।

নবীন রেগে বলে, বেশ। তাই হোক। আমি কিন্তু এ জীবনে আপনার সঙ্গে আর কথা কইব না। আজ কত বড়ো অন্যায় করলেন একদিন নিশ্চয় বুঝবেন। সেদিন ক্ষমা চাইলেও কথা কইব না।

সুনীল ফিরেও তাকায় না। রাগে নবীন থরথর করে কাঁপছিল। তীক্ষ্ণ বিদ্রূপের সুরে বলে, আচ্ছা, নমস্কার ! গুড ইভনিং ! রাম রাম ।

টাইপ করা বন্ধ রেখে সুনীল একটু ভাবে। নবীনের বেয়াদপি তাকে মোটেই বিচলিত করেনি। গায়ের জ্বালায় তার ও রকম ঝাঁঝালো কিন্তু সস্তা বিদ্রূপ করাটাই প্রমাণ করেছে যে নবীন এখনও ছেলেমানুষ।

এটা সে কি হিসাবে ধরেনি ? এটা বিবেচনা না করেই তার অঙ্ক আত্মপ্রীতি আর একগুঁয়েমির জন্য কথা বন্ধ করার সাজা দিয়েছে ?

তা হোক। এখন ছেলেমানুষি কাটিয়ে ওঠাব সময় হয়েছে নবীনের। ভাবপ্রবণতা কাটিয়ে ওঠাই তার উচিত।

অঘোর নীচে নামবার সময় দরজার কাছে দাঁড়িয়ে বলে, এখনও কাজ করছ ?

আমার একটা প্রবন্ধ টাইপ করছি।

ও, ই্যা। বিভা বলেছিল, রবীন্দ্রকাব্য নিয়ে তোমার একটা প্রবন্ধ বেরিয়েছে। খুব নাকি তর্কাতর্কিও চলেছে প্রবন্ধটা নিয়ে।

নতুন কথা বললে তর্ক উঠবেই।

এ প্রবন্ধটা কী নিয়ে লিখছ ?

আধুনিক কবিতা সম্পর্কে।

আধুনিক কবিতাও পড় নাকি তুমি ? যাক, তোমায় ডিস্টার্ব করব না। সময় পেলে একদিন যেয়ো।

যাব।

অঘোর ধীরে ধীরে বেরিয়ে যায়।

বয়স পঞ্চাশ পেরিয়েছে। চুলে কিছুটা পাক ধরেছে। মানুষটার ধীর শান্ত এবং প্রায় নির্বিকার ভাব দেখে কল্পনা করাও কঠিন যে কতখানি কঠোর আর নিষ্ঠুর সে হতে পারে দরকার পড়লেই। শান্তি পাওয়ার যোগ্য অপরাধ করে এ আপিসের কেউ ক্ষমা বা অম্নে রেহাই পেয়েছে এ রকম একটি দৃষ্টান্তও কেউ স্মরণ করতে পারে না।

অপরাধ কেন, তার কাছে অনিচ্ছাকৃত ভুলেরও ক্ষমা নেই, ভুলের ফলটা অবশ্য যদি তার পক্ষে কোনোদিক দিয়ে ক্ষতিকর হয়।

মানুষের ভুল করার অধিকার সে স্বীকার করে না। তার মতে, ভুল হয় অবহেলার জন্য। যে ভুলের জন্য বিশেষ কিছু আসে যায় না, শুধরে নিলেই চলে, সে ভুল সে উদারভাবে ক্ষমা করে।

সুনীল ছাড়া কেউ জানে না যে তার বিদ্যাবুদ্ধিকে কিংবা মেয়ের অনুরোধকে খাতির করে অঘোর তাকে চাকরি দেয়নি, কঠোর সততা বলে জিনিসটা তার চরিত্রের স্বাভাবিক গুণ এটা টের পেয়ে তাকে চাকরি দিয়েছে।

অঘোরের সৎ-অসতের বিচারের মাপকাঠি, লাভ আর লোকসান। তার তাই এ রকম দু-একজন লোকের প্রয়োজন আছে যাদের সম্পর্কে এক বিষয়ে সে নিশ্চিত থাকতে পারবে যে তার নিজেরও সাধ্য হবে না ওদের দিয়ে মিথ্যা বলায়, চুরিচামারি ছলনা করায় বা কারও বিশ্বাস ভাঙায়।

সুনীলকে কাজ দিয়ে শুধু একবার বলে দিলেই হল এটা গোপনীয়। গুরুতর বিষয়টা যে গোপনই থাকবে সে বিষয়ে তারপর আর মনের মধ্যে এতটুকু খুঁতখুঁতানি রাখবারও দরকার হয় না।

সুনীলের মতো লোক না রাখলে কাজটা তার নিজের করা ছাড়া উপায় থাকে না।

অবশ্য মূল্য দিতে হয়। সুনীল তাকে খাতির করে না, ভয়ও করে না। সে যে তার চাকরি রাখার, চাকরি খাবার মালিক এটা যেন গ্রাহ্যের মধ্যে আনে না সুনীল।

তাছাড়াও আরেকটা অসুবিধা আছে। ব্যাবসার নীতিতে না হলেও সাধারণ নীতির বিচারে যেটা দুর্নীতির পর্যায়ে পড়ে, সুনীলকে দিয়ে সে কাজ করানো যায় না। অথচ ব্যাবসা করতে গেলে ও রকম বিচারও চলে না।

এ দোষটা যদি না থাকত সুনীলের, তার ব্যাবসাগত স্বার্থের বেলাতে নীতিবোধটা টিল দিতে দিতে পারত, আরও কত উঁচু আসনে অঘোর তাকে নিজেই তুলে বসাত !

কিন্তু অঘোর জানে তা হয় না। যে তাকে খাতির করবে ভয় করবে, পয়সার জন্য নিজের ন্যায্যঅন্যায্যের বিচার শিকিয়ে তুলতে পারবে, তার সততা কিছুতেই টেকসই হবে না সুনীলের মতো।

তার বিশ্বাস রাখার বেলা লোহার মতো শক্ত হবে আর অন্যদিকে হবে তার মনের মতো—এ রকম মানুষ সে পাচ্ছে কোথায় ?

অগত্যা সুনীলকেই রাখতে হয় তার নগ্নতার অভাবটা মেনে নিয়ে।

সুনীল বাড়ি ফিরলে আলপনা মুখ ভার কবে বলে, তুমি নাকি বিনা দোষে নবীনের সঙ্গে কথা বন্ধ করে দিয়েছ ?

বিনা দোষে দিইনি, দোষ ছিল বলেই দিয়েছি।

কী দোষ করেছে ? তোমার কথা মানেনি, এই তো ?

ও নিজের দোষ দেখতে পায় না, অন্যকে দোষ দেয়, এটাও একটা মস্ত দোষ। একগুঁয়ের মতো নিজের মত আঁকড়ে থাকে, অন্যের মত উড়িয়ে দেবার জন্য তর্ক করে, আবার ছাবলার মতো রেগেও যায়। এই জন্য কথা বন্ধ কবেছি।

আলপনার মুখ ভার কমে না।

সে বলে, নিজের মত, নিজের ধারণা জোরের সঙ্গে বলা কি দোষ ? নিজে যেমন জানবে, বুঝবে তাই তো মানবে মানুষ।

তা মানবে, সেটা দোষ নয়। কিন্তু অন্যের কথা কিছুতেই জানব না বুঝব না মানব না—এই একগুঁয়েমিটা মস্ত দোষ।

আলপনা তবু হার না মেনে বলে, তুমি বুঝিয়ে দিতে পার না তাই বোঝে না, এটাও তো হতে পারে ?

সুনীল বলে, হতে পারে বইকী। সেটা আলাদা কথা। আমার কথা বুঝতে পারে না বলে তো আমি কথা বন্ধ করিনি। ওর বুঝবার ইচ্ছা নেই চেষ্টা নেই—গায়ের জোরে সব কথা উড়িয়ে দেবে। এ বোঁকটা খুব খারাপ।

নবীনের পক্ষ নিয়ে এবার আর আলপনা কোনো যুক্তিতর্ক খাড়া করতে পারে না, সে শুধু বলে, ওর মনে ভয়ানক আঘাত লেগেছে।

সুনীল বলে, তাতে ক্ষতি নেই। ছেলেমানুষি ঝোঁকটা কাটিয়ে উঠবার চেষ্টা করবে।

৭

নন্দার খবরের কাগজের বেশ খানিকটা দায় যে শেষ পর্যন্ত সুনীলের ঘাড়ে চাপবে কে তা ভাবতে পেরেছিল।

তার দায় ছিল কেবল নন্দাকে মোটামুটি ইংরাজি শেখানো—এমন পাণ্ডিত্য দান করা নয় যাতে দরকার হলে খসখস করে যে কোনো বিষয়ে একটা লাগসই সম্পাদকীয় লিখে ফেলতে পারবে।

অন্যের লেখা পড়ে মোটামুটি মানে বুঝতে পারবে, একটা ইংরাজি কাগজ চালাবার আনুষঙ্গিক ব্যাপার ও কাগজপত্রগুলি নিজে খেঁটে আয়ত্ত করতে পারবে, এইটুকু ছিল নন্দার দাবি।

নন্দাকে পড়াতে পড়াতে সামান্য কিছু টাকার বিনিময়ে তাব কাগজে একটা গুরুগম্ভীর সাহিত্যিক প্রবন্ধ লিখে ফেলা থেকে, ক্রমে ক্রমে ছোটোবড়ো আরও লেখা দেওয়া এবং সেই সূত্রে কাগজটার আপিসে যাতায়াত ক্রমে ক্রমে বেড়ে যাওয়া, সংবাদ ও মন্তব্যের এটা-ওটাতে মাঝে মাঝে চোখ বুলানো—এ সব কিছুই অসাধারণ ঘটনা ছিল না।

কেউ আশ্চর্যও হয়নি।

পেটে বিদ্যা আছে, ভালো ইংরাজি লিখতে পারে—অন্য একটা আপিসে চাকরি করতে করতেও সে একটা ইংরাজি সংবাদপত্রে লিখবে এবং পত্রিকাটির সঙ্গে ঘনিষ্ঠ হবে এ পর্যন্ত সকলে হজম করেছিল অনায়াসেই। কিন্তু একটা আপিসে চাকরি কবতে করতে সে যে কাগজটাব সম্পাদকীয় দায়িত্বই এক রকম গ্রহণ করে বসবে এটা কেউ স্বপ্নেও ভাবতে পারেনি।

একটা বিশেষ ঘটনার পর এটা ঘটে।

কাগজটার সম্পাদনা করে নিখিল, কিন্তু সম্পাদক হিসাবে নাম ছাপা হয় প্রদ্যোতের।

একটা উদ্ভট সম্পাদকীয় ছাপা হবার দায়ে প্রদ্যোতকে কিছুদিনেব জন্য জেলে যেতে হয়।

সে এক অদ্ভুত খাপছাড়া ঘটনা।

যে সম্পাদকীয় ছাপানোর জন্য প্রদ্যোতের জেল হল, সেদিন সকালে কাগজটি বাব হলে সম্পাদকীয় পড়ে সকলেই প্রায় চমকে গিয়েছিল !

সুনীল ভেবেছিল, মাথা কী খারাপ হয়ে গিয়েছে নিখিলের ? এ তো জার্নালিজম নয়—এ তো স্রেফ উন্মত্ততা ! খুব কড়া, খুব গরম সম্পাদকীয় লেখারও একটা কায়দা আছে, এ লেখায় সমস্ত কায়দা গিয়েছে বাদ, উন্মাদের প্রলাপ দিয়ে প্রাণপণে শুধু চেষ্টা করা হয়েছে লেখাটাকে ভয়ানক রকম বেআইনি করে তোলা।

নন্দাকে পড়াতে গিয়ে দ্যাখে, সমস্ত বাড়িটা যেন স্তব্ধ হয়ে আছে। সুনীলের বাড়ির ভেতরে যাবার আহ্বান আসে। ভেতরের একটা ঘরে নন্দা, শচীন, প্রদ্যোত আর অনুকূল বসে জটলা চালাচ্ছেন।

অনুকূল ব্যারিস্টার।

শচীন জিজ্ঞাসা করে, কাগজ পড়েছ আজকের ? এডিটোরিয়াল ?

পড়লাম বইকী ! এটা কী ব্যাপার হল হঠাৎ ?

অমরাও তাই বুঝবার চেষ্টা করছি।

অর্থাৎ ওটা প্রদ্যোতের লেখা নয় ?

নন্দা বলে, এতকাল পরে আপনি যেন আকাশ থেকে পড়লেন। দাদার নামটাই শুধু সম্পাদক হিসেবে ছাপা আছে জানেন না ? দাদা কখনও সম্পাদকীয় লেখে নাকি !

এই সব রিস্কের জনাই মাইনে করা সম্পাদকের নাম ছাপা রীতি।

নন্দা হেসে বলে, দেখুন না দাদাব পাগলামি। নিখিলবাবুকে মাইনে দিয়ে রেখেছি, ওর নামটা কোথায় ছাপা থাকবে, এ সব ঝঞ্জাট ওঁর উপর দিয়ে যাবে—দাদার শখ হল, না, সম্পাদক হিসাবে ওর খ্যাতি চাই।

প্রদ্যোত মৃদু হেসে বলে, খ্যাতি না ছাই। তোমরা তো নুলো হয়ে থাক, নিখিলবাবুটি কী চিজ খবর রাখ না। কবে কর্তাভজ্ঞা সস্তা কিছু ছেপে দেবেন এই ভয়ে আমি সম্পাদক হয়েছি।

সুনীল জিজ্ঞাসা করে, নিখিলবাবু আসেননি ?

নিখিলবাবু পরশু বাইরে গেছেন—পুরীতে। কাল-পরশুই ফিরে আসবেন।

সুনীল বলে, বেশ ব্যাপার তো ! নিখিলবাবু দুদিনের জন্য বাইরে গেছেন অমনি এ রকম একটা লেখা ছাপা হয়ে গেল ! কাগজ দেখবার—অন্তত এডিটোরিয়ালটা দেখবার কেউ ছিল না ? এটা লিখল কে ?

সেটাই সমস্যা দাঁড়িয়েছে। কেউ দায়িত্ব নিতে চাচ্ছে না। শিশিরবাবু চার্জে ছিলেন, তিনি বলছেন, এটা নিখিলবাবুর লেখা হিসাবেই তিনি ছাপিয়ে দিয়েছেন। টাইপ করা লেখা আজকের তারিখ-তারিখ দিয়ে রেডি করা ছিল।

টাইপ কপিটা পাওয়া গেছে ?

প্রদ্যোত মাথা নাড়ে !

শিশিরবাবু বলছেন তিনি প্রুফের সঙ্গে প্রেসে ফেরত পাঠিয়েছেন, প্রেস বলছে, কপি প্রুফের সঙ্গে শিশিরবাবুর কাছে পাঠানো হয়েছিল, প্রুফ ফেরত গেছে, কপি ফেরত যায়নি।

তারপর সুনীল কিছুক্ষণ চুপচাপ বসে ওদের পরামর্শ শুনতে শুনতে এখন সমস্যাটা কী দাঁড়িয়েছে সহজেই ধরতে পারে।

সম্পাদকীয়টি প্রত্যাহার করা হবে কি না এই হল সমস্যা।

অনুকূল আগেও বলেছিল, এখন আরেকবার বলে যে কালকের কাগজে যদি পাইকা হরফে বর্ডার দিয়ে স্পষ্ট পরিষ্কার করে ছাপিয়ে দেওয়া যায় যে এই লেখাটি ভুল করে ছাপা হয়েছে, এটি প্রত্যাহার করা হল—সমস্ত হাঙ্গামা মিটে যাবে। গরম হলেও, এতদিন কাগজটিতে যে সুর অনুসরণ করা হয়েছে সে জন্য কর্তাদের বিরক্তি থাকলেও বিশেষ মাথাব্যথা ছিল না। আচমকা একদিন শুধু অবিস্বাস্যরকম বেখাপ্পা, উদ্ভট নয় একেবারে মারাত্মকরকম গরম একটা সম্পাদকীয় বেরিয়ে গেছে বলেই হাঙ্গামা করার সুযোগ নেওয়া হবে না।

কিন্তু ত্রুটি স্বীকার করা চাই—বলা চাই যে ভুল হয়েছে। পর্বিস্কার স্পষ্ট ভাষায় সেটা ছাপতে হবে। লেখাটি প্রত্যাহার করা চাই।

প্রদ্যোত সোজাসুজি বলে, তা হয় না। অন্যসময় হলে করা যেত, এখন করা যায় না।

সুনীল বলে, লেখাটা তো ভুল করে ছাপা হয়েছে। হয়তো কারও বড়বস্ত্রের ফলে ছাপা হয়েছে। বড়বস্ত্র ?

তাই তো মনে হচ্ছে আমার ! নইলে ঠিক এ রকম যোগাযোগের সময় লেখাটা বাপ-মা হীন অবস্থায় এভাবে ছাপা হয়ে বেরিয়ে যেতে পারে ? ভুল স্বীকার করতে তো কোনো লজ্জা নেই !

প্রদ্যোত বলে, লজ্জার কথা নয়। লোকে ধরে নেবে যে এটা আমাদের ভয়—যেমন আমরা কাছাকাছি তোমনি আমরা ভীত। আমাদের কাগজে, আমাদের অজান্তে এডিটোরিয়াল পর্যন্ত বেরিয়ে যায়, আবার কড়া কথা লেখার জন্য আমরা হাত জোড় করে কর্তাদের কাছে ক্ষমাও চাই। এর একটা

হতে পারে—দুটো একসঙ্গে চলতে পারে না। হয় আমাদের অব্যবস্থা হয়েছে—নয় আমরা ভুল করে গাল দিয়েছি। গাল আমরা দিয়েছি ঠিকই, আরও খানিক দিলে হত। ওটাই বজায় থাক—আমাদের অব্যবস্থাটা সংশোধন হোক।

সকলে চুপ করে আছে দেখে প্রদ্যোত নন্দার দিকে চেয়ে আবার বলে, একজন সর্বস্ব দিয়ে জীবনপণ করে একটা কাগজ চালিয়ে গিয়েছিল—আমবা সেটা শুধু চালাচ্ছি, আমাদের সম্পত্তি হিসাবে।

শচীনের দিকে চেয়ে বলে, নন্দা তোমার মেয়ে না হলে, আমার বোন না হলে, সব কিছু দিয়ে এই কাগজটা করে সে বেচারী মরে না গেলে, আমরা কোনো দাম দিতাম এই কাগজটার ? কিন্তু সত্যিসত্যি একটা কাগজ কী কম দামি জিনিস। কত লোকের পয়সা চিন্তা খাটুনি আশাআকাঙ্ক্ষা দিয়ে একটা খবরের কাগজ চলে, দেশের মানুষের ভালোমন্দের কত বড়ো দায়িত্ব থাকে কাগজের। খবরের কাগজ মানেই সকলের কাগজ। কোনো দেশে খবরের কাগজ কোনো একজনের সম্পত্তি হলেই সে দেশের সর্বনাশ।

একটু থেমে বলে, সর্বনাশ আগে থেকে থাকলে সেটা ঠেকাতেই হবে, দূর করতেই হবে।

শচীন বলে, তুমি কি এতদিন ঘুমোচ্ছিলে ?

প্রদ্যোত নির্বিকারভাবে বলে, ঘুমোচ্ছিলাম বইকী। ঘুমটা সবে ভাঙছে, হাইমুড়ি তুলছি। নইলে কর্তাজ্ঞানি ঠেকাতে সম্পাদক হিসেবে নামটা ছাপাবার তোড়জোড় করলাম—কী ছাপা হচ্ছে সেদিকে তাকাবার অবসর পাই না !

চা এসে গিয়েছিল।

অনুকূলের স্পেশাল চায়ের সঙ্গে সাতান্ন বছর বয়সে সে যা চায় তাই তাকে দেওয়া হয়েছে। অনুকূলকে তারা ঘনিষ্ঠভাবেই জানে।

অনুকূলও যে তাদের ঘনিষ্ঠভাবে জানে তার পরিচয় পাওয়া যায় কয়েক মিনিট পবেই।

চা-টা খেয়ে চাঙ্গা হয়ে অনুকূল বলে, যাকগে, যাকগে।

কী যাকগে ?

একটা কাগজের একটা দিনের একটা এডিটোরিয়াল ! তাতেই যেন জগৎ উলটে-পালটে যাবে। তোমরা যদি এক কাজ করো প্রদ্যোত, এটা আপনা থেকে চাপা পড়ে যাবে।

প্রদ্যোত নিন্দভাবে জিজ্ঞাসা করে, কী কাজ ?

কাগজটা বার করে এ পর্যন্ত তোমাদের কত লাভ হয়েছে তার একটা হিসেব কাগজে ছাপিয়ে দাও।

নন্দা উৎফুল্ল হয়ে বলে, দেব, কালকের কাগজেই দেব। এ তো সোজা কাজ।

ফাঁকি থাকলে কিন্তু ধরে ফেলবে।....

বিদায় নেবার জন্য উঠে দাঁড়িয়ে অনুকূল বলে।

আমাদের হিসেবে ফাঁকি থাকে না। ধরের পয়সা ঢেলে কাগজ চালাই, হিসেবে ফাঁকি থাকবে কী রকম ? যারা কাগজ থেকে মোটা লাভ করছে, তারা হিসেবে ফাঁকি দেবে।

তবু সেই একটি এডিটোরিয়াল ছাপা হবার দায়ে প্রদ্যোত জেলে গেল। তাকে অনেক সুযোগ দেওয়া হল ওই লেখটার নিন্দা করে জেলে যাওয়া ঠেকাবার—সে বলল কী যে, তা হয় না, আমি ব্যাপার

বুঝেছি, আমার জেলে যাওয়া ঠেকানোর জন্য তোমরা দাঁড়াওনি—আমাকে দিয়ে কর্তাদের জয়গান করিয়ে আমাকে ছেড়ে দেবার ফিকিরে দাঁড়িয়েছ।

সুনীলকে সে বলে, একটা দায়িত্ব নিতে পারবেন ? খুব গুরুতর ব্যাপার।

ভূমিকা শুনাই অনুমান করছি।

আচমকা লেখাটা ছাপা হবার পিছনে ব্যাপারটা কী একটু খোঁজ নেবেন ?

সুনীল ধীরভাবে বলে, আগে ওই রহস্যটাই ভেদ করার চেষ্টা করছি। বেশি কঠিন হবে মনে হচ্ছে না। খানিকটা ইতিমধ্যেই অনুমান করা সম্ভব। স্বার্থঘটিত ব্যাপার তো, সুতো টানলেই সব বেরিয়ে আসে।

দায়িত্ব নিলেন ?

নিলাম।

প্রদ্যোত বলে, যাক, খানিকটা নিশ্চিত হয়ে জেলে যেতে পারব। ওই একটা ভাবনা ছিল আমার—আসল মতলবটা যার, সে না বাজি মেরে বসে।

নশা উপস্থিত ছিল। কিন্তু দুজনের কথা হেঁয়ালির মতো মনে হয় তার।

পরে সে সুনীলকে হেঁয়ালির মানে জিজ্ঞাসা করে।

সুনীল বলে, হেঁয়ালি কিছুই নয়—হঠাৎ যে এডিটোরিয়েলটা ছাপা হয়ে গেল, তার একটা কারণ তো থাকবে ? কেউ কোনো একটা মতলব নিয়েই ওটা ছাপিয়েছে।

নিশ্চয়। সে মতলবটা কী, কে সেটা খাটাবার চেষ্টা করছে—এদিকে একটু নজর রাখতে বলছিল আপনার দাদা।

নন্দা বলে, মতলব ? কীসের মতলব ? দাদাকে জেলে পাঠানো ?

সুনীল বলে, না, ওকে জেলে পাঠানো আসল উদ্দেশ্য মনে হয় না। উনি সম্পাদক থাকবেন না, এটাই ভদ্রলোক চাইছেন মনে হচ্ছে। উনি সম্পাদক থাকায় ভদ্রলোকের অসুবিধে হচ্ছিল।

নন্দা মুখ কালো করে খানিকক্ষণ চুপচাপ বসে থাকে।

নিখিলবাবু ?

আমি তাই সন্দেহ করছি।

না না, নিখিলবাবু সে রকম লোক নন। এ রকম লেখা কখনও ওঁর হাত দিয়ে বেরোতে পারে না।

অন্যের নামে ছাপা হবে জেনেও নয় ?

নন্দা চুপ করে থাকে।

সুনীল আপিস থেকে সোজা প্রেসে চলে যায়।

কাগজের নিজস্ব প্রেস নয়, সুধীন সরকার নামে আবগারি বিভাগের একজন পদস্থ, পেনশনপ্রাপ্ত ভদ্রলোক, প্রেসটার মালিক। প্রেসটা আরম্ভ করেছিল আরেকজন ভদ্রলোক, যার ছিল সাংঘাতিক রকম নেশার বাতিক। নেশার খাতিরেই প্রেসটা তাকে বেচে দিতে হয়, একেবারে জলের দামে।

সুধীন এমনি কোনো নেশা করে না, কিন্তু দাঁও মারার নেশাটা তার চিরদিন প্রবল। কোথায় বিপদে পড়ে কার কী সম্পত্তি নীলাম হচ্ছে কম দামে, কোথায় কোন জিনিসটা সস্তায় বিক্রি হয়ে যাচ্ছে, শকুনের শব খোঁজার মতোই তার চোখ সর্বদা দাঁও খোঁজে।

দাঁওটা শেষ পর্যন্ত লাভজনক হবে না বোঝা হয়ে উঠবে, এ সব হিসাব সে করে না। তার দৃঢ় বিশ্বাস যে দামি কিছু সস্তায় পাওয়া মানেই কিস্তিমাত করে দেওয়া।

নন্দার কাগজটা ছাপা না হলে প্রেসটা তার চাল রাখা সম্ভব হত না, অনেকদিন আগেই তুলে দিতে হত।

তাই সুধীন সরকার মালিক হলেও কাগজটা চালাবার দায়িত্ব যাদের, তাদেরই প্রেসের লোক মালিক মনে করে।

আগেকার ব্যবস্থাই সব বজায় আছে, সম্পাদক হিসেবে নামটাও ছাপা হচ্ছে প্রদ্যোতের—সবাই কেবল টের পেয়েছে যে, কাগজসংক্রান্ত সমস্ত বিষয়ে কর্তালি পেয়েছে সুনীল।

সে যা বলবে তাই হবে। তার কথার উপরে আর কোনো কথাও নেই, কারও কাছে নালিশও নেই।

নিখিল দেশ থেকে ফিরেছিল যথাসময়েই। বদখত এডিটোরিয়েলটা ছাপানো নিয়ে সেও ইইচই কম করেনি। কিন্তু সুনীলকে কর্তৃত্ব নিতে দেখে সে অত্যন্ত আহত হয়।

শচীনকে সে ক্ষুব্ধভাবে বলে, এই ছেলেমানুষেরা কতটুকু জানে কাগজ চালানোর ব্যাপারে ? কোনোদিন কাজ করেছে কোনো কাগজে ?

শচীন বিব্রতভাবে বলে, ও খুব কাজের মানুষ, পাকা লোক।

নিখিল বলে, ওকেই সব করে দিচ্ছেন নাকি—ম্যানেজাব, এডিটর ?

শচীন বলে, আপনি ভুলে যাচ্ছেন কাগজটা আমার মেয়ের, আমি কাগজের মালিক নই।

শচীনের কাছে নিখিলের কথা শুনে নন্দা গম্ভীরমুখে বলে, ওঁর গা জ্বালা কবছে কেন ? সুনীলবাবু তো ওঁর কোনো ক্ষতি করেননি, ওঁর কাজেও ব্যাঘাত জন্মাননি।

শচীন বলে, অনেকদিন থেকে ভদ্রলোকের সম্পাদক হবার আশা।

তুমিও সে খবর রাখ ?

এ আর খবর রাখারিখি কী ? এখন নামেই সম্পাদক—কাগজে নামটা ছাপা হলে বাজারে দাম বাড়বে। দরকার হলে অন্য কাগজেও যেতে পারবেন।

নন্দা বলে, এবার বুঝছি ব্যাপারটা। ভদ্রলোক টের পেয়েছিলেন কাগজটা তোমারও বোঝা হয়ে উঠেছে—তুমিও দায় এড়াতে চাও। একটা গোলমাল হলে সব জেনে বুঝেও তুমি চুপ কবে থাকবে—কাগজটা উঠে যায় তো যাক। তাই এমন সস্তা চাল চালতে সাহস হয়েছে নিখিলবাবুর।

শচীন আহত হয়ে বলে, বুড়ো হলাম, আমার কি এত ঝঞ্জাট পোষায় ?

তবে দায়িত্ব নাও কেন ?

সুনীল নিখিলকে বলে, আজ একটা কড়া লেখা চাই নিখিলবাবু।

কী রকম কড়া ?

বেশ খানিকটা কড়া। কালোবাজার কিংবা সরকারি দুর্নীতি—দুটোর কোনো একটা সাবজেক্ট নিতে পারেন।

নিখিল একটু ভেবে বলে, গাল দেব ?

পারলে দেখেন, আইন বাঁচিয়ে। মোটকথা আমার খুব কড়া লেখা চাই।

একষষ্ঠীর মধ্যে পিয়োন নিখিলের লেখাটা সুনীলের কাছে পৌঁছে দেয়। প্রিন্স ক-খানায় চোখ বুলোতে বুলোতে সুনীলের মুখের ভাবের কোনো পরিবর্তন ঘটে না, কিন্তু পড়া শেষ করে সে প্রায় মিনিট দশেক গুম খেয়ে বসে থাকে।

তারপর নিজেই নিখিলের বসবার ঘরে যায়।

ধরতে গেলে নিখিলও কার্যত সাব-এডিটর। কিন্তু অল্পবয়সি সাব-এডিটরদের মধ্যে এতদিন সে সম্মান পেয়ে এসেছে এডিটরের।

সুনীল বলে, নিখিলবাবু, এই নাকি আপনার গরম লেখা ? কড়া লেখা আপনার বোধ হয় আসে না, না ?

এর চেয়েও কড়া ?

নিখিল যেন আশ্চর্য হয়ে যায়।

সুনীল বলে, এ লেখা কি কড়া হয়েছে ? ভূপেনবাবু, দেখুন তো পড়ে। আপনার মতটা শুন।

ভূপেন তাড়াতাড়ি স্লিপ ক-খানা পড়ে বলে, পয়েন্ট মোটামুটি সব আছে, তবে ভাষাটা নরম হয়ে গেছে।

সুনীল বলে, আমারও তাই মনে হচ্ছিল। আগে মোটে একটা-দুটো কাগজ পড়তাম, বুঝতাম না। আজকাল অনেকগুলি কাগজে চোখ বুলিয়ে দেখছি—ভাষার কায়দাটাই যেন আসল ব্যাপার। কী বলা হচ্ছে তার চেয়ে বলার ভঙ্গিটা দিয়েই যেন কাগজের পলিসি বজায় রাখার চেষ্টা হচ্ছে। আপনি ঠিক বলেছেন। নিখিলবাবুর এ লেখাটায় সব কথাই আছে—ভাষার জন্য আসল কথা ছোটো হয়ে ছোটো কথা গরুত্ব পেয়েছে।

ভূপেন খুশি হয়ে হাসে।

সুনীল বলে, আপনি একবার চেষ্টা করে দেখবেন, গরম করতে পারেন নাকি ? আমি খুব গরম লেখা চাইছি। আপনি যত পারেন কড়া করে দিন, আমি দরকার মতো ঘষেমেজে নেব।

সুনীল চলে গেলে ভূপেন ও নিখিল মুখ চাওয়াচাওয়ি করে।

শৈলেশ নতুন এসেছে, সে জিজ্ঞাসা করে, হাতবদল করে কি লেখা ভালো হয় ?

খবরের কাগজে আবার ভালো লেখা !

রাত দশটায় ভূপেন লেখা নিয়ে সুনীলের ঘরে গেলে সুনীল তাকে বসতে বলে।

একটা সিগারেট দেয়।

ধীরে ধীরে তার লেখাটা পড়ে মুখ তুলে বলে, ভূপেনবাবু, নিখিলবাবুকে আমি বিদায় দিচ্ছি। ওঁকে দিয়ে আর দবকার নেই।

ভূপেনের মুখ একটু পাংশু হয়ে যায়।

সে আমতা আমতা করে বলে, কড়া লেখা অবশ্য ওনার ভালো আসে না কিন্তু—

সুনীল বলে, কড়া লেখা আসে না বলে নয়। উনি সেই লেখাটা ছাপিয়ে দেবার চক্রান্ত করেছিলেন বলে। আপনার সম্পর্কে কী করা যায় ভাবছি।

ভূপেন চুপ করে থাকে।

সুনীল বলে, আপনি ওর কথায় রাজি হলেন কেন ? আমায় সব খুলে বলুন, এবারের মতো আপনার ফাঁড়া কাটিয়ে দিচ্ছি—পরে যেন আর কখনও এ রকম করবেন না। এভাবে মানুষের উল্লিতি হয় না।

ভূপেন ধীরে ধীরে বলে, আমাকে নিখিলবাবু যা ছাপতে বলবেন, আমি তাই ছাপতে বাধ্য।

সেটা গোপন করতেও কি বাধ্য ?

উনি বললে খানিকটা বাধ্যতা এসে যায়।

সুনীল মুখের ভাব কঠিন করে বলে, শুধু ওঁর বলার জন্য ? আর কিছু কারণ ছিল না ?

ভূপেন একটু ভেবে বলে, ছিল। আমি—আমি ওঁর ভাগনিকে বিয়ে করেছি। উনি বলেছিলেন এডিটর হলে আমায় সুবিধা করে দেবেন।

ভূপেন ধীরে ধীরে মুখ তুলে তাকায়।

আপনাকে একটা কথা বলি। প্রদ্যোতবাবুর জেল হবে এ সব উনি ভাবেননি। উনি আমায় বলেছিলেন যে এ রকম একটা লেখা বেরিয়ে গেলে হইচই হবে, তাতেই ভয় পেয়ে প্রদ্যোতবাবুর নাম সরিয়ে নিয়ে ওঁর নাম এডিটর হিসাবে বসানো হবে। একদিন একটা খারাপ লেখা বার হলে সামলানো কঠিন নয়।

প্রেস্টিজ নষ্ট হয়।

প্রদ্যোতবাবু কী প্রেস্টিজের জন্য জেলে গেলেন ?

তা বইকী। তার নিজের প্রেস্টিজ, কাগজের প্রেস্টিজ। আইনে বাধুক, কথাগুলি তো মিথ্যা লেখা হয়নি। না লিখলে আলাদা কথা ছিল কিন্তু একবার ছেপে বেরিয়ে যাবার পর কথাগুলি আর ফেরত নেওয়া যায় না।

দশ মিনিটের মধ্যে সুনীল দুমাসের বেতন এবং বরখাস্ত পত্রখানা নিখিলের হাতে দেয়।

নিখিল বলে, তুমি আমাকে তাড়াতে পার না।

সুনীল বলে, নিশ্চয় পারি। আমাকে সে ক্ষমতা দেওয়া হয়েছে—লিখেই দেওয়া হয়েছে।

ফেরার পথে নন্দাকে সব জানিয়ে সুনীল বাড়ি ফেরে।

নন্দা বলে, সকালবেলা নিখিলবাবু একবার দরবার করতে আসবেন। দয়া হলে দয়া দেখাব ?

সুনীল বলে, দয়া নয়। জগাই-মাধাই ছাড়া দয়ায় কেউ উদ্ধার পায় না। হিসাব করে দেখবে ওঁকে আর রাখা চলে কি না। যদি মনে করো যে যথেষ্ট শিক্ষা হয়েছে, আর এ সব চালাকিবাজির দিকে ঝুকবেন না—তাহলে এবারের মতো ক্ষমা করতে পার।

নন্দা মাথা নাড়ে।

আমি ক্ষমা করতে পারি না। আমি আপনাকে ক্ষমা করার জন্য অনুরোধ করতে পারি।

এই তো শিখে গিয়েছ কায়দাকানুন !

শিখে গিয়েছি বলে সরে যাবেন না যেন। এটাও শিখেছি যে আমার এখনও অনেক শেখা বাকি। যে দায় নিয়েছেন সেটা আর ফেলতে পারবেন না কিন্তু—অন্তত যদিই আমি সব শিখে পড়ে না নিচ্ছি।

সুনীলের বাড়ি ফিরতে রাত বারোটো বেজে যায়।

মুখ হাত ধুয়ে খেতে বসেছে, মায়া এসে কড়া নাড়ে। দরজা খুললে ভেতরে এসে পাতের কাছেই মেঝেতে উবু হয়ে বসে বলে, তোমার খবর নিতে এলাম। আমার চাকরিটা সত্যি ছাড়লে তা হলে ?

কী করি ? কটা চাকরি করব ?

নবীনকে রাখব তোমার জায়গায় ?

ও যদি পারে কেন রাখবে না ? আমার সঙ্গে কিন্তু নবীনের কথা বন্ধ !

সেটা শুনই তো জিজ্ঞাসা করতে এলাম কী করব। নবীন নিজেই আমাকে বললে তুমি নাকি হঠাৎ কথা বন্ধ করে দিয়েছ।

আলপনা বলে, আপনাকেও বলেছে ? নবীন তর্ক করতে করতে দাদার হল রাগ—বাস, কথা বন্ধ ! আমি যত বলি, দাদা ও রকম নয়, দাদা কখনও অন্যায় করে না—কে কার কথা শোনে। ওর ওই এককথা—তর্ক চলছিল, তর্ক চালাতে চালাতে হঠাৎ রাগ করে দাদা কথা বন্ধ করে দিয়েছে।

মায়া একটু বিশ্বাসের সঙ্গেই আলপনার দিকে তাকায়। সুনীলের সামনে এই ভঙ্গিতে এ রকম সুরে কথা বলা আলপনার পক্ষে নতুন বটে।

গৌরী মেয়ের কথাগুলি শোনেনি কিন্তু কথার সুরটা কানে গিয়েছিল। ছেলের জন্য তরকারি এনে সে বলে, আমিই তো ওকে দিচ্ছিলাম, তুই জেগে বসে রয়েছিস কেন ?

মায়াদি এসেছে তাই।

সুনীল মায়াব মুখেব দিকে চেয়ে হাসিমুখে বলে, শুনলে ? নবীন যেমন মিথ্যা বলে, আলপনারও তেমন মিথ্যা আটকায় না।

মিথ্যা বলি।

আলপনা ফাঁস করে ওঠে।

এখনি বললি। মায়া এসেছে বলে তুই জেগে বসে আছিস, এটা মিথ্যা কথা নয় ?

আলপনা জোর দিয়ে বলে, না। ওটা কথার কথা, মার কথার একটা ভাসাভাসা জবাব। আমি কেন জেগে আছি সেটা বলতে পারব না কিন্তু মার কথার জবাবে কিছু বলতে হবে তো ? আমি তাই বললাম মায়াদি এসেছে বলে জেগে আছি। এটা শুধু মার মান রাখা, মিছে কথা বলা নয়। চূপ করে থাকা আর এ কথা বলার মধ্যে আর কোনো তফাত নেই। তোমার হিসেব যদি সংসারে চলত দাদা—

সুনীল বাধা দিয়ে বলে, তুই শুবি যা তো। মায়ার সঙ্গে আমার দরকারি কথা আছে।

এই তো তুমিও একটা মিছে কথা বললে। মায়াদিব সঙ্গে দরকারি কথা হয়ে গেল, আর কোনো দরকারি কথা নেই জানো। তবু বলছ দরকারি কথা আছে।

সুনীল তার দিকে না তাকিয়েই মায়াকে জিজ্ঞাসা করে, অনিল আর ছায়ার ঝগড়া মিটেছে ? কই আর মিটল ? অনিল ওর সঙ্গে মিশবে না বলেছে।

আলপনা বলতে যায়, বলেছে বটে, কিন্তু—

নিজেই সে থেমে যায় হঠাৎ।

কিছুক্ষণ মাথা হেঁট করে বসে থেকে ধীরে ধীরে উঠে চলে যায়।

মায়া জিজ্ঞাসা করে, ওর কী হল ?

অভিমান ! নবীনের সঙ্গে কথা বন্ধ করেছি বলে।

বেশ আছে ওরা, মান-অভিমান ছেলেমানুষি নিয়ে।

বেশ আছে ? বেশ থাকলে তো ভাবনাই ছিল না। ছেলেমানুষিতে পর্যন্ত ঘুণ ধরে গেছে। আড়াল-করা ছেলেমেয়েদের মানুষ কবা কঠিন দাঁড়িয়ে গেছে। একটা লড়াই অবলম্বন চাই মানুষ হতে হলে।

মায়া উঠে দাঁড়িয়ে হঠাৎ জিজ্ঞাসা করে, নবীনের সঙ্গে কথা বন্ধ করেছে কেন ? কারণটা ভালো বুঝলাম না।

সুনীল একটু হাসে।

কারণ ? কারণ ওর একগুঁয়েমি, সংকীর্ণতা। আসলে কথা বন্ধ করেছে নবীন নিজে। বড়ো বেশি তর্ক করত, আমি সেদিন আপিসে তাই অনুযোগ দিয়ে বলেছিলাম যে অনোর সঙ্গে তর্ক করে আমার কিছুদিন রেহাই দিক—কাজের কথা, দরকারি কথা ছাড়া আমার সঙ্গে যেন অন্য কথা না বলে। তাইতে চটে গিয়ে প্রতিজ্ঞা করেছে জীবনে কোনোদিন আমার সঙ্গে কথা বলবে না। কিন্তু বদনামটা হয়েছে আমার। আমিই নাকি কথা বন্ধ করেছি।

মায়া বলে, এ সব ছেলেমানুষদের সঙ্গে সত্যি পারা মুশকিল। ছায়া আমার সঙ্গে কী আরম্ভ করেছে জানো ? কথা কয় কিন্তু সেটা প্রায় না বলারই শামিল—নেহাত দরকার হলে মুখ ভার করে সংক্ষেপে বিরক্তির সঙ্গে বলে। আমি যে অনিলকে শাসন করে দিইনি।

মায়া আর দাঁড়ায় না।

মায়া চলে যেতেই আলপনা যেচে সুনীলের বিছানা ঝেড়ে দিতে, তার ঘরে গিয়ে প্রথমে চূপচাপ হাতের কাজটা সারে। তারপর বলে, তুমি যদি কথা না বন্ধ করে থাক, কথা বললেই পার নবীনের সঙ্গে ?

আমাকেই যেচে যেচে কথা বলতে হবে ?

তাতে দোষ কী ? তোমাব তো বাধা নেই—ও বেচারি একবাব প্রতিজ্ঞা করে ফেলেছে, ওব পক্ষে তো আর নিজে থেকে কথা বলা সম্ভব নয়।

আপিসে কাজের কথা বলি।

অন্যকথা দু-একটা বললেও হয়।

সুনীল হেসে বলে, হ্যাঁ, আমি যেচে অন্যকথা বলি আর ও জবাব না দিয়ে আমাকে অপমান করুক। নিজের দাদার মান-অপমানের বুকি দাম নেই তোর কাছে ?

আলপনা মুখ তুলে বলে, নবীন তোমায় অপমান করবে ? একবার করেই দেখুক। সেদিন থেকে আমি ওর মুখ দেখব ভেবেছ ?

৮

ক-দিন অঘোরের মুখ দেখলেই বোঝা যায় খোঁড়া মেয়ে তার সচল বাপকে কাবু করেছে।

রমেশের ব্যাপারের পর থেকে সে সন্দেহ করেছে যে মেয়ের এই বিদ্রোহাত্মক দুর্বুদ্ধির পিছনে আছে সুনীল। ড্রাইভারের কাছে অবশ্যই সে খবর পেয়েছিল যে রাত করে বিভা সুনীলের বাড়ি গিয়েছিল। তারপরই পশু বিভা বিদ্রোহ ঘোষণা করেছিল, সে বিয়ে করবে না।

শিক্ষিত বুদ্ধিমান সুদর্শন যুবক রমেশ, কত সাধারণ বাপের কত সাধারণ মেয়ে, আজকালকার দিনে এক রকম একটা স্বামী জুটিয়ে দেবার জন্য, বাপের ভালোবাসার পরিচয় পেয়ে কেঁদে ফেলে যে কেমন করে সে বাপকে ছেড়ে যাবে স্বামীর ভালোবাসা ভোগ করতে—বিভা স্পষ্ট পরিষ্কার ভাষায় জানিয়ে দিয়েছে এ রকম বাজে লোকের বউ হওয়ার চেয়ে কুমারী হয়ে থেকে জীবনটা কাটিয়ে দেওয়া সে অনেক ভালো মনে করে। কী ফাঁদেই যে পড়েছে অঘোর !

খোঁড়া মেয়ে, বিকাবগ্রস্তা মেয়ে। খোঁড়া হবার জন্যই সে বিশেষ অধিকার খাটাতে চায় তার বাপের উপর।

মেয়ের নীতির হিসাব বাপকে মানতেই হবে। অস্তুত তার বিয়ের ব্যাপারে।

রমেশ মেয়ের কাছে বাজে লোক কেন অঘোর বুঝতে পারে না। মেয়ে বুঝিয়ে দেবার পরেও নয়।

বিভার জন্য তার একবিন্দু মায়া-মমতা নেই তবু তার বাপের টাকার লোভে সে তাকে বিয়ে করতে রাজি—সারাজীবন তাকে তোষামোদ করে চলতেও রাজি। এই জন্য সে নাকি বদলোক।

তাতে দোষটা কী ? টাকার জন্য কী লোকে বিয়ে করে না ?

দোষটা বিভার মতে এই যে, টাকার কোনো দরকার নেই লোকটার, লোকটা খোঁড়া বউ নিয়ে জীবন কাটাতে একেবারেই অনিচ্ছুক তবু টাকার লোভ সামলাতে না পেরে বিভাকে বিয়ে করতে রাজি হয়েছে। সে যদি গরিব হত, আপনজনদের ভালোর জন্য নিজেকে বিক্রি করা যদি তার দরকার হত, সে যদি কোনো বিপদে পড়ত,—টাকার জন্য তাকে বিয়ে করতে চাইলে কিছুই মনে করত না বিভা।

কিন্তু শুধু টাকার লোভটাই যার বড়ো সে কি মানুষ ?

তুমি পারতে বাবা ?—তবে !

মেয়ের যুক্তি অনুসারে না হলেও রমেশ লোকটা যে সত্যি বাজে লোক এটা বুঝতে বাকি থাকেনি অঘোরের।

বাজে লোক না হলে এমন সুন্দর চেহারা নিয়েও একটা খোঁড়া দুঃখী মেয়ের মন ভুলাতে পারে না ? সে নিজে রাজি হলেও, মেয়েটাই তাকে বিয়ে করার নামে বেঁকে বাসে !

রমেশকে অঘোর তার ব্রাঞ্চ আপিসে বদলি করে দিয়েছে। নিচ পোস্টে নামিয়ে দিয়েছে।

তার মতলব যে হাসিল হয়নি রমেশকে দিয়ে, এটাই রমেশের মারাত্মক অপরাধ। আপিসের কাজের দিক থেকেও সে সুনীলের মতো অপরিহার্য নয়—সুনীলের বিপরীত হিসাবেও অপরিহার্য নয়।

তাকে পুরোপুরি বিশ্বাস করতে পারে না অঘোর—ভালো কাজেও নয়, চোরা কাজেও নয়।

সে ব্যাপারের জের হয়তো আজও মেটেনি। এখনও হয়তো অঘোর বুঝবার চেষ্টা করছে তার মেয়ের বিদ্রোহের জন্য সুনীলের দায়িত্ব কতখানি, সুনীলকে শাস্তি দেওয়া কর্তব্য কিনা অথবা সুনীল ভালোই করেছে তার !

খোঁড়া যুবতি মেয়ে।

বাপের এত টাকা।

এরই প্রতিক্রিয়ায় কী হয়ে যেতে পারত সে হিসাব কী আর অঘোর করে না, এত বড়ো সে হিসাবি মানুষ ! মেয়েকে নিয়ে হয়তো নাকের জলে চোখের জলে একাকার হতে হত তার।

হয়তো সুনীলের জন্যই তার ব্যর্থতার প্রতিক্রিয়া গ্রাস করা দূরে থাক, বিভার চরিত্রটি হয়েছে শক্ত, নিজের মনকে সে বেশে রাখতে পারে।

কিন্তু ক-দিন ধরে নতুন করে আবার মেঘ ঘনিয়েছে অঘোরের মুখে।

বিভার জন্যই মেঘের সঞ্চার সেটা অনুমান করা যায়, কারণ মেয়ের জন্য ছাড়া অন্য কোনো কারণে তার মুখে এ রকম মেঘ সঞ্চারিত হয় না।

মেজাজ বিগড়ে গেলে অঘোর আপিসে কর্মচারীদের সঙ্গে সাধারণত খুব ভালো ব্যবহার করে। ব্যতিক্রমও অবশ্য ঘটে থাকে কিন্তু এটাই তার সাধারণ নিয়ম।

সে জানে, রাগ দিয়ে কোনো কাজ হয় না সংসারে। রাগ বরং কাজ নষ্টই করে দেয়, লোকসান ঘটায়। অন্য সময় তো টনটনেই থাকে সাধারণ বিচারবুদ্ধি, রাগের সময়টাই বরং সাবধান থাকা বিশেষভাবে দরকার।

রোজ একটা দুটো জবুরি কাজ সুনীলের থাকেই। হয় সে কাজ অন্য কেউ করতে পারবে না অথবা অন্যকে দিয়ে করাতে অঘোরের বিশ্বাস বা সাহস হবে না।

কাজ বুঝিয়ে দিয়ে অঘোর বলে, তোমার হাতে উন্নতি হচ্ছে কাগজটার। কিন্তু এত খাটুনি কি পেরে উঠবে ?

অঘোরকে বলে সুনীল নন্দার কাগজের জন্য একটা স্থায়ী বিজ্ঞাপনের ব্যবস্থা করেছে। সেই সূত্রে অঘোর নিয়মিত কাগজ পায়।

কাগজে খাটুনি বিশেষ নেই। ঘরেও লেখাপড়ার কাজ করি, ওখানেও সেই একই কাজ। এ আনন্দের কাজে কষ্ট হয় না।

আমার এখানের কাজটা হল কষ্টের, কেমন ?

কাজ কষ্টের নয়। তবে একটা বাধ্য হয়ে করা, একটা কাজ নিজের খুশিতে করা। আপনার কাজে আমি ফাঁকি দেব না। যদি দেখি দুদিক সামলাতে পারছি না, একটা ছেড়ে দেব।

কোনটা ? আমার কাজ ?

সুনীলের মুখে একটু হাসি ফোটে।

আপনার কাজ ছাড়বার কী উপায় আছে ? কাগজ চলছে লোকসান দিয়ে। আমাকে এত বেতন দিয়ে ওরা কি রাখতে পারে ?

অঘোর আচমকা বলে, তুমি যাবার পর কাগজটায় বড়ো কড়া কড়া কথা লেখা হচ্ছে। এতটা কি ভালো ?

সুনীল বলে, অন্যায়-অনাচারের সমালোচনা আর কত নরম হতে পারে বলুন—সে রকম সমালোচনায় লাভ কী ? আগে বরং এলোমেলো গালাগালি থাকত, আমি সেটা একেবারে বন্ধ করে দিয়েছি। যুক্তি দিয়ে সিরিয়াসলি সমালোচনা হয় বলেই আজকাল লেখাগুলি কড়া মনে হয়। আগে টের বেশি কড়া কথা লেখা হলেও সস্তা গালাগালির জন্য সমস্ত লেখাটাই হালকা হয়ে যেত, তেমন কড়া মনে হত না।

বটেই তো, বটেই তো !

একটু চিন্তিত মুখেই সুনীল ফাইল হাতে নিজের জায়গায় ফিরে যায়। সে টের পেয়েছে, কোনো একটা মতলব ভাঁজছে অঘোর, তারই সম্পর্কে ভাঁজছে !

রবিবার ভোরে অঘোরের গাড়ি এসে দাঁড়ায় সুনীলদের বাড়ির সামনে।

লাঠিতে ভর দিয়ে নেমে আসে বিভা। খুঁড়িয়ে খুঁড়িয়ে সেদিনের মতো ভিতরে যায়।

বলে, বড়োই নাকি ব্যস্ত শুনলাম ? না শুনলেও বুঝতে পারছি। নইলে অতবড়ো একটা ব্যাপার পরামর্শ নিতে এলাম—আর তারপর খোঁজখবর নেওয়া নেই।

সুনীল বলে, খোঁজখবর নেওয়া নেই ? রোজ তোমার খবর পাই। তোমার বাবার আপিসে চাকরি করি ভুলে গেছ নাকি ?

আমি ভুলিনি, ভুলেছ তুমি। চাকরিটা খসিয়ে মনে পড়িয়ে দিতে হবে মনে হচ্ছে। মনিবের মেয়ে, এত অবহেলা সইব না আপিসের একটা কেরানির।

অবহেলা ? রোজ তোমার খবর নিই বলে ?

মাসে একবারটি গিয়ে চোখে দেখে খবর আনো না বলে।

বিভা হাসে।

জানি জানি, তুমি খবরের কাগজ বার করেছ, তোমার চান্দিকে নাম, কাজের তোমার অন্ত নেই। মনিবের মেয়ে হয়েও তাই তো নিজে নিচু হয়ে এলাম।

বিভা আবার একটু হেসে গম্ভীর হয়ে যায়। বলে, তামাশা নয়, কী ব্যাপার বলো তো সুনীলদা ? কাল বাবা প্রায় একঘণ্টা তোমার সম্বন্ধে আমাকে জেরা করল। তোমার আদর্শ কী, জীবনে তুমি পলিটিক্স করতে চাও নাকি, খবরের কাগজে ভিড়েছ কেন—এমনি সব কত যে আবোল-তাবোল প্রশ্ন। আমি সত্যি ভাবনায় পড়ে গেলাম। জগতে একটা মানুষ একটু নিঃস্বার্থভাবে স্নেহ করে, বিপদে-আপদে পরামর্শ দেয়, কী বলতে কী বলে ফেলে শেষকালে তার দফাটি রক্ষা করব ! হঠাৎ তোমার সম্পর্কে বাবার এত কৌতূহল চড়ে গেল কেন ?

সুনীল বলে, হঠাৎ যে খবরের কাগজে ভিড়ে গেলাম—কড়া কাগজ হল। তোমার বাবাই শুধু নন, আরও অনেকের কৌতূহল হঠাৎ চড়ে গেছে।

তোমার কোনো বিপদের ভয় নেই তো ?

কাতব মুখে কবুণ প্রশ্ন। সুনীলের কাছে বিভা আজ একেবারে সংযম হারিয়ে ফেলেছে। অথচ সুনীলের কাছেই প্রাণপণে সে নিজেকে বিচলিত বিগলিত হতে দেয় না, সুনীল পাছে মনে করে যে সে তাব কাছে স্নেহ আব বন্ধুত্বের বেশি আর কোনো আশা রাখে।

সুনীল নীরবে একটা সিগারেট ধরাতে বিভা সচেতন হয়। মুখখানা তার রাঙা হয়ে ওঠে।

সুনীল বলে, তবে তো আর জবাব দেবার দরকার নেই। তুমি নিজেই বুঝতে পেরেছ পুরুষ মানুষের বিপদের ভয়ে কেঁচো বনে থাকলে চলে না।

বিভা বলে, পুরুষমানুষ ! পুরুষমানুষ ! বড়ো অহংকার পুরুষমানুষের। মেয়েমানুষ যেন মানুষ নয় ! ছেলেবেলা থেকে এ অবস্থা না হলে একবার দেখিয়ে দিতাম মেয়েমানুষ ভেসে আসেনি। নিজে বাবার আপিসের ভার নিয়ে তোমাকে হুকুম দিয়ে খাটাতাম।

সুনীল বলে, এই তো ধাতে ফিরেছ !

তারপর হেসে বলে, বাবার আপিসের ভার নিয়ে ? তোমার বাবা বুঝি পুরুষমানুষ নন ?

বিভা তজ্ঞী তুলে বলে, ছি ! পৌরুষের অহংকারে শেষে এই বুদ্ধি হল ! মেয়ের কাছে শেষে বাপকেও পুরুষ বানাবার চেষ্টা ? বাপের সম্পত্তি ছেলে পায়। আমি মেয়েছেলে হলেও বাপের সম্পত্তি পাব, পুত্রকে টেকা দেব। বাবা পুরুষ না স্ত্রীলোক সে খবরে আমার কাজ কী ?

সুনীল বলে, তুমি সত্যি আজ আমাকে লজ্জা দিলে।

খবর আসে, লোক এসেছে। একজন, দুজন নয়, পাঁচজন বিশিষ্ট বেশধারী ভদ্রলোক।

সুনীল বলে, দেখলে ? রবিবার সকালটাও একটু বেহাই দেয় না। আবছা ভোরে বেরিয়েছিলে তাই সুনীলবাবুর সঙ্গে এতক্ষণ কথা বলাব ভাগ্য হল। নইলে—

সুনীল শুধু গেঞ্জিটা গায়ে চড়িয়ে বাইরে যাওয়ার উপক্রম করে।

বিভা বলে, গেঞ্জি নয়, পাঞ্জাবিটা গায়ে দিয়ে যাও।

সুনীল খানিকক্ষণ যেন অবাক হয়ে চেয়ে থাকে। তারপর সোৎসাহে বলে, ঠিক বলেছ !

শটীন বাঁধানো দাঁত খুলে রেখে দুধে ভেজানো পাউবুটি মাড়ি দিয়ে পিষে খেতে খেতে মেয়েকে বলে, খেয়াল হল তাই সাবধান করে দিচ্ছি, পবে যেন আমায় দোষ দিয়ে না। আমি সেকেলে মানুষ।

সেকেলে মানুষ।

নিশ্চয়। একেলে তোদের দিকে খানিক সহানুভূতি না দিয়ে উপায় নেই—কিন্তু মানুষটা আমি পুরোমাত্রায় সেকেলে। বাপ ছেলেমেয়ের জন্য যতটুকু একেলে হতে পারে, আমি তা হব, তার চেয়ে বেশি যেন টেনো না আমায়। তোরা বড়ো বেহিসাবি।

আমরা বেহিসাবি ? আমরা নিজেদের হিসাব কষছি, তোমাদের ভুল হিসাবকে সামলে নিচ্ছি।

তোরাই শেষ হিসাব করবি ? তোদের পবে আর হিসাব থাকবে না ? এইখানে শেষ জগৎ জীবন সভ্যতা সব কিছুর ?

নন্দা হাসে। এ প্রশ্নের কোনো জবাব দেয় না।

শটীন বলে, আমার কাছে চুপ করে থাকার সুবিধে আছে—অন্যেরা কিন্তু রেহাই দেবে না।

অন্যেরা মানে কাদের কথা বলছ ? কাগজে যাদের সমালোচনা করছি ? না, যারা টাকা পাবে ? অথবা যারা কাগজের জন্য খাটছে ?

সকলের কথাই বলছি। এভাবে বেশিদিন কাগজ চালানো যাবে না। তোমরা ক্রমে ক্রমে বাদিকে মোড় নিচ্ছ। কাগজের লাভ কিছুই নেই, বামপন্থী যাদের কাগজ নেই, তারা মাঝখান থেকে সুবিধা ভোগ করে নিচ্ছে।

তুমি সত্যি সেকেলে বাবা, অ্যাঙ্গিনে ভালো করে বুঝলাম। এতদিন কাগজটার কোনো নীতি না থাকার নীতি ছিল—সব খিচুড়ি পাকিয়ে একটা নিরপেক্ষ মত প্রকাশের চেষ্টা চলত। অ্যাঙ্গিনে দস্তুরমতো একটা নীতি ঠিক হচ্ছে, কতকটা সত্যিকারের খবরের কাগজ হতে চলেছে কাগজটা—তাতেই তুমি ভয় পেয়ে গেলে !

দূরদৃষ্টি থাকলে তোরও ভয় হত। সার্কুলেশন বাড়ার সঙ্গে লোকসান বেড়ে যাচ্ছে খেয়াল করেছিস ?

করেছি বইকী। তাই বলে সার্কুলেশন না বাড়়া ভালো নাকি ? কাগজ বার না করলে কিছুই লোকসান যায় না !

শচীন নীরবে খেয়ে ওঠে : হরতকির টুকরো মুখে দিয়ে ধীরে ধীরে বলে, একে একে বাইরের লোক এসে জুড়ে বসছে। হয়তো এমন দাঁড়াবে, তুই একটা কথা বললে কেউ দাম দেবে না।

নন্দা নিশ্চিতভাবেই বলে, ও রকম খাপছাড়া কথা আমি বলব কেন ? পাঁচজনের চেষ্টাতেই একটা খবরের কাগজ চলতে পারে, যে খাটবে তারও কাগজটাকে আপন ভাবা চাই। নইলে মালিকের একার সাধ্য আছে কাগজ চালায় ? পাঁচটা পাঁচ রকমের লোক নিয়ে সাধারণ একটা আপিস চালানো যায়, যে যার নিজের মনে নিজের কাজ করে যাবে। কিন্তু খবরের কাগজে পাঁচজনের খাটুনিতে সামঞ্জস্য থাকা চাই, তাদের খাটুনি মিলেমিশে কাগজটাকে রূপ দেবে।

শচীন বলে, এগুলি তোর কথা নয়, তুই এগুলি সুনীলের শেখানো কথা বলছিস।

নন্দা বলে, তা বলছি। কিন্তু কথাগুলি ঠিক তো ? আমি মনে মনে যা ভাবছি জানলে তুমি চমকে যাবে বাবা।

বুড়ো বাপকে বেশি চমকে দিয়ে না।

তবে মনের কথা মনেই থাক। একদিন অবশ্য জানতে পারবে।

সন্ধ্যার দিকে কাগজটার আপিসে গেলে মনে হবে এতদিনে বৃষ্টি স্বপ্ন সফল হয়েছে মৃত প্রমোদের, এতদিনে জেঁকে উঠেছে তার স্থাপিত সংবাদপত্রটি। নানাকাজে লোকজন তো সর্বদা যাতায়াত করছেই, বিনা কাজেও যে কত লোক আজকাল আসা-যাওয়া করে তার হিসাব রাখা দায়।

কেবল সাধারণ বাজে লোক নয়, খ্যাতিমান অর্থবান মানুষেরও পদার্পণ ঘটে পত্রিকার আপিসে—অনেক নামকরা নেতা লেখক সাংবাদিক শিক্ষাব্রতী সন্ধ্যার দিকে এসে আড্ডা জমায়।

নন্দা সুনীলকে বলে, আপনার আমার মধ্যে একটা পরিষ্কার লেখাপড়া হওয়া উচিত। কবে কী নিয়ে আপনাতে আমাতে ঝগড়া লাগবে—মাঝখান থেকে সর্বনাশ হয়ে যাবে কাগজটার।

কী লেখাপড়া হবে ?

আপনাকে কাগজটার আংশিক মালিকানা দিয়ে দেব। আমার সঙ্গে ঝগড়া হলেও তাহলে কাগজটার ক্ষতি করতে পারবেন না।

আমি তো মাইনে নিচ্ছি।

ভারী মাইনে নিচ্ছেন এত খেটে ! তাও তো গত মাসে পুরো টাকা পাননি। কাগজটাকে যে তুলছেন এত চেষ্টা করে, শুধু মাইনে নেবার স্বার্থ হলে জোর পাবেন কেন ?

সুনীল একটা বিড়ি ধরিয়ে বলে, শুধু মাইনের স্বার্থ নয়—কাগজে লিখছি। কাগজে আমার মতামত প্রকাশ পাচ্ছে, অনেক গায়ের জ্বালা কাগজটার মারফত ঝাড়তে পারছি, দেশের লোকের অনেক দাবি-দাওয়া নিয়ে লড়াই করছি। কাজ করে এত আনন্দ জীবনে কখনও পাইনি। কেবল কী মনে হয় জানো ? বন্ধ একটা জ্বালা মতো এতদিন যেন জীবনটা শুধু পচছিল—এতদিনে সত্যি একটা

গতিলাভ করেছে। হাঁপ ছেড়ে বেঁচেছি। কাগজ তোমারই থাক, আমাকে কাগজটা চালিয়ে যেতে দিয়ো, তাহলেই হবে।

নন্দা বলে, ধরুন দুদিন বাদে আমার মন বিগড়ে গেল, আপনাকে কাগজ চালাতে দিলাম না, তাড়িয়ে দিলাম। জগতে কতরকম কী হতে পারে, তখন কী করবেন ?

অন্য একটা কাগজে ঢুকে পড়ব।

নন্দা জোর দিয়ে বলে, এ হিসাবটা ভুল হল আপনার। এ কাগজটার জন্য যেভাবে খাটছেন অন্য কাগজে ঢুকে সে সুযোগ পাবেন না। এ কাগজটাকে নিজের ভাবতে পারছেন, অন্য কাগজে গিয়ে তা পারবেন ? তার চেয়ে আমি যাতে আপনার অধিকারে কোনোদিন কোনো কারণে হস্তক্ষেপ করতে না পারি, সে রকম একটা ব্যবস্থা করে নেওয়াই তো ভালো। আপনাকে সে দায়িত্ব শেষ পর্যন্ত নিতেই হবে—আমার রসদ ফুরিয়ে এসেছে। নিখিলবাবু নানাভাবে শুষতেন, এখন বুঝতে পারছি। সুনীল নীরবে ভাবে।

নন্দা বলে, আমি নিঃস্বার্থভাবে আপনার উপকার করছি ভাববেন না। কাগজের ভাগিদার হলে কাগজ থেকে লাভ করতে পারলে নেবেন, নইলে নেবেন না, আপনার সম্পর্কে আমার কোনো দায় থাকবে না। লাভ দিয়ে হোক, লোকসান দিয়ে হোক, নিজের কাগজ আপনি নিজে চালিয়ে যাবেন। সুনীল চিন্তিতভাবে বলে, হিসেবটা করেছ বুদ্ধিমতীর মতোই। এখন মাইনে বলে তবু কিছু নিচ্ছি, সেটা বন্ধ করতে চাও। এ কাগজ থেকে লাভ হতে দেবি আছে।

নন্দা হাসিমুখে বলে, এত খেটে, এত সময় দিয়ে, সামান্য যা আপনি নিচ্ছেন সেটা না পেলে আপনার চলবে কেন ? ভাগিদার করে আপনাকে হাতখরচের টাকা কটা থেকে বঞ্চিত করব, আমি মোটেই সেটা হিসাবে ধরিনি। নিজে দোকান দিলে, লোকে আয় থেকে নিজের খরচের টাকাও নেয়। না নিলে চলবে কেন ? যে নামেই নিন—এত সময় দিয়ে খাটলে খুটলে, কিছু টাকা আপনাকে নিতেই হবে।

সুনীল ভেবে বলে, তোমার বাবা ? প্রদ্যোতবাবু ? ওরা কী বলবেন ?

বুঝলে কিছুই বলবেন না, খুশিই হবেন। না বুঝলে যা খুশি হয় বলবেন। এতদিনে কাগজটা তুলবার একটা সুযোগ পেয়েছি, বাপ-দাদার খাতিরে সে সুযোগটা নষ্ট করব নাকি ? আগেও একবার একজন পাটনার জোটার কথা হয়েছিল, পয়সাওয়ালা পাটনার। সুবিধামতো লোক না পাওয়ায় হয়নি। ঠিক লোকটিকে পেয়ে গেছি, আমি ছাড়ছি না কিছুতেই।

আচ্ছা, একদিন দুজনে বসা যাবে। খরচ আরও বাড়বে মনে হচ্ছে। প্রেসটার পিছনে কিছু পয়সা ঢালা দরকার।

সেই জনাই তো তাগিদ দিচ্ছি—ভাগ নিন। নিয়ে যা দরকার-টরকার সব ব্যবস্থা করুন।

আনন্দ আর উৎসাহ যেন উৎসারিত হয় নন্দার মুখ থেকে। সে মুখের দিকে চেয়ে থাকতে থাকতে সুনীলের মনে পড়ে যায়, এই সেদিন নন্দাকে পড়ানোর কাজটা সে বেছে নিয়েছিল যে এ মেয়ে তাকে বিশেষ পাক্স দেবে না, এর কাছ থেকে কোনোরকম ন্যাকামির ঝঞ্জাট পোয়াবার আশঙ্কা নেই।

হিসাব তার ভুল হয়নি। কিন্তু এতখানি প্রাণশক্তি যে নন্দার আছে এটা সে ধরতে পারেনি আগে। নন্দার মধ্যেও কি রসকম নেই মায়ার মতো, তার মতো ? কাজ আর দায়িত্বের মধ্যেই তারও জীবনের আনন্দ-বেদনার হিসাবনিকাশ ? অথবা মৃত স্বামী মনটা দখল করে আছে বলে ওদিক দিয়ে তার আর কোনো আশা-আকাঙ্ক্ষা স্বপ্ন নেই ?

কিন্তু স্বামীর জন্য শোক নেই বলেই তো এদিকে আবার কুমারীও সেজে থাকে।

নবীনের একখানা কবিতার বই বেরিয়েছে।

চটি বই। ছোটো আর মাঝারি আকারের গোটা বাইশ কবিতা।

আলপনা সগর্বে বইখানা দাদার হাতে তুলে দেয়। বলে, কবিতা না পড়েই সমালোচনা করে একদিন ওকে চটিয়েছিলে, কবিতাগুলি পড়ে একটা সমালোচনা লেখো দিকি ভালো করে।

আমায় লিখতে বলেছে ?

আমি বলছি, তুমি লেখ না।

কল্পনা দিন দুই আগে প্রণবের সঙ্গে বাপের বাড়ি এসেছিল। প্রণব একদিন থেকেই চলে গিয়েছে। কল্পনার চেহারা দেখে তার স্বশুরবাড়ির উপর এ বাড়ির লোকেরা খুশি হতে পারেনি।

কল্পনা বলে, এত বিদো হয়েছে তোমার ? যার বই সে আসতে পারল না বলতে পারল না, তুমি দাদাকে হুকুম দিচ্ছ সমালোচনা লিখতে !

আলপনা বলে, দাদার সঙ্গে নবীনের যে কথা বন্ধ।

কল্পনা বলে, তাহলে দাদাকে দিয়ে সমালোচনা লেখানোও বন্ধ।

এই সুরটাই এবার স্পষ্ট হয়েছে কল্পনার কথায় ব্যবহারে—দাদার উপব দরদ। এ বাড়িতে আসবার আগে থেকেই বোধ হয় মতলব ঐটে এসেছে যে এবার যতদিন বাপের বাড়ি থাকবে স্পষ্টভাবে গায়ে পড়ে দাদাকে দরদ দেখাবে।

দাদা পছন্দ করুক বা না করুক !

প্রণব শ দুই টাকার একটা চাকবি করে। এবার কথায় কথায় সে সুনীলকে সলজ্জভাবে জানিয়ে গেছে যে সে-ও একবার রাজনীতির ধার ঘেঁষে কিছুদিনের জন্য জেলে গিয়েছিল—ছাত্র বয়সে।

সুনীলের কাগজটা পড়তে পড়তে নাকি মনটা আবার নাড়া খাচ্ছে তার।

সুনীল বলেছিল, ঠিক দলগত পলিটিক্স নেই কাগজটাব পিছনে। ওটা কোনো দলের কাগজ নয়।

প্রণব বলেছিল, তা হোক না। যারা দশজন সাধারণ লোকের পক্ষে থেকে তাদের স্বার্থে কথা বলছে, আপনারা তাদের কথাই তো বলছেন। ও মিলে যাবেই কমনম্যানের ইন্টারেস্ট যেই দেখুক—একাই দেখুক আর দল বেঁধেই দেখুক, বলতে হবে সেই এক কথাই।

সুনীল বলেছিল, তুমি ঠিক বলেছ। আমি দলীয় কাগজ উড়িয়ে দিচ্ছি না, বলছি না ও সব কাগজ দরকার নেই। রাজনৈতিক দল হলে তার একটা কাগজও চাই। সে কাগজে দলের কথা বেশি থাকবে, দলের স্বার্থ বড়ো হবে, সেটাও দোষেব কিছু নয় বরং উচিত কথাই। তবে এ বকম একটা কাগজেরও দরকার এ দেশে—অনেক দল কিনা।

সুনীল বলেছিল, কাগজ যারা পড়ে তারাও একটা দল কিন্তু। সংগঠিত নয়, কিন্তু দল।

প্রণব চলে গেলে কল্পনা সুনীলকে জানিয়েছিল, তোমার খুব ভক্ত হয়ে পড়েছে আজকাল।

তাই নাকি ! তা ভক্ত হয়েও আমার বোনটিকে এমন কাহিল করে ফেলেছে কেন ?

সেটা তোমার বোনের দোষ হতে পারে।

সত্যি কী তাই ? কেন রোগা হয়েছিস ?

এমনি। রোগা কি মানুষ ইচ্ছে করে হয় ?

কল্পনার শরীর খারাপ হবার ব্যাপারটা একটু ভালো করে খোঁজ করবে ভেবে রাখে, কিন্তু সময় আর হয় না সুনীলের। আগে ছিল বাঁধাধরা সময়ের কাজ, যতই খাটতে হোক অবসরের সময়টুকু

ছিল তারই হাতের মুঠোয়—বিশ্রাম করাব বদলে সে সময়টাও অন্য কাজে মাথা ঘামালে কারও কিছু আসত যেত না। এখন তার সবচেয়ে বেশি টানটানি পড়েছে সময়েব।

তাই আলপনাকে মুখখানা যথাসম্ভব ভারি ক্লি করে আসতে দেখে সে বিরক্ত হয়ে বলে, সামান্য কথা হলে এখন থাক। আমার সময় নেই।

আলপনা বলে, দিদির কথা বলব।

কী কথা ?

দিদি কেন রোগা হয়ে যাচ্ছে জানো ?

অগত্যা কাগজপত্র থেকে মুখ তুলে বোনের দিকে সুনীলকে তাকাতে হয়।

আলপনা ভূমিকা না করেই বলে, জামাইবাবুকে দিদিব পছন্দ হয়নি।

তুই কী করে জানলি ?

রকম-সকম দেখেই টের পেয়েছি। প্রণববাবুকে একেবারে আমল দেয় না। কেমন যেন একটা অবজ্ঞার ভাব। কথা কইলে গায়ে মাখতে চায় না।

সুনীল বলবার চেষ্টা করে, নতুন নতুন বিয়ে হলে—

আলপনা মাথা নাড়ে—হালকা হাসিঠাট্টার কথা বলছ ? আমি সেটা চিনি না ? প্রণববাবুর সঙ্গে ইয়ার্কি দিলে তো কথাই ছিল না। ও রকম অনেকেই দেয়, দেখায় যেন সব কিছু হাসিতামাশার ব্যাপার। দিদি সামান্য ব্যাপারে মুখ বাঁকায, কথায় কথায় বিরক্ত হয়—অনেক সময় কথাই বলে না ভালো করে, প্রণববাবুও কেমন একটু দুবুড় রেখে চলেন।

খেতে বসে সুনীল গৌরীকে জিজ্ঞাসা করে, প্রণব একদিন থেকেই চলে গেল কেন ? দু-একদিন থেকে যেতে বলনি ?

বলিনি ? কতবার বলেছি। থাকতে না চাইলে করব কী ! আপিস তো এখান থেকেই করতে পারে।

একটা চিঠি লিখে দিই, রবিবার দুপুরে এখানে থাকে, কী বলো ?

গৌরী কিছু বলাব আগেই কল্পনা বলে বসে, থাকগে না, অত খাতির না করলেও চলবে।

সুনীল বলে, তাব মানে ? নতুন জামাইকে খাতির না কবলেও চলবে কী বকম ?

কল্পনা বলে, ভারী তো একটা মানুষ। লেজ গুটিয়ে গুটিয়ে নিজেই ছুটে ছুটে আসবে দেখ তোমার কাছে।

বোনের মুখের ভাব লক্ষ করে সুনীল চিন্তিতভাবে খেয়ে যায়।

মুখের কথায় শুধু নয়, কল্পনার মুখের ভাবেও প্রণব সম্পর্কে দাবুণ অবজ্ঞার ভাব প্রকাশ পেয়েছে !

গভীরভাবে তালিয়ে না বুঝুক, নব বিবাহিতা বোনটির জীবনের কঠিন সমস্যাটা আলপনা ধরতে পেরেছে ঠিকই। প্রণবের সঙ্গে সাধারণভাবে কল্পনার কথা ও ব্যবহার লক্ষ করে, স্বামীর উপর তার শ্রদ্ধার অভাবটা ধরা আরও সহজ হয়ে গেছে তার পক্ষে।

কিন্তু এই অবজ্ঞা ও অশ্রদ্ধাপূর্ণ মনোভাবের কারণ কী কল্পনার ? নিজে সে প্রণবের সম্পর্কে খোঁজখবর নিয়েছে, তার সঙ্গে আলাপ-পরিচয় করেছে বিয়ের আগে। তাকে তো হালকা ফাজিল ছোঁড়া মনে হয়নি, যে বিয়ের পর তাকে কল্পনার পক্ষে মানুষ হিসেবে শ্রদ্ধা করা সম্ভব হয় না।

এবং স্বামীকে শ্রদ্ধা করতে না পারাটাও তো অতি মারাত্মক কথা ! প্রেম ছাড়াও স্বামী-স্ত্রীর চলে যায় কিন্তু এই সহজ শ্রদ্ধাটুকুর অভাব ঘটলে তো তাদের পক্ষে সুখী হওয়া সম্ভব হয় না কোনোমতেই !

খেয়ে উঠে সে একটু পরামর্শ করতে যায় মায়ার সঙ্গে।

মায়া সব শুনে বলে, আমিও তোমাকে বলব কি না ভাবছিলাম। যা ব্যস্ত দেখি তোমায়, এ সব ঘরোয়া সমস্যা ঘাড়ে চাপাতে আবার মায়াও হয়। ছায়াও বলছিল আমাকে, কল্পনা নাকি প্রণবকে কেয়ার করে না, কেমন একটা অবজ্ঞার ভাব আছে। আমি প্রথমটা বিশ্বাস করিনি, কিন্তু গতবার যখন ওরা এসেছিল, তখন লক্ষ করে দেখেছি যে সত্যিই তাই। তোমার বোনের কাছে স্বামীটি হয়েছে নেহাত বাজে লোক।

সুনীল বলে, এ তো ভারী মুশকিল হল।

মায়া বলে, মুশকিল বইকী। আমি আস্তে আস্তে ওর পেটের কথা টেনে বার করার চেষ্টা করেছে। ঘুরিয়ে ফিরিয়ে নানাভাবে কল্পনাকে জেরা করেছে। আমার কী মনে হয়েছে জানো ? দুটি কারণে কল্পনার মন বিগড়ে গেছে।

মায়া একটু থামে।

না, বিগড়ে গিয়েছে বলব না, মন উঠছে না বলি। প্রণব শুধু চাকরি আর বন্ধুদের সঙ্গে তাস খেলে আড্ডা দিয়ে দিন কাটায়, সিরিয়াস কাজ কিছু করে না, এই হল একটা কারণ। আরেকটা কারণ আমার মনে হয়, প্রণব একটু বাড়াবাড়ি কাব্যি করতে গিয়েছিল মেয়ের সঙ্গে। অন্য মেয়ে খুশি হত, উনি তোমার বোন তো। বউয়ের সঙ্গে ন্যাকামি করাই ভদ্রঘরের রীতি, প্রণবের বিশেষ দোষ নেই। অনেকে আবার নিজে থেকে করে না, বন্ধুরা যেমন শিখিয়ে দেয় সেই রকম করে। কিন্তু কল্পনা ধবে নিয়েছে যে, ওর স্বামী জুটেছে ছাবলা।

সুনীল ধীরে ধীরে বলে, কী করা যায় বলো তো ?

মায়া বলে, কিছুই কবা যায় না। ওদের নিজেদের মধ্যেই সামঞ্জস্য হয়ে যাওয়াই ভালো। তুমি শুধু প্রণবের সঙ্গে ভালো ব্যবহার করবে, দেখাবে যে প্রণবকে তুমি তুচ্ছ মনে কর না।

বড়ো ঝঞ্জাট সংসারে !

ঝঞ্জাট বইকী ! কিন্তু তুমি আমি সংসার না করেই ঝঞ্জাট পোয়াচ্ছি এই হল আসল মজা।

মাঝে মাঝে সুনীলের মনে হয় সে যেন নিজের ইচ্ছায় বা অনিচ্ছায় নয়, নিতান্তই ঘটনাচক্রে নন্দার কাগজটার সঙ্গে গভীরতরভাবে জড়িয়ে পড়েছে। একটা অদৃশ্য শক্তি তার খেয়ালখুশি ব তোয়াক্কা না রেখেই তাকে ক্রমে ক্রমে আরও বেশি করে জড়িয়ে জড়িয়ে বাঁধছে কাগজটার সঙ্গে।

এ চিন্তা মনে মনে এলে অবশ্য সে সঙ্গে সঙ্গেই ঝেড়ে ফেলে।

অদৃশ্য শক্তিতে তার বিশ্বাস নেই বহুকাল।

তার সব কাজের, সহজ হোক কিংবা একটু জটিল হোক, সাধারণ বাস্তব ব্যাখ্যা যতক্ষণ সে খুঁজে পাচ্ছে, অদৃশ্য কোনো শক্তির উপর দায় চাপিয়ে বেহাই খুঁজবার সাধ সত্যি তার নেই।

নন্দা তাকে কাগজটার ভাগ্যের মালিক করে ছেড়েছে।

সেটা তার সমস্যা নয়। মালিক হবার আগেই যেচে যেচে যে দায়িত্ব ঘাড়ে নিয়েছিল, মালিক হবার পর এমনি দায়িত্ব হয়তো বেড়েছে, কাজ বাড়েনি। মালিকানার ভাগ না পেলেও এ খাটুনি তাকে খাটতে হত। সেটা পালন করতে গিয়ে অঘোরের আপিসে চাকরি বজায় রাখা কঠিন হয়ে দাঁড়িয়েছে তার পক্ষে।

কাগজটা যদি দাঁড়ায় আগামী কয়েক মাসের মধ্যেই দাঁড়িয়ে যাবে—নইলে একেবারেই দাঁড়াবে না।

সমস্ত কিছু নির্ভর করছে তার উপরে। নন্দা থেকে আরম্ভ করে কাগজটার সাব-এডিটররা পর্যন্ত যেন তার উপর সমস্ত দায়িত্ব ছেড়ে দিয়ে, তার কথায় উঠবার বসবার জন্য প্রস্তুত হয়ে অপেক্ষা করে।

দায়িত্ব তোমার। কী করতে হবে বলো, আমরা করব।

নন্দা বলে, সাথে কী ভাগিদার করেছি ? আমি ভারী চালাক মেয়ে। এই সুযোগে তোমাকে দিয়ে করিয়ে নিতে না পারলে যে আর হবে না আমি সেটা টের পাইনি ভাবছ ? টের পেয়েই দায় চাপিয়েছি।

সুনীল বলে, সে তো বুঝলাম। আমি এখন কোন দিক সামলাই ?

নন্দা সঙ্গে সঙ্গে অশ্লান বদনে বলে, কাগজটার দিক। অন্যদিক অন্য লোকেরা ঢের ঢের সামলাচ্ছে, একটা খবরের কাগজের দিক কী সবাই সামলাতে পারে, না চেষ্টা করার সুযোগ পায় ? ভেবেচিন্তে সুনীল অঘোরের কাছে তিন মাসের ছুটির দরখাস্ত দাখিল করে।

দরখাস্তে লেখে যে ছুটিটা তার পাওনা আছে, ব্যক্তিগত কারণে ছুটিটা এখন দরকার হয়েছে। মুখে কাগজের কথা সব জানায়।

অঘোর বলে, চাকরি না ছেড়ে ছুটি নিচ্ছ এই জন্য যে কাগজ যদি নেহাত না দাঁড়ায়, চাকরিতে ফিরে আসবে। কাগজ একটু দাঁড়ালেই আর তোমায় আমি এ আপিসে দেখতে পাব না।

সুনীল বলে, সেটা তো বুঝতেই পারছেন। মাইনে পাব দুমাসের। তারপর যে আমার কী অবস্থা হবে ভাবতে পারছি না। বাড়িতে সকলকে আধপেটা খেতে হবে।

অঘোরের আজ নতুন ভাব। হাসিমুখে সে বলে, আরে বোসো না। এই তো দোষ তোমাদের, একা একাই তোমাদের বীরত্ব, কারও সঙ্গে হাত মিলিয়ে একটু কম বীর হতে তোমাদের মন চায় না।

সুনীল মনে মনে বলে, সেরেছে !

কিন্তু ক্রান্ত মুখে হাসি নিয়েই সে বসে। বাইরের ক্ষমতামূলী বিশিষ্ট ব্যক্তিদেরই শুধু অঘোরের মুখোমুখি যে চেয়ারে বসার অধিকার, আজ নিয়ে দ্বিতীয়বার সে সেই চেয়ারে বসতে পায়।

অঘোর বলে, আমি তোমায় বিশ্বাস করি, এতদিনে নিশ্চয় সেটা জেনেছ। তোমায় বিশ্বাস করা যায়—এটাই আমার কাছে তোমার একমাত্র গুণ। শুনে রাগ হচ্ছে না তো ?

সুনীল বলে, রাগ ? এত বড়ো প্রশংসা করলেন, রাগ হবে কেন ?

অঘোর বলে, বিশ্বাস করলে সকলে খুশি হয় না। মনে করে যে বোকা পেয়ে বাগাচ্ছি। তোমায় আমি সত্যি বিশ্বাস করি। আমি জানি তোমার কয়েকটা আদর্শ আছে, নিয়মনীতি আছে, মরলেও তুমি তা ছাড়বে না। আমি তাই ভাবছিলাম কী, তুমি যখন এভাবে কাগজটার দিকে ঝুঁকেছ, নিশ্চয় ওর মধ্যে সাবস্ট্যান্সিয়াল কিছু আছে।

অঘোর একটা সিগার ধরায়। সিগার ধরানোটা তার চাল মাত্র, ধোঁয়া খেতে সে ভালোবাসে না। এই সিগারটাই তার চার-পাঁচদিন চলবে।

খানিক সুনীলের মুখের ভাব লক্ষ করে অঘোর বলে, আমি যদি তোমার ওই কাগজটার পিছনে দাঁড়াই ? আমি যদি কাগজটা দাঁড় কবাতো যত টাকা দরকার ঢালতে রাজি হই ? তুমি এমনভাবে মেতেছ বলেই আমি কিন্তু মোটা টাকা এভাবে রিস্ক করতে বাজি হচ্ছি সুনীল।

সুনীল খানিকক্ষণ চুপচাপ বসে থেকে বলে, আপনি এ কাগজের পিছনে টাকা ঢালবেন ? এটা তো মুনাফার কাগজ নয়।

মুনাফা ? তুমি এটা অন্যায্য বললে সুনীল। মুনাফা তো চাদক থেকে পাচ্ছিই—আমি কি মানুষ নই ? বিভার পেছনে যে এত টাকা ঢালি, সেটা কি মুনাফার জন্য ?

কী শর্তে আপনি টাকা দেবেন ? হাজার চল্লিশ টাকা পেলেই আমি কাগজটাকে দাঁড় করিয়ে দিতে পারব।

অঘোর বোধ হয় এতটুকুও আশা করেনি। সে খুশি হয়ে বলে, তুমি সিগারেট ধরাও না, সিগারেট খাও। ও সব প্রেজুডিস আমার নেই। আমি খুব সোজাসুজি শর্তে তোমায় টাকা দিতে রাজি

আছি। তোমায় আমি বিশ্বাস করি তো। আমার শর্ত খুব সোজা। যতই হোক তোমরা জোয়ান ছেলেমেয়ে তো, রক্ত তোমাদের গরম। ওর একটা সেফগার্ড রাখব যে কোনো লেখা আমি বাতিল করলে সেটা ছাপা হবে না। আরেকটা শর্ত খুব বাজে ঠেকবে—নেতিবাচক। কাগজে আমেরিকাকে গাল দেওয়া চলবে না।

সুনীল বলে, কাগজের মালিকের সঙ্গে আলাপ করে আপনাকে জানাব।

কাগজের মালিক কে ?

একটা ফাজিল মেয়ে। কাগজটা ওর স্বামীর। ওকে না জিজ্ঞাসা করে কিছু বলতে পারছি না আপনাকে।

সুনীল উঠে যাবার পর অঘোর জানালা দিয়ে বাইরে তাকিয়ে থাকে।

রাত প্রায় সাড়ে এগারোটার সময় শেষবার সম্পাদকীয় প্রবন্ধটার প্রুফ দেখে দিয়ে সুনীল ভাবছে যে এখন বাড়ি ফেরার চেষ্টা করাই শক্তির অপচয়, দুঘন্টা ধরে চেষ্টা করে বাড়ি ফিরে খেয়েদেয়ে অভ্যস্ত বিছানায় শুয়ে হয়তো ঘুম আসবে না।

তার চেয়ে এখানে কিছু আনিয়ে খেয়ে, এখানেই রাতটা কাটাবার ব্যবস্থা করলে বাড়ি ফিরবার শক্তিক্ষয়টা বেঁচে যায়।

নন্দা তখন আসে।

লুচি আর মাংস নিয়ে আসে।

বলে, বোকা হলে বাড়িতে নাক ডাকিয়ে ঘুমোতাম। কিন্তু দেখছ তো, মানুষকে খাটিয়ে নেবার কায়দা জানি।

কী রকম খিদে পেয়েছিল এতক্ষণে যেন টের পাওয়া যায়, হাত ধুয়েই সুনীল তাড়াতাড়ি খেতে আরম্ভ করে।

তাকিয়ে দেখে নন্দা বলে, যতই হিসেবি হোক, নিজের পেটের হিসাবটা পুরুষের খেয়াল থাকে না। আর সব কিছু ভাবতে পারলে, রাত্রে খিদে পাবে এটা মনে পড়ল না কেন ?

সুনীল বলে, মেয়েরাই চিরকাল খাওয়ার ব্যবস্থা করে দিয়ে এসেছে বলে আমিও ওই নিয়মের মধ্যেই মানুষ হয়েছি। বাড়িতে ওদিকে খাবার ঢাকা দিয়ে রেখেছে।

নন্দা বলে, আজ্ঞে না। এদিকে লুচি-মাংস খাবে, ওদিকে খাবার ঢাকা থাকবে—এই রেশন আর চোরাবাজারে অত নবাবি করে না। বিকালে গিয়ে বারণ করে দিয়ে এসেছি যে আজ থেকে রাত্রে তোমার রান্না হবে না, আমার কাছে খাবে।

শুনে কী বলল বাড়িতে ?

খুশি হল না তেমন। পুরুষমানুষ রাত্রে বাড়ি না ফিরলেই মেয়েদের খারাপ লাগে—যে জ্ঞানোই ফেরা না হোক।

সে একটু থামে।

তোমার মা বলেছিলেন, অনিলও নাকি খুব রাত করে ফেরে।

খেয়ে উঠে সিগারেট ধরিয়ে সুনীল অঘোরের প্রস্তাবটা নন্দাকে শুনিয়ে দেয়।

নন্দা আশ্চর্য হয় না। বলে, এ রকম কত প্রস্তাব আসবে। একটা কিছু গড়তে গেলেই টাকাওলা লোক সেটা বেদখল করতে চায়।

সুনীল বলে, টাকার কিছু খুব দরকার ছিল। কিছু টাকা জোগাড় করতেই হবে।

নন্দা সায় দিয়ে বলে, কিন্তু এর কাছে টাকা নিলেই তো ইনি কাগজটা কন্ট্রোল করবেন ?

তা খানিকটা করবেন।

তবে ? এমনি দিতে যদি রাজি হন, শুধু লাভের ভাগ পাবেন কিন্তু কাগজ চালানো সম্পর্কে একটি কথাও বলতে পাবেন না—তা হলে নেবেন।

সুনীলের বিছানার চাদরটা ঝেড়ে পেতে দিয়ে নন্দা বলে, এখানে ঘুমোবেন তো ?

হ্যাঁ। বাড়ি যেতে কুড়ি মিনিট সময়ও যদি লাগে, ঘুমোলে কাজ দেবে।

ঘুমোন, আমি পালাই।

সকালে একেবারে বাজার করে নিয়ে বাড়ি ফিরে সুনীল খবর পায়, অনিল তখনও পর্যন্ত বাড়ি ফেরেনি।

গৌরী আপশোশ করে বলে, কী যে মতিগতি হল ছেলেটার !

কল্পনা বলে, আমার মনে হয় কোনো বদখেয়াল ধরেনি ছোড়দাকে, পয়সা রোজগারের চেষ্টা করছে।

তোর এ কথা মনে হয় কেন ?

মেয়েবন্ধু পুষতে পয়সা লাগে তো।

আধঘণ্টা পরে অনিল ফিরে এলে তার চেহারা দেখে মনে হয় কল্পনার অনুমানই সত্য, বদখেয়ালে বাইরে রাত কাটাবার মতো কোনোরকম ছাপ তার মুখে নেই। বেশ তাজাই দেখাচ্ছে তাকে।

কল্পনাই তাকে জিজ্ঞাসা করে, বাড়িতে কিছু না জানিয়ে কোথায় রাত কাটানো হল বাবুর ? বন্ধুর বাড়ি ঘুমিয়ে পড়েছিলাম।

কেন ? ঘুম কি আজকাল বেশি হচ্ছে ?

বিয়ে হয়ে তোর মাতব্বরি তো বেশি হয়েছে !

ওটা মেয়েদের হয়ে থাকে। বেশ তো, আমার মাতব্বরি পছন্দ না হয়, দাদার কাছে ব্যাপার-ট্যাপার সব খুলে বলবে যাও। কলেজের ছাত্র যদি পড়াশোনা বাতিল করে দিনরাত আড্ডা মেরে বেড়ায়, বাড়ির লোকের একটু ভাবনায় পড়তে হয় কিন্তু ছোড়দা। তোমার উচিত নিজে থেকে সব খুলে বলা। দাদা কিছু বলতে গেলে তো আবার অপমান হবে।

অনিল চা খেতে খেতে গোমড়া মুখে ভাবে। কল্পনার কথাগুলি হেসে উড়িয়ে দেবার সাধ্য তার নেই। উচিত-অনুচিত একটা সহজ বাস্তব বিচার সুনীল যেন গায়ের জোরে তার অভ্যাস করিয়ে দিয়েছে।

সুনীল শেখাতে সময় পায় না কিন্তু মায়ার স্কুলের হিসাবনিকাশ তাকেই দেখে দিতে হয়।

মায়া কাগজপত্র এনে সবে তাকে হিসাবটা বুঝিয়ে দিতে আরম্ভ করেছে, অনিল ঘরে এসে বলে, তুমি নাকি আমায় ডেকেছ দাদা ?

সুনীল বলে, ডেকেছিলাম। বাবা নালিশ করেছিলেন তোমার নামে। তুমি ঘর থেকে টাকা নিচ্ছ, বাইরে রোজগার করছ—অথচ তোমার নিজের খরচের দায়িত্বটা তুমি নিতে পারছ না।

অনিল চূপ করে থাকে।

সুনীল আবার বলে, আমরা টাকা ঢালব, তুমি পড়বে—তার একটা সার্থকতা আছে। আমরা পড়ার খরচও দেব, তুমি আবার নিজেও ওদিকে রোজগারের জন্য টাইম আর এনার্জি নষ্ট করবে, আমি এর মানে বুঝি না।

অনিল ধীরে ধীরে বলে, মানুষ বিশেষ অবস্থায় পড়লে—

বিশেষ অবস্থায় পড়বার অধিকার তো তোমার নেই।

মায়া অস্বস্তি বোধ করে বলে, আমি চলে যাব ? তোমাদের কথা বলতে অসুবিধা হচ্ছে হয়তো।

সুনীল বলে, অসুবিধা কেন হবে ? গোপন কথা তো কিছু হচ্ছে না আমাদের। অবশ্য অনিল যদি কিছু বলতে চায়—

আমার কিছুই বলার নেই।

আমার কথার একটা জবাব তো দেবে ? আমরা পড়ার খরচ দিলে তোমাকে পয়সা রোজগারের চেষ্টা বাদ দিতে হবে। ছাত্রজীবনে যা দরকার সব আমরাই জোগাব।

অনিল গোমড়া মুখে বলে, পয়সা রোজগাবেব চেষ্টা কি খারাপ ?

সুনীল বলে, নিজের কাজ ফাঁকি দিয়ে করা খারাপ বইকী। রোজগার ছাড়া তোমার যদি না চলে, পড়া ছেড়ে দিয়ে ভিড়ে পড়ো। ভুল করে কোনো দায়িত্ব যদি নিয়ে ফেলে থাকো, টাকার জরুরি দরকার হয়ে থাকে, আমাকে জানালে নিশ্চয় বিবেচনা করে দেখব। তোমাব ভুল করার অধিকার তো আমি কেড়ে নিইনি।

অনিল চুপ করে থেকে বলে, কাল বলব।

সে চলে গেলে মায়া ক্ষুব্ধ স্বরে বলে, রেবার এবার ও বেচারাকে রেহাই দেওয়া উচিত।

সুনীল বলে, গায়ের জ্বালা মিটছে না যে। আমার অপমানের শোধ নিচ্ছে। আমার কাছে পাস্তা পায়নি, গায়ে জ্বালা ধরেছিল। তার শোধ নিচ্ছে।

মায়া ক্রুদ্ধ হয়ে বলে, এ কী রকম শোধ নেওয়া ? নিজের ঘাড়েও তো পড়ছে ! যখন সামলাবার দরকার হবে তখন কী করবে ?

সে বিবেচনা যার থাকে তার কি মিছিমিছি গায়ে জ্বালা ধরে ?

ও বেচারাদের দোষ নেই। ঘরেবাইরে সিনেমায় খালি ভাবুকতাই তো শেখানো হয়। মেয়েরা আরও বেশি টসটস করে ভাবে।

তুমিও তো মেয়ে ?

মায়া একটু হাসে।

আমিও মাঝে মাঝে গদগদ হই বইকী।

পড়াশোনা নিয়ে থাকবে অথবা রোজগার করতে নামবে এ বিষয়ে অনিল তার সিদ্ধান্ত পবেব দিন জানাবে বলেছিল। কে জানে সে মনস্থির করতে পাবে না, অথবা সুনীলকে সিদ্ধান্ত জানিয়ে দিতে ভুলে যায়।

দিন তিনেক পরে কল্লনাকে প্রণব নিতে আসে।

কল্লনা সোজাসুজি জানিয়ে দেয়, আমি ক-দিন বাদে যাব।

ওদিকে অসুবিধা হচ্ছে।

হোক না একটু অসুবিধা।

দুজনের কথা কাটাকাটি বাইরে থেকে শোনা যায়। প্রণব যে রাগ করেছে, টের পেতে বাকি থাকে না বাড়ির লোকের ! তা, একদিনের জন্য বাপেব বাড়ি বেড়াতে এসে তিন দিন কাটিয়েও ফিরে যেতে না চাইলে অপর পক্ষের রাগ করার অধিকার আছে বইকী !

কল্লনা গ্রাস্য করে না।

বলে, করুকগে রাগ—ঘরের ভাত বেশি করে খাবে।

গৌরী চিন্তিতভাবে বলে, এ কী স্বভাব হল তোর বিয়ের পর ? একেবারে যেন মহারানি বলে গিয়েছিস ! এ রকম ব্যবহার করলে তোকে তো দুচোখে দেখতে পারবে না কেউ ? মেয়েমানুষ, পরের ঘরের বউ, এটুকু ভুলে গেলে তো তোমার চলবে না বাছা !

ভুলিনি গো, ভুলিনি। পরশু যাব বললাম তো।

প্রণব যে পরশু আসতে পারবে না বললে ?

খুব আসতে পারবে। নিজের গরজেই আসতে পারবে।

অনিল প্রণবের পক্ষ নিয়ে রেগে বলে, এ সব ফাজিল মেয়ের বিয়ে দেওয়া উচিত হয়নি।

দেখা যাবে তোমার কত ভালো বউ আসে।

খুব সকালেই প্রণব এসেছিল। চা জলখাবার খেয়ে সে চলে যাবে, আপিস আছে। রাত্রে সুনীল কাগজের আপিসেই ঘুমিয়েছিল, প্রণব বিদায় নেবার কয়েক মিনিট আগে সে বাড়ি ফেরে।

প্রণবের মুখ দেখে সে বলে, এখানে খেয়ে আপিস চলে য়েয়ো ?

না। আমার কাজ আছে।

সুনীল আর কিছু বলে না।

অনিল ক্রুদ্ধ মুখে বলে, কল্পনাকে তোমার শাসন করে দেওয়া উচিত।

সুনীল শান্তভাবেই বলে, শাসন করা দরকার হলে এবার প্রণব করবে। আমি কী আর শাসন করতে পারি ?

প্রণব গম্ভীর মুখেই বলে, শাসন করে কী আর স্বভাব বদলানো যায় ? আপনার বোনের প্রকৃতিটাই হালকা।

সুনীল বলে, না হালকা মেয়ে ও নয়। একটা কিছু গোলমাল হচ্ছে, ঠিক বুঝতে পারছি না। আমার কথা রাখতে আজকের মতো তুমি ওকে ক্ষমা করো প্রণব। ও কেন এ রকম করছে একটু বুঝবার চেষ্টা করে দেখি।

প্রণব চলে যেতেই অনিল হঠাৎ ঝাঁঝের সঙ্গে বলে বসে, এ সমস্ত কিছুর জন্য দায়ি তুমিই। তুমিই সকলের মন বিগড়ে দিয়েছ। কারও স্বাভাবিক চালচলন আসে না।

সুনীল আশ্চর্য হয় না, রাগও করে না। গম্ভীর শান্ত মুখে বলে, কথাটা আমায় বুঝিয়ে দিতে পারলে সত্যি খুব উপকার হয়। আমার সম্পর্কে এ রকম একটা কথা যখন তোমার মনে এসেছে, খোলসা করে বলাই ভালো। আমি যে দাদা, গুরুজন এটা ভুলে গিয়ে তুমি খোলাখুলি কথা বলতে পারো। তোমার নালিশ যদি যুক্তিসঙ্গত হয়, আমি নিশ্চয় প্রতিকারের ব্যবস্থা করব।

অনিল চুপ করে থাকে।

সুনীল আবার বলে, কেন কথাটা মনে হয়েছে বলতে পারছ না ?

অনিল বলে, আমার কথা কি তুমি মানবে ? তুমি মানুষটাই ভয়ানক নিষ্ঠুর। তোমার কাছে মোটা হিসাব ছাড়া কোনো কিছুর দাম নেই। স্নেহ মায়া এ সব তুমি ন্যাকামি মনে কর। তোমার কাছে কল্পনা ওই নিষ্ঠুরতা শিখেছে— প্রণবের ভালোবাসা ওর ন্যাকামি মনে হয়। শক্ত পাথরের মতো মানুষ না হলে তাকে মানুষ বলেই গণ্য করতে পারে না।

এত বড়ো নিষ্ঠুর অভিযোগ ! সুনীল একবার ভাবে খানিকক্ষণ সময় নিয়ে ছোটো ভাইটিকে বুঝিয়ে দেবার চেষ্টা করবে, নিষ্ঠুর তার দাদা নয় ভাবাবেগের স্বার্থপরতায় সেই বরং নিষ্ঠুরতার চরমে উঠতে পারে, নিজেকে হীন পর্যন্ত করতে পারে।

কিন্তু বুঝিয়ে দিলেও বুঝবে কী ?

সুনীল তাই শান্তভাবেই প্রশ্ন করে, তোমার নিজের দিক থেকে ধরলে ?

আমারও তাই। তোমার কাছে উলটো নিয়ম শিখেছি। সংসারে হৃদয় নিয়ে কারবার যদি না চলত, তাহলে আলাদা কথা ছিল। আর সকলে হৃদয়টা মানছে, স্নেহ মায়া দুর্বলতা এ সব হিসাব ধরছে। তুমি আমাকে খানিকটা যন্ত্রের মতো বানিয়ে দিয়েছ, মানুষের সঙ্গে খাপ খেতে পারি না। কিন্তু ভালো লাগে না আমার, সব সময় কেমন একটা অস্থিরতা জেগে থাকে। মনে হয়, আমি একেবারে অপদার্থ। এ কাজটা বুঝি অন্যায় করলাম, ও কাজটা বুঝি উচিত হবে না—

আমার জন্য এটা হয়েছে ?

তোমার জন্য। তুমি সব নিয়মে বেঁধে দিতে চাও। জীবনে হাসি আনন্দ ফুর্তির এতটুকু দাম নেই তোমার কাছে। সবসময় সব ব্যাপারে মানুষকে সিরিয়াস হয়ে থাকতে হবে। এদিকে তোমার আবার খুব জোরালো পার্সোনালিটি—তাব চাপে আমবা কঁকড়ে গেছি। ভাইবোনেদের তুমি স্বাভাবিকভাবে মানুষ কবতে পারনি।

সুনীল একটু সময় চুপ করে ভাবে।

শান্তভাবেই বলে, আচ্ছা, কথাটা একটু অন্যভাবে বিচার করা যাক। আমাদের মধ্যবিস্ত ভদ্র সমাজে চরম ভাঙন ধরেছে, জীবনে বিকাব আর অস্বাভাবিকতা এমনিতেই খুব বেশি দেখা যাচ্ছে। আমি তোমাদের ভাবপ্রবণতার পথে সহজে ভেসে যেতে না দিয়ে খানিকটা বাস্তববুদ্ধি, বাস্তববিচার এনে দিয়েছি—হৃদয়মন একটু শক্ত করে দিয়েছি। স্রোতে ভেসে যেতে দিলে তুমি হয়তো এই সংঘাতটা টের পেতে না—ভেসেই যেতে। তুমি যদি বুঝতে চাও আমি তোমায় অশ্বক কষে দেখিয়ে দিতে পারি—আমি একটু শক্ত না হলে সংসারটাই ভেসে যেত। এখনও তুমি যেটুকু ভদ্রভাবে চলতে ফিরতে পারছ, কলেজ যাচ্ছ, এ সব কিছুই পারতে না। তোমার যে কিছু ভালো লাগে না, সেটা অবস্থার দোষ, আমার শিক্ষার দোষ নয়। ভাঙনের অবস্থাটা ভালো লাগা কাবও পক্ষেই সম্ভব নয়, কেউ কেউ ফাঁকি দিয়ে এটা ওটা দিয়ে নিজেকে ভুলিয়ে রাখতে পারে, এই পর্যন্ত। এ অবস্থাটা ভালো লাগছে না, তুমি একটা পরিবর্তন চাইছ, জীবনটা তোমার কাছে সস্তা নয়—এটাই তোমার ভিতরের অস্থিরতার কারণ হতে পারে না ?

অনিল স্নানভাবে একটু হাসবার চেষ্টা করে।

তোমাব সঙ্গে কথায় পারব না। তুমি আসলে আমার মধ্যে ইনফিরিওরিটি কমপ্লেক্স জন্মে দিয়েছ। নিজেকে ছোটো মনে হয়, অপদার্থ মনে হয়।

সুনীল এবার গম্ভীর হয়। তার মুখ দেখে অনিলের মনে হয়, এতদিন জন্মেনি, এখন এই মুহূর্তে বুঝি তার ইনফিরিওরিটি কমপ্লেক্স জন্মাল !

ইনফিরিওরিটি কমপ্লেক্স ? সেটা কোথেকে আসবে, কেন আসবে ? ইনফিরিওরিটি কমপ্লেক্সেব থিয়োরি তুমি জানো, এ বিষয়ে পড়াশোনা করেছ ? না শুধু কথাটাই শিখেছ কুদের কাছে ? তোমার কথাই ধরি, আমার জোরালো পার্সোনালিটি আছে—কিন্তু একটা চরিত্রের প্রভাবে অন্যের চরিত্রে তো ওই কমপ্লেক্স জন্মায় না ? তোমায় অসহায় পেয়ে যদি অন্যায় অত্যাচার করতাম, তোমার কাছ থেকে জোর করে সেবা ভক্তি আদায় করতাম, তাহলে তোমার আত্মগ্লানি আসতে পারত। নিরুপায় হয়ে অত্যাচার সহিতে হলেই কেবল ইনফিরিওরিটি কমপ্লেক্স জন্মাতে পারে—জোরালো চরিত্রের প্রভাবে চরিত্রই গড়ে উঠতে পারে।

একটু থেমে সুনীল বলে, তুমি যেটা নিজের কমপ্লেক্স ভাবছ, আসলে ওটা তোমার আত্মবিচার। অত অন্যায় অবিচার মেনে নিয়ে একটা বিস্তী ভাঙন ধরা অবস্থায় আমরা বেঁচে আছি। তুমি ছাত্র—তুমি জান শিক্ষার নামে কী রকম ফাঁকি চলছে। এ অবস্থাটা মেনে নিতে হচ্ছে বলে নিজেকে ছোটো মনে হয়—মনে হয় এভাবে লেখাপড়া শেখাটাই বুঝি অন্যায় কাজ, অপরাধ। এই থেকেই অবশ্য অনেক ছেলে বিগড়ে যায়—ছটফটানি থেকে রেহাই পাবার জন্য হালকা ফুর্তি খোঁজে। যারা ভাঙন ধরা অবস্থাটা টিকিয়ে রাখতে চায়, ও রকম ফুর্তির ব্যবস্থাও তারাই করে দেয়।

অনিল চুপ করে থাকে।

সুনীল বলে, কল্লনার ব্যাপারটা আমার কী মনে হয় জানো ? বোকামি খানিকটা হচ্ছে প্রণবের দিক থেকেই। মেয়েদের সম্বন্ধে একালের ছেলেদের কিছু অভিজ্ঞতা জন্মে যায়—ওর এতটুকু অভিজ্ঞতা নেই। শুধু বই পড়ে সিনেমা দেখে আর বন্ধুদের কাছে শুনে যেটুকু শেখা ! ওর ভাবটা তাই

খাপছাড়া লাগছে কল্পনার—এ রকম বউ-পাগলা গদগদ ভাব কি আজকালকার মেয়েদের কাছে বুচিকর হয় ?

কল্পনাকে বুঝিয়ে বলবে ?

বুঝিয়ে বলার কিছু নেই। নিজেই বুঝবে। প্রণব টের পাবে ওভাবে আজকালকার বউয়ের মন পাওয়া যায় না, বুঝে নিজেই সামলে নেবে।

সুনীল মাথা তুলে বলে, আমি একটু শক্ত না হলে, এ প্রশ্নগুলি কি তোমার মনে জাগত অনিল ? অনিল চুপ করে থাকে।

সুনীল বলে, একটু বুঝে দেখবার চেষ্টা করো। সংসারটা বজায় রাখার ব্যাপারে ছাড়া কোনো বিষয়ে আমি তোমার ওপরে কর্তালি কবিনি। অবস্থা খুব খারাপ। সকলকে ত্যাগ করতে হবে, কষ্ট করতে হবে। সবারই যে দাবি আছে সেটা তুলে গিয়ে, তুমি কেবল নিজের কথা ভেবেছ। ধরো, তুমি একটা জামা চাইলে, আলপনা একটা ব্রাউজ চাইল, মা চাইল বিশ বছরের পুরানো পোকায় কাটা শাড়ির বদলে একটা নতুন গরদের শাড়ি। তুমি টাকার হিসাব কষে দেখছ—এদের দাবি মেটানো যায় না। এদের আবদার রাখলে রেশন আনা যাবে না—এরাই খিদেয় কাতরাবে। তখন তুমি কী করবে ? তোমাকে দেখতেই হবে কোনটা আবদার, কোনটা দরকার। তুমি সেই বুঝে ব্যবস্থা করবে। সেটা কি নিষ্ঠুরতা ? গরদের শাড়ি কিনে দিয়ে মাকে দয়া দেখিয়ে, মাকে খেতে না দেওয়াটা কি নিষ্ঠুরতা নয় ? অনিল গুম খেয়ে থাকে।

আগেও তো এ সব সোজা কথা বুঝিয়ে বলতে পারতে ?

আগেও বলেছি, অন্যভাবে বলেছি, তুমি বুঝতে পারনি।

অনিল বলে, অমনভাবে বলবার কী দরকার ছিল, ঠিকভাবে বললে হত !

ঠিকভাবেই বলেছি। তবে আমার ভাই, তোমাকেই তো একা বলতে হয়নি, অনেককে বলতে হয়েছে। তুমি তাই মানেই বোঝনি কী বললাম। এখন দায়ে পড়ে বুঝছ।

অনিলের মুখভাব দেখে সুনীল আবার বলে, দায়ে পড়ে বোঝাটা কিন্তু কোনো দোষের কথা নয়। মানুষ চিরকাল দায়ে পড়েই বুঝে এসেছে, মানুষের জীবনের ব্যাপারটা।

অনিল অনেকক্ষণ চুপচাপ বসে থাকে।

তাবপব হঠাৎ জিজ্ঞাসা কবে, তুমি বলছ আমরা পুরুষেরাই, আমাদের চালচলন দিয়ে, মেয়েদের চালচলন শিখিয়েছি—তৈরি করেছি ? ওরা যাই কবুক সে জন্য আমরা দায়ি ? ওদের কোনো দোষ নেই ?

সুনীল শুধু বলে, ছায়া তোমার চেয়ে অনেক বেশি ছেলেমানুষ।

মায়ার কাছে সুনীল খবর পায় যে অনিল হঠাৎ গিয়ে গায়ে পড়ে ছায়ার সঙ্গে বিবাদ মিটিয়ে নিয়েছে।

বাঁচা গেল। মেয়েটার জন্য সত্যি ভাবনা হচ্ছিল। আমার বসকষ নেই বলে আমার সঙ্গে পান্না দিয়ে জীবনটা রসালো করতে উঠে পড়ে লেগেছিলেন। আমি একটা যন্ত্র—ওকে মানুষ হতেই হবে। যন্ত্র না হওয়ার উপায় কী ? প্রেম করে করে জীবনটা রসালো করে তোলা !

মায়া হাসে, আবার স্বস্তির নিশ্বাস ফেলে।

এত বাজে বই পড়ে, বাজে সিনেমা দেখেও ভাগ্যে ছেলেমেয়েগুলি মানুষ আছে ! একটা মেয়ে এমনি করে এগিয়ে গেলেও ভাগ্যে ছেলেগুলি মাথা ঠিক রাখতে পারে ! ললিত বেচারার সঙ্গে যা আরম্ভ করেছিল, কী বলব তোমায়। ভয়ে ভয়ে দিন কাটাতাম, কবে বোনটি এসে কেঁদে বলে আবার মুশকিলে পড়ে গেছি। ললিতকে এতটুকু দোষ দিতে পারতাম না। চুড়ি বিক্রি করে যে মেয়ে অনিলকে নিয়ে—

সুনীল সিগারেট ধরিয়ে বলে, তুমি যে তাজ্জব কথা বলছ।

মায়া বলে, আমিও তাজ্জব বনেই গেছিলাম। কিছু ঘট্টন, নীতির ওপর দিয়ে গেছে তাই রক্ষা। অনিলকে কিন্তু আমি বাহাদুর ছেলে বলব। সিনেমা দেখে বেরিয়ে, মেয়ে চুড়ি বেচে টেনে নিয়ে গেল, সেদিনটা বেচারী সামলাতে পারেনি। তা পারেও না। কিন্তু নিজেকে ও রকম সন্তুষ্ট করার জন্য যে খাতানি অনিল দিয়েছে, একেবারে হাড়ে হাড়ে ব্যাপার টের পেয়ে গিয়েছে মেয়ে। অনিল কী বলেছিল জানো ? আজ আমার সঙ্গে খারাপ হবে, তোমাদের মতো মেয়েকে বিশ্বাস করা যায় না। অনিল যদি শক্ত না হত, দুমাস যদি তুচ্ছ করে না রাখত, ও হারামজাদি কি বুঝতে পারত, কত ধানে কত চাল ?

সুনীল বলে, ললিতের সঙ্গে সিনেমায় যায় বলে নাকি অনিল রাগ করেছিল ?

মায়া বলে, ললিতকে ধরেছিল পরে—অনিলকে একটি কাবু করার আশায় বাড়িতে বলে যেত সিনেমায় যাচ্ছি—অনিল যাতে খবর পায়। আসলে ললিতের সঙ্গে মেয়ে যেতেন মিটিংয়ে। ললিতের সিনেমা দেখার রোগ নেই।

সুনীল আশ্চর্য হয়ে প্রশ্ন করে, এ সব কথা অ্যাডিন আমায় বলনি যে ?

মায়া বলে, ভয় হত। তুমি তলিয়ে বুঝবে কি না কে জানে ? তোমার ভাই আমার ছেলেমানুষ বোনকে নষ্ট করেছে—তুমি হয়তো ধরে নেবে এটাই। খুন করেই হয়তো ফেলবে ভাইকে। আমি তো জানি ছায়াই আসলে দোষী।

সুনীল আরেকটা সিগারেট ধরায়।

তুমিও আমার সম্বন্ধে এ রকম ধারণা করে রেখেছ ? বিচার-বিবেচনা না করেই ভাইকে খুন করে ফেলতে পারি ? আমার মায়া-দয়ার বালাই নেই ?

মায়া বলে, আগে তাই ভাবতাম।

বলে গা ঘেষে এসে সুনীলের গলার কাছে ছোটো যে ফোড়াটা উঠছে, সেটাকে সন্তর্পণে আঙুল দিয়ে পরীক্ষা করে আবার বলে, কিন্তু দেখতে পাচ্ছি তোমার মায়া-দয়াটা বেশি। একজন দুজনকে নিয়ে মায়া-দয়া পোষায় না তোমার—মায়া-দয়ার কারবারটা তোমার দশজনকে নিয়ে বড়ো স্কেলে। আমরা ছোটো স্বার্থ নিয়ে কারবার করি তো—তোমায় ঠিক বুঝে উঠতে পারি না। নন্দা খবরের কাগজের অফিসে গভীর রাতে গিয়ে, তোমায় খাইয়ে দাইয়ে ঘুম পাড়িয়ে আসে শুনে ভেবেছিলাম—বাইরের মেয়েই তোমার ভালো লাগে, যে মেয়ের কোনোরকম দায় ঘাড়ে চাপার ভাবনা থাকে না। কিন্তু বুঝতে পারছি আমার ভুল হয়েছিল। কোনো মেয়ের কোনোরকম দুঃখকষ্টের দায়িক হতেই তোমার দাবুণ অনিচ্ছা। নিজের হাঙ্গামা এড়ানো নয়, তুমি কষ্ট দিতে চাও না।

১০

নবীন উদ্যোগী হয়ে কয়েকজন বন্ধুর সঙ্গে মিলে একটি মাসিকপত্র বার করেছে—নাম দিয়েছে ‘নব-আলপনা’। প্রথম পাতাতেই একটি কবিতা ছাপিয়েছে আলপনার,—কাঁচা মেয়েলি কবিতা।

আলপনা একটু ভয়ে ভয়েই কাগজটা সুনীলকে দেখায়। নাম সম্পর্কে সে আপত্তি করেছিল, নবীন কানে তোলেনি।

নামটা নিয়ে জানাশোনা ছেলেমেয়েদের মধ্যে বেশ খানিকটা কানাকানি হাসাহাসি শুরু হয়েছে। কেউ কেউ বলেছে যে, সংকোচটুকু বাদ দিয়ে ‘নব’ কথাটার বদলে ‘নবীন’ বসিয়ে দিলেই চুকে যেত।

সুনীলও সেটা খেয়াল করে জিজ্ঞাসা করে, এটা নবীনের ইয়াকি হল, না ছেলেমানুষি ? এ বুদ্ধিটুকু নিশ্চয় আছে ? নবীন নামে একটা ছেলের, চেনা আছে আলপনা নামে একটা মেয়ের সঙ্গে ; সে যদি হঠাৎ এ রকম নাম দিয়ে একটা কাগজ বার করে, লোকে হাসাহাসি করবে না ?

আলপনা মাথা হেঁট করে থাকে।

সুনীল বিরক্ত হয়ে বলে, কী ব্যাপার ? নাচতে নেমে ঘোঁটা টেনো না, খোলাখুলি কথা বলো।
আলপনা মৃদুস্বরে বলে, নবীন বলছিল, হাসাহাসি বন্ধ করার সহজ উপায় আছে, আমাদের
এনগেজমেন্ট ঘোষণা করে দেওয়া।

তোমাদের এনগেজমেন্ট ?

নবীন প্রোপোজ করেছিল, আমি রাজি হয়েছি।

আমাদের জানাওনি কেন ?

নবীন বাবাকে জানাবে বলেছিল।

বাবাকে জানিয়েছে ?

না, জানাতে আসবে।

সুনীল গম্ভীর মুখে বলে, নবীন তাহলে জেনেশুনে ইচ্ছে করেই এই নাম দিয়ে কাগজটা বার
করেছে ? ওর ভয় ছিল আমি পাছে অন্য কোথাও তোর বিয়ে ঠিক করি, ওর সম্পর্কে আপত্তি করি,
তাই আঁটঘাঁট বেঁধে নেমেছে ? ওর মাথায় এত চালাকি বুদ্ধি খেলে, তা তো জানতাম না !

আলপনা চুপ করে থাকে।

তোর সঙ্গেও পরামর্শ করেছে নিশ্চয় ?

আমি বাণ করেছিলাম। বলেছিলাম তুমি যদি অমত কর, এভাবে কাগজ বার করবার পরেও
করবে।

সুনীল বলে, আমার অমত নেই। চাকরি কবছে, তোর পছন্দ হয়েছে, আমি অমত করব কেন ?
আমার বরং অনেক ঝগড়াট বেঁচে গেল। কিন্তু নবীন যে এদিকে প্রতিজ্ঞা করেছে, আমার সঙ্গে জীবনে
কথা বলবে না ?

আলপনার মুখ কঠিন দেখায়।

এ প্রতিজ্ঞা ভাঙতে হবে। আমি পরিষ্কার জানিয়ে দিয়েছি, নিজে এসে তোমার সঙ্গে যেচে কথা
না কইলে, আমার সঙ্গেও কথা কয়ে কাজ নেই। প্রতিজ্ঞা ভঙ্গ করলে তুমি কী মনে করবে, এটাই
হয়েছে ওর আসল মুশকিল। নিজের প্রতিজ্ঞা ভাঙতে নিজেই লজ্জা পাচ্ছে।

সে তো পাওয়াই উচিত।

মোটাই উচিত নয়। মুখ দিয়ে একটা কথা বেরিয়ে গেছে বলেই সেটা সারা জীবন সত্য করে
আঁকড়ে থাকতে হবে, এটা একগুঁয়েমি, বোকামি। অন্য লোকের ভালোমন্দ সম্পর্কে প্রতিজ্ঞা হয়,
প্রতিজ্ঞা পালন না করলে অন্যের ক্ষতি হয়, সে আলাদা ব্যাপার।

সুনীল একটু আশ্চর্য হয়েই শোনে।

তোর আবার এ সব বিবেচনা হল কোথা থেকে ?

আলপনা সোজাসুজি বলে, তুমিই শিখিয়েছ। তুমি নিজের কত কথা পালটে নাও।

আগে ভাবতাম এটা বুঝি তোমার দুর্বলতা। তারপর দেখলাম যে না, দরকার হলে, অবস্থা
পালটে গেলে, হিসাব পালটে গেলে, কথাও পালটাতে হয় মানুষকে।

আলপনা চলে যাবার পর সুনীল অনেকক্ষণ ‘নব-আলপনা’র পাতা উলটোতে উলটোতে চুপচাপ ভাবে।

কাগজ বার করার যে উদ্দেশ্যই থাক নবীনের, পক্ষপাতিত্ব করে আলপনার যত কাঁচা
কবিতাকেই একেবারে প্রথম পৃষ্ঠায় সে স্থান দিক, ভিতরে কয়েকটি লেখার হেডিং পড়েই টের পাওয়া
যায়, এ কাগজেও বর্তমান সমাজের তাজা তাজা সমস্যা নিয়ে নাড়াচাড়া করা হয়েছে।

এই সমস্ত সমস্যার সঙ্গে মুখোমুখি দাঁড়াতে হওয়ায় ছেলেমেয়েদের মধ্যে আপনা থেকে যে বাস্তববোধ জন্ম নেয়, নতুন যে আত্মবিশ্বাসের সূচনা সে দেখতে পাচ্ছে ওদের মধ্যে, তারও জন্ম কি ওইখান থেকে ?

প্রেমের ভবিষ্যৎ সম্বন্ধে চিন্তা-ভাবনা নেই নবীন বা আলপনার। তারা ধরেই নিয়েছে যে তারা যখন ব্যাপারটা ঠিক করে নিয়েছে নিজেদের মধ্যে, মিলন তাদের হবেই, কেউ ঠেকাতে পারবে না।

প্রথমটা সুনীল ধরতে পারেনি, তার সঙ্গে নবীনের কথাবন্ধের প্রতিজ্ঞাটা তার খেয়াল ছিল না। তাই প্রথমে তার মনে হয়েছিল, নবীন বুঝি আলপনার নাম জড়িয়ে কাগজ বার করে সম্ভবপর বাধাবিঘ্নের বিরুদ্ধে আটখাঁট বেঁধেছে, আলপনাকে তার হাতে দিতে তাদের বাধ্য করার জন্য এই চাল চলেছে।

কিন্তু তারপরেই সে টের পেয়েছে যে তার ওই ধারণাটাই ভুল।

নবীন ও সব হিসাব করেনি। আলপনাকে পাওয়া সম্পর্কে সে এতখানি সুনিশ্চিত যে, সেই আত্মবিশ্বাস থেকে তার শখ হয়েছে কাগজটার ওই নাম দেওয়ার এবং ওই নামকরণের মধ্যে দোষের বা অসুবিধার কিছুই সে খুঁজে পায়নি।

দরকার হলে সবাইকে জানিয়ে দিলেই হল যে, এর মধ্যে লুকোচুরির ব্যাপার কিছু নেই, তারা সত্যিই ‘এনগেজড’ !

এত বাজে বই পড়ে আর সিনেমা দেখেও ছেলেমেয়েরা ভাবালুতা বর্জন করার এত ক্ষমতা কোথা থেকে পায়, ভেবে মায়া আশ্চর্য হয়ে গিয়েছিল।

আজ সুনীলও আশ্চর্য হয়ে যায়।

একটা কথা মনে পড়ায় আলপনাকে ডেকে পাঠিয়ে সে জিজ্ঞাসা করে, তুই কি পড়া ছেড়ে দিবি ভাবছিস ?

বাঃ রে, পড়া ছাড়ব কেন ? চাকরি করছে, আমার পড়ার খরচটা জোগাতে পারবে না ?

এ সব পরামর্শও হয়ে গেছে বুঝি ? তাহলে আর দেরি করে লাভ কী ? নবীনকে বলিস তো আমার সঙ্গে যেন দেখা করে।

বোনের বিয়ের মতো এত বড়ো একটা ব্যাপার নিয়ে মায়ার সঙ্গে কথা না বলে, অন্য কাজে মন দিতে মনটা খুঁতখুঁত করে সুনীলের।

মায়া সব শুনে খুশি হয়ে বলে, এই তো চাই। একালের ছেলেমেয়েরা অত প্রেমপ্রেম করে পাগল হয় না—প্রেম ছাড়াও যে অনেক কিছু আছে জীবনে এটা বেশ বোঝে। প্রেমকে হাজার ফেনিয়ে ফাঁপিয়ে তুললে কী হবে, ওরা ভুলছে না। নইলে ছায়ার মতো আহুদি মেয়ে পর্তুগীজ এত শক্ত হতে পারে ?

সুনীল বলে, দুজনে খুব মিল হবে না বুঝতে পারছি। ঝগড়াঝাঁটি লেগেই থাকবে। কিন্তু তার আর কী করা যাবে ?

মায়া বলে, বটেই তো। মেয়ের বুদ্ধি আছে—বিয়ে যখন করবেই একজনকে, তার ঘাড়ে গিয়েই পড়ার খরচটা চাপাই, বাপ-ভাইকে রেহাই দিই।

সুনীল একটু হাসে।

তুমি আমিই বাদ পড়লাম দেখছি।

সত্যি।

কাজে এগোই না এগোই, কারও সঙ্গে একটু পরামর্শ করতেও ইচ্ছা হয় না আমাদের ?

মায়া বলে, ইচ্ছা আমার হয়, পরামর্শ করাটাই হয়ে ওঠে না শেষ পর্যন্ত।

আমার কী ইচ্ছা হয় না ? আমারও বোধ হয় ইচ্ছা হয় মাঝে মাঝে, পরে চাপা পড়ে যায়। এসো না দুজনে বসে পরামর্শ করি একদিন।

মায়া চোখ তুলে তাকায়।

ভাইবোনদের ভালোবাসার ব্যাপার দেখে হিংসা হচ্ছে নাকি ?

সুনীল হাসিমুখে বলে, ছেলেমানুষ নাকি যে হিংসা হবে ? আমি ভাবছিলাম কী, সমস্ত ছোটো বড়ো ব্যাপারে আমরা প্রায় স্বামী-স্ত্রীর মতো পরামর্শ করি। এটা খেয়াল করেছে নিশ্চয় ? প্রেম বোধ হয় আমাদের আসবে না, ও জিনিসটা বোধ হয় আমাদের ধাতেরই নেই। কিন্তু সাংসারিক ব্যাপারে যখন আমাদের এত মিল, স্বামী-স্ত্রী হয়ে গেলেই বা দোষটা কী ? অন্তত দুজনে বসে আমরা একটা প্ল্যান তো করতে পারি—স্বামী-স্ত্রী হিসাবে বাকি জীবনটা আমরা কাটাতে পারি কি না ?

মায়া মুখ বাঁকিয়ে বলে, পরামর্শ করার প্ল্যান করার কী আছে ? আমি যে তোমার স্ত্রী হতে পারব না এটা তো জানা কথাই। তোমাব বাড়িতে গিয়ে তো বাস করতে পারব না আমি। আমাকে স্কুলটা চালাতে হবে, বাবার অসুখের চিকিৎসা থেকে ঘরসংসারের সব ব্যবস্থা করতে হবে।

সুনীল বলে, তাতে কী আসবে যাবে ? আমার বাড়ি গিয়ে বাস করতে না পার বাস করবে না ! এখনকার মতোই যে যখন সময় পাই অন্যের বাড়ি আসব যাব, যে বাড়িতে সুবিধে হয় একটা ঘরে দুজনে একসঙ্গে রাত কাটাব। দুজনের যেমন সুবিধা হয় সে রকম বন্দোবস্ত করে নেব।

বলে সুনীল একটু হাসে।—আমাদের তো আর ভালোবাসার বিয়ে হবে না। সুবিধার বিয়ে হবে। পরস্পরকে আমরা জানি বুঝি বিশ্বাস করি পছন্দ করি, দুজনে পরামর্শ করে কাজ পর্যন্ত করি। সেই জন্য একটা সম্পর্ক গড়ে নেওয়া। আমাদের বোধ হয় ভালোই লাগবে মায়া।

মায়া চিন্তিত মুখে বলে, সে তো বুঝলাম। তোমার আমার মধ্যে নয় একটা বোঝাপড়া হল—লোকে কী ভাবে ? তোমার বাড়িতে কী বলবে, আমার বাড়িতে কী বলবে ? মেয়ের বিয়ে হচ্ছে না বলে মা এখনও দাপড়ায়। মেয়ের বিয়ে হয়েছে অথচ স্বামীর ঘর করে না বলে, মা তখন আরও দাপড়াতে !

সুনীল বলে, অন্যের হিসাব ধরলে আমাদের চলবে না। আমরা আমাদের সুবিধা-অসুবিধা হিসাব করব—অন্যদের সেটা মানতে হবে। প্রথম প্রথম একটু খারাপ লাগবে সকলের, তারপর সব ঠিক হয়ে যাবে।

মায়া বলতে যায়, তা ছাড়া—

তা ছাড়া ?

সুনীলকে ছেলেপিলের কথা বলতে মায়াব লজ্জা করে ! সুনীল বুঝতে পেবে একটু তাজ্জব হয়ে যায় বইকী !

ছেলেপিলের কথা বলছ ? ছেলেপিলে অবশ্য আমাদের দু-তিনটির বেশি হবে না, আমরা হতে দেব না। ছেলেপিলের জন্য আমাদের অসুবিধা হবার তো কোনো কারণ আছে মনে হয় না !

মায়া মৃদু হেসে বলে, তোমার না হোক আমার অসুবিধা আছে। আমি যদি ছেলে বিয়েই, ছেলে মানুষ করতে ব্যস্ত থাকি, আমার স্কুল কে চালাবে ?

দু-চারমাস দরকার হলে আমি চালিয়ে দেব।

তুমি সময় পাবে ? কাগজ চালাবার দায় কেমন টের পাচ্ছ তো ?

সময় না পাই আমাদের ছেলেমেয়ে হবে না। সে তো আমাদেরই হাত।

সেটা ভালো লাগবে আমাদের ?

পরীক্ষা করে দেখতে দোষ কী ? ভালো না লাগে, শেষ পর্যন্ত সুবিধে না হয়—বিয়েটা আমরা বাতিল বলে ধরে নিয়ে এখন যেমন আছি তেমনি থাকব।

মায়া হাসিমুখে মাথা নাড়ে।

তা আব হয় না। এখন যেমন আছি তেমন থাকা যায়, কিছুদিন স্বামী-স্ত্রীর মতো কাটিয়ে আর এ অবস্থায় ফেরা যায় না। সেই জন্য খুব ভালো করে ভেবেচিন্তে দেখা দরকার।

ভাবতে ভাবতে তুমি আমি বুড়ো হয়ে যাব।

মায়া তাকে আশ্বাস দিয়ে বলে, ভেবেচিন্তে দেখা উচিত, মানে কী আমি আবও দু-চারবছর ভাবতে বলছি। আজকেই একটা কিছু ঠিক করে না ফেলে, কয়েকটা দিন ভাবি এসো। আজকে কথাটা উঠল, আজকেই হেস্তনেস্ত করা ঠিক হবে না।

১১

একেবারে সাদামাঠাভাবে মুখে মুখে মোটামুটি একটু বিচার-বিবেচনা করা যে, তাদের নিজের নিজের দায়িত্ব ও কর্তব্য পালন করে যেতে যেতে, তাদের মধ্যে স্বামী-স্ত্রীর সম্পর্কটা স্থাপন করা সম্ভব এবং সুবিধাজনক কি না ! সুনীল ভালোবাসা জানায়নি বরং এই কথাটার উপরেই জোর দিয়েছে যে, তার ধাতে বোধ হয় ও সব আসে না।

মায়ার জন্য এতটুকু ব্যাকুলতা প্রকাশ করেনি, একটিও সরস কথা বলেনি। অত্যন্ত নীরসভাবে মোটা কথায় শুধু বিচার করেছে বাস্তব সুবিধা-অসুবিধা এবং এই সিদ্ধান্তে এসেছে যে তাদের বিয়ে হলে নেহাত মন্দ হয় না !

যেমন আছে সেভাবে দিন কাটাতে তার খুব বেশি কষ্ট নেই। তবে বুড়ো হতে চলেছে, কোনো মেয়ের সঙ্গে ভাব হওয়া দূরে থাক, তার গোড়াপত্তনটুকুও আজ পর্যন্ত ঘটেনি। একমাত্র মায়াব সঙ্গে তার যা একটু সহজ বোঝাপড়া আছে।

বিবাহিত জীবনটা কেমন হয় একটু চেখে দেখলে দোষ কী ?

অন্য মেয়ে হলে, সুনীলের প্রস্তাবে রীতিমতো অপমান বোধ করত। কোনো পুরুষের কাছ থেকে এ রকম হৃদয়হীন বিয়ের প্রস্তাব পাওয়ার চেয়ে বড়ো অপমান অনেক মেয়ে কল্পনা করতে পারে না।

কিন্তু সুনীলের সঙ্গে তার কিনা বিশেষ একটা সহজ বোঝাপড়া হয়ে আছে বহুদিন থেকে, সে নিজেও কিনা সুনীলকে অন্যায়সে জানিয়ে দিতে পারে যে তার কাছেও ভালোবাসা আশা করা মিছে ; সুনীলের বন্ধুভাবে ও রকম স্থূল বাস্তব প্রস্তাব তোলায় অপমান বোধ করার কথাটা তার খেয়ালেও আসে না।

বরং তার সমস্ত বিশেষ দাবিদাওয়া, অধিকার মেনে নিয়ে, সুনীল তাকে বিয়ে কবতে চায় ভেবে জীবনটা হঠাৎ যেন বড়োই রসালো হয়ে ওঠে মায়ার।

তার এতটুকু অসুবিধা না ঘটিয়েই সুনীল তাকে চায়। দরকার হলে তার মুখ চেয়ে তার গর্ভে সন্তানলাভের আকাঙ্ক্ষাও সুনীল ত্যাগ করতে প্রস্তুত।

প্রাণটা যেন গান গেয়ে ওঠে মায়ার।

সে ভাবে, রাজি হলেই চুকে যেত। কী দরকার ছিল ভেবে দেখবার জন্য আবার কিছুদিন সিদ্ধান্তটা পিছিয়ে দেবার ?

আর কোনো পুরুষমানুষের সঙ্গে ও রকম সম্পর্ক সে তো কল্পনাও করতে পারে না, ভাবতে গেলেও ঘৃণায় সর্বাঙ্গ যেন কঁকড়ে যেতে চায়।

এক বিছানায় সুনীরের পাশে শুয়ে রাত কাটাবার কল্পনা সে রকম রোমাঞ্চকর না ঠেকলেও খারাপ লাগে না। ভালোবাসা হলে হয়তো কল্পনা করেই রোমাঞ্চ শিহরন ইত্যাদি অনুভব করত, কিন্তু ভালোবাসা যখন নেই তখন আর সে জন্য মাথা ঘামিয়ে লাভ কী ?

ভালোবাসা ছাড়াই যখন সুনীরের স্ত্রী হবার কল্পনা, তার সন্তানের মা হবার কল্পনা মন্দ লাগে না, বরং আশা জাগে যে জীবনটা আনন্দময় হবে, সার্থক হবে—কী আসত যেত সেদিন সুনীরের কথায় সায় দিয়ে সব ঠিকঠাক করে ফেললে ?

মায়া স্পষ্ট অনুভব করে, নিজে থেকে সে কথাটা কোনোদিন তুলতে পারবে না সুনীরের কাছে।

সুনীল আবার কবে কথা তোলে, সে জন্যই ধৈর্য ধরে তাকে প্রতীক্ষা করে থাকতে হবে।

কথাটা যদি মনের তলায় চাপা পড়ে যায় সুনীরের ? খবরের কাগজটা নিয়ে সে যেভাবে দিনরাত মেতে আছে, তাতে সে যদি ভুলে যায় যে মায়ার কাছে সে একটা গুরুত্বপূর্ণ প্রস্তাব করেছিল এবং কয়েকদিন পরে আবার ও বিষয়ে মায়ার সঙ্গে তার আলোচনা ও পরামর্শ করার কথা আছে ?

এমনও তো হতে পারে যে তার সেদিনের কথাবার্তা থেকে সুনীল ধরে নিয়েছে যে তার তেমন ইচ্ছা নেই নেহাত সুনীরের খাতিরে কথাটা সে বিবেচনা করে দেখতে রাজি হয়েছে ? ধরে নিয়ে সুনীল যদি তার উপর কোনোরকম চাপ না দেওয়া ঠিক করে ?

তাকে রেহাই দেবার জন্যই কথাটা আর না তোলে ?

ছায়া বলে, তোমার কী হয়েছে দিদি ? শরীর ভালো নেই ?

কেন ?

ঠিকমতো খাচ্ছ-দাচ্ছ না, কী যেন ভাবছ সারাদিন। আমার জন্যে ? আমি তো বলেছি আমার জন্যে আর ভাবতে হবে না তোমাকে। এবার থেকে আমি নিজেই সব দিক সামলে চলব।

মায়া হেসে বলে, সে তো চলবিই। মেয়েরা কি একেবারে বেশি ভুল করে, না ভুল করলে পোষায় ? কিন্তু তোরা খালি নিজের কথা ভাবিস। আমি যে বুড়ি হয়ে গেলাম ? আমার আর বিয়ে-টিয়ে দরকার নেই, না ?

ছায়া গদগদ হয়ে বলে, সত্যি বিয়ের কথা ভাবছ ?

তারপরেই তার মুখে ছায়া ঘনিয়ে আসে।

ছিছি, ভারী বিস্ত্রী হবে কিন্তু। তোমার বিয়ে হবে বড়ো ভাইয়ের সঙ্গে, আমার বিয়ে হবে ছোটোভাইয়ের সঙ্গে—

মায়া একেবারে চমকে যায়।

বড়ো ভাইয়ের সঙ্গে মানে ?

আহা, আমরা যেন জানিনে কেউ।

তোরা কী জানিস বল না শূনি ?

সুনীলদার সঙ্গে তোমার ভালোবাসা আছে সবাই জানে।

জানে নাকি ?

জানবে না ? তোমাদের ভাব দেখলেই টের পাওয়া যায়। ঘরসংসারের দায়ের জন্য তোমরা বিয়ে পিছিয়ে রেখেছ, তাও সবাই জানে। তাই তো সবাই এত প্রশংসা করে তোমাদের।

প্রশংসাও করে নাকি !

করবে না ? বড়ো মা-বাপ-ভাইবোনেদের কথা কোন ছেলেমেয়ে ভাবে আজকাল ? নিজের নিজেরটা গুছিয়ে নিতে পারলেই হল। তোমাদের ভালোবাসা হয়েছে, বাড়ির লোকের জন্য বিয়ে পিছিয়ে রেখেছ—প্রশংসা করবে না ?

মায়া খানিকক্ষণ বোনের মুখের দিকে চেয়ে থাকে।

তারপর মায়া ভাবে, এই সুযোগটা কাজে লাগানো যেতে পারে।

ছায়ার সঙ্গে তার কী কথা হয়েছে, সে গল্প করার ছলে সুনীলের কাছে সে-ই তুলতে পারে কথাটা।

কিন্তু—

কথা তুললে যদি বিরত হয় সুনীল ? বড়ো কাজে মেতে গেছে, তার কথা ভাববার সময় পাবে না, জোর করে এখন সুনীলকে তার কথা ভাবতে বাধ্য করলে কাজের যদি ক্ষতি হয় তার ?

তার চেয়ে কিছুদিন চূপচাপ থাকাই ভালো !

সুনীল একটু সামলে নিক !

প্রাণটা ছটফট করে মায়ার। সুনীলকে জানিয়ে দিতে বড়োই সাধ জাগে যে তারা যাই ভাবুক আর যেমন হিসাবই করুক, জগৎ-সংসারে সকলে জেনে গিয়েছে যে তাদের ভালোবাসা হয়েছে।

তারা ধরে নিয়েছে যে ভালোবাসা তাদের জন্য নয়, সংসারে ভালোবাসা বলতে আর দশটা মেয়েপুরুষ যা বোঝে সেটা ধাতেই আসে না তাদের।

অথচ সংসারের ওই দশজনেই জেনে গিয়েছে যে তাদের মধ্যেই জন্মেছে খাঁটি ভালোবাসা, আসল ভালোবাসা !

সেদিন সুনীল ওইভাবে বিয়ের প্রস্তাবটা না করলে মায়া হয়তো সব কাজ ফেলে ছুটে গিয়ে সুনীলকে কথাটা শুনিয়ে দিত। এক মুহূর্তের জন্য তার দ্বিধা বা সংকোচ জাগত না।

সেদিন বিয়ে করতে চেয়ে কী ফাঁদেই তাকে ফেলেছে সুনীল। এত বড়ো একটা গুরুতর কথা শোনার জন্য প্রাণটা ছটফট করে তবু মায়া ছুটে যেতে পারে না। কীসে যেন তাকে আটকে রাখে !

মনে হয়, যতই সহজ আর অকপট হোক তাদের সম্পর্ক, ঘনিষ্ঠ বন্ধুর মতো খোলাখুলিভাবেই তারা আলোচনা করতে পারুক নিজেদের বিয়ের সুবিধা-অসুবিধার কথা—আত্মসম্মান বজায় রেখে যেচে গিয়ে সুনীলকে এ কথাটা সে শোনাতে পারে না।

সুনীলকে কোনো কথা বলতে সংকোচ বোধ করবে এটা এতদিন অভাবনীয় ছিল, প্রথমে ব্যাপারটা ভারী বিস্ময়কর মনে হয়। তারপর ক্রমে ক্রমে সে টের পায়, এতে আশ্চর্য হবার কিছুই নেই, এটাই স্বাভাবিক এবং সংগত।

এবার মুখ খোলার পালা সুনীলের।

সুনীল মুখ না খুললে, আত্মসম্মান বজায় রেখে এ বিষয়ে তার পক্ষে একটু ইঙ্গিত করাও সম্ভব নয়। সেটা হবে নিজেকে অপমান করা, ছোটো করা।

১২

অন্যায় আর অবিচারের সমালোচনা এবং প্রতিবাদ করা। জনসাধারণের স্বার্থটা সমস্ত কিছুর চেয়ে বড়ো করে তুলে ধরা। নন্দার মৃত স্বামী প্রমোদের নির্ধারিত এই মূল নীতিটাই অনুসরণ করা হয় তার প্রবর্তিত কাগজে।

শুধু এই নীতিটুকুর জন্যই কত মানুষের সমর্থন আর সহানুভূতি যে ভিড় করে এসে জমা হতে থাকে কাগজটার পিছনে !

লেখা দিয়ে, পরামর্শ দিয়ে, টাকা ধার দিয়ে লোকে সাহায্য করতে চায়, চালু রাখতে চায় কাগজটা।

বিভূতি একটা নাম-করা বড়ো কাগজে চাকরি কবত। লেখক হিসাবেও তার খানিকটা নাম হয়েছে। সে যেচে এসে প্রস্তাব করে যে ওই কাগজটা ছেড়ে এসে কম মাইনেতে সে নন্দার কাগজে আরও বেশি খাটতে রাজি আছে।

কারণ, এ কাগজের সুরে সুর মিলিয়ে সে কাজ কবতে আনন্দ পাবে, মাছভাতের বদলে শাক-ভাত খেতে হলেও দেহমানে সে বাঁচার আনন্দ ভোগ করতে পারবে।

সুনীল প্রশ্ন করে, বিয়ে করেছেন ?

করেছি। নইলে চাকরির থাকায় ঘুরি ? ঘরে বসে লিখতাম, আপনারা গিয়ে ধম্মা দিতেন একটা লেখার জন্য।

ছেলেমেয়ে ?

দুটি ছেলেমেয়ে। বিয়ে করলে দুটো-একটা ছেলেমেয়ে হওয়া উচিত।

সুনীল হেসে বলে, উচিত কী অনুচিত তা জিজ্ঞাসা করিনি, এমনি জানতে চাইছিলাম।

বিভূতি বলে, আপনি জিজ্ঞাসা না করলেও অল্প আয়ে ছেলেমেয়ে হওয়া অনেকে অন্যান্য মনে কবে। ছেলেমেয়ে একেবারে বাদ দিলে বিয়ে করার কোনো মানে আছে ? মেয়েদের তো মোটেই নেই।

সুনীল তাকে সংবাদ-বিভাগের সম্পাদক করে দিয়েছে—মাইনে কমায়নি। ঠিক এই রকম একজন লোকেব তার বড়োই প্রয়োজন ছিল। কেবল যোগ্যতা নয়, নিজের কাজের জন্য যার দরদও থাকবে।

বলেছে, অন্যেরা ওর ইচ্ছার বিরুদ্ধে যে টাকায় ওকে কিনেছে, সে টাকাটা ওকে দিতেই হবে।

বিভূতির মতোই আরও একজন এসে জুটেছে তাদের কাগজে।

এ কাগজে কাজ করতে তারা উৎসুক, উদগ্রীব। ভবিষ্যৎ অজানা কাগজটার, কবে হঠাৎ বন্ধ হয়ে যাবে ঠিক নেই, সময়মতো নিয়মিত বেতনের পুরো টাকাটা পাবে কিনা সন্দেহ আছে, তবু তারা মহোৎসাহে এই কাগজে যেচে এসে খাটতে চায়।

এবং সুযোগ দিলেই প্রমাণ দেয় যে তারা শুধু কথার মানুষ নয়, কাজের মানুষও বটে।

সুনীলের তাই মনে হয়, সকলকে নিয়ে ঘরোয়াভাবে তাব একদিন বসা উচিত, কাগজের অবস্থাটা সকলকে বুঝিয়ে দেওয়া উচিত।

কাগজের নীতিটা পছন্দ হয়েছে বলেই সকলে কাগজটার জন্য প্রাণপাত করতে চাইবে এবং সেও কাগজের বাস্তব অবস্থা গোপন করে রেখে তাদের সহযোগিতার সুযোগ গ্রহণ করবে—এটা উচিত নয়। সকলকে বুঝিয়ে দেওয়া দরকার যে দু-তিনমাস পরে কাগজটা একেবারে বন্ধ পর্যন্ত হয়ে যেতে পারে।

এ রকম কাগজের ভবিষ্যৎ আছে ভেবেই হয়তো ওরা এ কাগজে এত আগ্রহ নিয়ে কাজ করতে এসেছে—কাগজের অবস্থা যে অত্যন্ত কাহিল সেটা ওদের জানিয়ে না দিলে ওদের ঘাড় ভাঙার দায়ে সে দায়িক হবে।

বিভূতিকে সে বলে, কাগজটা ঠিকমতো চালাতে পারছি না। সকলকে ডেকে নিয়ে একদিন বসলে হত।

বিভূতি সংবাদের প্রুফ থেকে চোখ তুলে বলে, তাতে কী লাভ হবে ? সকলে বলবে যে আমাদের মাইনে আরও দশ-পনেরো টাকা কমিয়ে দিতে চান কমিয়ে দিন—আমরা কাজ করে যাব। এর বেশি আর কিছুই জানতে পারবেন না।

তবু সুনীল একদিন সকলকে ডেকে বৈঠক বসায়। দণ্ডুরি ইয়াকুবও বাদ যায় না।

সুনীল বলে, খোলাখুলি একটা আলোচনার জন্য আপনাদের ডেকেছি। আপনারা জানেন তো যে কাগজের আর্থিক অবস্থা খুব খারাপ ?

সকলেই সায় দেয়।

সাব-এডিটর অল্পবয়সি শিশির বলে, এ সব কাগজের আর্থিক অবস্থা খারাপ হবেই।

নরেশ বলে, আমরা সেটা জেনেই এসেছি।

সুনীল বলে, আপনাদের জানানো উচিত মনে করি, কাগজের আর্থিক অবস্থা শুধু খারাপ নয়—খুবই খারাপ। আমরা নানাভাবে চেষ্টা করছি, দু-তিনমাসের মধ্যে কোনো ব্যবস্থা না হলে হয়তো কাগজ বন্ধ করে দিতে হবে। আমি অবশ্য যদিও কথা বলছি, কাগজ যে বন্ধ হবেই এমন কোনো কথা নেই—তবে সত্তাবনার কথাটা মনে রাখবেন।

বিভূতি বলে, এ কাগজ বন্ধ হবে না। আপনারা না চালান, অন্যেরা চালাবে।

কাগজটা চালাতেই হবে, কেমন ?

নিশ্চয় !

প্রত্যেক মাসে লোকসান দিয়েও চালাতে হবে ?

বিভূতি তাড়াতাড়ি নিজেদের মধ্যে কথা চালিয়ে নেয়। নিচু গলায় নয়, কারণ সুনীলের কাছে গোপন করার কিছু ছিল না। একটা সিদ্ধান্ত সম্পর্কে পরস্পরের মতামত জেনে নেয়।

তারপর উঠে দাঁড়িয়ে যেন সভায় বক্তৃতা দিচ্ছে এমনভাবে বিভূতি তার বক্তব্য জানায়। এভাবে বলার মানে সুনীল অবশ্য বুঝতে পারে। বিভূতি তার বক্তব্য কেবল তাকেই শোনাচ্ছে না, সকলের কাছে পেশ করছে। কারও যদি কিছু বলবার থাকে বলবে। বিভূতি বলে, লোকসানটা তারা সবাই ভাগাভাগি করে নিতে রাজি আছে। মাসিক খরচের একটা হিসাব যদি তাদের দেওয়া হয়, এলোমেলো মাথাভারী বেহিসাবি খরচ যদি না হয়, সহকারী সম্পাদক থেকে পিয়োন পর্যন্ত তারা সকলে মাইনের অনুপাতে মাসিক লোকসানটা নিজেদের মধ্যে ভাগাভাগি করে নেবে।

বিভূতি এই বলে তার বক্তব্য শেষ করে : আপনারা বোধ হয় বুঝতে পারছেন অন্য কাগজে ভালো চাকরি পাব জেনেও কেন আমরা এ কাগজে লেগে থাকতে চাই ? আজ এই যে বৈঠক ডাকলেন, খোলাখুলিভাবে জানানলেন কাগজ চালাতে লোকসান দিতে হচ্ছে, অন্য কাগজে এটা করত না, সে কাগজে ভাঁওতা দেওয়া হত যে কাগজের অবস্থা খুব ভালো, তবে বাবু বাইরে যাবার আগে চেক সই করে যাননি, তাই এ মাসের মাইনেটা সময়মতো পাচ্ছ না। বাবুর সই-করা চেকটা ডাকে আসছে, এলেই তোমরা মাইনে পাবে।

সুনীল বলে, কাগজটা আপনারা যে নিজের ভাবেন আপনাবা তারই আরেকটা পরিচয় দিলেন। লোকসান ভাগ করে দিলে খানিকটা সুবিধা হতে পারে কিন্তু কত আর লোকসান ভাগ করে নেবেন নিজেরা ? বিনা মাইনেতে খাটলেও সামাল দেওয়া যাবে না, আয় বাড়তেই হবে।

সকলে চুপ করে থাকে।

সুনীল বলে, আরেকটা কথা বলি। কিছুটা লোকসান আপনারা আজ ভাগাভাগি করে নিলে, কোনোদিন লাভ হলে তার ভাগও আপনারা পাবেন।

অঘোরের চাকরিটা হাতে রেখে আর লাভ নেই। কাগজের সঙ্গে যেভাবে জড়িয়ে গেছে সুনীল, তাতে আর রেহাই পাবার কথা সে ভাবতেও পারে না। রেহাই পাওয়াটাই এখন দাঁড়িয়ে গেছে পরম দুর্ভাগ্যের ব্যাপার।

কাগজ আর বন্ধ করা যাবে না।

কাগজটা যাতে বন্ধ না হয়ে যায় সেই চেষ্টাতেই এবার তার জীবনপাত করতে হবে।

এদিকে রয়েছে সংসার চালাবার দায়।

কাগজ থেকে সে যত টাকা নেয় তাতে সংসার খরচ চালানো সম্ভব নয়। অঘোরের আপিসে সে যত টাকা বেতন পেত কাগজ থেকে তার অবশ্য তত টাকাই নেওয়ার কথা কিন্তু এখন সে তো আর চাকরি করে না কাগজে—সে এখন কাগজের লাভ-লোকসানের ভাগীদার।

বেতন নিয়ে যারা খাটছে তারা পর্যন্ত যখন কম টাকায় কাজ চালিয়ে যেতে প্রস্তুত, বাড়ির জন্য প্রয়োজন বলেই কোন মুখে সে বেশি করে টাকা নেবে ?

অনিলকে সে বলে, তোমার তো পড়ায় মন নেই, গায়ের জোরে টেনে টেনে পড়ছ।

অনিল স্বীকার করে।—উৎসাহ পাই না। পড়ে কী লাভ হবে তাই ভাবি। চাকরির যা বাজার ! তাহলে কাগজেই কাজে লেগে যাও।

নন্দা শুনে হেসে বলে, স্বজন-শোষণ নীতি গ্রহণ করলেন নাকি ?

সুনীল বলে, উপায় কী ? নিজের ভাইকে যত কম টাকায় খাটাতে পারব অন্যকে তো তা পারব না।

নন্দা বলে, আমিও তাই বলছি। অন্য লোকে দেশেব লোকের টাকায় করে স্বজনপোষণ, আপনি নিজের কাগজে আরম্ভ করলেন ভাইকে শোষণ করা।

সুনীল বলে, তাও নয়। ও অনর্থক আমাকে শোষণ করছিল, পড়ায় মন নেই, পড়াবার খরচটা যাচ্ছিল লোকসান। এখানে কাজও শিখবে, কিছু উপার্জনও করবে।

দেখা যায় সত্যি তাই। পড়াশোনা ভালো লাগছিল না কিন্তু কাগজে অনিল মহোৎসাহে কাজ আরম্ভ করে। মনে হয় কলেজে পড়া ছেড়ে দিয়ে সে যেন মুক্তি পেয়েছে। পরীক্ষা পাসের দৃষ্টিভঙ্গি যেন সত্যি একটা স্থায়ী কালো আবরণের মতো তার মুখে আঁটা হয়ে ছিল, কাগজে বেশি খাটনি আরম্ভ করলেও কয়েক দিনের মধ্যে তার মুখ থেকে কালো পর্দাটা সরে যেতে দেখা যায়।

ভূপেশ কিন্তু রাগারাগি করে।

বলে, নিজে তুমি অনিশ্চিতের আশায় ভালো চাকরি ছেড়ে দিলে, বাড়ির লোকের কথা একবার খেয়ালও করলে না। ভাইটিকেও কলেজ ছাড়িয়ে তোমার কাগজে ঢোকাচ্ছ। কাগজ যদি তোমার না চলে তখন ও বেচারার কী উপায় হবে ? তুমি নিজে ডুববে, ওকেও ডুবিয়ে ছাড়বে।

সুনীল বলে, ভবিষ্যতের জন্য সে রিস্ক নিতেই হবে। পড়া ছেড়ে বসে থাকলে আলাদা কথা ছিল।

কিন্তু তোমার কাগজ যে চলবে তার ভরসা কী ? কত টাকা আছে তোমাদের ? কদিন লোকসান টানবে ?

এ কাগজ বন্ধ হবে না। কাগজ থেকে একদিন শুধু লাভ করাটাই যদি উদ্দেশ্য হত তাহলে সে ভয় ছিল। সাধারণ লোকের স্বার্থের জন্য লড়াই করা এ কাগজের মূলনীতি, এ নীতির বদল হতে আমি দেব না। আমরা চালাতে না পারি, অন্যেরা এ কাগজ চালিয়ে যাবে।

তাতে তোমাদের কী লাভ ?

কাগজটা চলবে এটাই সবচেয়ে বড়ো লাভ। তাছাড়া, কাগজ যদি এখনকার নীতি বজায় রেখে চালানো হয়, আমাদের দুভাইকে নিশ্চয় তড়িয়ে দেবে না। টাকার অভাবে কষ্ট হয়তো পেতে হবে কিন্তু সেই ভয়ে তো হাত গুটিয়ে বসে থাকা যায় না !

এ সব কথা পছন্দ হয় না ভূপেশের, তার হিসাবে কোনো মানেই হয় না এ সব যুক্তিতর্কের তর্ক বন্ধ করে সে গজরগজর করতে থাকে।

অঘোরের আপিসে চাকরি করার সময়ও নানাদিক টানাটানি ছিল কিন্তু সেই আয়টা বন্ধ হবার পর এখন ভালো করেই টের পাওয়া যাচ্ছে অনটন কাকে বলে।

ছেলের খামখেয়ালে এই বয়সে এমন কঠিন অবস্থায় পড়ায় গা জ্বালা করে ভূপেশ এবং গৌরীর। গৌরী উঠতে বসতে নিজের পোড়া অঙ্গকে অভিশাপ দেয়।

আলপনা মাঝে মাঝে বুঝিয়ে তার গায়ের জ্বালা কমানোর চেষ্টা করে। অভাবের জ্বালা তার নিজের যদিও মোটেই কম নয়। বলে, তুমি এই সোজা কথাটা বুঝতে পার না মা ? পরে অনেক উন্নতি করবে বলেই তো দুভাই দুদিন একটু কষ্ট করছে। একটা ইংরাজি খবরের কাগজ ভালো করে চললে কত লাভ হয় হিসেব আছে তোমার ?

সাময়িকভাবে কথাটা মনে লাগে না গৌরীর এমন নয়, কিন্তু বেশিক্ষণ কথাটা তার মনে থাকে না।

আবার সে অঙ্গকে অভিশাপ দিতে শুরু করে। বলে, কপাল পোড়া না হলে কারও গর্ভে এমন হৃদয়হীন নিষ্ঠুর ছেলে জন্ম নেয় ! খেয়ালের বশে ছেলে চাকরি ছাড়ে, বাড়িতে মাছটুকু-দুধটুকু আসা বন্ধ হয়, ছেঁড়া কাপড় পরে দিন কাটাতে হয় মা-বোনকে !

কল্পনা মাঝখানে আরেকদিন এসেছিল। সেও সংসারের অবস্থা দেখে সুনীলকে অনেক অনুযোগ দিয়ে গেছে।

সুনীল বলেছে, তুই নিজেকে সামলা তো, আমাদের জন্য তোর মাথা ঘামাতে হবে না। প্রণবের সঙ্গে ঝগড়া কমিয়েছিস তো ?

তোমার ওই এককথা !

বেশির ভাগ দিন, রাত্রে সুনীলের বাড়ি ফেরা হয় না, সকালে বাড়ি আসে। অনিলও সপ্তাহে তিন-চাররাত্রি ডিউটি করে। মুখে শ্রান্তি উদ্বেগের ছাপ না পড়ুক দেখে বুঝা যায় দুজনে তারা রোগা হয়ে গেছে।

মায়া বলে, নিজেদেব আপিসের এই এক জ্বালা—অতিরিক্ত খাটতে হয়।

সুনীল বলে, টাকা থাকলে লোক রেখে খাটানো যায়।

মায়া জিজ্ঞাসা করে, আচ্ছা, 'কদিন লাগবে কাগজটার দাঁড়াতে ?

সার্কুলেশন বাড়ছে হু হু করে। সে জন্য আবার টাকার দরকাব। টাকা থাকলে এক বছবেই দাঁড় করিয়ে দিতে পারতাম। কিছু টাকা ধার করার ফিকিরে আছি।

কত ?

হাজার কয়েক।

ও বাবা ! তুমি এখন কাগজের মালিক, হাজার ছাড়া কথা কও না।

১৩

জরিমানার মোটা টাকা দিতে নন্দা প্রায় ফতুর হয়ে গিয়েছিল। প্রদ্যোত জেল থেকে বেরিয়ে আসতে আসতে তার টাকা শেষ হয়ে যায়।

অথচ এদিকে কাগজটার চাহিদা বেড়েছে প্রচুর, বেরোনো মাত্র হু হু করে বিক্রি হয়ে যায়। বেশি সংখ্যায় কাগজ ছাপাবার জন্য আবার বেশি করে টাকা ঢালা দরকার।

সুনীল অনেক চেষ্টা করে এক ভদ্রলোকের কাছ থেকে হাজার আষ্টেক টাকা ধার সংগ্রহ করেছে। বাঁধা রাখতে হয়েছে কাগজটিরই গুডউইল।

ভদ্রলোকের নাম হেমন্তবাবু। পয়সাওলা লোক, একটি বড়ো প্রেস এবং একটি সাপ্তাহিক কাগজ আছে। তার একটি চালু দৈনিক কাগজের মালিক হবার সাধ। ওই আশা মনে রেখেই সে ঋণের টাকাটা জুগিয়েছে।

টাকা ফেরত পাওয়ার বদলে সুনীলরা কাগজটা তার হাতে তুলে দিক, এটাই হেমন্ত আশা কবে।

বিভূতি যে জোর গলায় বলে কাগজটা কখনও বন্ধ হবে না, তারা না চালালে অন্যো কাগজ চালাবে, সেটা মিথ্যা নয়। সুনীলের পবিচালনাধীনে আসবার পর অল্পদিনের মধ্যে যে রকম জনপ্রিয় হয়ে উঠেছে কাগজটা তাতে অনেকেরই টনক নড়েছে।

ভবিষ্যৎ আছে কাগজটার।

বেশি দূর-ভবিষ্যৎ নয়। যথেষ্ট টাকা নেই বলেই কাগজটার উন্নতি ঠেকে আছে—টাকা থাকলে অবিলম্বে সার্কুলেশন দ্বিগুণ করে দেওয়া যেত।

লোকে টাকা দিতে চায়। অঘোরের মতো আরও অনেকেই কাগজটার পিছনে টাকা ঢালতে উৎসুক।

প্রস্তাবও পাঠিয়েছে কয়েকজন।

কিন্তু মুশকিল এই, প্রতিদানে তারা মালিকানার বড়ো অংশ চায়, কাগজটার উপর সম্পূর্ণ কন্ট্রোল চায়।

নন্দা বলে, না। আপনাকে অংশ দিয়েছি কাগজটা চালাবাব জন্য। কাগজ আমি মরে গেলেও অন্য লোককে বিক্রি করতে পাবব না।

সুনীল বলে, কিন্তু সামনে যে বিপদ দেখতে পাচ্ছি? হেমন্তবাবুর টাকা শোধ দেবার সময় এগিয়ে আসতে আসতে আরও কিছু টাকা ঢালার দরকার হবে—ওদিকে হেমন্তবাবুর টাকাও শোধ করে ফেলতে হবে।

নন্দা নির্বিকারভাবে বলে, সে ব্যবস্থা আপনি কবাবেন। এমনিই আপনাকে মালিকানা দিয়েছি নাকি কাগজটার?

সুনীল শান্তভাবেই বলে, সহজে ছাড়ব ভাববেন না। সর্বদা ওই চিন্তাই করছি। লম্বা মেয়াদে মোটা একটা টাকা জোগাড় করতে পাবলে আর ভাবনা থাকে না। সে কথা ভেবেই হেমন্তবাবুর কাছে এত অল্প মেয়াদে টাকাটা নিয়েছি—ঠেকনো দেওয়ার জন্য। লম্বা মেয়াদে টাকা পেলেই ওই টাকাটা ফেলে দেব। লম্বা মেয়াদে টাকাটা পাওয়াই এখন সমস্যা।

প্রদ্যোত বলে, পাওয়া যাবে মনে হয়। খুব নাম হয়েছে কাগজটার।

সুনীল বলে, ওটাই তো আমাদের আসল মূলধন। এতদিন ওটাই বাড়াবাব চেষ্টা কবেছি। আমি জানতাম ওই মূলধনটি আগে বাড়িয়ে না নিলে টাকার মূলধনও জোগাড় করা কঠিন কাজ হবে।

মায়া একদিন সন্ধ্যার পর একটু রাত করেই কাগজের আপিস ঘুরে দেখে যায়।

কর্মব্যস্ত মানুষগুলির মধ্যে সুনীলের কর্মব্যস্ততা লক্ষ করে সে আজ অনুভব করে, সুনীল কেন সেদিন অত বড়ো একটা গুরুতর কথা তুলেও একেবারে চূপ হয়ে গেছে।

অন্য সকলে কাজ নিয়ে ব্যস্ত। সুনীল যেন একেবারে মশগুল হয় ডুবে গিয়েছে তার কাজের মধ্যে। তার কাছে যেন ছোটো কাজ বড়ো কাজ নেই, সাধারণ সংবাদ ও বিশেষ সংবাদ বা সম্পাদকীয় প্রবন্ধের পার্থক্য নেই গুরুত্বের হিসাবে, তার কাগজে যা ছাপা হবে তার প্রতিটি লাইন তার কাছে মহামূল্যবান।

ব্যক্তিগত জীবনের সুখ-দুঃখ আশা-আনন্দ সব কিছু তার আশ্রয় করেছে কাগজটিকে। কাগজের চিন্তার তলে তার মধ্যে চাপা পড়ে গেছে মায়ার চিন্তা।

বিভূতি শিশির আর প্রদ্যোতের সঙ্গে সুনীল পরদিনের সম্পাদকীয় নিয়ে সম্পূর্ণ আলোচনা করে আর মায়া তাদের কথা শুনতে শুনতে সুনীলের মুখের দিকে চেয়ে ভাবে, সত্যি কি মানুষটার হৃদয় নেই?

কিন্তু যার হৃদয় নেই একটা কাগজকে সে এমনভাবে মনপ্রাণ দিয়ে ভালোবাসে কী করে?

আলোচনা শেষ করে বিভূতিরা নিজের আসনে ফিরে চলে গেলে মায়া বলে, এলাম যখন, আপনাদের কাগজে একটা বিজ্ঞাপন দিয়ে যাই।

সুনীল বলে, পয়সা লাগবে কিন্তু।

মায়া বলে, তা জানি। তুমি কি আর আমাকে রেয়াত করবে !

সুনীল বলে, রেয়াত করতে পারি। একটা কাজ করবে ?

কী কাজ ?

তোমার স্কুলের বিষয়ে সংক্ষেপে একটা আর্টিকেল লিখে দাও—রবিবারের কাগজে ছাপব। কী ভাবে স্কুলটা আরম্ভ হল, কী ধরনের ছেলেমেয়ে শটহ্যান্ড, টাইপবাইটিং শেখে—ইংরাজিতে লিখতে পারবে তো ?

মায়া হেসে বলে, তা কলম-টলম ভেঙে চেষ্টা করলে পারব বইকী।

এমনি বিজ্ঞাপনের চেয়ে এই আর্টিকেলটা ঢের বেশি এফেকটিভ বিজ্ঞাপন হবে। আর্টিকেলটার পারিশ্রমিক বাবদ তোমার স্কুলের বিজ্ঞাপন আমরা এক হপ্তা বিনা পয়সায় ছেপে দেব। খুব ছোটো বিজ্ঞাপন কিন্তু, দু-ইঞ্চির বেশি নয়।

মায়ার বাড়ি ফিরতে ইচ্ছা করে না।

মানুষ ও জীবনের কী বিচিত্র সমাবেশ ঘটে একটা খবরের কাগজের আপিসে !

সুনীলের সঙ্গে বেশিক্ষণ কথা হয় না তার, কথা বলার সময়ও নেই সুনীলের। কিন্তু নানা শ্রেণির নানা প্রকৃতির নানা অবস্থার মানুষেরা যে ভিড় করে আসছে সুনীলের কাছে, কেউ দাপটে কথা কইছে, কারও কথা বিনয়ে জড়িয়ে জড়িয়ে যাচ্ছে এবং সুনীল সকলকেই সামলে চলছে—জীবনের এক বিশ্বয়কর নতুন নাটকের মতো মনে হয় মায়ার কাছে ব্যাপারটা।

রাত নটার সময় মায়া উঠবে উঠবে ভাবছে অঘোর পর্যন্ত হাজির হয় কাগজটার আপিসে, সুনীলের সম্পাদনা-পরিচালনার ছোটোখাটো আপিসঘরে গিয়ে বসে। দেখেই টের পাওয়া যায় মেজাজ বিগড়ে গিয়েছে অঘোরের। সুনীল তার আপিসের সাড়ে তিনশো টাকার চাকরি ছেড়েছে, তার কাছে আর্থিক সাহায্য পাবার আশা ছেড়েছে, নিজে তার সঙ্গে গিয়ে দেখা করার বদলে তাকে তার আপিসে আসতে বাধ্য করেছে। এ কী সোজা অপমান অঘোরের ? মুশকিল এই যে, সময়-সময় মান-অপমানের হিসাব রাখলে তার চলে না।

কারবারটা তো চালিয়ে যেতে হবে তাকে।

এ বাজারে কারবারে লাভ তুলতে হলে মান-অপমানের হিসাব ভুলে যেতেই হয়।

ভাবের আবেগে একজন জুতো মারবে। জুতো খেয়ে তাকে দিয়ে যদি হাজার খানেক মুনাফার ব্যবস্থা সম্ভব হয়, জুতো না খেয়ে অঘোরের উপায় কী ?

অঘোর জাঁকিয়ে বসে। সুনীল বর্মা চুরট এগিয়ে দিলে সেই চুরট একটা ধরিয়ে কয়েকবার কেশে সে জিজ্ঞাসা করে, কাগজ তো ভালোই চলছে শুনলাম ?

সুনীল বলে, সুনাম আর সার্কুলেশনের হিসাবে খুব ভালোই চলছে।

অঘোর বলে, প্রতিভা নিজের রাস্তা খুঁজে নেবেই। প্রতিভাকে কেউ ঠেকাতে পারে না। কিন্তু আবার সস্তা কাজেও লাগানো হয় কিনা, সেই জন্য আমার গা জ্বালা করে।

সুনীল জিজ্ঞাসা করে, সস্তা কাজে ? কী রকম সস্তা কাজ ?

অঘোর বলে, ব্যাবসাতেই দেশের সম্পদ বাড়ে, তুমি দেশের ব্যাবসাবাগিজ্য ঘায়েল করবার জন্য উঠে পড়ে লেগেছ। আমি তোমাদের কাগজে বিজ্ঞাপন ছাপি, আজকের কাগজে আমার ব্যাবসাকে গাল দিয়েছ।

সুনীল এই প্রথমবার সকাল থেকে সেজে-রাখা পান থেকে একটু মুখে দিয়ে, সিগারেটের একটা প্যাকেট থেকে সিগারেট বার করে হাতে নিয়ে শান্তভাবে বলে, আপনি এটা গায়ের জোরে বানিয়ে কথা বললেন। আপনাকে সেদিনও স্পষ্ট বলেছি, গাল দেওয়াটাই আমাদের কাগজের নীতিবিরুদ্ধ। গাল দিয়ে সমাজের রাষ্ট্রের রোগ সারানো যায় না, বরং নিজেদের খেলো হতে হয়। আমরা সমালোচনা করি। তাছাড়া, বিশেষভাবে আপনার ব্যবসার বিরুদ্ধে তো কোনো কথা লেখা হয়নি? আপনার ব্যক্তিগত ব্যবসার সঙ্গে নয়, আপনাদের ব্যবসা করার সিস্টেমটার সঙ্গেই আমাদের বিবাদ বেধেছে। আমরা সিস্টেমটার সমালোচনা করেছি, আপনার মনে হয়েছে আপনাকে বেছে নিয়ে গাল দিয়েছে।

বটে নাকি?

নিশ্চয়। আপনি তো শুনবেন না, বুঝবেন না।

তোমাব মুখে একটু শুনি, বুঝবার চেষ্টা করি, কাল হয়তো কাগজে আমার নামে যাচ্ছেতাই গালাগালি ছাপিয়ে দেবে।

সুনীল ফস করে সিগারেটটা এবার ধরিয়ে ফেলে।

বলে, অত সস্তা কাগজ নয় আমাদের। ধরুন, আপনার সঙ্গে বিজনেস প্রতিযোগিতায় নেমেছে আরেকজন, তাকে গাল দিয়ে আপনার কাছে কিছু টাকা-পয়সার আশা আমরা করব না।

সিগারেট জোরে টান দিয়ে ধোঁয়া ছেড়ে সুনীল বলে, দরকার হলে আমরা আপনার সমালোচনাও করব। কাগজে চোরাবাজারের বিবরণ দেব তিন কলাম, চারের কলামে দেখিয়ে দেব আপনি কেমন ধরনের চোরাকারবার করেন।

সুনীল আবার জোরে সিগারেট টেনে বলে, আমি জেনে গেছি, এ কাগজটা বন্ধ করার জন্য আপনি কোথায় কোথায় কাব কার কাছে ছুটোছুটি করেছেন। আমার কিছুই জানতে বাকি নেই। টাকা দিয়ে কাগজটা কিনতে না পারার রাগে আপনি আমাদের সঙ্গে শত্রুতা করছেন। শত্রুতা আমিও কবতে পারি, কিন্তু আপনার আপিসে কাজ করে যে সব সিক্রেট জেনেছি, সে সব কাজে লাগানো হীনতা হবে, তাই চুপ করে আছি। ক্ষতি আমাদের বিশেষ কিছু করতে পারবেন না। গায়ের জ্বালায় আপনি বাদর নাচছেন খেলোয়াড়দের হাতে।

বাদর নাচছে! অঘোর বাদর নাচছে! এই সেদিন পর্যন্ত অঘোরের নীতিবর্জিত মুনাকা নীতির চোরা প্রক্রিয়ায় ব্যবসায় সক্রিয় অংশ নেবার জন্য মাসিক সাড়ে তিনশো টাকা পেয়ে এসেছে সুনীল, আজ সে সেই ব্যবস্থার বিরুদ্ধে ছাঁকা দেড় কলাম সম্পাদকীয় প্রবন্ধ লিখেছে।

টেবিলের এক কোণে পিছনে বসে মায়ার কিন্তু মনে হয় একটু বোকামি করছে সুনীল, সস্তা বাহাদুরি করার ঝোঁকে অঘোরের মধ্যে অকারণে শত্রুতা সৃষ্টি করছে। অঘোরের মতো খেলোয়াড় খেলোয়াড়দের হাতে বাদর নাচছে, এ কথাও মুখের উপর বলছে জোর গলায়।

আরও বেশি ব্যক্তিগত আক্রোশ জাগবে অঘোরের।

অঘোরের কথাবার্তা শুনলেই বুঝতে পাবা যায় যে সে খবরের কাগজটা সম্পর্কে দাঁও মারার ফিকিরে এসেছে। আজ কাজ হাসিল না হলেও কিছু আসে যায় না। নিজের আপিসের বেতনভোগী কর্মচারী সুনীলের কাছে এভাবে তার নত হয়ে আসার মানেই হল এই যে সে জানে সুনীলের ব্যবসা-বুদ্ধির মধ্যে ছেলোমানুষির ভেজাল আছে অনেকখানি।

নীতির জন্য আদর্শের জন্য সে অনেক কিছু বাস্তব সুবিধা বলি দিয়ে মনে করতে পারে যে খুব লাভ করলাম, জিতে গেলাম।

ছেলোমানুষ আদর্শবাদীদের ঘাড় ভাঙবার জন্য অনেক পাকা পাকা লোক যে চারিদিকে ওত পেতে থাকে, তাও অঘোরের অজানা নেই। এইটাই তার আসল ভয় সুনীল সম্পর্কে। তার আপিসে

চাকরি না করুক, দেনাপাওনার সম্পর্ক তাদের মধ্যে স্থগিত হয়ে গিয়ে থাক, একটা ঘনিষ্ঠতা তো সুনীলের সঙ্গে তার সৃষ্টি হয়ে আছে। অনেক কাল ধরে অনেক ধৈর্য আর ক্ষমা দিয়ে তাকেই তো গড়ে তুলতে হয়েছে এই ঘনিষ্ঠতার সম্পর্ক।

আজ তাকে ডিঙিয়ে যদি অন্য কেউ সুনীলের আদর্শবাদিতার সুযোগ নিয়ে তাকে বাগিয়ে বসে, নিজেকে অঘোর কোনোদিন ক্ষমা করতে পাববে না।

সুনীল কাত হবেই। শেষ পর্যন্ত ভেঙে যাবেই তার আদর্শবাদিতার এই চব্বম প্রচেষ্টা। কাগজটা তার বাগিয়ে নেবেই কোনো একজন পয়সাওলা বাস্তববাদী ব্যবসায়ী মানুষ।

একটু নত হয়ে নিজেই সুনীলের আপিসে এসে তার সঙ্গে আগেকার গড়ে তোলা আত্মীয়তার সুযোগ নিয়ে কাগজটা বাগাবার পথ সাফ করে রাখলে দোষটা কী ?

সুনীল নিজেই তো জানে না কীভাবে কোন ফাঁদে সে ধরা দেবে। কোন মুখোশ পরে কে আসবে তার কাছে, কীভাবে তার বিশ্বাস জন্মাবে যে ইনি একজন খাঁটি মানুষ, নিরুপায় হয়ে অগত্যা এর কাছে আত্মসমর্পণ করাই ভালো।

না। তা হতে পারে না। অঘোর তা হতে দিতে পারে না। সুনীলের আদর্শবাদী প্রতিভাও তারই সম্পত্তি ! নিজের আপিসে দায়িত্বপূর্ণ চাকরি দিয়ে সেই সাহায্য করেছে বাঁচিয়ে রেখেছে তার এই প্রতিভাকে।

একমাত্র তারই অধিকার আছে তার প্রতিভার বিকশিত ফুলটিকে ফলটিকে গ্রাস করার।

সুনীলের মস্তব্যে অঘোর রাগে না দেখে মায়া তাই অবাক হয়ে যায়।

অঘোর মুখ গম্ভীর করে বলে, এটা তুমি অত্যন্ত অন্যায় কথা বললে, আমাকে অপমান করার জন্য বললে। আমি কি কাগজটা বন্ধ করতে চাই ? না, এমনি বোকাহাবা মানুষ আমি যে সে চেষ্টা করতে গিয়ে অন্যের হাতে বঁদর নাচব ?

সুনীল বলে, কাগজটা আপনি কিনে নিয়ে কন্ট্রোল করতে চান। আপনি অন্যভাবে সে চেষ্টা করছেন—আমাদের কাবু করে বাগে আনতে চাইছেন।

অঘোর টেনিবে চাপড় মেরে বলে, তবেই দ্যাখো তোমাদের আদর্শের মধ্যে কত গলদ। দবকার হলে তোমরা আমাকে খোঁচা দেবে, আমি টাকা দিতে চাইলেও আমাকে ডিঙিয়ে হেমন্তের কাছে টাকা ধার করবে, আর আমি ব্যবসায়ী মানুষ, আমার মেথডে কাগজটা কিনবার চেষ্টা করলে তোমরা বলবে সেটা আমার অন্যায়। তোমরা আমায় কাগজটা বেচবে না, আমি কাগজটা কিনবার জন্য ফন্দি ফিকির খাটাব, এ তো ক্লিন কম্পিটিশন ! কেউ যাতে তোমাদের টাকা ধার না দেয়, হেমন্ত যাতে টাকার জন্য চাপ দেয়—সে চেষ্টা করা মরাল রাইট আমার পুরোমাত্রায় আছে !

এবার সুনীল একটু হাসে। আর তর্ক করে না।

মায়া এবার মুখ খোলে, বলে, আমার একটা নালিশ আছে অঘোরবাবু !

নালিশ ?

মায়া বলে, একটা স্কুল চালিয়ে সংসার চালাচ্ছি, সেটাও কী চালাতে দেখেন না আমাকে ? অঘোর চমকে ওঠে।

অঘোরের হৃৎপিণ্ডের পুরানো রোগটা যেন সুযোগ পেয়ে তাকে অবশ করে রাখে কয়েক মুহূর্তের জন্য।

মায়া বলে, স্কুলের কজন ছেলে নালিশ করেছে, আপনার আপিসে নাকি চাকরি করা দায়—আপনি ছ-মাস অ্যাপ্রেন্টিস খাটিয়ে ওদের বিদায় করে দিচ্ছেন। স্কুলটা তাহলে বন্ধ করে দি ?

অঘোর বিরতভাবে বলে, কাজ করতে পারলে আমি কি সহজে কাউকে ছাঁটাই করি ?

মায়া বলে, আপনি কী করেন না করেন আমি কী করে জানব বলুন ? ছোটখাটো স্কুল—বছরে মোটে কয়েকজন ছেলেকে সার্টিফিকেট দিতে পারি যে ই্যা, তুমি যে কোনো আপিসে কাজকর্ম করতে পারবে। আপনি আমার স্কুলের পাঁচ-ছটি ছাত্রকে ছ-মাস ধরে অ্যাপ্রেন্টিস খাটিয়ে বিদায় করেছেন। ছ-মাস অ্যাপ্রেন্টিস খাটার জন্য কে কার গরজে আমার স্কুলে শিখতে আসবে বলুন ?

সুনীল ডাকে, অভয়।

অভয় দরজার কাছেই ছিল, ভিতরে এসে সে বলে, কী বলছেন ?

সুনীল বলে, বিভূতি-শিশির-প্রদ্যোতবাবুদের আসতে বলে। আজ এডিটোরিয়েলটা বদলে যাবে।

অঘোর নিশ্বাস ফেলে বলে, শেষ পর্যন্ত আমাকে গাল দেওয়াই ঠিক করলে ? সুনীল আরেকটা সিগারেট ধরিয়ে বলে, আপনাকে গাল দেব ? কেন ? আপনাকে গাল দিয়ে লাভ কী হবে ? আপনি বরং খানিকটা পাবলিসিটি পেয়ে যাবেন। আমরা আজ আবোল-তাবোল ছাঁটাই করার প্রতিবাদ করব। যে কোনো ইয়ংম্যানকে ছ-মাস অ্যাপ্রেন্টিস খাটিয়ে আপনারা তাড়িয়ে দিতে পারেন, পুরানো পাকা লোককে যখন খুশি যে কোনো অজুহাতে তাড়াতে পারেন, শক্ত আইন করে আপনাদের এ অধিকার কেড়ে নিতে হবে। অন্য আপিসে অন্যায় ছাঁটাইয়ের আরও কয়েকটা উদাহরণ জানি, সেই সঙ্গে আপনার আপিসের ছাঁটাইটারও উল্লেখ করব।

অঘোর রেগে বেরিয়ে যায়।

অঘোর চলে যাবার পর সুনীলকে প্রথমবার একা পেয়ে প্রায় মায়া ধমকের সুরে বলে, এখনও তোমাব ছেলেমানুষি গেল না ? ছি !

মায়ার গলায় এমন কড়া আওয়াজ সুনীল অনেকদিন শোনেনি। সে আশ্চর্য হয়ে বলে, কী বলছ ?

বলছি লোকের সঙ্গে এত বাহাদুরি করা কেন ? নিজের রীতিনীতি, কাগজটার রীতিনীতি, সব ফাঁস করে দেওয়া হল মানুষটার কাছে। অত কথা বলার কী দরকার ছিল তোমার ? তোমার কথার আসল মানে বুঝবে ও মানুষটা ? ভদ্রলোক যেচে তোমার কাছে এসেছে নিজের স্বার্থে, তোমার অবস্থাটা নিজে যাচাই করাই ওর উদ্দেশ্য। কী দরকার ছিল তোমার অত বড়ো বড়ো কথা বলে বড়াই করার, নিজেকে জাহির করার ? ঠিক যেন কচি খোকার মতো করলে, ঘরের কথা শত্রুর কাছে ফাঁস করে দিলে। ভদ্রলোক তোমাকে এতটুকু বাহাদুর ভাববে মনে করেছ ?

সুনীল মন দিয়ে তার কথাগুলি শোনে। তার তিরস্কার যেন মাথা পেতে নিয়েছে এমনভাবে বলে, উনি আমার কী করবেন ?

মায়া বলে, এটাই তোমার ছেলেমানুষি। কিছু করতে পারুন না পারুন, শত্রু বাড়াবে কেন তুমি মিছিমিছি ? উনি কিছু করতে পারবেন না, তাই বা কী করে জানলে তুমি ? আমার তো মনে হয় উনি আজকালের মধ্যেই উঠে-পড়ে শত্রুতা আরম্ভ করবেন, দু-চারদিনের মধ্যে দেখতে পাবে কাগজ চালাতে যাদের সঙ্গে কাববার করতে হয় তাদের ব্যবহার কেমন বদলে যাচ্ছে ! চাপ দেবার ব্যবস্থা করবেন। আমি বলে রাখছি, কাগজওলা, ছাপাখানার মালিক, যারা বিজ্ঞাপন দেয়, পাওনাদার সবাই হঠাৎ অভদ্রতা আরম্ভ করে দেবে। তুমি যখন চোখে সর্ষেফুল দেখতে আরম্ভ করবে, উনি এসে কাগজটা কিনে নিয়ে তোমায় বাঁচিয়ে দিতে চাইবেন !

সুনীল বলে, সে তো বুঝলাম, ওটা উনি অনেকদিন থেকেই চাইছেন। কিন্তু আমি তো আজ নতুন কথা কিছুই বলিনি ? কয়েকদিন আমাদের কাগজ পড়লেই বোঝা যায় আমরা কী নীতি ধরেছি। সেটাই আমি সহজ ভাষায় বুঝিয়ে বলেছি অঘোরবাবুকে।

মায়া বলে, কাগজ পড়ে জানা আর তোমার মুখে শোনার মধ্যে অনেক তফাত। কাগজে তুমি কী উদ্দেশ্যে কী নীতি খাটাচ্ছ তা তো সব লোকে জানবে না ? অঘোরবাবুর মতো লোকেরা ধরেই নেবে একটা কোনো মতলব হাসিল করার জন্য তুমি একটা নীতি ধরেছ, দরকার হলে অদলবদল করবে। কিন্তু তোমার মুখ থেকে শোনা মানাই উনি জেনে গেলেন ওই নীতিটা আঁকড়ে থাকাই তোমার উদ্দেশ্য।

সুনীল ভুরু কঁচকে তার মুখের দিকে চেয়ে থাকে।

মায়া আবার বলে, এই নীতি তুমি কিছুতে ছাড়বে না, ওঁর সঙ্গে কোনোমতেই আপস করবে না, এটা আজ উনি পরিষ্কার স্পষ্টভাবে জেনে গেলেন। তুমি কতটা শক্ত হবে এটা ওর ধারণা ছিল না। তুমি আজ ভেতরের কথা ওর কাছে ফাঁস করে দিলে।

সুনীল বলে, তোমার কথাটা মানতে হচ্ছে।

কাগজেই ছেলেমানুষি করলে না ? ওর নানারকম খটকা ছিল, কতটা চাপ দিতে হবে জানতেন না, আজ জেনে গেলেন আপসে কিছু হবে না, তোমাকে ভাঙতেই হবে।

তোমার তো খুব ধারালো বুদ্ধি !

ধারালো বুদ্ধি নয়। এ সব সাধারণ সাংসারিক জ্ঞান ছাড়া মেয়েমানুষের চলে না। বাড়ি ফিরবে না আজ ?

ফিরব। চলো তোমার সঙ্গেই যাচ্ছি। আজ বাড়ি গিয়ে একচোট ঘুমোব। টাকার চিন্তাটাকে বড়ো বেশি প্রশ্রয় দিচ্ছি।

ট্রামে-বাসে তখন ভিড় কমেছে। মায়ার পাশে বসে সুনীল বলে, ছ-মাসের মধ্যে মোটর গাড়িতে বাড়ি ফিরব।

তাই নাকি !

নিশ্চয়। তার মানে কিন্তু ধরে নিয়ো না যে খুব বড়োলোক হয়ে যাব বলছি। কাগজ চালাবার জন্যই গাড়ি দরকার হবে। হবে কেন—হয়েছে। সময়ের দাম সম্পর্কে আমার নতুন জ্ঞান জন্মে গেছে।

সময়ের দাম সম্পর্কে নতুন জ্ঞান ?

আগে ধারণা ছিল, যে খুব কাজ করে, প্রাণপাত করে খাটে, তার কাছেই সময় হয় দামি। এখন দেখছি ও ধারণাটা ভুল। সময়ের দামটাও কাজের দামের ওপর নির্ভর করে। খাটুনিটা আসল নয়, কাজের কোয়ালিটিটাই আসল কথা। যার দায়িত্ব যত বেশি, যার কাজের ওপর যত বেশি লোকের কাজ নির্ভর করে, তার সময়ের দাম তত বেশি।

মায়া একটু হেসে বলে, এতদিনে জানলে এটা ? কাজ তো ছোটোবড়ো, উঁচুনিচু হয় না—একমাত্র দায়িত্ব দিয়েই কাজের বিচার চলে।

মায়া কি আশা করছিল, বাস থেকে নেমে বাড়ির পথটুকু একসঙ্গে হেঁটে যাবার সময়, তাদের নিজেদের কথাটা খেয়াল হবে সুনীলের ?

কিন্তু আশা করে সে এমন অস্বস্তি বোধ করে কেন ! কেন তার মনে হয় যে এই সুযোগে আজ সুনীল কথাটা পাকাপাকিভাবে ঠিক করে ফেলতে চাইলে সে মুশকিলে পড়ে যাবে ?

এখনও সে সব দ্বিধা কাটিয়ে অতখানি মনস্থির করে ফেলতে পারেনি।

সেদিনের আলোচনার পর সে ভেবেচিন্তে দেখেছে বিয়ের পর যতই তারা চেষ্টা করুক—যে যেমন আছে তেমনি থাকতে, সেটা সম্ভব নয়।

বাড়ি গিয়ে এতরাতে নবীনকে দেখে সুনীল একটু আশ্চর্য হয়ে যায়। আলপনার সঙ্গে সেদিন নবীনকে নিয়ে তার কথা হবার পর কেটে গেছে অনেকগুলি দিন, নবীন তার সঙ্গে কথা বলতে আসেনি।

ক্রমে ক্রমে ক্রুদ্ধ ও গভীর হয়ে উঠছিল আলপনার মুখ।

সুনীলের সামনে মাঝে মাঝে তার মুখ লাল হয়ে যায়। দাদার কাছে লজ্জা আর অপমানই নিশ্চয় ! সেদিন সে তুচ্ছ করে উড়িয়ে দিয়েছিল নবীনের প্রতিজ্ঞা, বড়াই করে বলেছিল, নবীনকে দিয়ে সে দাদাব সঙ্গে কথা বলাবে।

এবং সুনীল অনুমান করছিল শীঘ্রই নবীনের একদিন তার কাছে আবির্ভাব ঘটবে প্রতিজ্ঞা ভঙ্গ করার জন্য। কিন্তু রাতে সে আজকাল সব দিন বাড়ি ফেরে না জেনেও এতরাতে নবীন এসে তার জন্য অপেক্ষা করবে এটা সে ভাবতে পারেনি।

কথা সে নিজেই আরম্ভ করে।

কী খবর নবীন ?

বিভাদি আপনার সঙ্গে একবার দেখা করতে চায়। কখন বাড়ি থাকেন জানতে এসেছিলাম। কাল সকালে আসতে বলব ?

নবীন সহজভাবেই কথা বলে। জীবনে কোনোদিন কথা বলবে না ঘোষণা করে কয়েক মাস সতাই সে যে বাক্যলাপ বন্ধ রেখেছিল সুনীলের সঙ্গে, সেটা টেরও পাওয়া যায় না। আজ প্রথম নতুন করে কথা আরম্ভ করবার সময় একটু সংকোচ বোধ করা তার পক্ষে ছিল স্বাভাবিক। কিন্তু তার ভাব দেখে মনে হয় কথা বলাটা সুনীলের উপর যেন তার অনুগ্রহ !

সুনীল বলে, বিভার আসতে হবে না। কাল আমি ওদের বাড়ি যাব।

নবীন বলে, বিভাদি আপনাকে জানাতে বলেছে যে আপনি যদি যান এগারোটার পরে যাবেন।

—আঘোবাবু আপিস চলে যাবার পর।

কেন ?

তা কিছু বলেনি।

আলপনার সঙ্গে দেখা না করেই নবীন বিদায় নেয়।

ভেতরে গিয়ে আলপনা শুয়ে পড়েছে শুনে সুনীল ব্যাপারটা বুঝতে না পেয়ে আরও আশ্চর্য হয়ে যায়।

তার খাতিরে নবীন আজ নিজের প্রতিজ্ঞা ভঙ্গ কবতে এসেছে, তাকে বাইরে বসিয়ে রেখে আলপনা শুয়ে পড়েছে।

আলপনা বোধ হয় জানে না নবীন আজ তার মান রাখার জন্য এসেছে, তার কাছে বোধ হয় নবীন প্রতিজ্ঞা ভাঙতে রাজি হয়নি, পরে ভেবেচিন্তে মত পরিবর্তন করেছে।

রাগে অভিমানে আলপনা হয়তো নবীনের সঙ্গে দেখাও করেনি, নবীন তার মান রাখতে এসেছে না জানায়, কথাও বলেনি।

সে খেতে বসলে আলপনা উঠে আসে।

নবীন নিজে থেকে কথা বলেছে নাকি তোমার সঙ্গে ?

বলেছে। নিজে থেকে নয়, আমিই আগে বলেছি। সেটা কিন্তু ওর দোষ নয়, আগে কথা বলার সুযোগটাই বেচারা পায়নি। তোদের কী হল ? ঝগড়া হয়েছে নাকি ?

আমার সঙ্গে কথা বন্ধ করেছে।

কেন ?

তোমার সঙ্গে কথা বলবার জন্যে জোর করেছি যে।

বাঃ ! চমৎকার ব্যাপার তো তাদের !

আলপনা মুখ বাঁকায়।

সুনীল হেসে বলে, দাদার বদলে বোনের সঙ্গে কথা বন্ধ করে ও নিজের প্রতিজ্ঞা বজায় রাখতে চায় নাকি? প্রতিজ্ঞার ব্যাপারেও প্রকসি চলে ?

আলপনা বলে, কথা আমাদের বন্ধ হতই।

কেন ?

তোমার সঙ্গে কথা না বললে আমি ওর সঙ্গে কথা বন্ধ করতাম—করতাম কী, করেছিলাম।

পরদিন বারোটা নাগাদ অঘোরের বাড়ির দিকে রওনা হয়ে সুনীল ভাবে, কাল অঘোরের সঙ্গে সংঘর্ষের পর আজ বোধ হয় তার বাড়িতে তার না যাওয়াই উচিত ছিল। অঘোরের বাঁকা মন কী ভেবে বসবে কে জানে !

বিভা তার বাড়িতে গেলেও অঘোর অবশ্য খবর পেত কিন্তু সেটা হত আলাদা ব্যাপার। তার সঙ্গে বিভার তো বিবাদ হয়নি !

বিভার মুখখানা এত বেশি স্নান দেখায় যে সুনীলের মনে হয় তার বুঝি জ্বর এসেছে।

জ্বর গায়ে বসে আছে কেন ?

জ্বর কে বললে ?

মুখ দেখে মনে হচ্ছে।

বিভা মাথা নেড়ে বলে, জ্বর-টর হয়নি। খুব জ্বরুরি কথা আছে তোমার সঙ্গে।

সুনীল সিগারেট ধরিয়ে নীরবে প্রতীক্ষা করে।

বিভা বলে, তোমাকে নিয়ে বাবার সঙ্গে আমার ঝগড়া হয়ে গেল।

ব্যাপার কী ?

কাল বাবা বাড়ি এসে যা-তা বলতে লাগলেন তোমার নামে। তোমার নাকি মাথা খারাপ হয়ে গেছে, তুমি নাকি উচ্ছ্রমে যেতে বসেছ, কাগজটা খুব ভালো দাঁড় করানো যেত কিন্তু তোমার মতিচ্ছন্ন ধরেছে বলে তুমি কাগজটার ভবিষ্যৎও নষ্ট করছ, নিজেরও সর্বনাশ ডেকে আনছ। শুনতে শুনতে এমন রাগ হয়ে গেল আমার। আমি তোমার দিকে টেনে বলতে গেলাম যে, টাকা টাকা করে পাগল হওয়ার চেয়ে তোমার মতো মাথা খারাপ হওয়া ঢের ভালো। বাবা চটে লাল হয়ে চলে গেলেন। তোমার সঙ্গে বুঝি একচোট বেধেছিল কাল ?

বেশি বাধেনি, উনি কাগজটার জন্য টাকা দিতে চান আমি টাকা নেব না, এই হল ওঁর আক্রোশের কারণ। উনি আসল ব্যাপারটা বুঝতে পারছেন না। আমি কাগজটার আসল মালিক নই, অংশীদার। কাগজটার যিনি মালিক তিনি মালিকানা বিক্রি করবেন না—কাগজ বরং বন্ধ হয়ে যাবে কিন্তু অন্যের হাতে যাবে না। কাগজটা আরম্ভ করে তার স্বামী মারা যান। অঘোরবাবু ধরে নিয়েছেন আমি নিজের স্বার্থে ওর সাথে বাদ সাধছি।

বিভা বলে, বাদ সাধলেই বা ? তোমার কাগজের জন্য বাবা লোভ করবে কেন ? শখ হয়ে থাকলে একটা কাগজ বার করলেই হয়, কাঁড়ি কাঁড়ি টাকা নিয়ে কী করবে এদিকে তো ভেবে পায় না।

তুমি ভারী চটেছ দেখছি।

চটব না ? নিজের বাপ এ রকম ছোটোলোক হলে কেমন লাগে তুমি কী বুঝবে !

রাঁধুনি প্লেটে খাবার দিয়ে যায়।

বিভা বলে, আমি তৈরি করেছি, যেমন হয়ে থাক, খেতে হবে। বসে বসে একটু একটু রাঁধাবাড়ি খাবার করা এ সব কাজ করছি আজকাল। ভাত খেয়ে বেরিয়েছি বললে শুনব না।

আমি তা বলবও না। তোমার বাড়ি এলে পেটে জায়গা নিয়েই আসি। না খেলে যে ছাড়বে না এটা আমার জানাই আছে।

বিভা খুশি হয়। তার স্নান মুখে সানন্দ হাসির আভাস পর্যন্ত দেখা যায়।

কিন্তু অল্পক্ষণেই মিলিয়ে যায় তার হাসিখুশি ভাব। বলে, তোমায় সাবধান করে দিতে ডেকেছি। বাবা তোমাকে বিপদে ফেলবার চেষ্টা করবে।

মায়ার ভবিষ্যদ্বাণী সুনীলের মনে পড়ে যায়। মায়া ঠিকই ধরেছিল যে তার সঙ্গে কথা বলে অঘোর যেহেতু টের পয়েছে যে, এ কাগজে মাথা গলাবার সুযোগ সে পাবে না, সেই হেতু এবার থেকে অঘোর তাকে মুশকিলে ফেলবার চেষ্টা বিশেষভাবে আরম্ভ করবে।

বিভা বলে, টাকা টাকা করে নাকি পাগল হয়েছ অথচ বাবা টাকা দিলে নেবে না, এইভাবে তুমি শত্রুতা করছ বাবার সঙ্গে। বাবাও তাই শত্রুতা করবে।

পরম তৃপ্তির সঙ্গে খাবার খেতে খেতে সুনীল নিশ্চিতভাবেই বলে, বুঝতে পারছি। কী আর করা যাবে !

তোমার সত্যি খুব টাকার দরকার ?

টাকার চিন্তায় পাগল হতে বসেছি। টাকা জোগাড় করতে না পারলে সব নষ্ট হয়ে যাবে। টাকার চেষ্টা করতে নেমে সব জায়গায় ওই এক রকম ব্যাপার দেখছি। টাকা দিয়ে কাগজটা বাগানোর উদ্দেশ্যে ছাড়া কেউ টাকা দিতে রাজি নয়।

সুনীল স্কেভের হাসি হাসে।

সমস্যাটা দাঁড়িয়ে গেছে খুব সোজা। কাগজটার জন্য যাদের দরদ আছে, তাদের নেই টাকা, আর যাদের টাকা আছে কাগজটার নীতির জন্য তাদের নেই মাথাব্যথা।

বিভা বলে, তোমায় বলতে সাহস হয় না—আমি লুকিয়ে হাজার পঁচিশেক টাকা দিলে নেবে ? অত টাকা কোথায় পাবে ?

টাকা আমার নামে জমা আছে।

অঘোরবাবু টের পেয়ে যাবেন।

পরে টের পেলে আর কী হবে ? একটু রাগারাগি করবে—বাস্। মেরে তো আর ফেলতে পারবে না নিজের একটা মেয়েকে।

সুনীল স্থিরদৃষ্টিতে তার দিকে চেয়ে থাকে।

বিভা প্রশ্ন করে, কী ভাবছ ?

ভাবছি তোমার টাকা আর তোমার বাবার টাকায় তফাত কী ?

তফাত নেই ? এটা আমার নিজের টাকা।

তোমার বাবাই তো তোমাকে দিয়েছেন।

দিয়েছেন বলেই তো ওটা আমার টাকা। নইলে দেওয়ার কী মানে হয় ? এ টাকায় কেবল আমার অধিকার।

সুনীল একটু হেসে বলে, সে তো বুঝলাম, মেয়ে বলেই তোমার অধিকার। আমি কোন অধিকারে তোমার টাকা নেব ?

বিভা সঙ্গে সঙ্গে বলে, তুমি তো নিচ্ছ না ! আমি তোমাকে টাকা দেব বলছি নাকি ? তোমায় কেন টাকা দিতে চাইব ! তোমার সংসারে কত টানাটানি, কোনোদিন বলেছি পাঁচটা টাকা নাও ?

সুনীল বলে, বললে আমাকে অপমান করা হবে তাই বলনি, নইলে মনে মনে ইচ্ছা কী আর হত না। বড়োলোকের মেয়ে হবার জ্বালা আমিও খানিক বুঝি। কোনোদিন সাহস করে একটা জিনিস কখনও আমার ভাইবোনকে প্রজেক্ট দিতে পারনি।

বিভাও হাসে, অনেককে প্রেজেন্ট দিই—টাকাও দিই। নিজে না দিলে চেয়ে নেয়। কিন্তু এ ক্ষেত্রে তুমি সংকোচ বোধ করছ কেন ? টাকাটা সত্যিই তো আমি তোমায় দিচ্ছি না ! আদর্শের জন্য জনসাধারণের মঙ্গলের জন্য কাগজটা চালাচ্ছ—এ একটা খুব বড়ো কাজ, ভালো কাজ। কাগজটার জন্য আমি টাকা দিচ্ছি, কোনো লোককে নয়।

সুনীল বলে, ভালো কাজের জন্যও সব অবস্থায় সকলের টাকা নেওয়া যায় না—বিপরীত ফল হয়।

বিভা বলে, আহা, টাকাটা তো আমি দান করছি না, তোমরাও একেবারে নিয়ে নিচ্ছ না। অন্য লোকের কাছে ঋণ নিতে, আমার কাছ থেকেও ঋণ হিসাবেই টাকা নেবে। কাগজ দাঁড়ালে, লাভ হলে টাকা ফিরিয়ে দিয়ে—মিটে গেল।

সুনীল একটু ভেবে বলে, এ যুক্তিটা তুমি ভালো দিয়েছ। টাকার এমন দরকার যে ভেতর থেকে তাগিদ আসছে তোমার যুক্তিটা চোখ-কান বুজে মেনে নিই।

মেনে নাও না ?

সুনীল এবার গম্ভীর হয়ে যায়।

কিন্তু ভাববার কথাও আছে ! অনেক গুরুতর দিক ভাববার আছে। অন্যেরা যে টাকা ধার দেবে, তারা দেবে লাভের আশায়, অনেক কঠোর শর্ত থাকবে। কাগজের নীতিনিয়ম কনট্রোল না করুক, কাগজ চালানোর ব্যবসার দিকটা খানিক কনট্রোল করবে—আমাদের দোষে তার টাকা না মারা যায়। আমাদের সঙ্গে তার সম্পর্কটা লোকের বুঝতে অসুবিধা হয় না। কিন্তু তোমাব কাছে টাকা নিলে—

সুনীল থেমে যায়।

বিভা জিজ্ঞাসু দৃষ্টিতে চেয়ে থাকে।

সুনীল বলে, বুঝতে পারছ না ? খবরটা অজানা থাকবে না, একটা খবরের কাগজের ব্যাপার। আমি নিজে নিলে হয়তো গোপন রাখা যেত। লোকে শুনেই জিজ্ঞাসা করবে বিভা কেন এতগুলি টাকা দেয় ? চেনা তো এক সুনীলবাবুর সঙ্গে, তার কাগজটার জন্য ওর অত মাথাব্যথা কেন ? দরদটা কাগজের জন্য না লোকটার জন্য ? কিছু নিশ্চয় তাহলে আছে দুজনের মধ্যে !

বিভা খানিকক্ষণ ঠোট কামড়ে থাকে।

তাই বটে ! কেবল আমার নয়, তোমারও বদনাম হবে।

সুনীল হাসিমুখে বলে, তোমার একার হলে বুঝি উড়িয়ে দেওয়া যেত ? টাকা দিয়ে তুমি বদনাম কিনবে সেটা তুচ্ছ কথা নাকি ?

যাওয়ার আগে সুনীল বলে, টাকাটা নেব না বলিনি কিন্তু। ভাববার জন্য সময় নিচ্ছি। কেবল বদনামের দিকটা নয়। আরও ভাববার দিক আছে। যেমন ধরো, ঠিক এই সময় কাগজটা বাঁচাতে তুমি টাকা দিলে অঘোরবাবু খেপে যাবেন। মেয়েকে মেরে ফেলতে না পারলেও অশান্তির সীমা রাখবেন না মেয়ের জীবনে। শুধু এটাও নয়—আরও ভাববার কথা আছে ! ক-দিন ভেবে দেখা যাক।

সব কিছুই যেন দাঁড়িয়ে যেতে চায় জটিল সমস্যায় ! অনিল আর ছায়ার সম্পর্কে শেষ সিদ্ধান্ত নেওয়া হয়েছে, এটাই তাদের ধারণা ছিল। দুজনে যোগ্যতার পরিচয় দিলে ভবিষ্যতে বিয়ের কথা ভাবা যাবে, এখন ও বিষয়ে চিন্তা করারও প্রয়োজন নেই।

কিন্তু দেখা যায় এত সহজে সমস্যা এড়ানো যায় না।

মায়া বলে, এ তো আরেক বিপদ হল !

কী বিপদ ?

ছায়াকে সব বুঝিয়ে বললাম। ওর বিষয়ে ব্যবস্থার কথাও বললাম। মেয়ে বলছে তা হবে না।

সুনীল আশ্চর্য হয়ে বলে, বিয়ে হবে না জেনেও বলছে ?

মায়া বিব্রতভাবে বলে, বলছে বইকী ! সোজা স্পষ্ট—না। বলছে, ও ভুল করেছে, বোকামি করেছে, কিন্তু এমন কোনো পাপ করেনি যে, সে জন্য আরেকটা অন্যায্য করতে হবে। মেয়ে আমাকে পটপট করে কত কথা শুনিয়ে দিলে ! কোন মুখে আমরা বলছি এটা বিজ্ঞানের যুগ—আবার আমরাই সেকেলে অসভ্য ব্যবস্থা ধরছি। বিজ্ঞানের যুগে বুঝি অকারণে ভবিষ্যৎ একটা মানুষকে খুন করা হয় ! আমরা সেকেলে তাই আমরা কথাটা ভাবতে পেরেছি। অনায়াসে বলেছে, খুশি হলে ওকে তাড়িয়ে দিতে পারি, ও নিজের ব্যবস্থা করে নেবে।

বাটে !

কী বললে শুনবে ? বললে, মরব তো আর না, কত নিরাশ্রয় উদ্ভাস্তু মেয়ে চাল বেচে গতর খাটিয়ে নিজেদের বাঁচিয়ে রেখেছে।

সুনীল বলে, এ সব অনিলের শেখানো কথা। আমাদের ওপরে চাপ দিচ্ছে।

মায়া বলে, নরম হতে হবে নাকি আমাদের ? মেয়ে কিন্তু গৌঁ ছাড়বে না মনে হচ্ছে !

ভালোই তো। দুজনে পরামর্শ করে যদি এটা ঠিক করে থাকে, শুধু আমাদের চাপ দিয়ে কাবু করার জন্য না করে থাকে, তার চেয়ে আনন্দের কথা কী হতে পারে বলো ? যারা বিগড়ে গেল বলে আপশোষ করছিলাম, যাদের ভবিষ্যৎ নিয়ে দৃষ্টিস্তা করছিলাম, তারা প্রমাণ দিচ্ছে মনুষ্যত্বের। কোনো অন্যায্য তারা করেনি, কোনো জোড়াতালি ব্যবস্থা মানবে না। এতটা মনের জোর যদি ওরা দেখাতে পারে তবে তো কোনো ভাবনাই থাকে না ওদের সম্পর্কে।

একটু থেমে বলে, আমরা নরম হব না। ওদের দায়—আমরা উদ্ধার করে দেব না। তা হলেই সব কেঁচে যাবে। আমরা সাহায্য করব, যত রকমে পারি করব—কিন্তু লড়াই করে উঠতে হবে ওদের। সে জন্য দু-তিনবছর সময়ও যদি লাগে, কী এসে যায় ?

মায়া নিশ্বাস ফেলে বলে, মা-বাবাকে নিয়েই সমস্যা ! ওরা না হার্টফেল করে !

সুনীল বলে, আজ আশা হচ্ছে অত দূর গড়াবে না। অনিল যা হোক কিছু রোজগার করছে। আমি ওকে জানিয়ে দেব যে ওই টাকায় ছায়াকে নিয়ে বস্তির ঘরে যদি চালাতে পারে, আমি সংসারের জন্য কিছু চাইব না।

কল্পনার সমস্যা সহজ মনে হলেও মোটেই সেটা সহজ নয়।

এমন কোনো জটিল মানসিক বিকাব প্রণবের সঙ্গে তার বনিবনা না হবার কারণ নয় যে, সেটা বুঝবার জন্য সূক্ষ্ম মনস্তত্ত্ব খাঁটা দরকার হয়। সময়ের পরিবর্তনের সঙ্গে বৃষ্টির পরিবর্তনটাই তার অসুখী হওয়ার জন্য দায়ী।

সিধা পথে বাঁধা নিয়মে তো ঘটে না পরিবর্তন—না বাস্তবতার না মানুষের বৃষ্টি প্রকৃতির।

ভাসাভাসা বিচার করলে মনে হবে বুঝি একটা বিরাট এলোমেলো বিশৃঙ্খল ব্যাপার—কিন্তু সমগ্রভাবে দেখলেই ধরা পড়ে যায় মোট গতিটা সামনের দিকেই।

কিন্তু পরিবর্তনের খানিকটা এলোমেলো এগোনো পিছানো প্রকৃতির দরুন সমস্যা ও সংঘাত সৃষ্টি হবেই। শেষ পর্যন্ত ক্ষতি অবশ্য তাতে নেই—সংঘাতেই সৃষ্টি হয় জীবনের গতি।

কয়েকটা দিকে কল্পনার বৃষ্টি গেছে বদলে, হয়তো সুনীলের জন্যই গেছে, ন্যাকামি ভাবালুতা তার পছন্দ হয় না। সে ভুলে গেছে যে তার ভাবপ্রবণতা নিয়ে সুনীলকে সে বিব্রত করে তুলেছিল বিয়ের আগে, এখনও করছে।

ভাবালুতা সে নিজেই কাটিয়ে উঠতে পারেনি, শুধু কয়েকটা দিকে কয়েকটা বিষয়ে বিশেষ ধরনের ভাবালুতা তার কাছে অসহ্য হয়ে উঠেছে।

প্রণব বরং তার চেয়ে অনেক বেশি কম-ন্যাকা, কম-ভাবালু। কিন্তু মুশকিল হয়েছে এই, ঠিক যে বিশেষ ধরনের ন্যাকামি কল্পনার অত্যন্ত অপছন্দ সেই ন্যাকামির হিসাবেই প্রণব রয়ে গেছে পিছিয়ে !

তার জানাই ছিল না কল্পনাকে কীভাবে ভালোবাসা উচিত। তার ধারণা, ভাবোচ্ছল গদগদ প্রেম, দেহি পদপদ্মব মার্কা প্রেমই সব যুগে, সব মেয়ের কাম্য। ওইভাবে ভালোবাসতে গিয়ে একেবারে সে বিগড়ে দিয়েছে কল্পনার মন।

উপদেশ দিয়ে লাভ নেই। তবে কয়েকটা কথা জানিয়ে রাখা ভালো, পবে হয়তো কাজে লাগবে।

কল্পনাকে সে বলে, একেবারে বাজে বখাটে ছেলেমেয়েদের কথা বাদ, ওদের সংখ্যাটাও সব ছেলেমেয়েদের হিসাবে নগণ্য। যেসব ছেলেমেয়ে খুব তেজি সাহসী আর অনেকদূর এগিয়ে গেছে তাদেরও আমি হিসাবে ধরছি না। সাধারণ সমস্ত ছেলেমেয়েদের মধ্যে যে কী রকম একটা নতুন তেজ আর আত্মবিশ্বাস এসেছে, নানাব্যাপারে জড়িয়ে থেকে নিজে না দেখলে আমি ধারণাও করতে পারতাম না। একটি ছেলের মধ্যে হয়তো অনেক দুর্বলতা আছে, সেকেলে ভাব আছে, কিন্তু সেও যে কীভাবে নিজেকে নতুন দিনের নতুন জীবনের জন্য তৈরি করছে সে এক আশ্চর্য ব্যাপার ! সব চেয়ে আশ্চর্য এই, সে এটা পেরেছে অবস্থার জন্য, অনেকদিকে পিছিয়ে থেকে অনেক দুর্বলতা বজায় রেখেও। আমি আজকাল আর নেগেটিভ দিক ধরে কোনো ছেলেমেয়েদের বিচার করি না। সব সময় পজিটিভ দিকটা দেখি।

কল্পনা মন দিয়ে শোনে। বলে, আরেক হাতা ডাল দেব ? ডাল কমিয়ে তুমি বরং দু-একটা ডিম আর খানিকটা দুধ বাড়িয়ে দাও। আমরা ডাল ভাত চচ্চড়ি খাব—তুমি বুঝি তাই লজ্জা পাও ডিম-দুধ খেতে ? কিন্তু লজ্জা তুমি আমাদেরই দাও। আমরা যেন সেকেলে ভূত, আমরা যেন জানিনে এত খেটে শরীরটা বিগড়ে গেলে তুমি আর খাটতে পারবে না, আমরাই পড়ব বিপাকে। দুধ আর ডিম খেতে যা লাগে তার পঞ্চাশ গুণ তুমি তখন ডাক্তার আর ওষুধে ঢালবে, আমরা কথটি কইতে পাবব না।

দুর্গন্ধ ভাত, সুনীল কস্টে গ্রাসটা গিলে বলে, এ সংসাবে তোর তো কথা কওয়ার কথা নয়। এ সংসাবেই থাকব ভাবছি।

সুনীল আর ভাতের থালায় হাত দেয় না।

বলে, কাল পরশু প্রণব নিতে আসবে। এবাব যদি না যাও আব কোনোদিন সে আসবে না। তাবপর নিজেকে মাথা নিচু করে যেতে হবে।

সুরমা বলে, তোমার বোনের মাথা অত সহজে নিচু হয় না।

সুনীল ভাত ফেলে উঠে যায়।

পরের শনিবার প্রণব আসে। মুখখানা তার গভীর নয়, একটা কঠিন প্রতিজ্ঞার চাপে কঠিন, অস্বাভাবিক।

কারণও সঙ্গে ভালোভাবে কথা কয় না, শ্বশুরবাড়ির আদরআপ্যায়ন সম্পর্কে তার গভীর বিতৃষ্ণা দেখা যায়, খাবার ঠেলে সরিয়ে দিয়ে শুধু চা-টুকু গিলে সে খবরের কাগজটা তুলে নিয়ে চেয়ারে পা তুলে বসে একমনে কাগজ পড়তে শুরু করে।

আলপনা বলে, দাদা এই চিঠিটা রেখে গেছে আপনার জন্য।

প্রণব চিঠি লিখেই এসেছিল। শনিবার বিকালে এসে বিকালেই কল্পনাকে নিয়ে সে ফিরে যাবে।

সুনীল তাকে চিঠিতে জানিয়েছে যে—সময়-অসময় বিবেচনা না করে এমন আচমকা বাঙালি ঘরের মেয়েকে শ্বশুরবাড়ি পাঠানো যায় ? মেয়ের বাপ-মা-ভাই-বোনরা নিশ্চয় এত তুচ্ছ নয় তার কাছে যে, রাতটা এখানে কাটিয়ে সকালবেলা কল্পনাকে নিয়ে গেলে তার চলবে না।

চিঠি পড়ে প্রণব বলে, সুনীলদা যখন বলছেন, থাকতেই হবে।

আলপনা বলে, সুনীলদা বলছেন বলেই ?

প্রণব বলে, না, সুনীলদা ঠিক কথা বলেছেন বলে ! এ রকম ইইচই করে এসে সন্ধ্যাবেলা তোমার বোনকে নিয়ে যাওয়া সত্যি ঠিক নয়।

আধঘণ্টার মধ্যে কল্পনার সঙ্গে তার কথা বলার সুযোগটা সৃষ্টি করে দেয় বাড়ির লোকেরা।

কল্পনা বলে, আমি এখন যেতে পারব না। দু-একমাস পরে যাব।

প্রণব বলে, তাহলে তোমার আর গিয়ে কাজ নেই। বাপের বাড়িতেই থাকো। কই, বাপের বাড়িতে থেকেও তো চেহারা ফেরেনি ? বরং আরও যেন কাক-ঠুকরোনো লাগছে !

তুমি শান্তিতে থাকতে দেবে না, কী করব !

প্রণব খানিকক্ষণ গুম খেয়ে থাকে। তারপর বলে, আচ্ছা বেশ, আমি আর তোমার অশান্তি করব না, চেহারাটি ভালো করে প্রমাণ দিয়ে যে আমার জন্যেই তোমার শরীরের এই অবস্থা। প্রমাণ দিলে আমি কান ধরে তোমাব পায়ে নাকেখত দেব।

কল্পনা একটু আশ্চর্য হয়েই তার দিকে চেয়ে থাকে। তার সঙ্গে এ রকম তেজের সঙ্গে কথা বলা নতুন বটে প্রণবের।

প্রণব বলে, আমি এখন চলে যেতাম, তোমার অশান্তি করতাম না। কিন্তু সুনীলদা থাকতে বলেছেন, চলে যাওয়াটা উচিত হবে না। আমাদের একসঙ্গে শুয়ে আর কাজ নেই, অশান্তিই বাড়বে তো। আমি খেয়ে-দেয়ে অনিলের বিছানায় শুয়ে ঘুমিয়ে পড়ব, তুমি সকলকে বলে দিয়ে, ঘুম থেকে ডাকলে আমার শরীর ভীষণ খারাপ হয়, আমাকে ডেকে কাজ নেই।

কল্পনা একটু বিহ্বলভাবেই তার মুখের দিকে চেয়ে থাকে।

বাড়ির সকলের অনেক অসুবিধা ঘটিয়ে চিরদিনের মতো অর্থাৎ তাদের বিয়ের এই দশ মাসের মধ্যে অনেকবার ছোটো ঘরখানা থেকে জিনিস আর মানুষ সরিয়ে তাদের দুজনের শয্যা পাতা হয়।

দশটা বাজতে না বাজতে বাইরের ঘরে অনিলের বিছানায় শুয়ে প্রণব ঘুমিয়ে পড়ে।

কল্পনা বলে, কেউ ডেকো না কিন্তু। ঘুমিয়েছে ঘুমোক—ঘুম ভাঙলে বিষম ব্যাপার হবে।

আলপনা হেসে ফেলে।

এতকাল তো কিছুই হত না ঘুম ভাঙলে ? এ একটা নতুন রোগ হল নাকি ?

আলপনা হাসতে পারে, সে ছেলেমানুষ। অন্য সকলের মনে নানা আশঙ্কা উঁকি মেরে যায়। এ সব কী ব্যাপার ? সন্ধ্যাবেলাই কল্পনাকে নিয়ে চলে যেতে চেয়েছিল, নেহাত সুনীলের খাতিরে রাতটা এখানে থাকতে রাজি হয়েছে। শ্রান্ত হয়েছিল বলে নয় অসময়ে অস্থানে শুয়ে সে ঘুমিয়েই পড়েছে, কল্পনা এভাবে তাকে ডাকতে বারণ করে কেন ?

কী বিষম ব্যাপার হবে ডেকে তুলে ছোটো ঘরে গিয়ে শুতে বললে ?

কল্পনা বলে, ঘুম ভাঙলে ঘুম আসে না, শরীর খারাপ হয়—রেগে যায়।

তবে কাজ নেই তাকে ডেকে। এ ঘরটাই আজ ওদের ছেড়ে দেওয়া যাক। অনিলের বিছানাটা এতটুকু, ভূপেশ ও খোকার মেঝের বিছানাতেই কল্পনা শোবে।

কল্পনা রেগে বলে, তোমাদের যত উদ্ভট কাণ্ড। খোকা ঘুমিয়ে গেছে, আবার ওকে টানাটানি কর ! যেমন আছে থাকো। ছোড়না ছোটো ঘরে শোবে, আমার একটা ব্যবস্থা করে নেব।

মা ধমক দিয়ে বলে, আবোল-তাবোল বকিস না তো তুই। দিন দিন মাথা খারাপ হচ্ছে মেয়ের। কল্পনা ভাবে যাকগে, ভিন্ন বিছানায় তো শোব, তাতে আমার অপমান নেই।

সুনীল চিঠিতেই জানিয়েছিল সে আজ সাড়ে দশটা এগারোটায় মধোই বাড়ি ফিরবে। সে দশটার আগেই ফিরে আসে।

প্রণব ঘুমিয়ে পড়েছে শুনে সেও একটু আশ্চর্য হয়ে যায়। তার সঙ্গে নানাবিষয়ে কথা বলাব সুযোগ অবহেলা করে প্রণব তাড়াতাড়ি ঘুমিয়ে পড়েছে !

শরীর খারাপ ? কিন্তু শরীর খাবাপ হলে আচমকা আজ ওর আসবার কী দরকার ছিল ? দু-একদিন পরে এলেই হত।

কল্পনার থমথমে মুখ দেখে সুনীলও অস্বস্তি বোধ করে।

বাড়ির সকলের খাওয়া হয়ে গিয়েছিল। নন্দার ব্যবস্থায় বেশি রাতে বাড়ি ফিরে খাওয়ানো হাঙ্গামা সুনীলকে করতে হয় না।

একে একে সকলে শূয়ে পড়েছে, সুনীলও শোয়ার কথা ভাবছে, বিভা এসে হাজির হয়। শুধু হাজির হয় না, গাড়ি থেকে নেমে ড্রাইভারকে হুকুম দেয়, গাড়ি ফিরিয়ে নিয়ে যাও, গাড়ি আনবাব দবকাব নেই।

ড্রাইভার বলে, আজ্ঞে, আপনি এখানে থাকবেন ?

তা দিয়ে তোমার দরকার কী ?

কল্পনা বাইরের দরজা খুলে বেরিয়েছিল, গাড়ি চলে গেলে সে বলে, ব্যাপার কী বিভাদি ?

তা দিয়ে তোমার দরকার কী ? বাড়িতে অতিথি এসেছে ধরে নাও।

প্রণবেরও ঘুম ভেঙে গিয়েছিল। তাকে অনিলের বিছানায় বসে হাই তুলতে দেখে, মেঝেতে আরেকটা বিছানা দেখে এবং কল্পনাকে ভিতরের দিকের দরজা খুলতে দেখে বিভা কয়েক মুহূর্ত চূপ করে চেয়ে থাকে।

তারপর হেসে বলে, আগেই আরেকজন অতিথি হাজির হয়েছেন !

এ বাড়িতেই বিভার সঙ্গে প্রণবের পরিচয়। সে জিজ্ঞাসা করে, আপনি এত রাতে হঠাৎ ?

বিভা হেসে বলে, রাত বেশি হয়নি, এখনও অনেকটা রাত বাকি আছে। ভয় নেই, তোমাদের অসুবিধা করব না।

আগে এ রকম পরিহাস করলে কল্পনা মন্তব্য করত, আহা !

আজ সে কিছুই বলে না। প্রণব একটু শুকনো হাসি হাসে।

বিভা বাড়ির ভিতরে যায়।

সুনীল বলে, ব্যাপার গুরুতর নিশ্চয় !

বিভা বলে, গুরুতর বইকী। কাল সকালে আমার আশীর্বাদ। তোমার উপদেশ পালন করতে এলাম। নিজে শিখিয়েছ, তাড়াতে পারবে না কিন্তু। বাবা এসে হাঙ্গামা করলে সইতে হবে।

সুনীল বলে, হঠাৎ আবার—

বলছি। প্রণব এসেছে, তোমাদের অসুবিধা হবে জানলেও আমি কিন্তু এখানেই আসতাম। আত্মীয়বন্ধু অনেকের বাড়ি যেতে পারতাম—কিন্তু বাবা গিয়ে হাজির হলেই তারা বাবার পক্ষ নিত, আমার বিরুদ্ধে যেত। তাই এখানেই এলাম।

বেশ করেছ।

অনিল আজ এ ঘরে শুয়েছিল, ঘুমিয়ে পড়েনি। তাকে বলতে হয়নি, বিভা সুনীলের সঙ্গে জবুরি কথা বলতে এসেছে বুঝে নিজেই সে ঘর ছেড়ে বেরিয়ে গিয়েছিল।

তাদের কথা বাড়ির কেউ শুনতে পায় না, কিন্তু একনজর তাকিয়েই টের পায় বিশেষ কোনো গুরুত্বপূর্ণ আলোচনাই হচ্ছে দুজনের মধ্যে।

বিভা স্নানমুখে বলে, আরেকটা খারাপ খবর আছে। তোমায় যে টাকা দেব বলেছিলাম, নেবে কিনা ভেবে আর দরকার নেই। বাবা আমার অ্যাকাউন্ট বন্ধ করে দিয়েছে। আমার চেনা একটি মেয়ের স্বামীর টিবি হয়েছে, একটা চেক দিলাম, চেকটা ব্যাংক ফেরত দিয়েছে। বাবার সেই ছাড়া চেক ভাঙানো যাবে না।

সুনীল বলে, এবার বুঝতে পারছ, তোমার টাকা নিতে কেন ইতস্তত করেছি ? টাকা যে আসলে তোমার বাবার এটা কিছুতে ভুলতে পারছিলাম না। অ্যাকাউন্ট ওর নিজের নামে, ব্যাংক-কে হুকুম দিয়েছিলেন তুমি চেক কাটলেও যেন টাকা দেয়, এখন হুকুমটা বাতিল করে দিয়েছেন।

সুনীল একটা সিগারেট ধরায়।—কিন্তু হঠাৎ তোমার আশীর্বাদ কেন ?

পরশু তোমার পক্ষ নিয়ে বাবার সঙ্গে ঝগড়া করলাম না ? তারপর থেকে বাবা কেমন বিগড়ে গেছে। কিছু ভেবে নিয়ে যেমন রেগেছে তেমন ভয় পেয়ে গেছে। আমার টাকার জোর কেড়ে নিয়ে, স্কোশ করে বিয়ে দিয়ে আমায় বেঁধে ফেলতে চাইছে।

সুনীল হেসে বলে, বাড়ি ছেড়ে তুমি তবু আমার বাড়িতেই এলে ! তোমার বাবা খেপে যাবেন।

বিভা বলে, আসব না ? আমি কচিখুকি যে বাবার ভয়ে কাঁপব ? আমার পঁচিশ বছর বয়স হয়েছে, আশ্বিনে ছাব্বিশ হবে। আমার যেখানে সুবিধা সেখানে যাব।

একটু থেমে বলে, তোমার সঙ্গে একটোট হয়ে গেছে, হাঙ্গামা করতে বাবা নাও আসতে পারে তোমার বাড়িতে !

সেই আশাতেই থাকো ! নিজের বাবাকে চেনো না তুমি ?

অঘোরের দামি গাড়িটি আস্তে চালালেও তার বাড়ি আর সুনীলদের বাড়ির মধ্যে একবার পাড়ি দিতে বিশ মিনিটের বেশি লাগে না। ড্রাইভার নিশ্চয় আজকের বিশেষ অবস্থায় আস্তে গাড়ি চালিয়ে ফিরে যাবেন, অঘোরকে নিয়ে আসবাব সময় আবও বেশি জোবেই চালাতে হয়েছে অঘোরের হুকুমে।

আধঘণ্টার মধ্যে অঘোর এসে পড়ে। তখনও সবাই জাগা।

গাড়িতে বসে সে মেয়েকে কথা বলার জন্য ডেকে পাঠায় না। অত বোকা সে নয়। ড্রাইভার মেয়ের সঙ্গে তার কথা কাটাকাটি শুনুক আর কাল চারিদিকে ছড়িয়ে যাক তার মেয়ের পাগলামির গল্প !

গম্ভীর বিষম মুখে সে বাইরের ঘরে গিয়ে বসে।

ভেতর থেকে বিভা ধীরপদে ঘরে এলে আগে অঘোর তার মুখটা ভালো করে দেখে নেয়।

তারপর দীর্ঘনিশ্বাস ফেলে বলে, এ কী পাগলামি জুড়েছ ?

বিভা বলে, কী করব ? তুমি পাগলামি জুড়লে আমাকেও করতে হয়।

অঘোর ক্ষুব্ধস্বরে বলে, আমি তোমার ভালো না করে মন্দ করব এটা তুই ভাবতে পারলি ? তুই জানিস না—

অঘোরের মুখে কথা আটকে যায় !

বিভা শান্তসুরে বলে, তুমি আমার ভালোই চাইবে মন্দ চাইবে না, তা আমি ভালো করেই জানি। আমার ভালো হবে মনেপ্রাণে বিশ্বাস কর বলেই তুমি এ রকম করছ এটুকু বুঝবার মতো বুদ্ধি

আমার আছে। না বুঝে ভালো করতে চেয়ে আমার সর্বনাশ করতে চাইছ জানলে কী আর তুমি জবরদস্তি কবতে !

টের পাওয়া যায় বিভার কান্না এসে গেছে।

কিন্তু সে কাঁদে না।

এই যদি তোমার ইচ্ছা ছিল, আট-দশ বছর আগে যাকে হোক কিনে নিয়ে চুকিয়ে দিলেই পারতে। আমিও খুশি হতাম।

অঘোর নীরবে মেয়ের মুখের দিকে চেয়ে থাকে। কান্না এসে যায় কিন্তু তার সামনে কাঁদে না, মেয়ে তো সত্যিই তার কচিখুকি নেই !

অঘোর নিশ্বাস ফেলে বলে, ভগবান ফাঁদে ফেলেছেন, কী আর করি। কেন যে তাকে নিজের হাতে মানুষ করার শখ হয়েছিল, আজ তাহলে এই মায়ার ফাঁদে পড়তে হত না। তোর জন্যে দু-তিনটে নার্স রেখে দিয়ে নিজের কাজকর্ম নিয়ে থাকতাম—

বিভা কান্না পেলে কাঁদেনি। কিন্তু এবার হাসি পাওয়ায় হঠাৎ সে হেসে ফেলে।

বলে, এটা কী বলছ বাবা ? তিন-চারটে নার্স রেখে দিতে। আমি যখন বাচ্চা ছিলাম, ক জন নার্সের মাইনে তোমার রোজগার ছিল ভুলে গেছ একেবারে ?

অঘোর বিব্রত হয়ে বলে, তখনকার কথা বলছি নাকি ? অবস্থা ফিববাব পব—

বিভা বলে, অবস্থা তো তোমার ফিরল এই সেদিনের যুদ্ধেব বাজারে। তখনই তো আমি প্রায় বুড়িয়ে গেছি ! দু-তিনজন নার্স আমার কী করত ?

বলতে বলতে হাসি উপে গিয়ে তার মুখ ম্লান হয়ে যায় !—তা বটে, তুমি ঠিক বলেছ। নার্স না হোক, এখন দু-তিনজন ঝি বাঁধুনি তো বেখেছ খোঁড়া মেয়েব সেবার জন্য। তার আগে পর্যন্ত তুমিই করত।

অঘোর বলে, সেটাই ভুল হয়েছিল।

বিভা হেসে বলে, ভুল হয়নি। তখনও তুমি কম খাটতে নাকি ? শুধু টাকাই আসত না। শুধু কাজ আর টাকার ভাবনা নিয়ে থাকলে মানুষের চলে ? দু-একজনকে একটু মায়া কবতে হবে না ? সেটাও খুব দরকার। ভগবানকে টেনে এনো না, তোমার মায়া কবা দবকাব ছিল বলেই তুমি আমাকে মায়া করেছ।

স্বার্থপরের মতো ?

না না, অন্য সব কিছুর সঙ্গে সবার যেটা চাই নিজের খোঁড়া মেয়েকে দিয়ে সেটা মেটালে স্বার্থপর হবে কেন ? বাপ ছেলেমেয়েকে ভালোবাসবে না ? তুমি যদি আমায় এতখানি না ভালোবাসতে পারতে বাবা, তুমি যে আজ কী দাঁড়াতে—

তুই আমাকে বাঁচিয়েছিস ?

অনেকটা।

অঘোর হেন লোক এতক্ষণে ধাতস্থ হয়ে বলে, হোদের কথা হেঁয়ালির মতো লাগে, তবে খানিকটা সত্যি বইকী তোর কথা। তুই একটা নেশা দাঁড়িয়েছিলি আমার। বুড়ো বয়সে আরও কাবু করেছিস। নইলে এভাবে হার মেনে ছুটে আসি ?

বিভা বলে, আমিও কী সাথে যার তার হাতে পড়ে নেশা ছুটিয়ে তোমায় মারতে চাই না ? তুমি খালি আমার কথা ভাব, টাকাপাগল জামাই আনলে তোমার দশা কী দাঁড়াবে তা তো ভাবো না। দুদিনে পাগল করে দেবে না তোমাকে ?

অঘোর ক্রিষ্টবরে বলে, ভাবিনি ? এ তো জানা কথাই। আমি ভাবছিলাম, আমায় নয় টাকার জন্য পাগল করুক, তুই যদি সুখী হোস। ভাবছিলাম, বাঁচব তো আর দশ কী পনেরো বছর বড়ো

জোর। দশ বছরের বেশি আশা করতেও সাহস হয় না। হয়তো দু-একবছরেই কাত হতে পারি। তারপর তোর কী দশা হবে ভেবে—

অঘোর যেন গা-ঝাড়া দিয়ে সিধে হয়ে বসে বলে, যাকগে। আমি মরলে যা হবার হবে, আমি তো আর দেখতে আসব না ! চলো যাই এবাব, আমার ঘুম পেয়েছে।

চলো।

অঘোর অবাক হয়ে বলে, ওদের বলে আয় ?

কিছু বলতে হবে না, তুমি চলো। বাড়ি গিয়ে আর ঝগড়া করবে না। সটান শুষে পড়ে ঘুমোবে।

তারা গিয়ে গাড়িতে উঠে বসতে বসতে, সিগারেট নিভিয়ে ড্রাইভার নিজের সিটে বসে গাড়িতে স্টার্ট দিতে দিতে সুনীরেরা কয়েকজন অবশ্য বাইরে বেরিয়ে এসে প্রমাণ দেয় যে বিভার বিদায় না নিয়েই চলে যাওয়াটা তারা অভদ্রতা মনে করেনি।

সুনীল বলে, কাল বারোটা নাগাদ আমি আসছি বিভা। তোমার সঙ্গে জরুরি কথা আছে।

অঘোর বলতে যায়, আমি তখন বাড়ি থাকব না—

সুনীল বলে, বিভার সঙ্গে কথা সেরে আমি কাগজের কয়েকটা জরুরি কাজে বেরোব। কাজগুলি সেরে চারটে সাড়ে চারটের সময় আমি আপিসে আপনার সঙ্গে দেখা করব। আপনার সঙ্গেও আমার জরুরি কথা আছে।

কল্লনার দিকে চোখ পড়ায় বিভা ড্রাইভারকে বলে, দাঁড়াও গাড়ি ছেড়ো না।

অঘোরকে বলে, তোমার ঘুম পেয়েছে কিন্তু আমি একটা জরুরি কথা ভুলে গেলাম। পাঁচ-দশ মিনিট একটু বোসো গাড়িতে।

আবার নামবি ? কী এমন জরুরি কথা ?

বাড়ি গিয়ে বলব।

মেয়ের অতি কষ্টে গাড়ি থেকে নামার প্রক্রিয়া চেয়ে দেখতে দেখতে অঘোরের মনে হয় বৃকে পিঠে করে মানুষ করা পঙ্খ কুৎসিত মেয়েটা তার যেন রহস্যময়ী হয়ে উঠেছে।

তাকে আবার নামতে দেখে বাড়ির সকলে অবাক হয়ে গিয়েছিল। কল্লনাকে ডেকে নিয়ে আড়ালে যেতে তারা আরও বেশি অবাক হয়ে যায়।

বিভা ভিতরের বারান্দায় গিয়ে রেলিংহীন ফাঁকা ছাদে উঠবার সিঁড়িতে বসে বলে, চটপট মন দিয়ে কথা শুনবি, বাবার ওদিকে ঘুম পেয়েছে। আমার কাছে হার মেনে আরও বেশি ঘুম পেয়েছে।—বুঝ্ছিস তো ? ন্যাকামি করবি না।

কল্লনা বলে, তোমার কী হল বিভাদি ?

বিভা বলে, আমার কিছু হয়নি, হয়েছে তোর। আমি কি তোর মতো বোকা ? দেখলি না খোঁড়া অচল মেয়ে বাবাকে কীভাবে বাগে আনলাম ?

কল্লনা বলে, সে তুমি খোঁড়া বলেই পারলে। আমাদের মতো হলে পারতে না।

বিভা বলে, তুই ভারী বোকা। আমি খোঁড়া বলে ? বাবার আর একটাও ছেলেমেয়ে নেই বলে। তোর মতো আরেকটা মেয়েও যদি থাকত, বাবা আমার দিকে ফিরেও তাকাত না। নিজে মানুষ করত তোকে, আমার জন্যে কিছুই করত না। ছেলেবেলাতেই অঙ্কা পেয়ে যেতাম।

কল্লনা চূপ করে থাকে।

বাড়ির সকলে বাইরের রোয়াকে চুপ কবে দাঁড়িয়ে আছে, গাড়িতে অঘোর চুপচাপ অপেক্ষা করছে, স্টার্ট দেওয়া ইঞ্জিনটাকেও ড্রাইভার চুপ করিয়ে দিয়েছে। পাড়ার অনেকগুলি বাড়ির আধ-ঘুমন্ত কিছু কিছু চোখ এ বাড়ির দিকে উঁকি দিচ্ছে।

বিভা বলে, আমি খোঁড়া, চলে ফিরে দেখে বেড়াতে পারি না ! এক জায়গায় বসে চারিদিকে চোখ পেতে রাখি। চোখ দিয়ে খুটিয়ে খুটিয়ে সব তন্নতন্ন করে দেখি শূনি।

কল্পনা চুপ করে থাকে।

বিভা বলে, তোকে দেখেই টের পেয়েছি ছেলে হোক মেয়ে হোক একটা তোর হবে। এটাও টের পেয়েছি তুই বোকার মতো তোর ছেলে বা মেয়ের যে বাপ হবে তাকে মিছিমিছি নস্যাত্ন করেছিস। তুই সত্যি বোকা। ছেলে হোক মেয়ে হোক, তোর পেটে যা জন্মাবে তার বাপ ছাড়া তাকে কেউ বেশি ভালোবাসতে পারবে না, এই সোজা কথাটা তুই বুঝিস না।

কল্পনা এবার ঝেঁঝে ওঠে, বাপ বলেই তো নয়, ছেলেমেয়ের মানুষের ভালোবাসা চাই তো। বাপ হোক যে হোক অমানুষের ভালোবাসা ছেলেমেয়েদের নষ্ট করে দেয়।

অমানুষ ? তোর হৃদয় নেই বলে, ভালোবাসা বুঝিসনে বলে তোকে যে চিরদিনের জন্য ছেড়ে দেবে ভাবছিল, শূধু ছেলে বা মেয়ের মা হবি বলে সে যেচে যেচে তোর কাছে এসে অপমান হচ্ছে। অমানুষ এটা পারে ?

কল্পনা নিশ্বাস ফেলে বলে, তুমি কাব্যি করছ বিভাদি। ও জানে না।

জানে না ? না জেনে শূধু তোমার রূপযৌবনের খাতিরে এ রকম অপমান হতে এসেছে ? কী বোকা তুই, রূপযৌবন বাজারেও তো কিনতে পাওয়া যায় রে ! সাদা চোখে খানিকটা কম মনে হলেও মদের চোখে তুলনা মেলে না। তুই এত অপমান করেছিস যে ও বেচারার চোখে তোকে কুৎসিত লাগে। শূধু ও বেচারার কাছেই কি তোর নারীত্বের মর্যাদা দাবি ? আর কারও কাছে দাবি করতে ভরসা পাস না ? সাহস পাস না ? ও বেচারার শূধু একা তোর জন্য না খেটে তোব মতো আরও অনেকের জন্য খাটছে বলে, ন্যাকা ন্যাকা ভালোবাসা জানে না বলে, ওকে তুই বাতিল করবি ! তোর মতো বোকা মেয়ে আমি খুব দেখছি ভাই।

কল্পনা ঠোট কামড়ে চুপ করে থাকে।

বিভা বলে, ঢের বোকামি করেছ, আর নয়। আমি মিটিয়ে দিয়ে যাচ্ছি—বলে বিভা ডাকে, আলপনা ?

আলপনা বলে, এ ঘরের চৌকি থেকে অনিলের বিছানাটা সরিয়ে নিয়ে যা তো।

প্রণবের দিকে চেয়ে হাসিমুখে সে বলে, বোকা মেয়েকে চালাক করে দিয়ে গেলাম, তুমি যেন আবার বোকার মতো কোরো না।

পরদিন যেতেই বিভা অনুযোগ দেয়, অমনভাবে না বলে কয়ে এলেই হত। তুমি কি জানো না খোঁড়া মেয়ে বাড়িতেই থাকে ? সারারাত ঘুমোতে পারিনি। বাবাও ছটফট করেছে—তোমার কী মতলব বুঝতে না পেরে।

সুনীল বলে, বড়ো ব্যাপারে একরাত না ঘুমোলে ছটফট করলে কী আসে যায় ? খিদেয় রোগে কত লোক কত রাত ঘুমোতে না পেরে ছটফট করেছে।

বিভা বলে, বুঝছি। নানাভাবনার মধ্যে মাঝে মাঝে আমি যা ভাবছিলাম সেটা সত্যি নয়। তুমি এলোমেলো কথা বলে টাকা জোগাড়ের ব্যবস্থার জন্য আসনি।

টাকার জন্যই এসেছি।

তা জানি। সেই জন্যই তো আমাদের এত ভাবনা যে ব্যাপারটা কী ? এলোমেলো ধান্নাবাজি উপায় তোমার ধাতে আসে না। টাকাও তোমার নিজের জন্য চাও না। তাই তো বাপবোঁটা আমরা

দুজনে সারারাত ঘুমিয়েছি আর ছটফট করেছি আর ভেবেছি। তুমি আমাদের ক্ষতি করবে না জানি, কিন্তু কী করতে চাইছ তা তো জানিনে।

সুনীল বলে, রাত্রে না ঘুমিয়েও মুখ তো বেশ তাজা দেখাচ্ছে !

বিভা বলে, আমার মুখে এত লোম, প্রথম বয়সে পুরুষ ছেলের যেমন গৌঁফদাড়ি গজায়। তবু তুমি বুঝতে পার আমার মনের ভাব ?

সুনীল বলে, তা খানিকটা বুঝতে পারি বইকী। অনেকদিন থেকে দেখে আসছি তো, খোঁড়া পা, মুখের লোম, বাপের টাকার অভিশাপ নিয়েও তুমি মানুষের মতো বাঁচার জন্য লড়াই করছ। যারা এ রকম লড়াই করে তাদের বিশেষ এক ধরনের সরলতা থাকে, মনে কোনো ভাব জোরালো হলে মুখে তার ছাপ পড়ে। রাত্রে না ঘুমোলে কী হবে মনে খুব উৎসাহ বোধ করছ, মুখখানা তাই তাজা দেখাচ্ছে।

বিভা হেসে বলে, তা ঠিক। শূদ্র দৃষ্টিস্তায় তো নয়, বেশি আনন্দেও মানুষের ঘুম আসে না। আমার এত উৎসাহ কেন, আনন্দ কেন জানো ?

জানি।

সত্যি জানো ?

জানি বইকী। তোমার সবচেয়ে বড়ো দুর্ভাবনা শেষ হয়েছে। অঘোরবাবু আর তোমার বিয়ের চেষ্টাও করবেন না, আমার পিছনেও লাগবেন না। মনে মনে তুমি খালি নিশ্বাস ফেলছ আর ভাবছ, বাব্বা, বেঁচেছি !

বিভা যেন হাসবে না কাঁদবে ভেবে পায় না। খানিকক্ষণ অবাক হয়ে তার মুখের দিকে চেয়ে থেকে সে বলে, বাবার চেয়ে তোমার অনেক বেশি বুদ্ধি—গভীর বলো, চোখা বলো, সবদিক দিয়ে। কিন্তু বাবা আর তোমার শত্রুতা করবে না এটা কী করে বুঝলে ?

সুনীল বলে, ওঁর সঙ্গে ঠোঁকর লাগলেই তুমি আমার কাছে ছুটে যাও, পরামর্শ চাও। সেদিন আমার পক্ষ নিয়ে ঝগড়া করলে, বিয়ের ব্যবস্থা পাকা করতেই বাড়ি ছেড়ে আমার ওখানে গিয়ে উঠলে। অঘোরবাবুর কী আর বুঝতে বাকি আছে যে আমায় ঘা দিলে সেটা তোমার গায়ে লাগবে ?

বিভা খুশির হাসি হাসে।

বলে, বাবার চেয়ে তোমার বুদ্ধিই বেশি নয়, তুমি ঢের বেশি চালাক। বাবা সোজাসুজি তোমাকে বাগে আনতে চেয়েছিল, তুমি আমাকে দিয়ে বাবাকে কাবু করেছ। আমার টাকা ধার নেবে তো ?

সুনীল অন্যমনস্ক হয়ে গিয়েছিল, জবাব দেয় না।

কী ভাবছ ?

সুনীল বলে, ভাবছি খুব গুরুতর কথা। টাকার জন্য আমি যদি তোমায় বিয়ে করতে চাই, তুমি রাজি হবে ?

বিভা হাঁ করে তাকিয়ে থাকে।

সুনীল বলে, তামাশা করছি না। ক-দিন ধরে কথাটা ভাবছিলাম। সোজাসুজি বলি, প্রেম আমার কাছে তুমি পাবে না, ওটা আমার ধাতেরই আসে না। তবে অন্য জীবীরা যেমন আদরযত্ন পায় স্নেহ-মমতা পায় সে সব তেমনি পাবে।

তুমি টাকার জন্য বিয়ে করবে ?

দোষ কী ? অন্যো তোমায় বিয়ে করলে টাকা পেত, আমিও পাব। তুমি এমনই টাকা দিতে চাইছিলে, কিন্তু এমনি তো টাকা নিতে পারি না। বিয়ে হলে তোমার টাকায় আমার অধিকার জন্মাবে।

ক্ষণে ক্ষণে কতরকম ভাব যে খেলে যায় বিভার মুখে। একবার বোধ হয় লজ্জাতেই লাল হয়ে যায় সমস্ত মুখখানা। যা ছিল তার কল্পনাভীত অভাবনীয় ব্যাপার তাই আজ এমন আচমকা বাস্তব সত্যের বাস্তব সম্ভাবনার বুপ নিয়ে সামনে হাজির হয়ে বিচলিত অভিভূত কবে দিয়েছে তাকে।

হঠাৎ সে বলে, কিন্তু খোঁড়া বউ বলে তোমার খারাপ লাগবে না ?

সুনীল বলে, না। অন্য মেয়ে হলে হয়তো লাগত, তুমি বলে লাগবে না। তোমায় খোঁড়া দেখে দেখেই আমার অভ্যাস হয়ে গেছে। আমি সমস্ত দিক তলিয়ে ভেবে দেখেছি। খারাপ লাগার সম্ভাবনা থাকলে আমি তোমায় বিয়ের কথা বলতাম না। কারণ তোমায় আমার খারাপ লাগা মানেই দাঁড়াবে তোমাকে অসুখী করা। আমার দিক থেকে ও সব কোনো খুঁতখুঁতানি নেই। খোঁড়া মেয়ে হয়েও টাকার দামে নিজেকে বিক্রি করনি—তোমার বাবা টাকা দিয়ে রাজপুত্র কিনে আনলেও আসলে কিন্তু তোমার নিজেকেই বিক্রি করা হত। তুমি এ ভাবে ধবনি, সোজাসুজি হিসেব করেছে—টাকার জন্য যে তোমায় চাইবে সে অমানুষ। নিজেকে বিক্রি করনি বলেই কিন্তু আমি তোমাকে শ্রদ্ধা কবি।

শ্রদ্ধা !

তুমি দেখছি আকাশ থেকে পড়লে। শ্রদ্ধা বুঝি শুধু পুরুষের পাওনা ?

সুনীল হঠাৎ সুব পালটে বলে, যাকগে, বেশি বলে তোমার মাথা গুলিয়ে দেব না। এখন তুমি নিজের মন বুঝে দ্যাখো। তোমাকে আমার খারাপ লাগবে না এটা সত্যি কথা, তোমার জন্য স্নেহও আছে কিন্তু বিয়ে আমি তোমাকে করছি টাকার জন্য। এটা অস্বীকার কবব না। টাকার দবকার না পড়লে কথাটা হয়তো আমার মনেও আসত না।

বিভা মুখ নিচু করে।

একটা বড়ো কাজে টাকার দবকার পড়ায় কবছ, নিজের জন্য টাকার লোভে তো নয়।

তুমি তা হলে রাজি ?

বিভা মুখ তোলে না।

রাজি না হয়ে পারি ? তুমি জানো না, তোমার জনোই তো কারও বেলা মন উঠছিল না।

সুনীল তার মাথায় একটা হাত রাখে।

সত্যি ? আমি তো টের পাইনি। আমায় খুব শ্রদ্ধাভক্তি কব এটুকু জানতাম।

শ্রদ্ধাভক্তির নীচে মেয়েরা ও সব চাপা রাখতে পারে। কোন মুখে তোমাকে জানতে দিতাম ? আজ তুমি নিজের দরকারে এসে বলেছ, তবু আমার মনটা খুঁতখুঁত করছে, তোমার উপযুক্ত বউ পাবে না, একটা বাজে মেয়ে জুটবে।

এ খুঁতখুঁতানি মন থেকে মুছে ফেলো। খুব সুন্দরী হবে, নাচবে বেড়াবে সেবা করবে—এ রকম বউয়ের লোভ থাকলে টাকার লোভে তোমায় বিয়ে করতাম না। ও সব আলগা হিসাব আমার আসে না। তোমার দিকের হিসাবটাই এখন সবচেয়ে গুরুতর দাঁড়াচ্ছে কিন্তু। যাদের তুমি অমানুষ বলে বাতিল করেছে তাদের মতোই আমি কিন্তু টাকার জন্য এগিয়ে এসেছি,—আমায় শ্রদ্ধা করতে পারবে তো ?

পারব না ? নিজের জন্য তো টাকা চাইছ না। আমার শ্রদ্ধা বরং বেড়ে গেছে।

দুজনে নানাকথা বলে। অঘোরের সম্মতির প্রশ্ন নিয়ে আগে মাথা ঘামাবার কোনো দরকার হত না কিন্তু সুনীলের উপর তার বর্তমান বিরাগের জন্য কথাটা নিয়ে একটু আলোচনা দরকার হয়।

বিভা জানায় যে ওই বিরাগের জন্য কিছু আসবে যাবে না।

খোঁড়া মেয়ের বিয়ে দেবার জন্য অঘোর পাগল। সুনীল তাকে বিয়ে করবে শুনলে সব বিরাগ জল হয়ে যাবে। শত্রুতা না করলেও কাগজটা বাগাবার মতলব সে ছাড়েনি, সেটাও ছেড়ে দেবে।

সুনীল নিজেই যাতে কাগজটা দাঁড় করাতে পারে সে জন্য নানাভাবে বরং সাহায্যই করবে।
বিভা হাসে।—তুমি সত্যি ভায়ী চালাক। এক ঢিলে কটা পাখি মারছ ভাব দিকি ?

সুনীলও হাসে, উপায় কী ? ঢিল যে আমার মোটে একটা !

বিভা একটু ভেবে বলে, একটা কথা জিজ্ঞাসা করি। মায়ার সঙ্গে তোমার নাকি ভাব আছে
শুনেছিলাম ?

মনে বুঝি খটকা লাগল ? ভাব আছেই তো।

তবে ?

সুনীল হেসে পালটা প্রশ্ন করে, একজনের সঙ্গে ভাব থাকলেই বুঝি ভালোবাসা থাকতে
হবে ?

লোকে তাই ধরে নেয়।

লোকে অমন কত কিছু ধরে নেয়। তোমায় তো বলেছি কোনো মেয়ের জন্যই আমার
ভালোবাসা আসে না। ওটা আমার ধাতে নেই।

তাই বল। আমার সত্যি মনে হচ্ছিল তুমি বুঝি কাগজটার ভবিষ্যতের জন্য দুদিক দিয়ে মস্ত
মস্ত দুটো ত্যাগ স্বীকার করতে চলেছ।

ও রকম ত্যাগে আমি বিশ্বাস করি না।

সুনীলের চলে যাবার সময় আজ বিভা তাকে প্রণাম করে বলে, এত বড়ো হৃদয় তুমি কোথায়
পেলে ?

সুনীল হাসিমুখে বলে, আজ বুঝি ভক্তি বেড়ে গেছে ?

বিভা খুশির সঙ্গে বলে, সত্যি বেড়ে গেছে। সবাই বলে তোমার নাকি হৃদয় নেই, তুমি
বসকবহীন নিষ্ঠুর মানুষ। সব মিছে কথা ! তোমার হৃদয়টা মস্ত কিনা তাই লোকে ভুল করে, চিনতে
পারে না।

সুনীল তাকে আদর করে বলে, কী জানো, আমার হৃদয় ভাবলে হৃদয়টা ছোটো হয়ে যায়,
হালকা হয়ে যায়। দশজনের হৃদয়ের সঙ্গে কারবাব করার জন্য হৃদয়—এ রকম ভাবলেই হৃদয়টা
ছোটো না বড়ো সে চিন্তা চুকে যায়, অনেক মিথ্যা যন্ত্রণা থেকে হৃদয় বেচারা রেহাই পায় !

খবর শুনে বিস্ময়ে হতবাক হয়ে যায় আত্মীয়বন্ধু।

অঘোরের খোঁড়া মেয়েটাকে শেষ পর্যন্ত বিয়ে করবে সুনীল !

টাকার লোভের কাছে শেষ পর্যন্ত সুনীলের মতো শক্ত আদর্শবাদী মানুষকেও মাথা নত করতে
হয় !

এ যেন বিশ্বাস হতে চায় না।

খবর শুনে প্রথমে ফ্যাকাশে হয়ে যায় মায়ার মুখ, তারপর সে মুখে ঘটে অসহ্য ক্রোধের কালো
মেঘের সঞ্চার।

অপমানে লজ্জায় ঘৃণায় তার যেন মরে যেতে ইচ্ছা হয়। নিজেকে সে বারংবার ধিক্কার দেয় !
তাকে নরম পেয়েছে ভালোমানুষ পেয়েছে বলেই না তার সঙ্গে এ রকম ব্যবহার করার সাহস হয়
সুনীলের।

এতখানি তুচ্ছ সে সুনীলের কাছে ?

সব ব্যাপারে তবে তার পরামর্শ দরকার হয় কেন ?

সুনীলের সঙ্গে তার তখন সামান্যামনি দেখা হলে বিস্ত্রী একটা কাণ্ড হয়ে যেত সন্দেহ নেই।

মায়া তাই ঘটনাচক্রকে ধন্যবাদ দেয় যে রাত জেগে কাজ করতে হওয়ায় বাড়ি ফিরে
সকালবেলা সুনীল ঘুমিয়ে পড়েছিল।

সুনীলের ঘুম ভাঙতে ভাঙতে মন শান্ত হয়ে যায় মায়ার।

না, এতে তার কোনো অপমান নেই।

তাকে কোনো কথাই তো দেয়নি সুনীল। কথা দেওয়ার মতো কোনো কথাই তো তার সঙ্গে হয়নি সুনীলের। তার নারীত্বের বদলে তার বঙ্কুত্বকে বড়ো করে সমানভাবে তার সঙ্গে বাস্তব সুখসুবিধার দিকটা খোলাখুলি আলোচনা করেছিল—ওভাবে কথা বলে কথাটা বাতিল করে দিলে তার কোনো অপমান হয় না, এটা সুনীল জানে।

নিজের মনটা তার নরম হয়ে গিয়েছে বলে, সেদিনের পর থেকে একটা প্রত্যাশা নিয়ে স্বপ্ন ও কল্পনার জাল বুনতে শুরু করেছিল বলে সুনীলের স্বাভাবিক ও সঙ্গত ব্যবহারে এতখানি আঘাত লেগেছে, নিজেকে অপমানিতা মনে হয়েছে।

সুনীল কী করে জানবে যে সম্প্রতি তার মধ্যে এই দুর্বলতা এসেছে ?

সে নিজেই সেদিন সুনীলের প্রস্তাবকে আমল দেয়নি। কিছুদিন ভেবে দেখার কথা বলেছিল।

সুনীল যদি ধরে নিয়ে থাকে যে, কথাটা তারপর আপনা থেকেই বাতিল হয়ে গেছে, তাকে তো দোষ দেওয়া যায় না।

তা ছাড়া এটা তার শখের বিয়ে নয়।

কাগজটার জন্য টাকা দরকার বলে জীবনে সে একটা ঝগড়াট বাড়াচ্ছে।

মায়া এ সব কথা তলিয়ে ভাববাব সুযোগ পায় বলে অতি অল্পের জন্য তাদেব ঝগড়াটা বেঁচে যায়। বেলা হলে মায়া সহজভাবে শান্ত মনে নিজেই সুনীলের সঙ্গে কথা বলতে যেতে পারে।

আলপনা বলে, খবর শুনেছ মায়াদি ?

শুনলাম তো।

দাদার শেষে এই মতি হল ?

কেন, দোষ কী ? বড়োলোকের মেয়ে, অনেক টাকা পাবে।

আলপনা গম্ভীর হয়ে বলে, তা ঠিক বলেছ। দাদাকে দিয়েই এ রকম কাণ্ড সম্ভব। হৃদয় বলে তো কিছুই নেই, শুধু দরকারের হিসাব। টাকার দরকার হয়েছে, একজনকে বিয়ে করলে টাকা পাওয়া যাবে, করো তাকে বিয়ে। বউ কেমন হবে না হবে তাতে কী এসে যায় ?

মায়া বলে, সব সময় সব মানুষকে এ রকম সোজাসুজি বিচার কোরো না বোন। তুমি কী করে জানলে মেয়েটার কথাও তোমার দাদা ভাবেনি ?

আলপনা ভড়কে যায়।

তার মানে ?

দাদার মনের মধ্যে ঢুকেছ কী ? বড়োলোকের খোঁড়া মেয়েকে টাকার লোভে বিয়ে করবে শুধু বাজেমার্কী মানুষ—হয় বাজে লোকের হাতে সারা জীবন কষ্ট পাবে, নয় জীবনে কোনো সাধ-আত্মদ মিটেবে না। এটা হিসেব ধরেও হয়তো তোমার দাদা বিভাকে বিয়ে করতে চেয়েছে। কেবল টাকার জন্যেই নয়।

আলপনা মায়ার মুখের দিকে চেয়ে থাকে।

মায়া বলে, নিজের শখের কথা তোর দাদা কত কম ভাবে জানিস না তুই ? তোরাই বলিস মানুষটার হৃদয় নেই !

সুনীল স্নান করতে যাবার জন্য প্রস্তুত হচ্ছিল।

মায়া যতদূর সম্ভব মুখ গম্ভীর করে বলে, এ সব কী শুনছি ? তুমি নাকি বিভাকে বিয়ে করবে ? তা হবে না। তুমি আগে আমায় কথা দিয়েছ, আমি ছাড়ব না।

সুনীল বলে, তুমিই তো রাজি হলে না তখন। ভাগ্যে রাজি হওনি মায়া ! আমার এতগুলি টাকা পাবার সুযোগ ফসকে যেত।

মায়া ভাবে, ঠিক যা সে ভেবেছে ! সেদিন সে রাজি হয়নি বলে কথাটা একেবারে বাতিল ধরে নিয়েছে সুনীল। নইলে একটি মেয়ের সঙ্গে বিয়ের কথা বলে নিলে জগৎ-সংসার উলটে গেলেও কি এ মানুষটার কথার নড়চড় হত !

মুখে সে বলে, কে বললে রাজি হইনি ? আমি তো রাজিই হয়ে গেলাম। তোমার মত বদলানো দরকার হতে পারে মনে করে কয়েকদিন কথাটা তোমায় ভেবে দেখবার সুযোগ দিয়েছিলাম।

সুনীল হেসে বলে, সেই এককথাই দাঁড়াল। আমি ভেবেচিন্তে মত বদলেছি—তুমি যে সুযোগ দিয়েছিলে সেটা কাজে লাগিয়েছি। কাজেই আমার কোনো দোষ নেই।

মায়া এবার হাসে।

তোমার সঙ্গে কথায় কে পারবে বলো ? আমি কিন্তু সত্যি রাগ করতে পারি। আমায় একবার জানানোও দরকার মনে করলে না ? অন্য সব বিষয়ে তো আমার সঙ্গে পরামর্শ কর ! কাগজের জন্য টাকার দরকারের কথাটা আমায় জানাতে পারলে, টাকা জোগাড়ের এ রকম উপায়ের কথাটা একেবারে চেপে গেলে।

সুনীল তীক্ষ্ণদৃষ্টিতে তার মুখের ভাব লক্ষ করে। কয়েক মুহূর্তের জন্য তাকে সত্যিই বিব্রত মনে হয়।

তারপব সহজভাবেই সে বলে, তোমার সঙ্গে পরামর্শ করার কথা ভেবেছিলাম মায়া। কিন্তু ভেবেচিন্তে দেখলাম এ ব্যাপারে তোমার পরামর্শ না নেওয়াই ভালো। পরামর্শ তুমি দিতে পারবে না, আমার মাথা গুলিয়ে দেবে। এ এমন একটা ব্যাপার যে আমার একার বিচার-বিবেচনা করে সিদ্ধান্ত নেওয়া ছাড়া উপায় ছিল না।

মায়া চুপচাপ তার কথাটা বুঝবার চেষ্টা করে।

সুনীল আবার বলে, তুমি আমার ভালোই চাইতে তাতে আমার সন্দেহ নেই। তোমার ঈর্ষা হবে, তুমি চোখ-কান বুজে আমাকে ঠেকাবার চেষ্টা করবে, এ ভয় আমি করিনি। আমার মঙ্গল চেয়েই তুমি আমায় ভুল পরামর্শ দিতে। কাবণ হাজার মঙ্গল চেয়ে হাজার চেষ্টা করবেও ঠিক আমার অবস্থায় নিজেকে ভাবা তোমার পক্ষে সম্ভব নয়। তাছাড়াও একটা বড়ো প্রশ্ন, আরেকজনের সারা জীবনের সুখদুঃখের দায়িত্ব আমাকে নিতে হবে। এ প্রশ্নটা ঠিকভাবে বিবেচনা করাও অসম্ভব তোমার পক্ষে।

মায়া অনেকক্ষণ চুপ করে থাকে।

তুমি সুখী হতে পারবে তো ?

সুনীল তার ব্যাকুল প্রশ্নের জবাবে হেসে বলে, ঠিক এই কথাটাই বললাম এতক্ষণ। একটি মেয়ের সারাজীবনের সুখদুঃখের দায়িত্ব আমাকে নিতে হবে—আমার সুখদুঃখের প্রশ্নটাও যে তার সঙ্গে জড়িয়ে আছে তুমি সেটা ধরতে পারবে না। এই কথাটাই আমাকে বিশেষভাবে বিবেচনা করতে হয়েছে। এ তো শুধু একটা নীতি বা আদর্শের কথা নয়। তোমার মনে কেবল প্রশ্ন জাগছে—আমি সুখী হব তো ? আমাকেও ঠিক এই কথাটা বিবেচনা করতে হয়েছে। কারণ আমি যদি সুখী না হতে পারি, আমার যদি মনে হয় জীবনটা এদিক দিয়ে আমার ব্যর্থ হয়ে গেল—বিভাকে সুখী করার সাধ্য আমার হবে না। যতই সংকল্প করি আর প্রতিজ্ঞা করি যে ওকে সুখী করবই—আমি নিজে অসুখী হলে শেষ পর্যন্ত বেচারাকে চোখের জলে ভাসতে হবেই। আমি নিজে সুখী না হলে আরেকজনকে সুখী করার দায়িত্ব পালন করার ক্ষমতাও আমার থাকবে না।

মায়া বলে, এবার বুঝেছি। সাথে কী এত বড়ো হৃদয় থাকতেও লোকে তোমায় হৃদয়হীন ভাবে ? সুখদুঃখের হিসাবনিকাশটা পর্যন্ত তুমি অঙ্ক কষার হিসাবে দাঁড় করিয়েছ।

অঙ্কশাস্ত্র বিজ্ঞান। বিজ্ঞান ভুল কবে না।

বেশ তো। আমি বোকাহাবা মেয়েমানুষ, আমার একটা কথার সোজাসুজি জবাব দাও। হিসেব কষে দেখলে তুমি সুখী হবে ?

বিভাকে নিয়ে সুখী হব কি না জানি না। দেখলাম, ওটা হিসাব করে বার করা যায় না—অন্তত আমার সে ক্ষমতা নেই। কারণ ওই রকম সুখী হওয়াটা ঠিক কী ব্যাপার আমার কোনো ধারণাই নেই। তবে এটা জেনেছি যে অসুখী হব না। তা ছাড়া অন্যদিকে সতাই সুখ পাব—কাগজটা দাঁড় করাবার জন্য লড়াই করার সুখ। আবেকটা বিষয়ে আমি নিশ্চিত আছি—বিভাকে অসুখী করব না। নইলে ও বেচারাকে সুখী করার দায়িত্ব নিতে পারতাম ?

মায়া একগাল হেসে বলে, তার মানেই তুমি ববাবর ওই মেয়েটাকে ভালোবেসে এসেছ।

সুনীলও হাসে।

মুশকিল হল কী জানো ? ভালোবাসা কাকে বলে আমি জানি না। আমার এই মনোভাবটা, এই বিচারবিবেচনা হিসাবনিকাশটা তোমার মতে যদি ভালোবাসা হয়, আমার কিছুই বলার থাকবে না। কিন্তু একটা কথা ভুলে যেয়ো না। কাগজের জন্য টাকার দরকার না হলে ওকে বিয়ে করার কথা আমার মনেও আসত না। ভালোবাসা কি এ রকম বাস্তব প্রয়োজন দাঁড়াবার পর জন্মায় ?

মায়া বলে, যাক গে, ভালোবাসা থাক বা না থাক যাকে খুশি তোমাব বিয়ে করো আমার বয়ে গেল। আমার একটা চিকিৎসার ব্যবস্থা করে দাও, তাহলে আমি খুশি হব।

তোমার কীসের চিকিৎসা ?

আমি তো মেয়েমানুষ ? আমার কেন বউ হতে, মা হতে, সাধ যায় না ? তুমি বউ কবতে চাইলে, মা হবার সুযোগ দিতে চাইলে, তবু আমি রাজি হতে পারলাম না !

সুনীল বলে, এই ব্যাপার ! স্পেশালিস্ট দেখিয়ে মতামত নিতে হবে না, আমিই বলে দিচ্ছি তোমার কী হয়েছে। মা হয়েছে বইকী। বাবা বিছানায় পড়ে আছে, মা আর ভাইবোনেবা নিবুপায়—ওদের মা হতে হয়েছে তোমাকে। এ দেশে অন্যরকম মা হতে গেলে আর ওদের মা থাকা যাবে না, কাজেই তোমাকে বউ হয়ে ছেলেমেয়ে বিইয়ে মা হবার আশা ছাড়তে হয়েছে।

শুধু দায়িত্বপালন ?

দায়িত্বপালন। এ সব অস্বাভাবিক দায়িত্ব, কিন্তু সমাজ আর রাষ্ট্র দুই-ই অস্বাভাবিক, কাজেই এ দায়িত্ব না নিয়ে উপায় নেই। তুমি হিসাবনিকাশ করে দ্যাখোনি কিন্তু টের পেয়ে গেছ যে একজন পুরুষের বউ আর ছেলেমেয়ের মা হতে গেলে এদের ভাসিয়ে দিতেই হবে। তোমার তাই বউ হতে, মা হতে, এত বিতৃষ্ণা। অনেকে ভাবে দায়িত্ব মানেই নীরস কঠোর কর্তব্য করা, নিজেকে বঞ্চিত করা। তুমি হাতেনাতে দায়িত্ব পালন করে দেখেছ, এতেও কম রস নেই, এভাবেও জীবনে কম রং আসে না।

মায়া খুশি হয়ে জিজ্ঞাসা করে, এটা তাহলে আমার রোগ নয় ?

সুনীল বলে, রোগ বইকী। তবে রোগটার জন্য তুমি দায়ি নও। যারা দায়ি আমার কাগজটায় তাদের মুখোশ খুলে দিচ্ছি।

মায়া বলে, এবার বুঝেছি। তুমি আমার কাছে একটা লেখা চেয়েছিলে না ? স্কুলটার বিষয়ে ? কীভাবে স্কুল চালাই, কী ধরনের ছেলেমেয়ে স্কুলে পড়ে, পাস করে চাকরি-বাকরি কীরকম পায় ? কালকেই লেখাটা দিয়ে আসব।

মায়া চলে যাবার পর নবীন আসে।

সুনীল তখন ন্নান করে খেতে বসেছে।

নবীন চটের আসনটা টেনে বিছিয়ে জাঁকিয়ে বসে জিজ্ঞাসা করে, কথাটা কি সত্যি সুনীলদা ? আপনি বিভাদিকে বিয়ে করছেন ?

সত্যি বইকী। তুমি যথাসময়ে দুপক্ষের নেমস্তম্ভ পাবে।

নবীন বলে, সে তো পাবই। অঘোরবাবুর কাছে খবরটা যাচাই করতে গিয়েছিলাম, বিভাদি অঘোরবাবুকে দুধ-খই খাওয়াচ্ছিল। আমাকে সন্দেশ দিল। অঘোরবাবুর নাকি সন্দেশ নয় না, মিষ্টি জিনিস খাওয়া বারণ। বিভাদির সামনে অঘোরবাবু আমার পঁচিশ টাকা মাইনে বাড়িয়ে দিলেন।

ভালোই তো।

আমি রিজাইন দেব ভাবছি।

ভেবেচিন্তে যদি রিজাইন দেওয়া ভালো মনে কর, রিজাইন দেবে।

আলপনা চা এনে দেয় কিন্তু নবীনের সঙ্গে কথা বলা চলে না।

নবীন গরম চায়ে চুমুক দিয়ে জিভ পুড়িয়ে খানিকক্ষণ মুখ বাঁকিয়ে থেকে বলে, আপনি বিভাদিকে বিয়ে করছেন বলেই আমার মাইনে বাড়ল। অঘোরবাবু নিশ্চয় ধরে নিয়েছেন আমি ঘটকালি করে বিয়েটা ঘটিয়েছি। অঘোরবাবু জানেন যে বিভাদি দরকার হলেই আমাকে আপনার কাছে পাঠাত—গাড়ির ড্রাইভার থেকে শুরু করে অঘোরবাবুর অনেকগুলি স্পাই আছে।

সুনীল চিচিঙ্গার হেঁচকি দিয়ে শক্ত মোটা ভাত মাখতে মাখতে বলে, ভালোই তো হয়েছে।

নবীন বলে, আপনি তো বলবেন ভালোই হয়েছে। আমার মন যে উলটো কথা বলছে ? আপনি অঘোরবাবুর মেয়েকে বিয়ে করবেন, আমার পঁচিশ টাকা মাইনে বাড়ল—আপনার বোন আগেই বর্শেছিল কাজে রিজাইন দিয়ে আপনার কাগজে যোগ দেওয়া উচিত ছিল। আমি তা করিনি বলে আপনার বোন আমাব সঙ্গে কথা বন্ধ করেছে।

সুনীল বলে, এটা আবার কী রকম কথা শুনছি ? আলপনা যে আমায় বললে তুমি প্রতিজ্ঞা ভাঙানোর জন্য কথা বন্ধ করেছে ?

নবীন জোর দিয়ে বলে, না, ওটা মিছে কথা। আমি নই, আপনার বোন কথা বন্ধ করেছে। কথা বন্ধ করার পর আমি ভেবেচিন্তে দেখলাম যে সত্যি তো, আপনার সঙ্গে আমার কথা বন্ধ থাকলে ও আমাব সঙ্গে ভাব বাখে কী করে ? তাছাড়া আমিই ছেলেমানুষের মতো ব্যবহার করেছিলাম আপনার সঙ্গে।

সেটা বুঝতে পেরেছ ?

পেরেছি বইকী ! নইলে আমি মরে গেলেও আপনার সঙ্গে যেচে এসে ভাব করতাম ভেবেছেন ? আমি প্রতিজ্ঞা ভাঙলাম কিন্তু আপনার বোনের রাগ ভাঙল না।

কী কবে জানলে রাগ ভাঙেনি, তোমার সঙ্গে কথা বলবে না ? ডেকে যাহোক কোনো কথা জিজ্ঞাসা করেই দ্যাখো না !

নবীন বলে, আমি কেন যেচে কথা বলতে যাব ? যে আগে কথা বন্ধ করেছে সেই আগে কথা বলবে। আমার যা করার ছিল আমি করেছি, এখনও রেগে থাকবে কেন ?

সুনীল হেসে বলে, বেশ কবেছে। তোমাদের মতো খোশামুদে মতলববাজ ছেলেদের সঙ্গে মেয়েদের কথা বন্ধ করাই উচিত।

নবীন বলে, বটেই তো। বোনের দিকে টানবেন বইকী।

ভাই বোনের দিকে টানবে এটা তোমার কাছে বুঝি খুব খাপছাড়া ব্যাপার ?

এ ছেলেমানুষি রাগ-অভিমান ওদের মিটে যাবে, সে জন্য সুনীল ভাবে না। কিন্তু ছেলেমানুষ নবীন, সুনীলকে বড়োই দমিয়ে দিয়ে যায়। তার মনে হয় যে তার সমস্ত হিসাবনিকাশের মধ্যে কোথাও যেন মস্ত একটা ছেলেমানুষি গলদ রয়ে গেছে। তাকে আর নন্দার কাগজটাকে বেদখল করার জন্য

চারিদিকে যে ষড়যন্ত্র মাথা চাড়া দিয়ে উঠেছে তার ফাঁদে সে ধরা দিয়েছে নিজে। তাকে সোজাসুজি বশ করা যায় না, সাধারণ স্বার্থ আর সুবিধার হিসাবটা তার খাপছাড়া, তাই তার নিজের পছন্দমতো পথে চলার ব্যবস্থা করে দিয়ে তাকে বাগাবার কৌশল করা হয়েছে।

বিভা না জানুক তাকে জয় করার খেলায় বিভা অঘোরদের হাতের একটি খুঁটিমাত্র।

কাগজটা বাঁচাবার জন্যও অঘোরের কাছে সে টাকা নেবে না জানা কথা, তাই এমনভাবে ব্যবস্থা করা হয়েছে যে সে যেন স্বেচ্ছায় খুশি মনে অঘোরের মেয়েকে বিয়ে করে অঘোরের টাকা নিতে এগিয়ে যায়, নিজে বিচার-বিবেচনা করে সমস্যা সমাধানের উপায় আবিষ্কার করার আশ্বপ্রসাদ নিয়ে সে যেন ধরা দেয় অঘোরেরই ফাঁদে।

সে মনে করুক না যে তারই জয় হয়েছে। এই ছেলেমানুষি অহংকার নিয়ে সে যত খুশি তৃপ্তি পাক না। কী তাতে আসে যায় অঘোরের !

সে তো নিজের মতলব হাসিল করে নিচ্ছে তাকে দিয়েই।

দারুণ অস্থির মধ্যে তার সময় কাটে। নিজেকে তার আজ অসহায় মনে হয় বিশেষভাবে এই জন্য যে সে এমন এক জায়গায় এসে দাঁড়িয়েছে, নিজের বিচার-বিবেচনার উপর নির্ভর করে এতদূর এগিয়েছে যে এখন নিরপেক্ষভাবে সমস্ত বিষয়টা তলিয়ে দেখা তার পক্ষেও সম্ভব নয়, অন্যের বিচারবুদ্ধির উপর নির্ভর করাও সম্ভব নয়।

কাগজের আগিসে যাওয়ার আগে সে নন্দাদের বাড়ি যায়। বেলা তখন তিনটে বাজে, নন্দা অবেলায় খেয়ে নিশ্চিন্তমনে আরাম করে ঘুম দিচ্ছিল। চোখে মুখে জল দিয়ে উঠে এসে সুনীরের সামনে আঁচলের আড়ালে মস্ত একটা হাই তুলে সে লজ্জা পেয়ে হাসে।

সুনীল রীতিমতো ঈর্ষা বোধ করে।

কে জানে নন্দাও তার সঙ্গে কী খেলা খেলছে। উদারতার ভান কবে কাগজের মালিকানার অংশের সঙ্গে কাগজটার সমস্ত দায় তার ঘাড়ে চাপিয়ে দিয়ে এমন নিশ্চিন্ত হয়ে ঘুমোবার ব্যবস্থা করে নিয়েছে।

নন্দা বলে, আপনার মুখ যে শুকনো দেখাচ্ছে ? শরীর ভালো নেই ? বড়ো বেশি খাটছেন আপনি।

সুনীল বলে, খাটলে শরীর খারাপ হয় ? যে বোঝা চাপিয়েছেন, ভাবনায় চিন্তায় ঘুম হয় না।

নন্দা নালিশের সুরে বলে, আমায় দোষ দেবেন না, আমি হালকা বোঝাই চাপিয়েছিলাম। সে রকম রাখলে ঠুকঠাক কবে জোড়াতালি দিয়ে অন্যায়সে কাগজটা চালিয়ে নিয়ে যেতে পারতেন। বোঝা ভারী করেছেন আপনি নিজে। কাগজের ভার বাড়াবেন, কাগজ নিয়ে চারিদিকে হইচই লাগিয়ে দেবেন, হাঙ্গামা পোয়াবেন না ?

সুনীল একটু ভাবে।

খানিকটা বাড়াবাড়ি করছি, না ?

মোটাই না। কাগজটা যদি সহজ হত তবে আপনার মতো লোকের দরকার পড়ত নাকি ! তবে টাকার জন্য যে ব্যবস্থা করছেন সেটা বাড়াবাড়ি হচ্ছে কি না বলতে পারব না। আমরা সবাই থ বনে গেছি।

কেন ? বিয়ে করাটা এমন কী অদ্ভুত ব্যাপার ?

টাকার জন্য আপনার এভাবে বিয়ে করাটা অদ্ভুত ব্যাপার বইকী। তাও অঘোরবাবুর মেয়েকে বিয়ে করছেন। কাগজের সকলের মুখে আর কোনো কথাই নেই। মত হয়েছে দুরকম—আপনার পক্ষে আর বিপক্ষে।

সুনীল কৌতূহলের সঙ্গে জিজ্ঞাসা করে, কী বলছে দুপক্ষ ?

নন্দা বলে, শিশিররা কয়েকজন বলছে এভাবে টাকা সংগ্রহ করা উচিত নয়, এতে নৈতিক জোর কমে যায়। আপনি খাঁটি থাকলেও কেবল এভাবে টাকা জোগাড় করার জন্যই শেষ পর্যন্ত ফলটা খারাপ দাঁড়াবে। এর চেয়ে পাবলিকের কাছে চাঁদা চেয়ে সাহায্য চেয়ে টাকা তোলা ভালো ছিল, জনসাধারণের উপর নির্ভর করাই সব সময় উচিত।

অন্যপক্ষ কী বলছে ?

বিভূতিবাবু নরেশ এরা আপনার প্রশংসা করার ভাষা খুঁজে পাচ্ছে না।

কাগজের এই সংকটের সময় কাগজটার জন্য আপনি যে স্বার্থত্যাগ করছেন তার নাকি তুলনা হয় না।

সুনীল এবার হাসে।

আপনি নিজে কী ভাবছেন ?

ওই যে বললাম ঠিক বুঝে উঠতে পারছি না। আমি অবশ্য আপনার কোনো কাজেই বাধা দেব না, আগেই সেটা আপনাকে বলে দিয়েছি। এটুকু স্বাধীনতা না দিলে দায়িত্ব দেওয়ার কোনো মানে হয় না। যেভাবেই জোগাড় করুন, কাগজটার পিছনে শেষ পর্যন্ত আপনিই টাকা ঢালবেন বেশি। আমার মন কিন্তু খুঁতখুঁত করছে, তা জানিয়ে রাখি। দাদা অবশ্য আপনার পক্ষ নিয়ে খুব লাফাচ্ছে।

এস্যাতবাবু বাড়ি নেই ?

নাইতে গেছে।

তার স্বপক্ষে প্রদ্যোতের কী বলার আছে শুনবার জন্য সুনীল অপেক্ষা করে। নিখিলের ষড়যন্ত্র করে ছাপিয়ে দেওয়া সম্পাদকীয় প্রত্যাহার করলে কাগজের প্রেস্টিজ নষ্ট হবে বলে সে যে জেলে গিয়েছিল, তারপর থেকে তার বিচার-বিবেচনাকে সুনীল বিশেষ মূল্য দেয়।

মান করে এসে প্রদ্যোত খুশির সঙ্গে বলে, এই যে সুনীলবাবু ! এ দেশে অনেক রকম ত্যাগের কম্পিটিশন চলে আসছে বহুকাল ধরে, আপনি নতুন রকম ত্যাগের নমুনা দেখালেন।

ত্যাগ কী রকম ? বিয়ে করেছে, টাকা পাচ্ছি—

বিয়ে না করাটা আর এভাবে টাকা না পাওয়াটা অনেক দামি ছিল আপনার কাছে। কাজেই এটা ত্যাগ বইকী !

নন্দাদের বাড়ি থেকে বেরিয়ে রাস্তায় দাঁড়িয়ে সুনীল কিছুক্ষণ ইতস্তত করে। তারপর কাগজের আপিসে যাওয়ার বদলে রওনা দেয় অঘোরের আপিসের দিকে।

ধীরে ধীরে একটা কথা স্পষ্ট হয়ে উঠছিল তার মনে। তার অস্বস্তি বোধ করার কারণ হল অঘোর। বিভাকে সামনে রেখে অঘোর মতলব হাসিল করছে এই খাপছাড়া চিন্তা সে বাতিল করে দিয়েছে।

তাকে জামাই করার পর অঘোর কোনো মতলব আঁটবে কি না এ বিষয়ে নিশ্চিত হতে না পারলে তার অস্বস্তি যাবে না।

আগে যে ঘরে সে নিজে কাজ করত সেখানে ঢুকতেই চেনা কর্মচারীদের মধ্যে একটা শোরগোল পড়ে যায়। নানাশ্রম আর মন্তব্যে সুনীলকে যেন ঝাঁঝেরা করে ফেলার চেষ্টা চলে।

এ আপিস থেকে বেরিয়ে গিয়ে সে একটা খবরের কাগজ চালিয়ে চারদিকে হইচই পড়িয়ে দিয়েছে, তারা কী ধারণাও করতে পেরেছিল, সুনীল একদিন এই লাইন ধরবে !

সনৎ বলে, কার মধ্যে যে কী প্রতিভা গোপন থাকে জানা যায় না। আপনি তার প্রমাণ দেখালেন।

সুধীর জিজ্ঞাসা করে, এডিটোরিয়ালগুলি কি আপনিই লেখেন ? তর্ক করার সময় আপনি যেভাবে যুক্তি দিতেন কাগজের লেখায় তেমনভাবে যুক্তি সাজানো দেখতে পাই কিনা !

ভূপেন বলে, খুব জোরালো লেখা হচ্ছে। শত্রু বাড়চ্ছেন খেয়াল রাখবেন কিন্তু।

বুড়ো নরেশ বলে, শত্রু তো বাড়বেই। খাঁটি কথা বললে খাঁটি কথা লিখলে মতলববাজদের স্বার্থে যা লাগে। শত্রু যত বাড়ছে তার চেয়ে বন্ধু ঢের বাড়ছে এটাও ভুলবেন না যেন।

অঘোরের মেয়েকে সে যে বিয়ে করবে এ কথাটা কেউ উল্লেখও করে না। সুনীল টের পায়, এরা তাকে লজ্জা দিতে চায় না তাই কথাটা সকলে চেপে যাচ্ছে।

অঘোরের ঘরে ঢুকতে সে হাসিমুখে সানন্দে তাকে অভ্যর্থনা জানায়।

তার সামনে টেবিলে খান চারেক ইংরাজি বাংলা দৈনিক কাগজ পড়েছিল, সুনীলদের কাগজও তার মধ্যে ছিল। কাগজটা তুলে নিয়ে অঘোর বলে, তোমাদের এডিটোরিয়ালটা পড়ছিলাম। তোমাদের লেখার আসল কায়দাটা বেশ ধরা যায়—তোমরা কোনোরকম কায়দা করার চেষ্টা কর না। বিভা তাই বলছিল—কায়দা না করার কায়দা দিয়ে তোমরা পাবলিককে বশ কবছ।

তাদের সেদিনকার কাগজে প্রধান সম্পাদকীয় লেখা হয়েছিল চোরাবাজারকে আক্রমণ করে। কিন্তু কড়া লেখাটা পড়ে যেন খুশিই হয়েছে অঘোর। ভাবী জামাইয়েব দিকে সে স্মিতমুখে চেয়ে থাকে।

যেন জানাতে চায় যে তুমি যা কর তাতেই আমার সমর্থন আছে।

সুনীল দেখা করতে আসাব কারণ হিসাবে বলে, আমি আপনাব কাছে এসেছিলাম নবীনব ব্যাপারটা জানতে।

অঘোর বলে, নবীন ? নবীন ভালো কাজ করছে। ওব মাইনে বাড়িয়ে দিয়েছি।

সুনীল বলে, আপনি জানেন তো আমার বোনের সঙ্গে ওর বিয়ের কথা হয়েছে ? ওব সম্বন্ধে আপনার ধারণা কী রকম ?

ছেলে খুব বুদ্ধিমান তবে একটু খেয়ালি। কাজ করলে বেশ মন দিয়েই করে কিন্তু দায়িত্ব দিয়ে নিশ্চিত থাকা যায় না। বয়সের সঙ্গে এটা কমে যাবে আশা করছি। বিভা ওকে খুব স্নেহ করে। মেয়ের খাতিরে ওর খামখেয়ালি খানিকটা সয়ে যেতে হয়, উপায় কী।

মাসিকটাকে সাপ্তাহিক করে চালাবে শুনছিলাম ? আপনি নাকি ফাইন্যান্স করবেন ?

হ্যাঁ। একটা বাংলা সাপ্তাহিক কাগজ চালিয়ে দেখা যাক কিছুদিন ! তারপর দৈনিকেব কথা ভাবা যাবে। তোমরা তো তোমাদের কাগজে মাথা গলাতে দিলে না।

সুনীল বিশেষ মনোযোগের সঙ্গে অঘোরের মুখের ভাব লক্ষ করে। তাদের খবরের কাগজটি সম্পর্কে অঘোর যে বর্তমানে উদাসীন তাতে সন্দেহ নেই। কাগজ সম্পর্কে হাল ছেড়ে দিয়ে এখন সুনীলকে জামাই হিসাবে বাগাতে পারার আনন্দে নয়, মেয়ের বিয়ে হবে এই আনন্দেই সে মশগুল।

কিন্তু সম্পর্ককে পরে কাজে লাগাবার কথা সে কি কিছুই ভাবেন ?

সুনীল বলে, আপনাকে আগেই জানিয়েছি আমি কাগজটার অংশীদারমাত্র, এই অংশও আমাকে দেওয়া হয়েছে এই শর্তে যে আমি অন্য কারও কাছে বিক্রি করতে পারব না।

অঘোর বলে, থাক থাক, সে জন্য কী ! তুমি আছ বলেই একটা দৈনিক চালাবার শখ হয়েছিল। আমি হলাম কী জানো, ব্যবসায়ী মানুষ, আমরা সব সময় চেষ্টা করব রোপ বুঝে কোপ বসাতে। কাগজটার উন্নতি তুমি করবেই জানতাম, তাই ভাগ বসাতে আগ্রহ হয়েছিল। তুমি এখন আমার নিজের লোক হয়ে যাচ্ছ, কাগজটার লাভ তোমার থাকা আমার থাকা সমান কথা।

খবরের কাগজে লাভ অবশ্য অনেকটা অনিশ্চিত থাকে। কখনও ওঠে, কখনও পড়ে যায়।

সে তো বটেই। ব্যাবসামাত্রেরি ঠাণ্ডা আছে।

আরও কিছুক্ষণ অঘোরের সঙ্গে আলাপ করার পর সুনীল বিদায় নেয়। এ বিষয়ে তার সন্দেহ থাকে না যে কাগজ সম্পর্কে অঘোরের মনে এখন পর্যন্ত কোনো সুনির্দিষ্ট চিন্তা বা পরিকল্পনা নেই, ও চিন্তা সে ভবিষ্যতের জন্য তুলে রেখেছে। অনির্দিষ্ট আশা হয়তো তার মনে আছে, কিন্তু কোনো মতলব নেই।

এটা টের পেয়ে সুনীল নিশ্চিত হতে পারে না। কারণ অঘোর কাগজটা সম্পর্কে স্পষ্ট কিছু যে ভেবে রাখেনি, তার মানেনি দাঁড়ায় এই যে তাকে জামাই করার পথে ভবিষ্যতে কাগজটা সম্পর্কেও সুবিধা করে নিতে পারবে, এ বিষয়ে অঘোর অনেকটা নিশ্চিত হতে পেরেছে।

অঘোরের আপিস থেকে সুনীল বিভার কাছে যায়।

বলে, তোমায় স্পষ্টভাবে একটা কথা জিজ্ঞেস করতে এলাম। তোমায় বিয়ে করা ছাড়া আর কোনো শর্ত থাকবে না তো আমার টাকা পাওয়ার ?

বিভা আশ্চর্য হয়ে বলে, আবার কীসের শর্ত ?

তোমার বাবা যদি কোনো গোলমাল করেন ?

সুনীল : গোলমাল করলেই হল ! বাবা তো আর তোমায় টাকা দেবে না, টাকা দেব আমি। বলো না এখনি চেক লিখে দিচ্ছি।

এ টাকাও তোমার বাবার, ভুলে যাচ্ছ ? চেক নিয়ে যদি তোমায় বিয়ে না করি ?

তোমার কী হয়েছে বলো তো ? এ সব আবোল-তাবোল কী বকছ ? না করলে করবে না বিয়ে। আমি কী মামলা করতে যাব তোমার নামে ? সুনীল চুপচাপ বসে খানিকক্ষণ সিগারেট টানে।

তোমার জনাই আমি একটা দুশ্চিন্তায় পড়ে গেছি। তোমার জীবনে আমি না অশান্তি নিয়ে আসি।

কেন ?

আমার পক্ষ নিয়ে বাবার সঙ্গে যদি তোমার লড়াই করতে হয় ? সম্পর্ক আর টাকার বিনিময়ে উনি যদি আমার কাছে কিছু বাগাবার চেষ্টা করেন, তাই নিয়ে ওর সঙ্গে যদি তোমার ঝগড়া হয় ? তুমি দোটানায় পড়ে কষ্ট পাবে।

বিভা দ্বিধামাত্র না করে বলে, না। কষ্ট পাব, দোটানায় পড়ব না। বাবা যদি অন্যায় করে তোমার কাছে কিছু বাগাতে চায়, বাবার সঙ্গে ঝগড়া করতে আমার দোটানার কষ্ট হবে না। অন্যায়ের বিরুদ্ধে দাঁড়িয়েছি বলে বুকে জোর পাব। দরকার হলে, বাপের দিক ছেড়ে মেয়েরা স্বামীর দিকেই ঝোঁকে—এটাই তো চিরকালের নিয়ম। তবে আমার মনে হয়, ও রকম কোনো আশঙ্কা করার কারণ তোমার নেই। নিজের বাপের নিন্দে করতে নেই কিন্তু বাবার দোষের দিকগুলি আমি জানি না, ভেব না। দোষ যতই থাক, মেয়ের জীবনে অশান্তি ঘটবে এমন কিছু বাবা করতে পারবে না।

বিভার জোরালো আত্মবিশ্বাস সত্যি বুকে বল এনে দেয় সুনীলের। অনেকটা হালকা মন নিয়ে সে কাগজের আপিসে যায়।

